

SALMO CA'

Salmo 1

- ¹ Ba neza zrente naca na chee bēnea'
quebe dxezi'e da dxuluzéajni'i benne' wēn da calela ca' le',
ne quebe dxune' tuze benne' dul-la ca',
ne quebe dxune' tu zren benne' ca' dxelún le' chee Dios.
- ² Zue' xel-la' dxebé lawe' da dxuzúe' dizra'
da nadxixruj bea Xránadxu,
ne ca naca da nadxixruj bea na,
te zra ne chizrela dxelaba lazre' na.
- ³ Benne' nigá naque' ca tu xaga zua na dxu'a xegu nisa,
da dxunna na da zixre chee na lu beu' cheéqueze na,
ne xrlegue na quebe dxase na.
Ca naca da dxun benne' nigá, dxēpe ban na.
- ⁴ Quegá caní zaj naca benne' wēn da calela ca'.
Zaj naque' ca tu xizre laga' da dxua be' bdunu'.
- ⁵ Quebe xelexegá'ana chawe' benne' wēn da calela ca'
gate guchi'a Dios chee',
ne quebe xelú'u benne' dul-la ca' naga zaj nazraga
benne' xrlátaje ca'.
- ⁶ Dxezaca ba lazre' Dios ca da dxelún benne' xrlátaje ca'.
Da dxelún benne' wēn da calela ca'
che na le' naga xelebía xi'e.

Salmo 2

- ¹ ¿Bizr chee na' dxeledábaga benne' xēzr la xu ca' neda'?
¿Bizr chee na' dxululaba lázrequeze bēneache
da guzúa na neda' chalá'ala?
- ² Dxeledábagaqueze benne' wenná bea ca',
ne dxelún tuze dizra' benne' ca' dxelenná bea ca xelune'
chee Xránadxu Dios, ne chee Bēnea' gucá'a Le'.

- 3 Dxelenné': "Guselá cuínadxu lu xel-la' dxenná bea chee',
ne guzúadxu chalá'ala da zaj nadxixruj bé'ene' dxi'u."
- 4 Naga dxe' Xránadxu xabáa dxuzrizre'.
Quebe dxezí' lené' chee da dxelegú'u lazré' xelune'.
- 5 Lu xel-la' dxezrá'a chee' dxedil-le' le',
ne lu xel-la' snia chee' dxuchebe' le'.
- 6 Dxenné': "Lu xi'a lá'azxa chia', xi'a Sión
ba nuzúa' benne' gaque' Wenná Bea waláz chia' neda'."
- 7 Dxenná Wenná Bea na': "Guzenda' le'e da
guzre Xránadxu neda'."
Guzre' neda': "Lue' nacu' Zri'ina'. Ná'aqueze naca' Xrau'.
- 8 Gunabe neda', na' gunna' Lue' xúgute cue' xezr la xu ca',
na' gaca chiu' duté ca naca xezr la xu.
- 9 Guzíxenu' bènneache xezr la xu ca' nen vara xia,
ne ca tu dxe'e xu guzuzru' le'."
- 10 Na'a, le'e, wenná bea, le xene da nigá dxuzéajni'ida' le'e.
Le gusede da nigá dxusízreda' le'e,
benne' dxelenná bea lu xezr la xu.
- 11 Le gun zrin chee Xránadxu Dios, duté xel-la' dxezrebe
cheele.
Nen xel-la' dxezrize cheele, le be lau Le'.
- 12 Le gapa ba lá'ana Zrí'ine' chee quebe zre'e,
checa' cuía xile la neza cheele, lawe' da la zra'ate Le'.
Da ba neza zrente naca na chee xúgute benne'
dxuluxrén lazre' Le'.

Salmo 3

- 1 Xrana' Dios, ba naxánle'e benne' dxeledábage' neda'.
Benne' zante dxeledíl-lalene' neda'.
- 2 Benne' zante dxelenné' chia': "Quebe guselá Dios le'."
- 3 Lue', Xrana' Dios, dxucú'uju' neda'.
Nacu' Benne' dxebélena', ne Benne' dxuzé chawe' neda'.
- 4 Gudxezre xa'a, bláwizra' Xrana' Dios,
na' Le' bechebe' chia' naga zue' lu xi'a lá'azxa chee'.
- 5 Guta', ne gusia',
na' bebana' lawe' da nuxru Xrana' neda'.
- 6 Quebe zreba' gaxúa gaxúa bènneache,
benne' zaj naxéchaje' neda'.

- ⁷ Guzé, Xrana' Dios.
 Bselá neda', Dios chia'.
 Ben we' xraga benne' ca' dxeledíl-lalene' neda',
 ne guzuzruj lazxa benne' xriwe' ca'.
⁸ Xel-la' weselá za' lu na'u, Xrana' Dios.
 Ben da chawe' chee' bènneache chiu'.

Salmo 4

- ¹ Bechebe chia' gate dxuláwizra' Lue', Dios.
 Nacu' Benne' dxuchi'e ca da dxuna'.
 Gate guzúa' lu da stebe, Lue' btipu' lazra'.
 Bexache lazre' neda', ne bene ca da dxuchálajlena' Lue'.
² Le'e, bènneache, ¿ájatescha' gucá'ana dítjale neda'?
 ¿Ájatescha' zri'ile da quebe zaca, ne chéajlele da wen lazre'?
³ Le xexúnbea ba gucá'a Xránadxu
 nu benne' dxape' Le' ba lá'ana.
 Xrana' Dios xenne' gate dxuláwizra' Le'.
⁴ Le zrebe lau Dios, ne quebe gunle dul-la.
 Le gulaba lazre' chee' naga dxásale, ne le sua zrize.
⁵ Le gute lau Le' béadu ca' lu da naca du lazre',
 ne le guxrén lázre' Xránadxu Dios.
⁶ Benne' zante dxelenné': "¿Nuzra gun gá'anatu' chawe'?"
 Dute xel-la' zri'i lazre' chiu' bxue netu', Xran.
⁷ Lue' bzu' xel-la' dxebé lu xichaj lázrdawa',
 da naca na zrendxa ca da zaj napa benne' zaj nápalē'e zrua',
 ne xrise uva wal-la.
⁸ Dute xel-la' dxebeza zri lazre' gata', ne gasia',
 lawe' da dxunu' Lue', Xran, zua' zri'a chawe'.

Salmo 5

- ¹ Bze naga dizra' chia', Xran.
 Bde lazre' ca dxebezre lazra'.
² Bene ca guchálajlena' Lue', Wenná Bea chia', ne Dios chia',
 q lawe' da guláwizraja' Lue', Dios.
³ Xran, che zílala xennu' chi'a.
 Che zílala xídaqueza' lau Lue', ne wabeza lazra' Lue'.
⁴ Nacu' Dios quebe dxezaca ba lazru' da calela.
 Benne' wen da calela quebe súaqueze' naga zu' Lue'.

- 5 Quebe dxu'u lataj xelezrín benne' wen da calela lau'.
Dxecuídenu' xúgute benne' dxelune' da zrinnaj.
- 6 Guzría xí'quezu' benne' ca' dxelezí xē'ē.
Guzú' chalá'ala benne' wete benne', ne benne' guzrí xē'.
- 7 Neda' waca chu'a lizru' lawe' da nazr'íle'ēnu' neda'.
Güe lál'ana' Lue' lu xudau' lál'azxa chiu' dute xel-la'
dxezrebe.
- 8 Bsi neda' chee guna' da xrlátaje chiu', Xran,
lawe' da zrále'ē benne' dxeledábague' neda'.
Gulú'u neda' neza chawe' chiu'.
- 9 Benne' caní quebe dxelenné' da li.
Lu xichaj lázrdawe' xu'u da calela.
Xēdxu lbe'ē zaj naca na ca tu ba chee benne' gate da
naxalaj na.
Zaj nupé'ē dizra' chawe' chee' da zaj naca na da wen lazre'.
- 10 Bde benne' ca' lu da ba xa', Xrana' Dios.
Ben cheajlecházíe' cáteze zaj naca xrtízraqueze'.
Lawe' da naxánle'ē da calela da dxelune'
ne lawe' da guledábague' Lue', bebéaje' chalá'ala.
- 11 Welebéle'ē benne' ca' dxuluxrén lazre' Lue'.
Welebézre xá'aqueze' dute xel-la' dxelebé
lawe' da dxucú'uju' le'.
Lau Lue' welebéle'ē benne' ca' zaj nazr'íine' Lue'.
- 12 Gúnquezu' da chawe' chee benne' xrlátaje, Xran.
Gucu'uju' bēnea' lawe' da dxezaca ba lázrele'nu' le'.

Salmo 6

- 1 Lue', Xran, quebe til-lu' neda' lu xel-la' snia chiu',
ne quebe gudéu' neda' ba xa' lu xel-la' dxezrá'a chiu'.
- 2 Bexache lazre' neda', Xran, lawe' da quebe chawe' zua'.
Bexún neda', Xran, lawe' da dxedéa' xel-la' zi'.
- 3 Stébele'ē zua xichaj lázrdawa'.
Xran, ¿bátala gácalēnu' neda'?
- 4 Gudá, Xran, bselá bēne' du xu'a.
Bselá neda' dute xel-la' zri'i lazre' chiu'.
- 5 Naga zaj zra' benne' gate ca', quebe nu dxeajsá lazre' Lue'.
Lu lataj ba xa' ¿núzraqueze güe lál'ana Lue'?
- 6 Ba dxexedú lazra' lawe' da dxebezre lazra'.
Tu zre' tu zre' dxebísane ga dxásia' nisa da dxebezra'.

- Dxusebisa' xrcugua' nisa da dxebezra'.
 7 Ba dxane xiaj lawa' xel-la' dxebezre.
 Ba bebízrqueze nisa xuzru xiaj lawa' lawe' da zrálē'e
 benne' dxulusaca zi'e neda'.
 8 Le cuasa naga zua', xúgutele dxunle da zrinnaj
 lawe' da ba ben Dios dxebézrele'a.
 9 Xrana' Dios ba benne' da dxata' xueda' Le'.
 Ba guzí' Xrana' Dios da dxuchálajlena' Le'.
 10 Dxelexedué'e, ne zaj zua lu da stébele'e xúgute
 benne' dxeledábague' neda'.
 Chadite xelxebigue' naga zua', ne xelxedu'é'ene'.

Salmo 7

- 1 Xrana' Dios, dxuxrén lazra' Lue'.
 Gúcale neda' ne bselá neda' lu na' benne' ca' dxulusaca zi'e
 neda',
 2 chee quebe xelexe' neda' ca dxun bezre xixre',
 na' xuluzúzruje' neda' naga quebe nu chilá' nu guselá neda'.
 3 Xrana' Dios, che bēna' neda' caní:
 Che bi da zrinnaj ben ni'a na'a.
 4 Che bi da calela bēna' chee benne' zue' chawe' nen neda'.
 (Bselá' bēnea' dxedábague' neda' lácala quebe bi nuna'
 chee'.)
 5 Che caní bēna',
 be lataj benne' dxedábague' neda' gau zi' ne xezrúnene' neda'.
 Be lataj bēnea' guchuchu guléaje' neda' lu xu,
 ne xusunitie' xel-la' ba lá'ana chia'.
 6 Xran, dutē xel-la' dxezrá'a chiu', guzē.
 Bexechaj benne' ca' dxulusaca zi'e neda' lu xel-la' dxelezrá'a
 chee'.
 Gusel-la da gácale na neda' gate guchi'u da dxaca chia'
 ca da gunná be'u.
 7 Xúgute benne' zaj zre'e xezr la xu xelezrague' lau'.
 Gunná be'e benne' ca' dutē xel-la' szren chiu'.
 8 Lue', Xran, guchi'u chee benne' xúgute xezre.
 Bchi'a ca da nuna' lu da naca xrlátaje,
 ne lu da naca du lazre' chia'.
 9 Ben cheajsē naze da zrinnaj da dxelún benne' wen da calela
 ca',

- san bzua chawe' benne' xrlátaje,
lawe' da nacu' xrlátaje, Dios, ne dxenná'u da xu'u
xichaj lázrdau bénneache.
- 10 Diósqueze dxucu'ujē' neda'.
Dxuselē' benne' zaj naque' du lazre'.
- 11 Xlátaje dxuchi'a Dios chee da dxelún bénneache.
Tu dxezrá'azqueze Dios da dxelún benne' wen da zrinnaj
ca'.
- 12 Che quebe xelexíaje lazre' Dios gulé' xia chee'.
Ba nuzúa cuásate' xaga nalá xéche'ze chee'.
- 13 Ba naxrúa cuásate' xia chee' ca' chee wedil-la.
Ba nuzúa cuásate' xaga nalá xéche'ze da dxelala.
- 14 Benne' wen da zrinnaj dxugú'u lazre' ca da calela gunē'.
Xu'u lázrdawe' da zrinnaj da gunē', na' dxebéajé' da wen
lazre'.
- 15 Ba gudene' tu xedxu situj naga cheajlechaze bénneache,
na' lézqueze' xeajházie' lu xedxu na'.
- 16 Da zrinnaj da bene' dxebage na léqueze',
na' da bsaque' bénneache xezrizre na xíchaje'.
- 17 Güe lánanaqueza' Xrana' Dios ca da xrlátaje da dxune',
ne gúl-laqueza' chee La Xrana' Dios, Bénnea' naque' szrente'.

Salmo 8

- 1 Lue' Dios, Xránantu', zrente naca Lau' du gabí'i xezr la xu.
Zrendxa naca xel-la' szren chiu' ca xabáa.
- 2 Bidu ca', ne bidu dxe'ene ca' dxelúl-labe' ca naca na.
Zúaquezu' lataj chawe' naga quebe xelezrín benne' ca'
dxeledábage' lue'.
Dxuzúa zriu' benne' dxeledábage' lue',
ne benne' dxelecuídenē' Lue'.
- 3 Gate dxenná'a xabáa da nunu' Lue',
ne beu', ne belaj ca', da ca' nuzú' cha chee na,
- 4 na' dxuchēba': “¿Ájazra naca bénneache, dxulaba lazru'
chee le'?”
¿Ájazra naca bénneache, dxe'u gunne xue le'?”
- 5 Benu' le' látezdxa szren ca nacu' Lué'queze,
ne bzu' chee' xel-la' szren, ne xel-la' ba lánana.
- 6 Benu' dxenná bé'ene' xúgute da ca' nunu'.
Xúgute na bdeu' lu ne'e,

- 7 zřila' ca', ne bezre ca',
 ne xúgute be xixre' ca',
 8 be zaj zua xřila, ne bela ca',
 ne xúgute da zaj zua na lu nísadau'.
 9 Xránantu', Dios,
 szrentę naca Lau' du gabí'i xęzr la xu.

Salmo 9

- 1 Xran, dute lázrdawa' güe lá'ana' Lue'.
 Guzenda' bėnneache ca zaj naca da zrente da bėnu'.
 2 Wabėquezda', ne gúl-laqueza' ca naca chiu'.
 Gul-la' cheę lau' Lue', nacu' Dios zrente.
 3 Buluzrunnuj benne' dxeledábague' neda'.
 Xeajlechazie', ne belexenitie' lau Lue'
 4 lawe' da nucá'ana chawu' da xrlátaje da dxuna'.
 Dxe'u lataj blau chiu', ne lu da xrlátaje dxuchi'u.
 5 Gudil-lu' benne' xęzr la xu ca',
 ne bzria xi'u benne' wen da caleła ca'.
 Bsulul' la benne' ca' chadía chacanna.
 6 Ba gulebía xi' benne' dxeledábague' neda'.
 Chadía chacanna zaj nazrinnaj lataj cheę benne' ca',
 ne xęzre cheę' ca', da ca' bchínnuju' Lue'.
 Netú benne' cheajsá lazre' benne' ca'.
 7 Xránadxu Dios súatequeęe' chadía chacanna.
 Ba nucueęe' lataj blau cheę' naga guchi'e cheę bėnneache.
 8 Lu da xrlátaje guchi'e cheę bėnneache dute xęzr la xu,
 ne cheę benne' xúgute xęzre ca' lu da naca li lazre'.
 9 Xránadxu Dios gaque' ca tu lataj ga xelezrá chawe' benne'
 xache',
 naga xelezré'e chawe' gate zrin zra cheę da zi' da xa'.
 10 Benne' ca' zaj núnbe'e Lue', Xran, xuluxrén lazre' Lue',
 lawe' da quebe bsan lazru' benne' ca' belexílaje' Lue'.
 11 Le gul-la cheę Xránadxu, Bėnnea' zue' xęzre Sión.
 Le guzén benne' xęzre ca' ca zaj naca da ca' nune',
 12 lawe' da dxeajsá lazre' cheę benne' ca',
 ne dxexebéaj lazre' cheę benne' wete benne'.

- Quebe gul-la lazre' ca da dxululáwizra benne' ba xache' ca'
Le'.
- 13 Bexache lazre' neda', Xran.
Gunná' da dxezaca' lu ni'a na' benne' ca' dxelecuídene'
neda'.
- Dxeca'u neda' lu na' xel-la' gute,
- 14 chee guzenda' bèneache da dxue lá'ana' Lue',
naga dxu'untu' xezre Sión,
ne chee beda' lawe' da bseláu' neda'.
- 15 Xeajlechaze benne' xezr la xu ca' lu xedxu da gulene'.
Xeajlechu'e lu xralaj da bulucueze'.
- 16 Xránadxu Dios blé'ene' ca da zaj naque' ne chee
da zi' da xa' da gudichaj be'e chee benne' ca' dxelune' da
calela.
Xeajchaze benne' wen da calela na' lu da nun ni'a ná'queze'.
- 17 Benne' wen da calela ca' xeledéqueze' lu lataj ba xa'.
Xúgute benne' ca' dxelal-la lazre' Xránadxu Dios.
- 18 Quegá chadía chacanna gal-la lazre' Dios benne' xache' ca',
ne quegá tu chi'ize xenite da dxelebeza lazre' le'.
- 19 Guxasa, Xrana' Dios.
Quebe gu'u lataj xelexegá'ana szrénqueze bèneache.
Xelexá' lau' benne' xezr la xu ca' chee guchi'u chee'.
- 20 Xran, ben xelezrebe benne' ca' Lue'.
Ben xelexúnbea benne' xezr la xu ca' zaj naque'
bèneacheze.

Salmo 10

- 1 ¿Bizr chee na' zu' zitu', Xran?
¿Bizr chee na' dxucache cuinu' gate dxeledé xel-la' zi'
bèneache chiu'?
- 2 Benne' wen da calela dxenáu zi' xuzre' benne' xache'
lu xel-la' dxucá'ana szren cuine',
na' xeajchaze benne' xache' na' lu da ba nucuéza bènea'.
- 3 Dxucá'ana szren cuine' ca naca da dxezá lazre'.
Nupé'e dizra' da dxenné' chee benne' dxucude',
na' dxucá'ana díraje' Xránadxu Dios.
- 4 Benne' wen da calela na' lu xel-la' dxucá'ana szren cuine'
quebe dxape' Dios ba lá'ana,

ne quebe dxéqueñe' che zua Dios.

⁵ Tu dxúnzqueze' da calela,

ne quebe dxéqueñe' guchi'u Lue' ca da dxune'.

Dxuzúe' chalá'ala xúgute benne' dxeledábague' le'.

⁶ Lu xichaj lázrdawe' dxenné': "Quebe bi seque' guzaga na neda'.

Cabata' bi gaca chia' da calela."

⁷ Tu dxennézqueze' dizra' schanni',

ne da wen lazre', ne ca naca da calela da gune'.

Dxeledxúaj dxu'e dizra' calela, ne dizra' xálaze.

⁸ Dxu'a xezre ca' dxucache cuine' chee quele' bèneache.

Bagácheze dxutie' benne' dxeledeze' na'.

Bagácheze dxenné'e chee bi gune' chee benne' xache' ca'.

⁹ Bagácheze dxebeze' ca dxun bezre xixre'.

Dxebeze' ga séquene' quel-le' benne' xache' ca'.

Dxel-le' benne' xache' lu xralaj chee', ne dxexu'e le'.

¹⁰ Dxine' xu bènea' gudel-le'.

Dxusaca zie' benne' zan nen ne'e wal-la.

¹¹ Lu xichaj lázrdawe' dxenné': "Nal-la lazre' Dios benne' caní.

Nucache lawe', ne quebe lé'ene' da dxuna'."

¹² Guxasa, Xrana' Dios, ne bze na'u.

Quebe gal-la lazru'u benne' xache' ca'.

¹³ ¿Ájazra chen' benne' ca' dxelune' da calela

dxuluzúe' Dios chalá'ala?

Lu xichaj lázrdawe' dxelenné': "Quebe xebéaj lazre' Dios."

¹⁴ Dios, Lue' blé'eqeznu' da nigá,

lawe' da dxenná'u benne' wen da calela,

ne da ca' dxune' quebe naca na xrlátaje,

na' xebéaj lázrequezu' bènea'.

Dxuluzúa cuina benne' xache' ca' lu na'u.

Lue' dxácalequezu' bi wezébedu ca'.

¹⁵ Dxugú' xel-la' wal-la chee benne' wen da calela.

Guleaj lálwela da calela da nune', da na' bene' lu da bagache'.

¹⁶ Chadía chacanna naca Xránadxu Wenná Bea cheedxu.

Lu x̄ezr la xu chee' ba gulebía xi' benne' dxelecuídene' Le'.

17 Bnézruju' ca da bululáwizra benne' dxexruj lázre'du ca'
Lue', Xran.

Lue' dxupa'u lázxdau bēnne'du ca' chee xuluzé nague'
xrtizru',

18 chee guchi'u chee bi wezébedu ca',
ne chee benne' dxeledé' xel-la' zi',
chee québedxa bi da calela xelún benne' ca'
dxeluné' da calela chee bēnne'du caní.

Salmo 11

1 Dxuxrén lazra' Xrana' Dios.

Ájazra chēn' dxi'u bēnne'du xu'a:

“Bzrunnuj, guxiáj lu xí'ala ca tu bxinne?”

2 Le na' xque, dxulucuéza benne' ca' dxeluné' da calela
xaga nalá xéche'ze.

Ba zaj naxrúe' xaga nalá xéche'ze chee' lu du chee na,
chee xelútie' bagácheze benne' xrlátaje ca'.

3 Chete ca' xelexinnaj da dxulusé chuchu da xrlátaje,
¿ájazra xelún benne' xrlátaje ca'?

4 Xránadxu Dios zúaqueze' lataj lá'azxa chee'.

Xabáaqueze zua lataj blau naga dxe' Dios.

Dxelenná' xanne xiaj lawe'.

Dxelé'ene' ca da dxelún bēnneache.

5 Xránadxu Dios dxudé' chawe' benne' xrlátaje ca' lu da
stebe.

Dxequídene' benne' ca' dxeluné' da calela,

ne benne' dxeluné' da zrinnaj.

6 Gudé' benne' ca' dxeluné' da calela lu da zi' da xa',

da zaj naca na xi', ne da dxuzézrele'e da dxala na ca xedxe,

ne tu be' lálē'e, da ca' sel-le' lawe' benne' ca'.

7 Caní guné' lawe' da naca xrlátaje Xránadxu Dios,

ne nazrí'ine' da naca na xrlátaje.

Benne' li lazre' ca' xeelé'ene' lawe'.

Salmo 12

1 Xrana' Dios, bselá bēnneache chiu' lawe' da québedxa

dxape' benne' xezica Lue' ba lá'ana.
Quebe nu chilá' benne' li lazre' ládujla bèneache ca'.

- ² Xúgute bèneache ca' dxelezí xe'e le sa' ljwezre'.
Lu da wen lazre' ba zaj nupé'e dizra' chee xelezí xe'e le'.
- ³ Xránadxu Dios guzría xi'e xúgute benne'
quebe dxuluchálaje' du lazre',
ne benne' ca' dxuluchálaje' da dxucá'ana szren cuine'.
- ⁴ Benne' ca' gulenné': "Ne chee dizra' cheentu'
zrué'entu' da chawe'.
Ca dxezá lázrentu' guchálajntu', ¿nuzra nna be'e netu',
xca'?"
- ⁵ Dxenná Xránadxu Dios: "Na'a xídaqueza' lawe' da
dxulusaca zi'e benne' xache' ca',
na' dxelebezre lazre' benne' baxache' ca'.
Guselá' benne' ca' dxelánene' da guna'."
- ⁶ Xrtizra' Xránadxu Dios zaj naca na du lazre'.
Zaj naca na ca xiaj plata da ba gudé na lu xi',
da ba gudé na lu xi' gazre lasa.
- ⁷ Xran, guxúequezu' Lue' bèneache chiu' ca'.
Chadía chacanna gucu'uju' le' lu na' benne' zaj zre'e
lu zra na'a zra.
- ⁸ Gáteteze na' dxaca da calela
gate dxulucá'ana szren bèneache da naca sban.

Salmo 13

- ¹ ¿Ájatequeze gal-la lazru' neda', Xran?
¿Gal-la lártequezu' neda'?
¿Ájatequeze quebe le'enu' da dxaca chia'?
- ² ¿Ájatequeze gun na ba xen guchaga lawa' da dxezaca'?
¿Ájatequeze gaca wi'ine lazra' te zra, ne chizrela?
¿Ájatequeze nna be'e benne' dxedábague' Lue' neda'?
- ³ Gunná' da dxaca chia', Xran, ne bechebe chia'.
Btipa lazra' chee quebe gatia',
- ⁴ ne chee quebe nna benne' dxedábague' neda':
"Ba betia' ni'a ne'e."
Benne' ca' dxeledábague' neda' xelebene'
che cheajcházia' lu da calela.

- 5 Neda' dxuxrén lazra' Lue' xexache lazru' neda'.
Dutē lázrdawa' dxebeda' lawe' da dxuseláu' neda'.
- 6 Gúl-laqueza' chee Xrana' Dios
lawe' da ba nune' chia' da xrlátaje.

Salmo 14

- 1 Benne' lázxdau zide' dxezá' lazre', dxenné': “Quebe zua
Dios.”
Benne' caní zaj nazrinnaj xichaj lázrdawe'.
Dxelunē' da sban ca'.
Quebe nu chilá' benne' dxunē' da xrlátaje.
- 2 Xránadxu Dios zue' xabáa dxenné'e bēnneache
chee lé'ene' che zua nu benne' dxéajni'ine',
bēnnea' dxape' ba lá'ana Dios.
- 3 Xúgute' zaj xu'e neza xuca'.
Xúgute' zaj nazrinnaj xichaj lázrdawe'.
Quebe nu chilá' benne' dxunē' da xrlátaje, netúgue'.
- 4 ¿Quebe dxeléajni'i benne' ca' dxelunē' da sban?
Dxulusunítie' bēnneache chia' ca dxuzuzruj tu benne'
xeta da dxawe',
ne quebe dxeléquebe'ene' zua Xrane' Dios.
- 5 Dutē xel-la' dxelezrebe dxelezrize benne' ca'
lawe' da dxácale Dios benne' xrlátaje ca'.
- 6 Belún le' chee da gulenná benne' xache' ca',
san benne' caní xelebeza lazre' Xránadxu Dios.
- 7 Xídatega Bēnnea' guselé' benne' Israel ca'.
Gate gun Xránadxu xelexezrín benne' chee' ca',
benne' ca' zaj nada'u zítu'la,
na' welebé zri'ine zre sua Jacob,
ne welebéle'equezne' benne' Israel ca'.

Salmo 15

- 1 Xran, ¿núzraqueze benne' sue' naga zu' Lue'?
¿Núzraqueze benne' sue' naga naca lá'azxa chiu'?
- 2 Waca bēnnea' naque' du lazre', ne dxunē' da xrlátaje,
bēnnea' zua da líqueze lu xichaj lázrdawe',

- ³ Bénnea' quebe dxenné' chee le sa' ljwezre',
 ne quebe bi da calela dxune' chee le sa' ljwezre',
 ne quebe dxu'e lataj nu benne' si tizre' le sa' ljwezre'.
- ⁴ Waca bénnea' quebe dxape' ba lá'ana
 nu benne' dxune' da sban.
 Dxape' ba lá'ana benne' ca' dxelape' ba lá'ana Xránadxu
 Dios,
 bénnea' quebe dxuché'e dizra' da ba gunné' lácala bi da'
 gunítie'.
- ⁵ Waca bénnea' dxusané' dumí chee' ne quebe dxenabe'
 xíchajen,
 ne quebe dxezí' lu ne'e dumí chee nnie' chee
 nu benne' quebe bi zria nabague'.
 Nu benne' dxune' caní cabata' cheajchazie' lu da calela.

Salmo 16

- ¹ Bxue neda', Dios, lawe' da dxuxrén lazra' Lue'.
- ² Lu xichaj lázrdawa' gucha' Xrana' Dios:
 “Lue' nacu' Xrana'.
 Quebe bi xetú da xrlátaje de chia' da quebe naca na chiu!”
- ³ Tuze benne' ca' zaj naque' chee Dios lu xezr la xu,
 ne benne' ca' zaj naque' du lazre' dxezaca ba lázrelena'.
- ⁴ Waxánqueze da dxelezaca benne' ca' dxelape' ba lá'ana
 tu dios quebe bi zaca.
 Quebe guna' le' tu zren gate dxuluzríe' zren lau dios na',
 ne quebe guchíneda' la dios na'.
- ⁵ Xránadxu Dios dxugawe' neda', ne naque' da ba neza chia'.
- Lue', Dios, nuxru' ca da naca chia'.
- ⁶ Ca da nuzú' chia' zaj naca na da dxezi'a ba neza,
 ne xrtante zaj naca da nunnu' chia'.
- ⁷ Tu gucá'ana szrénzqueza' Xránadxu Dios,
 Bénnea' dxusédene' neda'.
 Chizrela gate ne dxasia' dxuzéajni'ine' neda' lu xichaj
 lázrdawa'.
- ⁸ Xránadxu Dios nuxrén lazra' gusi'e neda'.
 Lawe' da zue' cuita', quebe bi seque' guchebe na neda'.

- 9 Chee le na' gubé lázrdawa', ne gubéle'equezda',
na' zra gacha' lu xedxu ba cueza lazra'
10 lawe' da quebe gucá'anu' bénne'du xu'a lu lataj ba xa',
ne quebe gu'u lataj guzru nu benne' nácaqueze' chiu'.
11 Gulé'enu' neda' da guna' chee gata' chia' xel-la' nabán.
Naga zu' Lue' wabéle'equezda',
na' cuitu' Lue' súatequeze da ba neza chia'.

Salmo 17

- 1 Bze naga chi'a, Xran.
Ben xanne' da dxuláwizra' Lue'.
Guzí' da dxenaba' Lue', naca' du lazra'.
2 Benna lataj xelá'a lau' chee guchi'u chia',
lawe' da dxelé'enu' xúgute cáteze zaj naca na.
3 Lue' dxenná' xánniu' xichaj lázrdawa'
ne dxelé'enu' neda' chizrela.
Gunná' xánniu' da dxuna', na' quebe bi da calela blé'enu'.
Ba nuna' quebe bi dizra' calela nnia'.
4 Dxuzúa' dizra' ca naca da dxennáu',
na' quebe dxuna' ca da dxelún benne' wen da zrinnaj ca'.
5 Bxue neda' lu neza chawe' chiu',
chee quebe cheajcházia' lu da calela.
6 Dxuláwizra' Lue', Dios, lawe' da dxennu' chi'a.
Bze naga chi'a, na' bene da dxennía'.
7 Ble'e ca dxexache lázrele'u bénneache.
Bselá benne' ca' dxuluxrén lazre' Lue' lu na' benne'
dxeledábague' le'.
8 Bxue neda' ca dxun benne' dxuxúe' xiaj lawe'.
Gudezre neda' ca dxun bedxuj dxézreba' zrí'ineba' zran
xrílaba'
9 chee quebe bi xelún chia' benne' ca' dxelune' da calela,
benne' dxeledábague' neda', ne dxelaca lazre' xelúti'e' neda'.
10 Quebe dxelexache lazre' le sa' ljwezre',
na' dute xel-la' dxulucá'ana szren cuine' dxuluchálaje'.
11 Gáteteze dxedá' dxeléchaje' neda'.
Dxelaca lazre' xeline' neda' xu.
12 Zaj naque' ca tu bezre xixre'dau' dxaca lázreba' bi gáguba'.
Zaj naque' ca tu bezre xixre',
ba nucache cuínaba' chee quél-laba' béadu ca'.

- 13 Gudá, Xran, gudábaga' benne' ca' dxelune' da caleḷa,
na' bchiche' lu xu.
Bselá neda' lu na' benne' ca' dxelune' da caleḷa,
guchínenu' xia chiu'.
- 14 Bselá neda' lu na' benne' ca' nen ni'a ná'quezu', Xran.
Bselá neda' lu na' bēnneache, benne' ca' zaj dxēḷe gunne
xue
cheḷ xezr la xu nigaze,
benne' ca' dxeláguqueze' da zácaleḷe chiu'.
Da nigáqueze dxulugawe' zrí'ine' ca',
ne dxexegá'anaqueze da dxelágu zri'ine zre sue'.
- 15 Le'eda' neda' lau Lue' lawe' da naca' xrlátaje.
Xezaca ba lazra' gaca' ca nácaquezu' Lue' gate xebana'.

Salmo 18

- 1 Nazrí'ida' Lue', Xran.
Lue' dxuzé chuchu' neda'.
- 2 Lue', Xran, nacu' ca tu xiaj naga zḷ chúchua',
ne ca tu xu'u zren naga xu'u chawa', na' nacu' weselá chia'.
Dios chia', Lue' dxuzé chuchu' neda', na' guxrén lazra' Lue'.
Dxucu'uju' neda', ne dxuseláu' neda', ne dxucache chawu'
neda'.
- 3 Wannéqueza' Xránadxu Dios,
Bēnnea' naca cheḷ gūe lál'anaxu Le'.
Le' guselé' neda' lu na' benne' ca' dxeledábague' neda'.
- 4 Guzúa' lu da stēbe cheḷ xel-la' gute,
na' guca da caleḷa ca tu xḷgu nisa da bchebe na neda'.
- 5 Guzúa' lu da stēbe chu'a lataj ba xa'
lawe' da zua' lu da stēbe cheḷ xel-la' gute.
- 6 Lu da zi' da xa' bláwizra' Xrana' Dios, ne gunnéqueza' Dios
chia'.
Le' benne' chi'a naga zue' lataj lál'azxa cheḷ,
ne bze nague' da bchálaja' lawe'.
- 7 Nadxa guzrú' lu xezr la xu nigá.
Gulezrize lane xi'a ca'.
Gulezrízeleḷe na lawe' da bzra'a Le'.
- 8 Bdxuaj zren cheḷ xi' lu zrine',
ne bdxuaj xi' lu dxu'e da bzezxe na da de lawe',
na' xi' na' gudel-la na bau ca'.

- 9 Bzéxruje' da zria zran xabáa, na' bétaje',
 na' guzúa da chul-la zran ni'e.
 10 Gudée' lu be' zrie' tu da nazí le na querubín.
 Chadí gudée' lu be' bdunu'.
 11 Gúcue' da chul-la, da bcache na Le',
 da na' naca na beuj bza da xuzru na nisa.
 12 Lu da dxácatite legala chee' da xu'u lu beuj bza,
 na' beledxúaj bau dxelala, ne xiaj bezxe'.
 13 Zran xabáa gunné guziu' chee chi'i Xránadxu,
 na' ben chi'i Dios szrente ládujla bau dxelala ca',
 ne xiaj bezxe' na'.
 14 Bsané' xaga nalá xéche'ze chee' ca',
 na' beše dínnaje' benne' ca' dxeledábague' neda'.
 Bsané' xesa guziu' ca', ne bzria xi'e benne' ca'.
 15 Nadxa belelá' da zaj de lu situj chee nísadau',
 ne ble'e lau lane xezr la xu da zua na zran nísadau',
 gate na' gudil-lu' benne' ca' dxeledábague' neda', Xran,
 ne lu xel-la' dxezrá'a chiu' bzagu' benne' ca'.
 16 Bétaje' lu da sibe, ne bequé'e neda'.
 Bebéaje' neda' lu da naca ca tu nisa zila.
 17 Bselé' neda' lu na' benne' wal-la dxeledábague' neda',
 ne lu na' benne' ca' dxelecuídené' neda',
 benne' zaj nácadxe' wál-la ca neda'.
 18 Buluzague' neda' gate na' zua' lu da stébele'e,
 san Xrana' Dios gúcalene' neda'.
 19 Bebéaje' neda' naga xu'a, ne bzue' neda' tu lataj zren.
 Bselé' neda' lawe' da bezaca ba lazre' chia'.
 20 Xránadxu Dios bexunne' chia' cáteze naca
 da xrlátaje da nuna'.
 Cáteze naca da xrlátaje da nuna' bexunne' chia'
 21 lawe' da dxuna' ca da dxusede Xrana' neda',
 ne quebe guleaj xíchaja' Dios chia'.
 22 Dxuna' ca naca da dxenná bé'ene' neda',
 ne quebe bsana' da ca' nadxíxruj be'e.
 23 Guca' li lazre' lau Le',
 ne bxue cuina' chee quebe guna' da calēla.
 24 Chee le na' bexunna Xránadxu Dios chia'
 cáteze naca da xrlátaje da bēna',
 cáteze naca da xrlátaje da nuna' lau Le'.
 25 Dxexache lazru' chee benne' dxexache lazre' le sa' ljwezre',

- ne nacu' li lazre' nen benne' naque' li lazre'.
- 26 Dxunu' da naca chawe' chee benne' naque' chawe',
na' gacu' snia nen benne' wen da calela.
- 27 Guseláu' benne' zaj zue' lu da zi' da xa',
san guzéxruju' benne' dxulucá'ana szren cuine'.
- 28 Lué'queze guzalju' xi' chia'.
Xrana' Dios, guzani'u chia' naga zua' lu da chul-la.
- 29 Nen xel-la' waca chiu' guzría xi'a benne' zante
dxeledíl-lalene' neda'.
Che Lue', Dios, súalenu' neda'
waca guchínnaja' ze'e da zaj naxečaj xezre ca'.
- 30 Li lazre' zaj naca da dxun Dios, na' du lazre' naca xrtizre'.
Dxucu'uje' xúgute' benne' ca' dxelebeza lazre' Le'.
- 31 Tuze Xránadxu naque' Dios.
Tuze Dios cheedxu naque' Benne' dxucu'uje' dxi'u.
- 32 Dios naque' Bénnea' dxune' neda' benne' wal-la,
ne Benne' dxune' li lazre' da dxuna' neda'.
- 33 Dxune' ni'a ca zaj naca ni'a bzrina' xixre'
ne dxuzúa chúchue' neda' lu xi'a Sión chee'.
- 34 Dxsédene' neda' chee gaca cha'a lu wedil-la,
ne chee gaca guchíneda' xaga nalá xéche'ze
da naca na xia gache'.
- 35 Lu xel-la' weselá chiu' bcu'uju' neda',
ne nen na'u xabela gúcalenu' neda'.
Xel-la' zri'i lazre' chiu' ba nucá'ana szren na neda'.
- 36 Ben chawu' neza naga tea',
chee quebe cuila' lu neza na'.
- 37 Bлага' benne' dxeledábague' neda', na' xeajzrena' le',
na' quebe bebi'a cadxa bétetea' benne' ca'.
- 38 Bena' benne' ca' we', na' quebe guca xelexase'.
Xeajlecházie' zran ni'a.
- 39 Btipu' lazra' chee cha'a lu wedil-la.
Bzéxruju' benne' dxeledábague' neda' zran ni'a.
- 40 Benu' buluzrunnuj benne' dxeledábague' neda' lawa',
chee bzria xi'a benne' ca' dxelecuídené' neda'.
- 41 Gulenné' nu benne' gácalene' le' san quebe nu chilá'.
Gulenné' Xránadxu Dios, san quebe benne' chee'.
- 42 Bzúzruja' benne' ca' ca bxrte xu da dxua be'.
Bléaja' le' ca dxuléaja' guna' la neza ca'.
- 43 Bseláu' neda' lu na' benne' ca' dxeledábague',

- na' benu' neda' benne' xíchajē xēzr la xu ca',
na' benne' ca' quebe nú**nb**e'a dxelunē' zrin chia'.
- 44 Gate belenne' chia', na' buluzúē' xrtizra'.
Benne' zaj zra' xēzr la xu ca' belunē' ca gunná be'eda'.
- 45 Benne' zitu' ca' gulate ni'a nē'e,
na' beledxúajē' dxele**z**rízíē' lu xēzre zrentau' cheē' ca'.
- 46 Gaca ba lál'azxa Xránadxu Dios.
Gaca ba Bénnea' dxucu'ujē' neda'.
Xegá'ana szrénqueze Dios, Bénnea' dxuselé' neda'.
- 47 Naca Dios Bénnea' dxebéaj lazre' benne' dxeledábague'
neda',
ne dxuzúē' benne' ca' zran ni'a.
- 48 Naque' Bénnea' dxuselé' neda' lu na' benne' ca'
dxeledábague' neda'.
Dxunē' dxenná be'eda' benne' ca' guledábague' neda'.
Bselé' neda' lu na' benne' xichaj zra'a ca'.
- 49 Cheē lē na' xechēba' chiu', Xran, lau benne' xēzr la xu ca',
na' gúl-laqueza' cheē Lau' Lue'.
- 50 Dxun Dios dxenná bea bēnnea' waláz cheē',
ne dxexache lazre' bēnnea' guqué'e, bēnnea' naque' David,
ne zri'ine zre sue' chadía chacanna.

Salmo 19

- 1 Dxulé'e lau zran xabáa ca naca xel-la' szren cheē Dios.
Dxuchálajqueze na ca zaj naca da nune'.
- 2 Tu zra tu zra dxuzén na zra xula da nigá,
na' tu zre' tu zre' dxē na zre' xula da ná'queze.
- 3 Quebe dxuluchine na xrtizra' bēnneache,
ne quebe nu dxen chi'i na,
- 4 san dxezriluj da dxelenná na du gabí'i xēzr la xu,
ne dxele**z**rín xrtizra' na dapa saca cheē xēzr la xu.
Dios bene' xabáa ca tu xu'u naga zua gubizra.
- 5 Che zílala dxalaj na ca tu benne' wechaga na'.
Dxebé na ca tu benne' dxezá chégüē' lu witja.
- 6 Dxedxuaj na chalá'a naga dxalaj na,
na' dxezrín na chalá'a naga dxebía na.
Dxuchá'a na xúgute da zaj dē.
- 7 Du lazre' naca da nadxixruj bea Xránadxu,

- ne dxuzé chacha na bénne'du xú'udxu.
 Li lazre' naca da dxexechebe Xránadxu,
 ne dxunezruj na xel-la' sina chee benne' ca'
 quebe zaj nape' na.
- ⁸ Da líqueze zaj naca da nadxixruj bea Xránadxu,
 na' dxelebéle'e benne' ca' dxelune' ca zaj naca na.
 Du lazre' zaj naca da dxuzéajni'i Xránadxu dxi'u,
 da dxuluzúa na dxi'u lu xel-la' naxaní'.
- ⁹ Cháwedau' naca zrédexu Xránadxu,
 da gun na súadxu chadía chacanna.
 Da líqueze zaj naca da dxuchi'a Xránadxu cheedxu,
 ne zaj naca na chawe'.
- ¹⁰ Zaj naca na da dxezá lázredxadxu ca oro,
 ne ca oro zrente da zácale'e na.
 Zaj naca na zíxredxa ca bzrína'dau', da nácale'e na zixre.
- ¹¹ Dxulusizre na neda', wen zrin chiu'.
 Lawe' da dxuna' ca zaj naca na, da zrente dxezi'a.
- ¹² Netú benne' quebe gaca lé'ene' da calela da dxune'.
 Bselá neda', Xran, lu da calela da quebe dxéquebe'eda'
 dxuna'.
- ¹³ Bucache chawe' neda', wen zrin chiu',
 chee quebe bi dul-la guna' du lazra'.
 Quebe gu'u lataj nna be'e dul-la neda'.
 Nadxa gaca' du lazra', ne quebe baga' zria chee dul-la na'.
- ¹⁴ Gaca da dxuchálaja', ne da dxulaba lazra'
 da dxezaca ba lazru' Lue', Xran
 Nacu' Benne' dxuxúe' neda', ne Benne' dxexá'ue' neda'.

Salmo 20

- ¹ Dxenaba' Xránadxu xenne' chi'u lu zra zu' lu da stebe,
 ne gucu'uj La Dios chee Jacob lue'.
- ² Dxenaba' Le' naga zue' lataj lá'azxa chee' sel-le'
 da gácale na lue',
 ne chee xi'a Sión xide' guxre' lue'.
- ³ Dxenaba' Le' cheajsá lazre' ca naca xúgute guna' bzu' chee',
 ne si' lu ne'e béadu ca' dxuzezxu' lawe'.
- ⁴ Dxenaba' Le' gunne' lue' ca naca da dxezá lazru',
 ne gunne' xúgute da dxéquenu' xrlátaje.

- 5 Béle'entu' gate guselé' lue',
na' chí santu' tu da gulé'e lawe na La Dios cheedxu.
Dxenaba' Xránadxu gunne' lue' xúgute da dxenabu' lau Le'.
- 6 Na'a nezda' dxuselá Xránadxu bènnea' ba gucá'aqueze'.
Naga zue' xabáa l'azxa chee' xenne' chi'i bènnea'.
Xel-la' waca zrente chee' guselé' bènnea'.
- 7 Bal-la benne' dxuluxrén lazre' carro ca' chee wedil-la,
na' xezícadxe' dxuluxrén lázre' bzrina' ca'.
Dxi'u dxuxrén lázredxu La Xránadxu Dios.
- 8 Benne' ca' gulate ni'a ne'e, ne xejlechazie'.
Dxi'u bexásadxu, na' zedxu.
- 9 Bselá netu', Xran, nacu' Wenná Bea cheentu'.
Ben chí'intu' gate dxuláwizrantu' Lue'.

Salmo 21

- 1 Benne' dxenná bea dxebéle'ene' nen xel-la' waca chiu', Xran,
na' ca naca xel-la' weselá chiu' dxebéle'ene'.
- 2 Bnézruju' le' da guzá lazre',
ne quebe bzaqu' da gunabe' Lue'.
- 3 Guzí' lu na'u le', ne benu' dxaca chawe' chee'.
Nuzriu' xíchaje' tu da naca na oro.
- 4 Gunabe' Lue' gunnu' le' xel-la' nabán,
na' bnézruju' na le' chee súaqueze' zane' iza.
- 5 Zrente naca xabáa chee' lawe' da bseláu' le'.
Bennu' le' xel-la' ba l'ána, ne xel-la' szren.
- 6 Lawe' da nunu' gaca chawe' chee' chadía chacanna
dxunu' dxebéle'ene' lau Lue'.
- 7 Lawe' da dxuxrén lazre' wenná bea na' Xránadxu,
xexache lazre' Dios szrente le',
na' quebe sue' lu da stebe.
- 8 Xulétaju' xúgute benne' dxeledábague' lue'.
Xel-la' waca chiu' xulétaju' benne' ca' dxelecuídené' lue'.
- 9 Lu zra na' zra'u le' gaca chee benne' ca'
ca guzú' le' lu xi' ga dxulúzrie' bla'dau'.
Xránadxu guzúzruje' benne' ca' lu xel-la' dxezrá'a chee',
na' xi' na' guzezxe na le'.
- 10 Xúgute da belune' lu xezr la xu nigá guzria xi'u,

- ne xegú' zri'ine zre sue' ládujla bénneache,
 11 lawe' da gulaca lazre' xelune' da calēla chiu' Lue'.
 Gulilaj lazre' ca da xelune', san quebe bi xelezéquene',
 12 lawe' da gulagu' benne' ca'.
 Nucuezu' xaga nalá xéche'ze chiu' chee' le'.
 13 Begá'ana szrénqueze Lue', Xran, lu xel-la' wal-la chiu'.
 Tu gúl-lazquezdxu, ne tu güe lá'anazquezdxu Lue'
 ca naca xel-la' waca chiu'.

Salmo 22

- 1 Dios chia', Dios chia', ¿bizr chee' na' nusán lazru' neda'?
 ¿Bizr chee' na' quebe dxennu' da dxenaba' Lue'
 chee' guseláu' neda'?
- 2 Dios chia', dxuláwizra' Lue' te zra, ne quebe dxexechebu'
 chia'.
 Dxuláwizra' Lue' chizrela, ne quebe dxezí'i lazra'.
- 3 Lá'azxa nacu' Lue'.
 Nacu' Benne' dxebeze' naga dxelúe lá'ana benne' Israel Lue'.
- 4 Xra xrtáuntu' gulebeza lazre' Lue'.
 Gulebeza lazre', na' bseláu' le'.
- 5 Bululáwizre' Lue', na' belelé'.
 Buluxrén lazre' Lue', na' quebe belexedué'ene'.
- 6 Neda' naca' ca tu belá' gúna'dau', ne quegá bénneache.
 Dxelecuide bénneache neda', ne dxuluzúe' neda' chalá'ala.
- 7 Xúgute benne' dxelelé'e neda' dxelún le' chia'.
 Lu da dxelún le' chia' dxelexrá dxu'e,
 ne dxulutá xíchaje', dxelenné':
- 8 “Bzua cuine' lu na' Xránadxu chee' guselé' le'.
 Guselé' le' che dxezaca ba lázrele' le'.”
- 9 Lue' nacu' Bénnea' bexru' neda' gate gúlaja'.
 Benu' bxren lazra' Lue' gate na' ne dxázrete'a'.
- 10 Guxu'a lu na'u gate quebe ne gálajtea'.
 Gate ne xu'a lu le'e xrna'a, báchequeze nacu' Dios chia'.
- 11 Quebe xebigu' naga zua' lawe' da zua gágute
 da gusaca zi na neda',
 ne quebe nu chilá' benne' gácalēne' neda'.
- 12 Zaj naxechaj benne' dxeledábague' neda' ca bezre ca'.
 Zaj naxechaj benne' neda' zaj naque' ca bezre wal-la ca'
 chee' Basán.

- 13 Gulaca lazre' xuluzría xi'e neda'
ca tu bezre xixre' dxedunba', ne dxebezre xa'aba'.
- 14 Bebizre lazra' ca nisa da nalalaj na lu xu,
na' ca naca zrita xu'a bulusán ljwezre na.
Lázdawa' guca na ca xina' da bxuna na lu le'a ca nisa.
- 15 Bexaca xel-la' wal-la chia' ca tu xé'ena xu la'a,
na' luzra' bedá' na chichja'.
Nuzú' neda' lu xu xrte chee xel-la' gute.
- 16 Zaj naxéchaje' neda' ca becu' ca'.
Zaj naxečaj benne' wen da zrinnaj ca' neda'.
Gulídue' ni'a na'a.
- 17 Waca gulaba' ca naca zrita xu'a,
na' benne' ca' dxelenné'e neda', ne dxelenná' xánnie' neda'.
- 18 Belexelé'e zra lana' late' weaj,
na' lawe' zra lana' gulebeje' da gaca bea na.
- 19 Quebe xebigu' naga zua', Xran.
Nacu' xel-la' wal-la chia'.
Gudázega gácalenu' neda', Xran.
- 20 Bselá bénne'du xu'a lu na' benne' gu'e neda' xia.
Bénnea' guzría xi'e neda' gune' ca dxun becu'.
- 21 Bselá neda' lu dxu'a bezre xixre'.
Bselá neda' lu luzu bezre wal-la ca'.
- 22 Guzenda' bi bícha'dau' ca' lau' Lue'.
Güe lánanaqueza' Lue' ladaj benne' zaj nazrague' lau'.
- 23 Le'e, dxezrébele Xránadxu, le güe lánana Le'.
Le gucá'ana szrene', le'e, zri'ine zre sua Jacob.
Le zrebe Le', le'e, zri'ine zre sua Israel.
- 24 Quebe bzua Dios chalá'ala, ne quebe gucuídene'
da zi' da xa' da guledé benne' xache' ca',
ne quebe bcache lawe' lau benne' ca'
san gate bululáwizre' Le', benne' chi'e.
- 25 Güe lánanaqueza' Lue' laduj benne' zan zaj nazrague' lau'.
Ca da guchebe lazra' gúnqueza' lau benne' ca' dxelezrebe'
Lue'.
- 26 Xelagu benne' dxexruj lazre', ne welélajquezne'.
Benne' ca' dxelebigue' lau Xránadxu xelúe lánanaqueze' Le'.
Tu gácazqueze da ba neza chee benne' ca'.
- 27 Cheajlesá lazre' benne' duté xezr la xu Xránadxu,
na' xelexebí'e lau Le'.

- Xúgute cue' benne' chee xúgute cue' xezr la xu
 xelúe lá'anaqueze' Le',
 28 lawe' da xu'u lu na' Xránadxu xel-la' dxenná bea,
 na' nna bé'ene' xúgute benne' xezr la xu ca'.
 29 Xeláguqueze xúgute benne' zren ca' chee xezr la xu
 nigá,
 ne xelúe lá'anaqueze' Dios.
 Xuluzú zribe lau Le' xúgute benne' ca' xelate,
 benne' ca' quebe xelezéquene' xelegú'u chawe'
 bène'du zaj xu'e chee quebe xelatie'.
- 30 Zri'ine zre sua benne' ca' xelunbe' zrin chee Xránadxu.
 Xuluzenne' zrí'ine' ca' ca naca chee Xránadxu
 cadxa cheajsęte chee bėnneache.
- 31 Xelezrine', ne xuluzenne' bėnneache ca naca
 da xrlátaje da dxun Dios.
 Xuluzenne' benne' quebe ne xelálaje' bėn Dios da caní.

Salmo 23

- 1 Xránadxu Dios dxuxúe' neda' ca tu benne' dxuxúe' zrila'
 chee'.
 Quebe bi dxexázejeda'.
 2 Ca dxelezzúa zríla'du ca' ba guláguba' xixre' xá'adau',
 caní dxunę' chia' chee xezí' lazra'.
 Gunę' chia' ca dxaca chee zrila' ca'
 dxeché'e-ba' dxu'a xegu nisa da de zrize.
 3 Dxuxuzúa chúchue' neda' lu xichaj lázrdawa'.
 Dxusi'e neda' lu da xrlátaje chee gaca li da guchebe
 lazre'.
 4 Láqueze tea' naga sua' lu da stębe chee xel-la' gute,
 quebe bi da calela guchebe na neda',
 lawe' da zúalenu' Lue' neda', Xran,
 na' dxelácale zrise', ne blazru chiu' neda'.
 5 Dxucuezu' da xi'aj gawa' lácala benne'
 dxeledábague' neda' zaj naxechaj neda'.
 Dxugú'u da za xichja' da dxapa na neda' ba lá'ana,
 ne dxusezráteu' zriga' chia'.
 6 Da xrlátaje, ne xel-la' dxexache lazre' chiu'
 da lítegage xelezúale na neda' xúgute zra naca bana',
 na' lizru', Dios, gaca na lizra' chadía chacanna.

Salmo 24

- 1 Chee Dios naca xezr la xu nigá ne xúgute da zaj de lawe na.
Naca chee' xezr la xu, ne xúgute bénneache zaj zre'e ga na'.
- 2 Bzue' na lawe' nísadau',
ne bzale' lane na sítujla zran nísadau'.
- 3 ¿Nu seque' cuen xi'a chee Xránadxu?
¿Nu seque' chu'u xudau' lá'azxa chee'?
- 4 Waca benne' ca' zaj naque' du lazre' ca naca da dxelune',
ne ca naca da dxulaba lazre'.
Benne' ca' quebe ne xelechisa ne'e lau bedáu' xiaj xaga ca',
ne quebe bi ne xechebe lazre' da naca wen lazre'.
- 5 Xránadxu guné' da chawe' chee benne' caní.
Dios guchi'e chee benne' caní, ne guselé' le'.
- 6 Caní zaj naca bénneache dxelebigue' lau Le',
benne' ca' dxelexu'e naga zua Dios chee Jacob.
- 7 Le salaj dxa xu'u chee xudau'.
Le salaj dxa xu'u chawe' ca',
na' chu'u Wenná Bea szrente.
- 8 ¿Nuzra na' Wenná Bea szrente nigá?
Naque' Xránadxu, Benne' wal-la,
Bénnea' nape' dute xel-la' waca.
Naque' Xránadxu, Bénnea' dxedxúaje' chawe' lu wedil-la.
- 9 Le salaj dxa xu'u chee xudau'.
Le salaj dxa xu'u chawe' ca',
na' chu'u Wenná Bea szrente.
- 10 ¿Nuzra na' Wenná Bea szrente nigá?
Naque' Xránadxu, Benne' dxenná bé'ene' xúgute da zaj zua.
Le' naque' Wenná Bea szrente na'.

Salmo 25

- 1 Xran, dxennía' Lue' dute lázrdawa'.
- 2 Dxuxrén lazra' Lue', Dios chia'.
Quebe gu'u lataj xedué'eda'.
Quebe gu'u lataj benne' dxeledábague' neda' xuluzétaje'
neda'.
- 3 Da líqueze, benne' ca' dxelebeza lazre' Lue'
quebe xeque zréajene'.

- Xeledué'e benne' ca' dxeledábage' xrtizru'.
- 4 Xran, ble'e neda' da dxaca lazru' guna'.
Ble'e neda' da dzezaca ba lazru' guna'.
- 5 Bse_{de} neda' guna' ca naca da li chiu'
lawe' da nacu' Dios dxuseláu' neda'.
Tu dxebeza lázrezqueza' Lue'.
- 6 Bsa lazre', Xran, gacu' zri'i lazre',
ne xexache lazru' chia' cáteze da dxúntequezu'.
- 7 Quebe chajsá lazru' dul-la da be_{na}' gate ne naca'
benne' cuide', ne ca gudábaga' xrtizru'.
Nen dutē xel-la' dxexache lazre' chiu', bsa lazre' neda',
ne nen dutē xel-la' zri'i lazre' chiu', Xran.
- 8 Xrlátaje, ne li lazre' naca Xránadxu Dios.
Chee le na' gusédene' benne' dul-la ca' da dxal-la' xelunē'.
- 9 Gul'éne' benne' dxexruj lazre' ca' da xrlátaje da xelunē',
ne gusédene' benne' zren lazre' ca' da xelunē'.
- 10 Lu xel-la' dxexache lazre',
ne lu da li dxeche Xránadxu benne' ca' dxelunē'
ca naca xel-la' wezría chee', ne ca da dxuse_{de} Le'.
- 11 Lawe' da dxunu' ca da ba gunnú', Xran,
gunite lau' ca naca dul-la nuna', da naca na zren.
- 12 ¿Nu benne' dzezrebe' Xránadxu Dios?
Le' gusédene' benne' nigá da dxal-la' gunē'.
- 13 Gaca chee' tu da ba neza zrente,
na' zri'ine zre sue' gaca cheebe' xezr la xu.
- 14 Xránadxu Dios naque' tuze nen benne' ca' dxelezrebe' Le',
na' gunē' xelúnbe'e xel-la' wezría chee'.
- 15 Tu dxennázqueza' Xránadxu Dios
lawe' da guselé' neda' lu na' benne' ca' dxelaca lazre' xelele-
le' neda'.
- 16 Gunná' neda', ne bexache lazre' neda'
lawe' da zua' tuza', ne dzezaca zi'a.
- 17 Naxánle'e da stebe da zaj zua lázrdawa'.
Bselá neda' lu da stebe zua'.
- 18 Gunná' ca dzezaca zi'a, ne ca dxunle'a zrin,
na' bnite lau xúgute dul-la da nabaga'.
- 19 Gunná' benne' ca' dxeledábage' neda' ca naxánle'ene',

- ne ca dxelecuídele'ene' neda'.
 20 Bxue bénne'du xu'a, ne bselá neda'.
 Quebe gu'u lataj xedué'eda' lawe' da dxuxrén lazra' Lue'.
 21 Zaj nuxru da xrlátaje, ne xel-la' li lazre' neda'
 lawe' da dxebeza lazra' Lue'.
 22 Dios, bselá benne' Israel ca'
 lu xúgute da dxelezaca zi'e.

Salmo 26

- 1 Bchi'a chia', Xran, lawe' da nuna' da xrlátaje.
 Bxren lazra' Lue', Xrana' Dios, ne quebe ben chupa lazra'.
 2 Gunná' xanne' lázrdawa', Xran, ne bxue ca da nuna'.
 Gunná' xanne' da xu'u lu xichaj lázrdawa'
 3 lawe' da dxeque be'eda' dxexache lazru' neda',
 ne dxuna' ca naca da li chiu'.
 4 Quebe ne guna' tu zren benne' ca' dxelune' da xrlátaje cúzreze,
 ne quebe ne guna' tuze benne' ca' dxulul'é e cuine' xrlátaje.
 5 Dxecuúdeda' da dxelún benne' ca' dxelune' da calēla
 naga dxelezrague',
 ne quebe ne chu'a tu zren benne' ca' dxuluzúe' Dios chalá'ala.
 6 Dxelé'enu' quebe bi zria nabaga',
 na' waca biga' lu cugu chiu', Xran,
 7 chee cuezre xa'a, xapa' Lue': "Xcalenu'",
 ne chee guzenda' bénneache ca naca da zren ca' da nunu'.
 8 Xran, nazrí'ida' lizru' naga zu',
 ne lataj lá'azxa naga zua da xabáa chiu'.
 9 Quebe guzría xi'u neda' tu zren nen benne' dul-la ca',
 ne quebe gutiu' neda' tu zren nen benne' ca' dxelútie' benneáche,
 10 benne' ca' dxelune' da calēla,
 ne tu dxulunézrujzqueze' dumí chee xeledé' lu da zaj nune'.
 11 Neda' tu gúnzqueza' da naca li lazre'.
 Bselá neda', ne bexache lazre' neda'.
 12 Tu núnzqueza' da xrlátaje, na' güe lá'anaqueza'
 Xránadxu Dios
 lau benne' ca' zaj nazrague' chee'.

Salmo 27

- 1 Xránadxu Dios naque' xel-la' naxaní' chia',

- ne Benne' dxuselé' neda'.
 ¿Nu benne' gaca guchebe' neda'?
 Xránadxu Dios naque' Benne' dxucu'uje' neda'.
 ¿Nu benne' gaca guzúe' neda' lu da stébele'e?
² Gate guléchaj benne' ca' dxelune' da caleļa chia',
 nen benne' ca' dxulusaca zi'e neda',
 ne benne' ca' dxeledábague' neda' chee xuluzría xi'e neda',
 na' gulechégüe', ne xejlecházie'.
³ Láqueze xeléchaj tu cue' benne' dxjaque' wedil-la neda',
 benne' ca' dxeledábague' neda', quebe zrébequeza'.
 Láqueze xuluzúe' neda' lu wedil-la, neda' guxrén
 lázrequeza' Dios.
⁴ Tu da gunábeda' Xránadxu Dios.
 Da nigáze sa lazra', da naca na chee sua' lizre Xránadxu
 xúgute zra gaca bana',
 chee gulaba lazra' ca naca da xrtante chee Xránadxu,
 ne chee guchálajlena' Le' lu xudau' lá'azxa chee'.
⁵ Le' gucache chawe' neda' lu lataj lá'azxa chee'
 lu zra dxaca da caleļa.
 Gucache chawe' neda' lu lataj cheéqueze' naga zúaqueze'.
 Guzúe' neda' tu naga se cháweda'.
⁶ Nadxa gune' guzétaja' benne' dxeledábague' neda',
 ne zaj naxéchaje' neda',
 na' nen duté xel-la' dxebé gutia' béadu ca' guzúa'-ba'
 lu cugu chee'.
 Gúl-laqueza', ne tu güe lá'anazqueza' Xránadxu.
⁷ Xran, ben chi'a gate ne dxuláwizra' Lue'.
 Bexache lazre' neda', ne bechebe chia'.
⁸ Lu xichaj lázrdawa' benda' chi'u, gunnú': "Bexilaj chia'."
 Xexílaja' chiu', Xran.
⁹ Quebe gucache lau' chia' neda'.
 Lu xel-la' dxezrá'a chiu' quebe xebigu' naga zua' neda',
 wen zrin chiu'.
 Nacu' Benne' dxácalene' neda'.
 Quebe gusanu' neda', ne quebe cueaj xichju' neda',
 Dios, weselá chia'.
¹⁰ Lácala xulusán xra xrna'a neda',
 tu xecá'azqueze Xránadxu Dios neda'.
¹¹ Bsede neda' da dxaca lazru' guna', Xran,
 ne ble'e neda' da li lazre' da dxal-la' guna',

- lawe' da zaj naxán benne' dxeledábage' neda'.
 12 Quebe gu'u lataj benne' dxeledábage' neda'
 xelune' chia' da dxelaca lazre'
 lawe' da zaj naxechaj benne' wen lazre' neda'
 nen benne' dxelaca lazre' xulusaca zi'e neda'.
 13 Xránadxu Dios guchebe lazre' le'eda' da xrlátaje chee'
 naga gaca bana'.
 La quebe guxéajle'a da nigá, na' gute ni'a na'a.
 14 Le cueza xelá' Xránadxu.
 Le gutipa lázrele, na' Le' guzé chúchue' le'e.
 Awe', le cueza xelá' Xránadxu.

Salmo 28

- 1 Xran, dxuláwizra' Lue'.
 Nacu' Benne' dxucú'uju' neda'.
 Bze naga chi'a lawe' da che quebe xennu' neda'
 gaca' ca tu benne' dxu'e lataj ba xa'.
 2 Ben chi'a dxuláwizra' Lue',
 ne dxechisa na'a lau' naga zu' lataj lá'azxa chiu'.
 3 Quebe guzría xi'u neda' tu zren nen benne' wen da calela
 ca',
 ne cá'aqueze nen benne' ca' dxelune' da zrinnaj,
 benne' ca' dxelenné' dizra' cháwedau' lau le sa' ljwezre',
 san xu'u lázrdawe' da calela gune' chee'.
 4 Bde benne' ca' lu da ba xa' cáteze naca chee' da belune',
 cáteze naca da calela da zaj nune'.
 Bunezruj chee' benne' ca' cáteze da belune', da na' dxal-la'
 xezeí'e.
 5 Lawe' da quebe gulape' ba lá'ana da ben Xránadxu,
 ne quegá da bene' lu ni'a ná'queze',
 guxrínnaje' benne' ca', ne gudée' le' lu da ba xa'.
 6 ¡Gaca ba Xránadxu Dios, Bénnea' benne' chi'a
 gate bláwizra' Le'!
 7 Xránadxu naque' Bénnea' dxuzé chúchue' neda',
 ne dxucu'uje' neda'.
 Bxren lazra' Le', na' gúcalene' neda',
 na' chee' le' na' gubéle'eda', na' gul-laqueza',
 ne güe lá'anaqueza' Le'.
 8 Xránadxu naque' Bénnea' dxuzé chúchue' benne' chee' ca',

ne naque' Benne' dxucu'uje', ne dxuselé' bénnea' guqué'e.
 9 Bselá benne' chiu' ca', ne ben gaca chawe' chee da naca
 chee'.
 Bxue benne' ca', ne bexru le' chadía chacanna.

Salmo 29

- 1 Le güe lá'ana Xránadxu, le'e, zrale xabáa.
 Le güe lá'ana xel-la' szren chee', ne xel-la' waca chee'.
 2 ¡Da xabáa naca La Xránadxu!
 ¡Le güe lá'ana na!
 Le guzú zrífbele lau Xránadxu lá'azxa gate xel'é'e.
 3 Chi'i Xránadxu dxen na lawe' nísadau'.
 Dxen chi'i Dios xabáa ca guziu' da dxenné na.
 Dxedá chi'e lawe' nísadau'.
 4 Dxen chi'i Xránadxu ca naca xel-la' wal-la chee na.
 Dxen chi'i Xránadxu duté xel-la' szren chee na.
 5 Chi'i Xránadxu dxichaj na xaga cedro ca'.
 Dxichaj na xaga cedro ca' zaj zé na xi'a Líbano.
 6 Dxuxrite na xi'a Líbano ca' ca dxelexrite bézredu ca',
 na' dxuxrite xi'a Hermón ca tu bézredau'.
 7 Chi'i Xránadxu dxun na chaze xesa.
 8 Chi'i Xránadxu dxuxrize na le'e xixre' lawe' lataj.
 Dxuxrize na le'e xixre' chee xezr la xu Cades.
 9 Chi'i Xránadxu dxuxrize na xaga wal-la ca'.
 Dxuchibe na xrlegue xaga ca',
 na' lu xudau' chee' dxeleenná xúgute bèneache:
 “¡Gaca ba Dios!”
 10 Dxenná be'e Xránadxu nísadau' ca'.
 Chadía chacanna dxenná be'e ca Wenná Bea.
 11 Xránadxu Dios dxuzé chache' benne' chee' ca'.
 Dxuzúe' le' lu da ba neza chee xel-la' dxebeza zri lazre'.

Salmo 30

- 1 Gucá'ana szrena' Lue', Xran, lawe' da bechisu' neda',
 ne quebe bnézruju' lataj benne' ca' dxeledábage' neda'
 xelún le' chia'.
 2 Xrana' Dios, bláwizra' Lue', na' bexunu' neda'.
 3 Xran, bseláu' neda' lu lataj ba xa'.

Bexunu' neda' chee quebe chu'a xedxu ba.

4 Le gul-la chee Xránadxu, le'e nácale benne' cheéqueze!.

Le xe Le': "Xcalenu'", ne dxajsá lázrele naque' lá'azxa,

5 lawe' da tu chí'idauze dxezré'e

san chadía chacanna zua xel-la' zri'i lazre' chee'.

Wabézredxu tu zreze, san che zílala wabéle'edxu.

6 Gate guzúa chawa' gunnía': Quebe nu seque' gutá neda',

7 lawe' da bze chuchu' neda', Xran, ca tu xi'a zren,

ne blé'enu' neda' cháwedau'.

Gate bcache lau', na' guzúa' stēbe.

8 Xran, guláwizra' Lue', ne gata' xueda' Lue'.

9 ¿Bizra da ba neza gaca na chiu' che gatia',

ne chu'a xedxu ba?

¿Güe lá'ana' Lue' gate ba naca' xu xrte?

¿Waca nu guzenda' da li chiu'?

10 Bze naga neda', Xran, ne bexache lazre' neda'.

Xran, gúcale neda'.

11 Benu' bexaca xel-la' dxebezre chia' xel-la' wexá'a.

Bcuasu' xel-la' dxewí'ine lazre' chia', ne bzu' chia' xel-la'

dxebé.

12 Chee le na' tu gúl-lazqueza' chiu', lawe' da nacu'

da ba neza chia', ne quebe sua zríqueza'.

Xrana' Dios, tu güe lá'anazqueza' Lue' chadía chacanna.

Salmo 31

1 Dxuxrén lazra' Lue', Xrana' Dios.

Quebe gu'u lataj xedué'eda'.

Lu da xrlátaje chiu' bselá neda'.

2 Bze naga chi'a, ne bselá neda'.

Bze chuchu neda', ne bucú'uj neda' chee la'.

3 Nacu' Benne' dxuzé chuchu' neda', ne dxucú'uju' neda'.

lawe' da nacu' li lazre' gulé'enu' neda' neza,

ne gusi'u neda' neza na'.

4 Bebéaj neda' lu xralaj da ba zaj nucueze', chee xelēl-lē'

neda'.

Lue' nacu' Benne' dxuxúe' neda'.

5 Lu na'u dxuzúa' bēnne'du xu'a, Xran.

- Lue' bexá'awenu' neda', Dios li lazre'.
- 6 Dxequídeda' benne' ca' dxelebeza lazre' dios ca'
quebe bi zaj zaca.
Neda' dxebeza lazra' Xrana' Dios.
- 7 Béle'eda', ne sua' lu da ba neza lawe' da dxexache lazru'
neda'.
Caní dxunu' lawe' da dxelé'eqeznu' ca da dxezaca zi'a.
Nézenu' ca dxedéa' lu da ba xa'.
- 8 Quebe bdeu' neda' lu na' benne' ca' dxeledábague' neda'.
Bze chuchu' neda' tu lataj chawe'.
- 9 Bexache lazre' neda', Xrana' Dios, lawe' da zua' lu da ba xa'.
Ba bebizre nisa xuzru xiaj lawa' lawe' da dxewí'ine lazra'
dute bénne'du xu'a, ne dute bela' dxen chia'
- 10 lawe' da dxedé xel-la' nabán chia' lu da ba xa',
ne dxedéa' iza chia' ca' dxebezre lazra'.
Dxedú lazra' lawe' da nabaga' zria, na' dxelelá zrita xu'a.
- 11 Xúgute benne' ca' dxeledábague' neda' dxelecuídene' neda',
na' benne' walíZR chia' dxuluzúe' neda' chelá'ala,
na' benne' zaj núnbe'e neda' dxelecuase' neda'.
Benne' ca' dxelelé'ene' neda' la neza dxuluzrúnnuje' naga
zua'.
- 12 Benne' caní ba gulal-la lazre' neda' ca dxelal-la lazre'
tu benne' gate.
Naca' neda' ca tu xé'ena xu da nalá'a.
- 13 Dxenda' dizra' schanni' da dxelenná benne' zante' chia',
na' gáteteze zua da dxuchebe na neda'.
Dxácate na' dxelune' tuze dizra' bi xelune' chia',
ne zaj nune' xelúti'e neda'.
- 14 Neda' dxuxrén lazra' Lue', Xran.
Dxennía' nacu' Lue' Dios chia'.
- 15 Lu na'u Lue' zaj xu'u zra chia' ca'.
Bselá neda' lu na' benne' ca' dxeledábague' neda',
ne lu na' benne' ca' zaj nau zi' xuzre' neda'.
- 16 Lu xel-la' szren chiu' bxue neda', wen zrin chiu'.
Lu xel-la' dxexache lazre' chiu' bselá neda'.
- 17 Quebe gu'u lataj xedu'éda', Xran, lawe' da dxuláwizra'
Lue'.
Ben xelexedu'é benne' ca' dxelebéaj xíchaje' Lue'.
Ben xelezúa zrie' lu lataj ba xa'.
- 18 Ben quebe gaca xelenné benne' ca' dxelezí xe'e,

- benne' ca' dxelenné' da calēla chee benne' xrlátaje ca',
da dxelenné' lu xel-la' dxulucá'ana szren cuina,
ne lu xel-la' dxulucá'ana ditaj benne' caní.
- 19 Da zrente naca xel-la' zri'i lazre' chiu' da napu'
chee bi gunu' chee benne' ca' dxelape' Lue' ba lál'ana,
da na' dxunu' lau xúgute bēnneache
ne chee benne' ca' dxelebeza lazre' Lue'.
- 20 Lu da bagácheze naga zu' Lue' dxucachu' benne' ca'
chee quebe bi xelún bēnneache chee'.
Dxuzú' benne' ca' tu lu xu'u nagache
chee quebe bi gun chee' xel-la' wetil-la dizra' chee
bēnneache.
- 21 ¡Gaca ba Xránadxu Dios!
Lu xel-la' dxexache lazre' chee' bene' da zrente
chee gúcalene' neda' tu lu xezre naga guca wedil-la.
- 22 Gate na' guzúa da dxuchebe neda' gunnía':
Zua' naga québedxa le'e Xrana' neda'.
Lue' bennu' chi'a da guta' xueda' Lue' gate na' bláwizra'
Lue'.
- 23 ¡Le zri'i Xránadxu, xúgutele le'e nácale benne' chee
Léqueze'!
Xránadxu dxuxúe' benne' ca' quebe dxulusane' Le',
na' dxuxunézruje'e chee benne' ca' dxulucá'ana szrene' Le'.
- 24 Le gutipa lázrele, xúgutele le'e dxebeza lázrele Xránadxu
Dios,
na' Le' guzé chúchue' le'e.

Salmo 32

- 1 ¡Ba neza zrente naca na chee bēnnea'
Dios ba bnite lawe' dul-la da gubágue',
ne ba gudúe' zria da guzúa chee'!
- 2 ¡Ba neza zrente naca na chee bēnnea'
Dios quebe dxusebague' le' zria,
bēnnea' quebe dxezí xe'e!
- 3 Gate quebe guxrúalepa' dul-la gubaga',
bedú lazra' lawe' da gudxezra' bedú zra.
- 4 Te zra ne chizrela bdeu' neda' xel-la' zi', Xran.
Bedú lazra' ca dxebizre beaj nisa beu' la.

- 5 Nadxa guxrúalepa' dul-la gubaga',
ne quebe bcacha' zria da guzúa chia'.
Bechugu lazra' guxrúalepa' na lau Lue', Xran,
na' Lue' bnite lau' chee dul-la gubaga'.
- 6 Xúgute bēneache chiu' dxal-la' xuluchálajleñe' Lue'
gate de lataj xelexezrelne' Lue', na' gate zrin da zi' da xa'
da xezeaque',
da gaca na ca tu xegu nisa zren da dxedxuaj na,
na' quebe bi gune na benne' ca'.
- 7 Lue' nacu' ca tu lataj naga gaca gucache cuina',
na' gucache chawu' neda' chee quebe bi da saca'.
Tu gul-lazqueza' zizraj ca bseláu' neda' lawe' da dxuxú'
neda'.
- 8 Dxenná Xránadxu: “Gulé'eda' lue' neza naga dxal-la' tau'.
Gusédeda' lue', ne guzėjni'ida' lue' ca dxal-la' gunu'.
- 9 Quebe gacu' ca tu bzrina' u tu bea, be quebe bi
dxelėjni'iba',
bea ca' dxun na ba xen nna be'enu'-ba', na' cu'u xia
dxú'aba',
chee gunu' xelunba' ca dxaca lazru'.”
- 10 Benne' wen da calela ca' dxun na ba xen
xeledé' lu da zi' da xa'.
Benne' ca' dxuluxrén lazre' Xránadxu,
tu dxuxúezqueze' le' nen dutē xel-la' zri'i lazre' chee'.
- 11 Le'e, benne' xrlátaje, le be, ne le sua lu da ba neza,
ne chee da ben Xránadxu, gúcalēne' le'e.
Nen dutē xel-la' dxebé le gul-la, le'e, nácale li lazre' lau Le'.

Salmo 33

- 1 Le be le'e, benne' xrlátaje, lau Xránadxu Dios.
Xrtante naca lau Dios da dxelúe lánana benne' xrlátaje ca'
Le'.
- 2 Le gucá'ana szren Dios nen da zriadi'i na du da dxínnele.
Le gúl-laqueze chee' nen da dxúl-lalēne,
ne nen tu da nua na chi du.
- 3 Le gul-la chee Le' tu da cube.
Le gul-la cháwedau', quínnele dutē xel-la' dxebé.
- 4 Li lazre' naca xrtizra' Xránadxu Dios,

- na' nune' dute lu xel-la' li lazre' chee'.
- 5 Le' nazrí'ine' da naca xrlátaje, ne da naca du lazre'.
Zaj núnbea benneache xel-la' dxexache lazre' chee
Xránadxu
du gabí'i xezr la xu.
- 6 Ne chee xrtizra' Xránadxu Dios, bene' xabáa,
na' xúgute belaj da zaj nalá' zran xabáa bene'
nen be' dxedxuaj dxu'e.
- 7 Le' dxuxutube' nísadau', ne dxexune' na ca tu xi'a nisa.
Dxegá'a chawe' nisa lu da situj ca' naga nucueze' chee na.
- 8 Le zrebe Xránadxu Dios, xúgutele zrale xezr la xu nigá.
Le zrebe lau Le', xúgutele le'e zrale lu xezr la xu
- 9 lawe' da gunneze', na' guca xezr la xu.
Gunná be'ene' na, na' zúaqueze na.
- 10 Xránadxu Dios dxune' dxexaca dácheze dizra' zaj nun
benneache xezr la xu ca',
ne dxune' dxelaca níteze da ca' zaj nune' xelune'.
- 11 Dizra' ba nun Xránadxu Dios tu súazqueze
na chadía chacanna.
Da dxegú'u be'e lu lázrdawe' tu wadíazqueze na
lau xúgute benneache.
- 12 Ba neza zrente naca na chee benne' xezr la xu ca'
Xránadxu naque' Dios chee le',
benne' xezr la xu ca' gucá'a Dios chee xelaque' benne' chee'.
- 13 Naga zué' xabáa chee' dxenná' Xránadxu Dios,
na' dxelé'ene' xúgute cuen benneache.
- 14 Naga zué' lataj lá'azxa chee' dxenné'e,
na' dxelé'ene' ca zaj zra' benneache lu xezr la xu.
- 15 Le' bene' xichaj lázxdau xúgute benne' ca',
na' dxenné'e xúgute da dxelune'.
- 16 Quebe la benne' wenná bea ne chee benne'
dxjaque' wedil-la zante chee',
ne quebe la benne' wal-la ne chee xel-la' wal-la da nape'.
- 17 Quebe nu benne' le' ne chee bzrina',
ne quebe nu la ne chee xel-la' wal-la zren chee'.
- 18 Le na' xque, dxuxúe Xránadxu Dios benne' ca' dxelezrebe'
Le'.
Dxuxúe' benne' ca' dxelebeza lazre' Le' xexache lazre' le'
- 19 chee guselé' le' lu xel-la' gute,
ne chee gugawe' le' gate dxaca gubina'.

- 20 Dxebeza lázredxu Xránadxu Dios.
 Le' naque' Bénnea' dxácalene' dxi'u, ne dxucu'uje' dxi'u.
 21 Chee le na' du lázredxu béle'equezdXu lau Le',
 lawe' da tu dxuxrén lázrezquezdXu La lá'azxa chee'.
 22 Bexache lazre' netu', Xránantu',
 lawe' da dxebeza lázrentu' Lue'.

Salmo 34

- 1 Tu güe lá'anazqueza' Xránadxu Dios te zra chizrela.
 Tu gúl-lazqueza' da güe lá'ana na Le'.
 2 Xezaca ba lázreleña' Xránadxu Dios.
 Xelén benne' dxexruj lazre' da caní, na' welebéle'ene'.
 3 Le gucá'ana szren Xránadxu Dios tu zren nen neda',
 na' tu zren gucá'ana szrendxu La lá'azxa chie'.
 4 Bláwizra' Xránadxu Dios, na' Le' benne' chia',
 ne bselé' neda' lu xúgute da buluchebe na neda'.
 5 Benne' ca' gulebeza lazre' Le' belelé'ene' da xabáa chee',
 ne quebe belexedué'ene'.
 6 Neda', benne' xache', bláwizra',
 na' ben Xránadxu Dios chia',
 ne bselé' neda' lu xúgute da dxezaca zi'a.
 7 Gubáz chee Xránadxu zue' cuita benne' ca' dxelezrebe' Le',
 na' dxucu'uje' benne' ca'.
 8 Le guxúe xque, na' lé'ele naca xrlátaje Xránadxu Dios.
 Ba neza zrente naca na chee bénnea' dxuxrén lazre' Le'.
 9 Le zrebe Xránadxu Dios, le'e, nácale benne' chee Léqueze',
 lawe' da quee bi dxelexazrje benne' ca' dxelezrebe' Le'.
 10 Bezre xíxre'du ca' dxelexázzrjeba', ne dxeledunba'.
 Benne' ca' dxelebeza lazre' Xránadxu Dios
 quebe bi da chawe' xelexázzrjene'.
 11 Le da, bidau', ne le xen chia'.
 Gusédeda' le'e chee zrébele Xránadxu Dios.
 12 ¿Nu benne' ládujla le'e dxaca lazre' xegá'ane'
 lu xel-la' nabán,
 bénnea' dxaca lazre' sue' zane' iza chee lé'ene' da chawe'?
 13 Bxue xanne' ca dxuchálaju' chee quebe nneu' da calēla,
 ne chee quebe guchálaju' da wen lazre'.
 14 Bsan da calēla da dxunu', na' ben da xrlátaje.
 Ben ba xuzre gapu' xel-la' dxebeza zri lazre',

- ne ben ca naca chee na.
- 15 Dxuxúe Xránadxu Dios benne' ca' zaj naque' xrlátaje,
ne dxuzé nague' da dxululáwizre' Le'.
- 16 Dxezrá'a Xránadxu Dios benne' ca' dxelune' da calela,
chee quebe sua nu benne' chajsá lazre'
benne' wen da calela ca'.
- 17 Benne' xrlátaje ca' dxululáwizre' Xránadxu Dios,
na' Le' dxenne' chee',
ne dxuselé' benne' ca' lu xúgute da dxelezaca zi'e.
- 18 Gágute zua Xránadxu Dios naga zaj zra' benne' ca'
dxelexewi'ine lazre',
ne dxuselé' benne' ca' dxelexewi'ine lazre'.
- 19 Da zante da dxezaca zi' benne' xrlátaje.
Dxuselá Xránadxu Dios bènnea' lu xúgute da ca'.
- 20 Le' dxuxúequeze' xúgute zrita xu'e,
na' netú zrita chee' quebe gachaj na.
- 21 Dul-la da dxun benne' wen da calela gute na le',
na' xelebía xi' benne' ca' dxelecuídene' benne' xrlátaje.
- 22 Xránadxu Dios dxexá'awe' bènne'du xu'u
benne' wen zrin chee' ca',
na' xúgute benne' ca' dxuluxrén lazre' Le'
québequeze xelebía xi'e.

Salmo 35

- 1 Xran, bsizre benne' ca' dxelenné' chia'.
Gudíl-lale benne' ca' dxeledíl-lalene' neda'.
- 2 Gudá gucu'uju' neda' lu wedil-la,
ne gúcale neda'.
- 3 Gudel-la xia chee wedil-la chee guzagu' benne' ca'
dxululague' neda'.
Guzre neda' nacu' Benne' dxuselé' neda'.
- 4 Ben xelexedué'e, ne xeleque zréaje benne' ca'
dxelaca lazre' xelútie' neda'.
Ben xuluzrunnuj, ne xelexedué'e benne' ca' dxelaca lazre'
xelune' chia' da calela.
- 5 Ben xelaque' ca tu xizre bebe da dxua be',
ne gusel-la gubáz chee xabáa chiu' chee gulague' benne' ca'.
- 6 Ben chul-la neza naga xeledé'e, na' gaca na naga xelebile',
ne gusel-la gubáz chee xabáa chiu' chee gulague' benne' ca'.

- 7 Bulucache' tu xralaj chee' quela na neda',
 ne quegá bi nuna' chee'.
 Gulene' tu xedxu naga cheajcházia' neda',
 ne quegá bi de da dxagu na zria chia'.
- 8 Gusel-la da guzría xi na benne' ca', ne quebe xeleque
 be'ene'.
- Ben quela xralaj chee' na' léqueze',
 ne cheajlecházie' naga xelebía xi'e.
- 9 Nadxa béle'equezda' ca naca da nun Xránadxu Dios.
 Sua' lu da ba neza lawe' da bselé' neda'.
- 10 Xúgute zrita xu'a xelenná na: Xran, ¿núzraqueze naca
 ca nacu' Lue'?
- Dxuseláu' benne' xache' lu na' benne' wál-ladxa ca le',
 ne benne' dxexazrje lu na' benne' dxebane' da du de chee'.
- 11 Belasa benne' dxelexechebe' da wen lazre'.
 Gulawe' zria neda' chee' tu da quebe dxaca be'eda'.
- 12 Belexebi'e neda' da calela chee' tu da xrlátaje da bena',
 chee' xuluzúe' neda' lu da ba xa'.
- 13 Neda', gate quebe chawe' gulezúe', bewi'ine lazra'.
 Bena' gubasa da bsaca zi na neda',
 ne du lazra' bláwizra' Dios chee' xexune' benne' ca'.
- 14 Bewi'ine lazra' chee' benne' ca' ca dxuna' chee'
 le sa' ljwezra', u chee' bi bíchequeza'.
 Guzúa' lu da baxache' ca dxun benne' chee' xrne'e gate
 dxatie'.
- 15 Gulebé benne' ca' gate zua' lu da ba xa', ne belezrague'.
 Belezraga benne' dxeledábague' neda',
 benne' wen da calela, na' chadite' gulel-le' neda'.
 Tu belúezqueze' neda', ne quebe gulezúa zrie'.
- 16 Bulusaca zi'e neda', ne belún le' chia',
 ne gulagu lazxe' lu xel-la' dxelezzrá'a chee' neda'.
- 17 Xran, ¿ájate scha' gu'u latja da dxelune'?
- Bselá neda' lu na' benne' caní dxuluzría xi'e neda',
 benne' zaj naque' ca bezre xixre' ca'.
- 18 Xapa' Lue': Xcalenu', lówela benne' zan ca' zaj
 nadupe' chiu' Lue'.
- Tu güe lá'anazqueza' Lue' ládujla benne' zan ca'.
- 19 Quebe gu'u lataj xelebé benne' ca' dxeledábague' neda',
 ne quebe bi nuna' chee'.
- Quebe gu'u lataj xelún la benne' ca' chia',

- benne' dxelecuídene' neda',
 ne quebe bi de da dxagu na zria chia'.
 20 Benne' caní quebe dxelaca lazre' xelezúe' lu
 xel-la' dxebeza zri lazre',
 na' lu xel-la' dxelezí xē chee' dxeleñné' chee' benne' ca'
 dxelebeza zri lazre' lu xezr la xu nigá.
 21 Belún le' chia'.
 Gulenné': "¡E! ¡E! ¡Ba blé'entu' da nune'!"
- 22 ¡Xran, ba blé'equeznu' da dxelune'!
 ¡Quebe sua zriu'!
 ¡Xran, quebe gusanu' neda'!
- 23 ¡Guxasa, guzúa guchi'u chia'!
 ¡Gudá, Xrana' Dios, chee' gácalenu' neda'!
- 24 ¡Bchi'a chia' lu da xrlátaje chiu', Xrana' Dios!
 ¡Quebe gu'u benne' ca' lataj xuluzrizre' chia'!
- 25 ¡Quebe gu'u lataj xelenné': "Ba guca da dxezá lázredxu!"
 ¡Quebe xelenné': "Ba bendxu chie'!"
- 26 Ben xelexedué'e, ne xeleque zréaje xúgute' benne' ca'
 dxelebene' gate bi dxaca chia'.
 Bsi'e xel-la' stu', ne ben xelaca xala benne' ca'
 dxeledábague' neda'.
- 27 Ben xelúl-la, ne xelebé benne' ca' zaj de'e neda',
 chee' xelennáqueze': "Tu xegá'ana szrénzqueze Xránadxu,
 Bénnea' dxezá lazre' sua lu xel-la' dxebeza zri lazre'
 benne' wen zrin chee'!"
- 28 Tu guchálajzqueza' chee' da xrlátaje chiu',
 ne chee' da dxue lánaqueze na Lue' te zra chizrela.

Salmo 36

- 1 Da zrinnaj da dxun benne' dxuzúa chalá'ala Dios
 dxuchálajle' na le' lu xichaj lázrdawe'.
 Quebe dxezá lázrequeze' gape' Dios ba lánana.
 2 Chee' le' na' dxulé'e cuine' ca' tu benne' zrente'.
 Dxéquene' quebe dxelé'e Dios da zrinnaj da dxune',
 ne quebe dxecuide Dios le'.
 3 Da tu dxuchálajzqueze' naca na da zrinnaj, ne da wen
 lazre'.
 Québedxa dxéajni'ine', ne québedxa dxune' da xrlátaje.

- 4 Dxulaba lazre' ca naca da calela gune' gate de' naga dxate!
 Xu'e neza da quebe naca neza chawe!
 Quebe dxecuídene' da calela.
- 5 Xrana' Dios, zrente naca xel-la' dxexache lazre' chiu'
 da dxezrinte na xabáa,
 na' dxezrinte lu beuj xel-la' li lazre' chiu'.
- 6 Da xrlátaje chiu' naca na ca tu xi'a zren chiu',
 na' ca dxuchi'u naca na ca tu nísadau' sítuje.
 Xrana' Dios, tu dxuxúezquezu' bénneache, ne be xixre' ca'.
- 7 Xrdante naca xel-la' dxexache lazre' chiu', Dios.
 Chee le na' dxuluxrén lazre' bénneache Lue' ca dxelún
 bedxuj dxé'enedu ca' dxelexezraba' zran xrila bedxuj.
- 8 Welélajquezne' chee da dele'e lizru',
 na' Lue' gunézruju' xelé'aje' da naca ca tu xegu da
 naca na da dxezaca ba lazru' Lue'.
- 9 Naga zu' Lue' zua beaj naga dxalaj nisa da dxunna na
 xel-la' nabán.
 Lu xel-la' naxaní' chiu' walé'entu' da naca lení'.
- 10 Bexache lazre' benne' ca' zaj núnbe'e Lue',
 ne bzua chee benne' li lazre' ca' da xrlátaje chiu'.
- 11 Quebe gu'u lataj tábaga benne' dxucá'ana szren cuina neda',
 ne quebe gutá benne' dxun da calela neda'.
- 12 Xeajlechaze benne' ca' dxelune' da zrinnaj.
 Lue' benu' xeajlechaze benne' ca', na' quebe gaca xelexase'.

Salmo 37

- 1 Quebe su' stebe ne chee da dxelún benne' ca'
 dxelune' da calela,
 ne quebe se lazru' da zaj nápa'e benne' dxelune' da
 zrinnaj,
- 2 lawe' da xeledé chee benne' ca' ca dxaca chee xixre'du ca',
 na' gaca chee benne' ca' ca dxaca chee xixre' da nadxugu,
 dxebizre na.
- 3 Bxren lazre' Xránadxu Dios, ne ben da xrlátaje,
 na' súaquezu' lu xezr la xu, ne sí'quezu' ba neza da li.
- 4 Bezaca ba lazre' nen Xránadxu,
 na' Le' gúnnaqueze' chiu' da dxezá lazru'.
- 5 Bzua cuinu' lu na' Xránadxu,
 ne bxren lazre' Le', na' Le' gune' ca da dxenabu'.

- 6 Gulé'ene' da xrlátaje chiu' ca tu xel-la' naxaní',
ne da li lazre' chiu' ca lawe' zra.
- 7 Guzúa zrize lau Xránadxu, ne guleza lazre Le'.
Quebe su' stēbe ne chee benne' dxezi'e ba neza,
bénnea' dxúnqueze' da calela.
- 8 Bsan xel-la' xichaj zra'a, ne quebe cuídenu'.
Quebe sa lazru' bi xusacu' benne' ca' dxelune' da calela,
9 lawe' da guzría xi' Dios benne' ca' dxelune' da calela.
Benne' ca' dxelebeza lazre' Xránadxu, gaca chee' xezr la xu.
- 10 Chadite te chee benne' ca' dxelune' da calela.
Le'enu' lizre lataj benne' ca', san québedxa zaj zre'e na'.
- 11 Benne' dxexruj lazre' ca' gaca chee' xezr la xu,
na' xelexezaca ba lazre' lu xel-la' dxebeza zri lazre' zrente.
- 12 Benne' dxelún da calela dxelilaj lazre' bi xelune'
chee benne' xrlátaje,
ne lu xel-la' dxelezá'a chee' xelagu lazxa benne' ca'.
- 13 Xránadxu Dios guzrízrequeze' chee benne' ca' dxelune'
da calela
lawe' da nézene' ba za zra cheajsé chee benne' ca'.
- 14 Benne' dxelune' da zrinnaj dxelebéaje' xia chee',
ne dxuluzé' xaga nalá xéche'ze chee',
chee xuluzría xi'e benne' xache' ca', ne benne' dxelexazrje',
chee xelútie' benne' ca' dxelune' da li lazre'.
- 15 Xia nalá chee benne' ca' chaze na lu lazdáuqueze',
na' gáchajqueze xaga nalá xéche'ze chee'.
- 16 Cháwedxa naca da du da de chee benne' xrlátaje
ca da gunní'a da zaj napa zánete benne' dul-la ca',
- 17 lawe' da welátequeze ni'a na' benne' dxelúne' da zrinnaj.
Xránadxu ná'queze dxuxúe' benne' xrlátaje ca'.
- 18 Nunbea Xránadxu ca zaj naca zra xelezúa benne'
du lazre' ca',
na' da zaj napa benne' ca' xelezúa na chadía chacanna.
- 19 Quebe xelexedué'ene' gate quebe dxaca chawe' chee
bénneache,
na' lu zra chee gubina' gata' da xelawe'.
- 20 Xelebía xi' benne' dxelúne' da zrinnaj,
na' benne' ca' dxeledábaga' Xránadxu,
ca dxaca chee xiaj xixre' ca'.
Xeledé chee', ne xelexenitie' ca zren chee xi'.
- 21 Benne' ca' dxelún da calela tu da dxelenabe' tu chí'idauze,

- ne quebe dxuluxunézruje' na,
na' benne' xrlátaje dxexache lazre' le', ne dxunézruje' chee'.
- 22 Benne' ca' dxelé'e Xránadxu le' chawe', gaca chee
benne' ca' xezr la xu,
na' benne' ca' quebe dxelé'ene' chawe', xelebía xí'queze'.
- 23 Da dxelún benne' xrlátaje ca' zaj naca na da ble'e
Xránadxu le', na' dxelé'ene' cháwedau' ca da dxelune'.
- 24 Gate dxelejchaze benne' xrlátaje ca' quebe cheajlechaze'
tu chilize lawe' da nuxru Xránadxu na' benne' ca'.
- 25 Benne' cuide' guca', ne na'a ba gúxrúa',
ne cabata' ble'eda' tu benne' xrlátaje gusán Dios le',
na' quebe xeledá zri'ine zre sue' xelebéaje' guna'.
- 26 Benne' xrlátaje nigá tu dxexache lázrezqueze',
ne dxunézruje' bi dxexazrje nu benne',
na' zri'ine zre sue' zaj naque' da ba neza chee bénneache.
- 27 Québedxa gunu' da calela, san ben da xrlátaje,
na' gaca bánquezu' chadía chacanna,
- 28 lawe' da nazrí'i Xránadxu da naca li lazre',
ne quebe dxusané' benne' zaj de'e Le'.
Chadía chacanna tu guxúezqueze' benne' ca',
san guzría xi'e xrtia ljwezre benne' ca' dxelune' da calela.
- 29 Benne' xrlátaje ca' gaca chee' xezr la xu nigá,
na' xelezrá'queze' chadía chacanna lu xezr la xu.
- 30 Benne' xrlátaje dxuchálajqueze' da naca sina,
na' ca dxuchi'e naca na xrlátaje.
- 31 Da nadxixruj bea Dios tu xú'uzqueze na xichaj lázrdawe'.
Chee le na' quebe cheajchaze bénnea'.
- 32 Benne' wen da zrinnaj dxenné'e benne' xrlátaje,
ne dxuné' ba xuzre gutié' le'.
- 33 Quebe gusán Xránadxu le' lu na' benne' wen da calela na',
ne quebe guzría xi'e le' gate dxuchi'e chee'.
- 34 Guleza lazre' Xránadxu, ne ben ca da ba gunné',
na' Le' chísaqueze' Lue' chee gaca chiu' xezr la xu nigá.
Gate xelebía xi' benne' dul-la ca', na' lé'enu' na.
- 35 Ble'eda' tu benne' wen da zrinnaj, nagá'ane' szrente,
na' guxánle'e da de chee' ca dxegula tu xaga zrente.
- 36 Na' gudé chee', na' québedxa zue' na'a.
Bexílaja' le', san quebe nu bezrelda'.
- 37 Blaba lazre' ca naca chee benne' li lazre',
ne gunná' benne' xrlátaje

- lawe' da naga cheajsé gaca tu da ba neza chee benne'
dxebeze' zri lazre'.
- 38 Benne' dxeluné' da caleḷa xelebía xí'queze'.
- Quebe nu cha' xrtia ljwezre benne' dxeluné' da zrinnaj.
- 39 Xránadxu Dios guseláquezé' benne' xrlátaje ca',
na' Le' gutipe' lazre' benne' ca' lu zra chee da stebe.
- 40 Xránadxu Dios gácalene' le', ne guselé' le'.
- Guselé' le' lu na' benne' ca' dxeluné' da caleḷa,
na' gune' gaca chawe' chee' lawe' da buluxrén lazre' Le'.

Salmo 38

- 1 Xrana' Dios, quebe til-lu' neda' lu xel-la' dxezrá'a chiu'.
- Quebe gudéu' neda' da ba xa' lu xel-la' snia chiu',
- 2 lawe' da belúe xaga nalá xéche'ze chiu' neda',
na' be' na'u neda'.
- 3 Quebe bi chawe' zua beḷa' dxen chia' lawe' da dxezra'u
neda',
- ne quebe zaj zua zrita xu'a cháwedau' lawe' da nuna' dul-la.
- 4 Ca naca da zrinnaj da nuna' ba zria cháqueze na xíchaja'.
- Zaj naca na chia' ca tu xua' zí'ilé'e.
- 5 We' da zaj zria beḷ-la' dxen chia' ba dxelelá na,
ne ba dxeluzru na,
- da na' dxaca chia' lawe' da beḷa' da caleḷa.
- 6 Nucache lawa', ne dxexedué'ele'eda',
ne dxebezre xacha' te zra chizrela,
- 7 lawe' da ca naca beḷ-la' dxen chia' dxelá na,
ne quebe bi chawe' zua beḷa' dxen chia'.
- 8 Nate ni'a na'a, ne dxéqueda' ba naxúzrujne zrita xu'a.
- Dxebezre lazra' lawe' da zua stebe lázrdawa'.
- 9 Xran, ca naca da dxezá lazra' zaj zua na nen Lue',
na' da dxebezre lazra' dxelé'equeznu' Lue'.
- 10 Dxate' lázrdawa', ne ba bedú lazra',
ne québedxa dxelé'eda' cháwedau'.
- 11 Dxelexebiga ljwezra', ne le sa' ljwezra' ca' zítu'la
ne chee xízrawe' chia',
- na' benne' walíZR chia' ba belexeuase' zítu'la.
- 12 Benne' ca' dxelaca lazre' xelútié' neda' dxuluzalé' xralaj,
na' benne' ca' dxelúe lazre' bi gaca chia' dxelenné' chia'
wabía xi'a, ne tu zaj zúaze' bi xulusaque' neda'.

- 13 Neda' quebe dxenda' ca dxaca chee tu benne' cuezru,
ne naca' ca tu benne' quebe dxaca nne',
benne' quebe dxexrá dxu'e.
- 14 Naca' ca tu benne' quebe dxenne',
bénnea' quebe dxexechebe',
- 15 lawe' da dxebeza lazra' Lue', Xrana' Dios.
Lue' xechebu' waláz chia', Xrana' Dios.
- 16 Gunnia': Quebe gu'u lataj xelebene' ne chee da dxaca chia'.
Gate dxeajchazia', quebe gu'u le' lataj xulucá'ana szren
cuine'
lawe' da zua' lu da baxache'.
- 17 Ba zua' cheajcházia',
ne tu dxelázqueze dute bel-la' dxen chia'.
- 18 Chee le na' xrúalepequeza' da calela da bena',
ne xewine lazra' ca naca dul-la da nabaga'.
- 19 Benne' ca' dxeledábage' neda' zaj zúaqueze' chawe',
ne zaj naque' benne' wal-la.
Zaj naxánle'e benne' ca' dxelecuídene' neda',
ne quebe bi de da dxagu na zria chia' lau le'.
- 20 Benne' ca' dxelune' da calela chee benne' ca'
dxelune' da xrlátaje
zaj naque' benne' dxeledábage' neda' lawe' da
tu dxúnzqueza' da xrlátaje.
- 21 Quebe gusanu' neda', Xrana' Dios.
Dios chia', quebe su' zitu' naga zua'.
- 22 Ben ba xuzre gácalenu' neda', Xran.
Nacu' Benne' dxuselé' neda'.

Salmo 39

- 1 Neda' gunnía': Guxúe xanne' cuina' chee quebe guna' dul-la
lu da guchálaja'.
Tu guxúe xánnezqueza' ca da guchálaja' dxácatē na'
zua benne' wen da calela naga zua'.
- 2 Guzúa' zrize ca tu benne' quebe dxaca nnie',
ne québequeze bchálaja' da xrlátaje,
na' bzáladxa xel-la' dxudía chia'.
- 3 Guca lázrdawa' ca tu da dxala,
na' lu da dxulaba lazra' guca na ca tu xi'.
Na' gunaba' lau Xránadxu, gunnía':

- 4 Xran, ble'e neda' da gaca chia',
ne ájate zra gaca bana'.
Bzéajni'i neda' chadite nazruzre gatia'.
- 5 Nunu' chia' sua' bábaze zra,
na' iza chia' québequeze bi naca na lau Lue'.
¡Da líqueze quebe bi zaj naca zra chee xúgute bénneache!
- 6 ¡Da líqueze zaj naca bénneache ca tu zrúl-laze!
¡Da líqueze dácheze naca zaj dxé' bénneache gunne xue
chee xel-la' nabán chee'!
¡Dxulucúdie' xel-la' gunní'a, ne quebe zaj nézene'
nu chee gaca na!
- 7 Na'a, Xran, ¿bízraqueze cueza lazra'?
Tuzu' Lue' dxal-la' cueza lazra'.
- 8 Bselá neda' lu xúgute da zrinnaj da bēna'.
Quebe gu'u lataj benne' xala ca' xelún le' chia'.
- 9 Guzúa' zrize, ne quebe bi bchálaja'
lawe' da Lué'queze bēnu' guca caní chia'.
- 10 Becá'a xízrawe' da bzu' lu bēla' dxen chia'.
Bache gatia' lu da dxusacu' neda'.
- 11 Dxudéu' ba xa' tu benne' ba nun dul-la
chee dxuzéajni'inu' le',
ne ca dxun béadu dxuteba' ladxe' dxuzría xi'u
da nazrí'idxe bēnea'.
¡Da líqueze quebe bi zaj naca zra chee xúgute bénneache!
- 12 Bene da dxenaba' lau Lue', Xran,
ne bze naga ca da dxuláwizra' Lue'.
Quebe su' zrize gate zua' dxebezra' lau'
lawe' da naca' lau Lue' ca tu benne' dxedaze', ne quebe de
lizre',
ne naca' ca tu benne' quebe de xezr la xu chee'
ca gulaca xra xrtawa' ca'.
- 13 Bsan neda' chee gata' lataj xezí' le dipa'
nédxula ca xexá'a xenitia'.

Salmo 40

- 1 Nen dutē xel-la' zren lazre' chia' guleza lazra' Xrana' Dios,
na' bze nague' chia', ne benne' da gunábeda' Le'.
- 2 Bebéaje' neda' ca tu lu xēdxu situj, ne lu da naca
ca guna' guzra'.

- Bzue' ni'a ca tu lu xiaj xre, ne begu'e neda' neza li.
³ Bene' dxul-la' tu da cube da naca na da dxue lá'ana'
 Xránadxu.
 Benne' zante xeled'ene' da nigá dxune', na' xelezrebe' Le',
 ne xuluxrén lazre' Xránadxu Dios.
- ⁴ Ba neza zrente naca na chee bënnea' dxuxrén lazre'
 Xránadxu Dios,
 ne quebe dxune' ca dxelún benne' ca' dxulucá'ana szrene'
 bedáu' xiaj xaga ca',
 ne quegá ca dxelún benne' ca' dxelún lazre'.
- ⁵ Da zante benu', Xrana' Dios, da dxebánentu',
 ne ca zaj naca da dxezá lazru' gunu' cheentu'
 quebe gaca guláabantu' lau Lue'.
 Chela nu guzenda' ca zaj naca na,
 ne che guchálaja' chee na, quebe baben tu na.
- ⁶ Quebe dxezaca ba lazru' béadu ca' gutia' lau',
 u da gunna' Lue',
 ne quebe gunabu' béadu ca' guzézxea' lau', u dxen chee
 béadu ca' da guzúa' lau' ne chee dula nabaga',
 san gusalaju' naga' chee xenda' chi'u.
- ⁷ Nadxa gunnía': Guná' xque, za'a neda'.
 Lu xiche lá'azxa naxúaj na ca naca chia'.
- ⁸ Dxezaca ba lazra' guna' ca da dxaca lazru' Lue', Dios chia',
 na' da nadxixruj be'u zua na lu xichaj lázrdawa'.
- ⁹ Ca naca da xrlátaje chiu' ba bzenda' bënneache
 naga zaj nazraga chiu' bënneache zante'.
 Gunná' xque, quebe guzúa' zria',
 ca nézqueznu' Lue', Xrana' Dios.
- ¹⁰ Quebe bcácheza' ca da xrlátaje chiu' lu lázrdawa'.
 Ba bchálajqueza' ca naca xel-la' li lazre' chiu',
 ne ca dxuseláu' bënneache.
 Quebe guzúa' zri ca naca xel-la' dxexache lazre' chiu',
 ne ca naca da li chiu' ládujla benne' zante zaj nazrague'
 chiu'.
- ¹¹ Xran, quebe chenu' xexache lazru' neda'.
 Xel-la' dxexache lazre' chiu', ne da li chiu'
 tu dxelácalezqueze na neda'.
- ¹² Lawe' da ba guléchajle'e da calela ca' neda',
 da calela ca' da ba nuna' zaj zria na neda',
 na' quebe gaca nna'a naga zu'.

- Zaj naxándxa na ca zaj naca xicha xíchaja!, na' dxedú lazra'.
- 13 Dxenaba' lau!, Xran, guseláu' neda'!
Xran, ben ba xuzre gácalenu' neda'.
- 14 Ben xelexedué'e, ne xeleque zréaje
xúgute benne' ca' dxelaca lazre' xelútie' neda'!
Ben xeajxaca bzébelá, ne xelexedué'e
benne' ca' dxelezá lazre' xelune' chia' da calela.
- 15 Ben xeleque zréaje' lawe' da belún zréaje' neda'
benne' ca' gulé'e neda': “E, e.”
- 16 Ben xelebé, ne xelezúe lu da ba neza xúgute benne' ca'
dxelebeze' Lue',
ne ben xelennáqueze benne' ca' zaj nazrí'ine' Lue',
weselá chee'.
Xelenné': “Xegá'ana szrénqueze Xránadxu.”
- 17 Láqueze sua' neda' lu da ba xa', ne lu da baxache',
guxúequeze Xrana' Dios ájala guné' chia'.

Nacu' Benne' dxácalene' neda', ne Benne' weselá chia'.
Dios chia', quebe chenu' gácalenu' neda'.

Salmo 41

- 1 Ba neza zrente naca na chee bénnea' dxe'e gunne xue
chee benne' xache'.
Lu zra gate zué' lu da stebe, guselá Xránadxu bénnea'.
- 2 Xránadxu guxúequeze' le', ne gunézruje' le' xel-la' nabán.
Gaca na tu da ba neza zrente chee bénnea' lu xezr la xu
nigá,
na' quebe gudé Xránadxu le' lu na' benne' ca' dxeledábague'
Le'.
- 3 Xránadxu Dios gúxruqueze' le' gate zúe' lu xel-la' dxudía.
Gun chawe' duté da naque' gate na' quebe chawe' zué'.
- 4 Gunnía': Xrana' Dios, bexache lazre' neda'.
Bexún bénnea'du xu'a lawe' da bena' dul-la gate gudábaga'
Lue'.
- 5 Benne' ca' dxeledábague' neda' dxelenné' chia' da calela.
Dxelenne': “¿Bátala gate benne' nigá, ne xenite le'?”
- 6 Che xedajlenné'e neda', dxelún lazre'.
Dxelebáaje' neda' dizra' chee bi da calela gaca xelenné'
chia',

- na' gate dxelexedxúaje', na' dxelexrúe' dizra' na'.
 7 Gate dxelezruga benne' dxelecuídenē' neda',
 na' tu dxelennézqueze' chia'.
 Tu dxulucháaljēzqueze' ljwezre' chia' neda' da naca
 da caleḷa, dxelenné':
 8 “Ba guxú'e tu xízrawe' da gute na le',
 ne québedxa xexásaqueze' ga na' de'.”
 9 Cá'anqueze bēnnea' guleza zri lazre' nen neda',
 bēnnea' bxren lazra', na' gudágulequeze' neda',
 benne' nigá dxedábagazegue' neda'.
 10 Lue', Xrana' Dios, bexache lazre' neda',
 ne ben xexasa' neda',
 na' xunézruja' benne' ca' ca da dxal-la' xelezí'e.
 11 Caníqueze nezda' ba bēna' da dxezaca ba lazru' Lue',
 chee quebe bi xelebéle benne' ca' dxeledábage' neda'.
 12 Ca naca chia' neda', ba bēxruquezu' neda' lawe' da
 naca' du lazre',
 ne ba bzu' neda' lau Lue' chadía chacanna.
 13 ¡Gaca ba Xránadxu, Dios chee benne' Israel ca'
 gaxuane iza, ne chadía chacanna!
 ¡Ca'an naca na, ne ca'an gaca na!

Salmo 42

- 1 Ca dxun bzrina' xixre' dxebezre xa'aba' lawe' da
 dxebíleba' nisa,
 ca' dxuláwizra bēnne'du xu'a da naca chiu', Dios.
 2 Dxebile bēnne'du xu'a da naca chiu', Dios ban.
 ¿Bata gaca xida' chee guzúa cuina' lau Dios?
 3 Nisa xuzru xiaj lawa' guca na ca xeta dxawa'
 te zra chizrela,
 dxácate na' gulé'e neda' xúgute zra: “¿Ga na' Dios chiu'?”
 4 Dxajsá lazra' chee da caní, ne dxebezre lazra'.
 Dxajsá lazra' ca guxá'alēna' benne' zan ca',
 ne nuzúa' lawe' le' lizre Dios.
 Tu dxúl-lazquezdXu lu xel-la' dxebé,
 ne dxue lá'anaquezdXu Dios lu laní.
 5 ¿Bizr chee na' dxate ni'a na'u, bēnne'du xu'a?
 ¿Bizr chee na' zu' stēbe lu xichaj lázrdawa'?

- Guleza lazre' Dios lawe' da güe lá'anaqueza' Le' da xula.
Naque' Benne' dxuselé' neda', ne Dios chia'.
- 6 Dios chia', ba nate ni'a na' bénne'du xu'a
lu xichaj lázrdawa'.
Chee le na' dxajsá lazra' chiu' nigá zua' lu xezr la xu
xechalá'a xegu Jordán,
ne lu xezr la xu chee benne' Hermón naga zua xi'a Mizar.
- 7 Ca schaga da dxun nísadau', ne da dxun tu bdua nisa
zren chiu', Dios,
ca' dxeque bénne'du xu'a lawe' da dxusaca zi' na'u neda'.
- 8 Te zra xexache lazre' Xránadxu neda',
na' chizrela tu gúl-lazqueza' da güe lá'ana' Le',
ne tu guchálajlezqueza' Dios,
Bénnea' dxunne' xel-la' nabán chia'.
- 9 Xapa' Dios: Lué'queze dxucu'uju' neda'.
¿Bizr chee na' nal-la lazru' neda'?
¿Bizr chee na' dxewí'ine lazra' lawe' da dxusaca zi'
benne' dxedábague' neda'?
- 10 Ca tu benne' dxelé'ē zrita xu'a, ca' dxelún benne' ca'
chia', dxelún le' chia'.
Tu zra tu zra dxelenné' chia': “¿Ga na' Dios chiu'?”
- 11 ¿Bizr chee na' dxate ni'a na'u, bénne'du xu'a?
¿Bizr chee na' zu' štebe lu xichaj lázrdawa'?
Guleza lazre' Dios lawe' da güe lá'anaqueza' Le' da xula.
Naque' Benne' dxuselé' neda', ne Dios chia'.

Salmo 43

- 1 Bchi'a chia', Dios, ne ble'e lau naca' xrlátaje.
Bselá neda' lu na' benne' ca' dxuluzúe' Lue' chalá'ala,
ne lu na' benne' ca' dxelezí xē'ē, ne dxelunē' da zrinnaj.
- 2 Nacu' Lue' Dios chia', ne dxuzé chuchu' neda'.
¿Bizr chee na' nusán lazru' neda'?
¿Bizr chee na' dxewí'ine lazra' lawe' da dxusaca zi' neda'
benne' ca' dxeledábague' neda'?
- 3 Gusel-la chia' xel-la' naxaní' chiu', ne da li chiu'.
Da caní xulusí na neda' neza.

Xeleché na neda' lu xi'a lá'azxa chiu', ne naga zúaquezu'
Lue'.

⁴ Chu'a naga zua lucugu chee Dios.

Chu'a lau Dios, Bénnea' dxune' dxebeda', na' zua' lu da ba
neza.

Güe lá'ana' Lue' nen da zríadi'i na du, Dios chia'.

⁵ ¿Bizr chee na' dxate ni'a na'u, bénne'du xu'a?

¿Bizr chee na' zu' stebe lu xichaj lázrdawa'?

Guleza lazre' Dios lawe' da güe lá'anaqueza' Le' da xula.

Naque' Benne' dxuselé' neda', ne Dios chia'.

Salmo 44

¹ Dios, bache bémentu' lawe' da buluzén Xra xrtáuntu' netu'
ca naca da benu' lu zra chee', da naca na iza ba guledé na.

² Bzria xi'u bénneache xezr la xu xezícadxa ca' lau
xra xrtauntu' ca', na' bzu' le' xlataj benne' ca'.

Bsaca zi'u benne' xezr la xu ca', san bzua chachu'
bénneache chiu' lu xezr la xu nigá.

³ Xra xrtáuntu' ca' quebe gulezi'e xezr la xu nigá
nen xia nalá cheéqueze',

Ne quebe buluselá cuine' nen xel-la' wal-la da zaj nape'.

Lue' bseláuquezu' le' nen xel-la' waca chiu',

ne nen xel-la' wal-la chiu',

ne nen xel-la' naxaní' chiu', lawe' da bezaca ba lazru' nen
le'.

⁴ Dios, nacu' wenná bea chia'.

Bselá zri'ine zre sua Jacob.

⁵ Nen xel-la' waca chiu' xebéajntu' benne' ca'
dxeledábague' netu'.

Lu Lau' Lue' guchuchuj guléajntu' benne' ca'

dxeledábague' netu'.

⁶ Quebe guxrén lazra' xaga nalá xéche'ze chia',

ne quebe guselá xia chia' neda'.

⁷ Lue' bcu'uju' netu' lau benne' ca' dxeledábague' netu',

ne benu' belexedué'e benne' ca' belecuídené' netu'.

⁸ Ne chee Dios tu súazquezentu' lu da ba neza,

- na' chadía chacanna güe lá'anantu' Lau' Lue'.
- 9 Nusán lazru' netu', ne nunu' dxexedué'entu',
ne quebe dxéajlenu' benne' cheentu' ca' dxjaque' wedil-la.
- 10 Benu' buzrúnnujntu' lau benne' ca' dxeledábague' netu',
na' benne' ca' dxelecuídene' netu' gulegüe' ca naca
da ná pantu'.
- 11 Bdeu' netu' ca zrila' ca' lu na' benne' xelútiē' netu',
ne ba beše dínnaju' netu' ládujla benne' xēzr la xu ca'.
- 12 Bdéu' netu', benne' chiu' ca' cá'aze, ne quebe bi guzi'u.
- 13 Dxunu' dxelún la benne' walízre cheentu'.
Benne' zaj naxéchaje' netu' dxelún le', ne dxuluzrizre'
cheentu'.
- 14 Nuzú' netu' ca tu da dxelenná benne' xēzr la xu ca'
naca na da baxáchele'e.
Xúgute benne' dxelelé'ene' netu' dxulutá xíchaje',
ne dxexebánene' ca da baxache' nácantu'.
- 15 Tu zra tu zra tu dxexedué'ezquezda',
ne tu zúazqueza' lu da stébele'e
- 16 lawe' da dxelenné' schanni' chia', ne dxuluzúe'
neda' chalá'ala,
ne dxulutíl-lale neda' benne' ca' dxeledábague' neda',
nen benne' ca' dxexebeaj lazre' neda'.
- 17 Xúgute da caní dxaca cheentu', ne quebe ne
gal-la lazrentu' Lue',
ne quebe ne guzúantu' chalá'ala xel-la' wezría chiu'.
- 18 Quebe ne gusán lázrentu' Lue',
ne quebe ne xecuásantu' lu da gunná be'enu' netu'.
- 19 ¿Bizr chee na' nuzú' netu' chalá'ala tu lataj chee be snia ca',
ne nuzú' netu' naga xelaze gátentu'?
- 20 La gul-la lázrentu' La Dios cheedxu,
ne bca'ana szrentu' tu dios da quebe bi zaca,
- 21 ¿quebe dxal-la' zra'a Dios netu' ne chee da nigá?
Le' nézquezne' da zaj zua lu xichaj lázxdau bénneache.
- 22 Lawe' da nácantu' chiu', tu zra tu zra ba
zaj zúatequeze' xelútiē' netu'.
Zaj nune' netu' ca zrila' ca' ba zua xelútiē'-ba'.
- 23 ¡Bebán, Xran!
¿Bizr chee na' dxasiu'?
¡Bebán!
¡Quebe su' zitu' tu chi'ize!

- 24 ¿Bizr chee na' nucache cuinu',
ne quebe dxeque be'enu' ca dxezaca zí'intu',
ne ca dxuluchine benne' ca' netu'?
- 25 Ba nate ni'a na' bénne'du xú'untu', ne dxeajcházetentu' lu xu,
na' ba détentu' sudxú'ala lu xezr la xu.
- 26 ¿Guxasa, gúcale netu',
ne dutē xel-la' dxexache lazre' chiu', bselá netu'!

Salmo 45

- 1 Xu'u lázrdawa' tu dizra' xrtante,
na' gúl-laqueza' tu da naca chee Wenná Bea.
Gúl-laqueza' tu da bzuaj tu benne' dxuchálajleē cháwedau'.
- 2 Nacu' xrtánle'edxa ca xúgute bénneache.
Dxezílē'entu' ba neza chee dizra' dxuchálaju',
lawe' da nucá'anaqueze Dios Lue' cháwedau' tu chí'izqueze.
- 3 Bda' xia chiu' dxu'a le'u, Lue', benne' wal-la,
lu dutē xel-la' szren chiu', ne xel-la' dxenná bea chiu'.
- 4 Lu xel-la' szren chiu' chepe bánquezu'.
Bchine dizra' li, ne xel-la' dxexruij lazre', ne da xrlátaje,
na' guzéajni'i Cuinu' da zri'a ca'.
- 5 Zaj nalále'e xaga nalá xéche'ze chiu' ca',
da xelute na benne' xezr la xu ca' lau Lue',
ne cheajlechaze na lu lázrdau benne' ca' dxeledábague' Lue'.
- 6 Lataj blau naga dxe'u, Dios, naca na da chadía chacanna,
ne súdequeze na.
¿Xrlátaje naca ca dxenná be'u!
- 7 Nazri'inu' da naca xrlátaje, ne dxecuídenu' da calela.
Chee le na' ba nuzúa Dios chiu' Lue' xlátaju',
naga dxebéle'edxenu' ca le sa' ljwezru' ca'.
- 8 Dxelá zixre zra lanu' nen xala da naca na nizre xaga,
ne xiaj, da ca' dxelelá na zixre.
Lu xu'u lizru' da zácalle' na dxuluzú' Lue' lu da ba neza.
- 9 Bi nu'ula chee wenná bea ca' zaj zúabe' ládujla nu'ula
chiu' ca' zaj naque' blaudxa.
Chalá'a xabēla chiu' dxe' nu'ula gácabe' zru'ulu' nácube' oro
da za na xezre Ofir.
- 10 Bene, nú'uladau', ne gunná' xque, ne bze naga da nnia':

- Bzala lazru' lazriu' ne lizre xrau',
 11 na' benne' wenná bea sa lazre' xel-la' xrtan chiu'.
 Bzexruj lazru' lau le' lawe' da naca le' xranu'.
 12 Xelexé' nu'ula xezre Tiro lau lue', zaj nu'e da xelunne' chiu',
 na' xelenaba benne' gunní'a ca' gunu' tu culuén chee'.
- 13 Xrtanle'e naca bi nu'ula chee wenná bea lu xu'u naga zue'.
 Zra lánabe' nazí' lechítaje na oro.
 14 Xelexé'e-be' lau wenná bea, nácube' zra lánabe'
 da núale'e lechítaje na.
 Nu'ula wégu'du ca' chjácabe' cuzru lebe'.
 Nu'ula caní, nu'ula ljwézrebe' xuluzúabe' lawe' lue'.
- 15 Lu duté xel-la' dxebé, ne lu da ba neza xelexé'e-be',
 na' xelú'ube' lu xu'u lizru', wenná bea.
 16 Waláz chee xra xrna'u xelexezúa zri'inu',
 bi ca' gunu' xelenná beabe' du gabí'i xezr la xu.
 17 Guna' cheajlesá lazre' xúguté bénneache lau' lue'.
 Chee le na' xelúe lánana bénneache lue' chadía chacanna,
 ne gaxuane iza.

Salmo 46

- 1 Dios naque' Benne' dxuxúe' dxi'u, ne dxune' dxi'u
 benne' wal-la.
 Zúatequeze' gácalene' dxi'u gate dxededxu xel-la' zi'.
 2 Chee le na', quebe zrédexu lácala xru' xezr la xu nigá
 na' cheajlechaze xi'a ca' lu nísadau',
 3 ne lácala xeajxruga zren chee nísadau' xuluninne na,
 ne dxelúnle'e na schaga,
 na' welezrízequeze xi'a ca' ne chee da dxezrú'.
- 4 De tu xegu da dxunna na xel-la' dxebé lu xezre chee Dios,
 ne lu xu'u lánaxa chee Dios, Benne' nape' duté xel-la'
 szren.
- 5 Dios zue' xezre na', ne cabata' cuía xi na.
 Dxanísise' xide' gácalene' bénneache zaj zre'e xezre na'.
 6 Dxelezrébele'e benne' xezr la xu ca',
 na' dxelezrize benne' chee wenná bea ca'.
 Dxenné Dios ca dxenné guziu', na' dxexuna xezr la xu.

⁷ Dios, Bénnea' nape' dutę xel-la' waca, zúalene' dxi'u.
Dios na' cheę Jacob dxucache chawe' dxi'u.

⁸ Le da lé'ele da ca' nun Xránadxu.

Le nna' ca naca da dxebánedxu da nune' lu xęzr la xu.

⁹ Dxebeque zrię' wedil-la da dxelaca du gabí'i xęzr la xu.
Dxuzúzruje' da dxuzala na xaga nalá xéche'ze ca',
ne dxíchuje' xaga tuche' ca' cheę wedil-la,
na' dxuzezxe' da ca' zaj nache' benne' wedil-la ca'.

¹⁰ Dxenná Dios: “Le sua zrize, ne le xúnbea naca' Dios.
Naca' szrendxa ca zaj naca xúgute cue' xęzr la xu.
Naca' szrendxa ca dutę xęzr la xu.”

¹¹ Dios, Bénnea' nape' dutę xel-la' waca, zúalene' dxi'u.
Dios na' cheę Jacob dxucache chawe' dxi'u.

Salmo 47

¹ ¡Le capa na'le, le'e, xúgute bénneache!

¡Le güe lál'ana Dios nen dutę xel-la' dxebé!

² Dخال-la' zrédexu Xránadxu, nape' dutę xel-la' szren.

Naque' Wenná Bea zren dxenná bé'ene' dutę xęzr la xu.

³ Bzue' benne' xęzr ca' zran ní'adxu.

Bzue' dxi'u cheę nna be'edxu zánete cue' xęzr la xu ca'.

⁴ Bequé'ę tu xęzr la xu da gaca na cheędxu,

Da naca tu xęzr la xu xrtante cheę zri'ine zre sua Jacob,
benne' ca' nazrí'ine'.

⁵ Dxegüén Dios naga dxe'ę dxenná be'ę.

Dxelebezre luzu da dxulucuezre' gate dxegüén Xránadxu ga
na'.

⁶ ¡Le gul-la da gaca ba Dios!

¡Le gul-la!

¡Le gul-la da gaca ba Wenná Bea cheędxu!

¡Le gul-la!

⁷ ¡Dios naque' Wenná Bea dutę lu xęzr la xu nigá!

¡Le gul-la chee' nen dutę xel-la' dxéajni'i chee!

⁸ Dxe' Dios naga dxenná be'ę, lu lataj na' naca na lál'azxa.

Dxenná bé'ene' xúgute cue' xęzr la xu ca'.

⁹ Dxelezraga benne' dxelenná bé'ene' xúgute cue' xęzr la xu
tu zren nen bénneache cheę Dios cheę Abraham.

- 10 Benne' ca' dxelenná be'e du gabí'i xezr la xu
buludé'e' xel-la' dxenná bea chee' lu na' Dios.
Le' dxenná bé'ene' xúgute benne' wenná bea ca'.

Salmo 48

- 1 ¡Zrente naca Xránadxu!
¡Naca chee' güe lá'anale'edxu Le'
ga naca lu xezre chee Dios cheedxu,
da dxe' na lu xi'a lá'azxa chee'!
- 2 Sión, da naca na xi'a chee Dios, naca na sibe, ne xrtante.
Naca na xezre chee Wenná Bea zrente,
da dxunna na xel-la' dxebé dute xezr la xu nigá.
- 3 Dios ba blé'ene' dxucache chawe' dxi'u,
lu xu'u zaca ca' chee xezre chee' na'.
- 4 Belezraga benne' wenná bea ca',
na' belelé'e' chee xeledíl-lalene' xezre nigá,
- 5 na' gate belelé'ene' na, na' belexebánene'.
Belezzébe', na' buluzrúnnuje'.
- 6 Gulezré'e' lu da stebe,
ne gulezúe' xel-la' dxudía ca dxaca chee tu nu'ula
ba zua sane' bidau'.
- 7 Gulaque' ca da ca' dxeledá lawe' nísadau' dxexrite na
gate dxácale'e be' bdunu' lu nísadau'.
- 8 Bendxu ca da ben Dios, na' na'a ba ble'edxu na,
ga naca lu xezre chee Xránadxu, nape' dute xel-la' waca,
da naca na xezre chee Xránadxu Dios.
Le' guzúa chawe' xezre nigá chadía chacanna.
- 9 Ga naca lu xudau' chiu' Lue', Dios
dxajsá lázredxu ca naca xel-la' zri'i lazre' zren chiu'.
- 10 Gáteteze na' dxelúe lá'ana bénneache Lue',
na' ca naca xel-la' szren chiu' dxezrín na
du gabí'i xezr la xu.
Ca naca da xrlátaje dxenná be'u.
- 11 Xelebéle'e' bénneache zaj zre'e Sión.
Xelebéle'e' bénneache zaj zre'e xezre ca' chee Judá
ne chee da dxuchi'u chee'.
- 12 Le'e, bénneache chee Dios, le chechaj dxu'a xezre na',
ne le gulaba ca zaj naca xu'u sibe ca',
da dxuluzé chacha na xezre na'.

- 13 Le nna' xque ca naca ze'e zren naxechaj na xezre na!
 Le nna' xanne' ca zaj naca xu'u wal-la chee na,
 chee guzenle bi cheele ca naca xezre na'.
- 14 Dios nigá nácaqueze! Dios cheedxu chadía chacanna.
 Le' tu gulé'ezquezne' dxi'u neza.

Salmo 49

- 1 Le xen da nigá, le'e, benne' xúgute cue' xezr la xu.
 Le guzé nágale, le'e, benne' duté xezr la xu,
- 2 le'e, benne' blau, ne le'e, benne' xezícadxa,
 le'e, benne' gunní'a, ne le'e, benne' xache'.
- 3 Guchálajqueza' xel-la' sina,
 ne guzéajni'ida' le'e da xu'u lázrdawa'.
- 4 Guzé naga' tu dizra' sina.
 Gúl-laqueza' chee tu da nagache,
 ne quinnia' da zríadi'i na du chen.
- 5 ¿Bizr chee na' dxun na ba xen zreba' lu zra chee da stébe,
 gate naxechaj da calēla neda' da dxelún benne'
 dxeledábague' neda'?
- 6 Benne' ca' dxuluxrén lazre' da zaj de chee',
 ne dxulucá'ana szren cuine' lawe' da zaj nápalet'e.
- 7 Quebe xelexéquene' xelexá'awe' le sa' ljwezre',
 ne quebe gaca xulunézruje' Dios da guselá na le'
- 8-9 chee tu xelaca bánzqueze',
 ne chee cabata' xeluzru bel-la' dxen chee'
 lawe' da zrenté naca da dxexa'u na xel-la' nabán chee
 bénneache,
 ne cabata' seque' nu benne' quízruje' na.
- 10 Xelelé'ene' dxelátequeze benne' sina ca',
 ne xelúzruje' cáteze dxaca chee benne' xala ca',
 ne chee benne' lázrdau zide' ca',
 na' dxulucá'ane' xel-la' gunní'a chee' lu na' benne' xula ca'.
- 11 Dxeléquene' wazráqueze zri'ine zre sue' chadía chacanna,
 na' xelexegá'ana lizre' chee xelaca na chee xúgute cuen
 xrtia ljwezre',
 na' dxelule' la xezr la xu chee' ca' ca zaj nazí láqueze'.
- 12 Quebe xelexegá'anatequeze bénneache lu da ba lál'ana.
 Zaj naque' ca be xixre' ca', be dxeláteba'.
- 13 Ca da dxelune' naca na da xálaze,

- na' dxelexezaca ba lazre' xrtia ljwezre' ca' nen da
dxelennaze'.
- 14 Zaj naque' ca tu cue' zrila' zjácaba' lataj ba xa',
naga guxúe xel-la' gute leba'.
Benne' xrlátaje ca' xelenná bé'ene' benne' gunnía' ca'
gate za' chaní',
na' xelebía xi' da ca' guta' chee',
na' lataj ba xa' gaca na naga tu xelezúazqueze'.
- 15 Dios xexá'awe' xel-la' nabán chia' lu lataj ba xa'
lawe' da xeché'e neda' naga zúaqueze' Le'.
- 16 Quebe su' stebe gate nu benne' dxezrué'ene' xel-la' gunnía',
ne gate dxune' lizre' da zácale'edxa,
- 17 lawe' da gate gatie' quebe bi xexu'e,
ne quebe chéajle xel-la' gunnía' chee' le'.
- 18 Lácala dxácate naca bane' dxē cuine' zue'
lu da ba neza zrente,
na' dxelúe lá'ana bēneache le' gate dxepe bane',
- 19 san chu'e naga zaj zra xra xrtawe' ca',
ne cabátadxa lé'ene' xel-la' naxaní'.
- 20 Bēnea' dxelapa bēneache le' ba lá'ana san quebe
bi dxéajni'ine'
naque' ca be xixre' ca', be dxeláteba'.

Salmo 50

- 1 Ba gunné Xránadxu Dios, ne ba nutube' bēneache
chee' dute xezr la xu,
benne' zaj zre'e naga dxalaj gubizra,
ne benne' zaj zre'e naga dxebía na.
- 2 Lu xi'a Sión, da naca na xrtánle'e ba bzaní' Dios.
- 3 Xelá' Dios cheedxu, ne quebe sua zrie'.
Gálajqueze xi' lau Le',
ne gácale'e be' bdunu' da chechaj na Le'.
- 4 Xutúbequeze' benne' zaj zre'e xabáa na'ala,
ne benne' zaj zre'e xezr la xu,
chee' guchi'e chee' bēneache chee'.
- 5 Dxenné': "Le xutube benne' chia' ca',
benne' ca' belune' tu xel-la' wezría nen neda'
da buluzúa chúchue' nen dxen chee' béadu ca'."
- 6 Da zua xabáala gulé'e lau na naque' xrlátaje,

- lawe' da naca Dios Benne' guchi'e chee b́enneache.
 7 Dxenné': "Le xen, b́enneache chia', na' guchá'laja'.
 Le guzé nágale, benne' Israel, na' nnia'
 da gagu na zria cheele.
 Neda', Dios, naca' Dios cheele.
 8 Quebe til-la' le'e ca naca béadu ca' b́etele lawa',
 ne ca naca béadu ca' bzézele,
 da zaj zúaqueze na lawa' neda'.
 9 Quebe ca'a lu na'ale medu ca',
 ne chivo biu ca', b́e nápaquezle
 10 lawe' da zaj naca chia' xúgute b́e xixre' ca',
 ne zane gaxúa b́e xixre' zaj zraba' lu xí'adu ca'.
 11 Xu'u lu na'a xúgute b́e zua xrila,
 ne naca chia' xúgute b́e zaj naca banba'.
 12 Chela neda' dxeduna', quebe xapa' le'e ca'
 lawe' da naca chia' xezr la xu, ne xúgute da de lawe na.
 13 ¿Dxun na ba xen gawa' b́ela' bezre ca'?
 ¿Xí'aja' dxen chee chivo biu ca'?
 14 Le guzúa lau Dios da güe lá'anale Le'
 ne le gunezruj ca da guchebe lázrele lau Dios szrente.
 15 Bláwizra neda' lu zra zu' lu da zi' da xa',
 na' guselá' lue', na' lue' gapu' neda' ba lá'ana."
 16 Dios guzre' benne' wen da calela:
 "¿Bi dxéquenu' lue', dxuchá'laju' ca nadxixruj bi'a,
 ne dxenníu' ca naca chee xel-la' wezrí'a chia'?"
 17 Lue' dxecuídenu' neda' che dxusízreda' lue',
 ne dxuzú' chalá'ala dizra' chia'.
 18 Gate dxel'énu' gubán, na' dxunu' le' tu zren,
 ne nacu' tu zren benne' ca' dxeledálene' nu'ula
 quebe zaj naca zru'ule'.
 19 Dxuchá'lajquezu' da calela,
 ne tu dxúnzquezu' da wen lazre'.
 20 Tu dxennézquezu' da calela chee bi bíchequezu',
 Ne dxagu' zria chee bi chee xrná'aquezu'.
 21 Da caní b́enu', na' neda' guzúa' zrize.
 Gúquenu' naca' tu benne' ca nacu' lue'.
 Na'a wadíl-laqueza' lue', ne gulé'eda' lue' ca ba b́enu'."
 22 Le chéajni'i da nigá na'a, le'e dxal-la lázrele Dios.
 Ga gaze guzuzruj Dios le'e, ne québedxa sua nu guselá le'e.
 23 Bénnea' guzúe' lawa' da güe lá'ane' neda' gape'

neda' ba lá'ana,
 na' bēnnea' dxuxuchá cuine' chee gunē' da xrlátaje,
 gulé'eda' le' ca guselá' le', naca' Dios chee'.

Salmo 51

- 1 Gúcale neda', Dios, lu dutē xel-la' dxexache lazre' chiu'.
 Dutē xel-la' dxexache lazre' chiu' bsula zria da nabaga'.
- 2 Gudibe neda' ca naca da calela da nuna',
 ne bca'ana chawe' neda' chee dul-la da bēna',
- 3 lawe' da dxexúnbe'a ca bēna' gudábaga' Lue',
 ne ca naca dul-la chia' tu dxáguze na zria neda'.
- 4 Lau' Lue' bēna' dul-la.
 Awe', lau' Lué'queze, ne ba bēna' da calela lau' Lue'.
 Caní dxaca na chia' chee gaca bea nacu' xrlátaje lu da
 dxenníu',
 ne nacu' du lazre' ca da dxuchi'u chee bēnneache.
- 5 Gunná' xque, báchequeze nabaga' dul-la gate gúlajtea',
 ne lu dul-la zúaqueza' gate guzrán xrna'a neda'.
- 6 Lue' dxezá lazru' sua da li lu xichaj lázrdawa',
 ne lu xichaj lázrdawa' ba bzéajni'inu' neda' da naca sina.
- 7 Bca'ana chawe' neda' nen da na' dxuchínenu',
 na' xegá'ana' xrlátaje.
 Gudibe neda', na' gaca' chíchedxa ca tu bezxe'.
- 8 Bēn xenda' xel-la' dxebé, ne da ba neza,
 na' xelexezí' le dipa zrita xu'a, da ba gudíchaju'.
- 9 Quebe gusá lazru' ca naca dul-la da bēna',
 na' bsula xúgute da calela da nuna'.
- 10 Dios, bzua neda' tu lázrdawa' xrlátaje,
 ne bzua tu be' li lazre' lu xichaj lázrdawa'.
- 11 Quebe gucuasu' neda' lau' Lue',
 ne quebe xeca'u lu xichaj lázrdawa' be' lál'azxa chiu'.
- 12 Bexunna neda' xel-la' dxebé chee xel-la' weselá chiu',
 ne bzua chuchu be' chawe' da xu'a.
- 13 Nadxa gusédeda' benne' ca' dxelune' da zrinnaj
 ca dxaca lazru' xelune',
 na' benne' dul-la ca' xelexexaque' chiu' Lue'.
- 14 Bselá neda' lu zria da nabaga', betia' benne'.
 Lue' Dios, nacu' Dios dxuseláu' neda',
 na' gúl-laqueza' chee da xrlátaje nacu' Lue'.

- 15 Xran, gusalaj dxu'a,
na' guzenda' bēnneache da dxue lá'ana' Lue'.
- 16 Quebe dxaca lazru' béadu ca' gutia'-ba' lau',
ne quebe dxaca lazru' béadu ca' guzézxea' lau'.
- 17 Da guzúadxu lau Dios da dxaca lazre' naca na
tu lázxdau dxexruj lazre'.
Tu lázxdau dxexruj lazre', ne da dxexíaje lazre'
quebe guzú' chalá'ala, Dios.
- 18 Dute xel-la' zri'i lazre' chiu', bēn gaca chawe' chee
xēzre Sión.
Bsegula ze'e da nazechaj na xēzre Jerusalén.
- 19 Nadxa xezaca ba lazru' nen béadu ca' gútentu' lau'
dute da naca xrlátaje cheentu',
ne béadu ca', ne da du ca' guzézxentu' lau'.
Nadxa xelútiē' béadu ca' lu cugu chiu'.

Salmo 52

- 1 ¿Bizr chee na' dxucá'ana szren cuinu' chee da calela
da nunu', lue', benne' wal-la?
Tu zúazqueze xel-la' dxexache lazre' chee Dios.
- 2 Tu dxuchálajzquezu' chee da calela da gunu' chee le sa'
ljwezru'.
Da dxennú' naca na ca tu xia da nalále'e, dxezí xē'u
ljwezru'.
- 3 Nazrí'idxenu' da calela quézcala da xrlátaje,
ne dxedánnedxenu' da wēn lazre' quézcala da li.
- 4 Nazri'inu' xúgute dizra' da dxulucá'ana ditaj na bēnneache,
lue', benne' dxezí xē'u.
- 5 Chee le na' guzría xi' Dios lue' tu chí'izqueze.
Waxēle' lue', ne xequé'e lue' naga zúaquezu',
ne gucuase' lue' naga zaj zra' benne' ban ca'.
- 6 Xelelé'e benne' xrlátaje ca' da nigá, na' xelezrébequeze'.
Xuluzrízrqueze' chiu' lue', xelenné':
- 7 “Le na' xque, benne' nigá quebe bxren lazre' Dios
chee gucu'ujē' le'.
Bxren lázrequeze' ca naca xel-la' gunnía zrentē chee',
ne guzúaqueze' lu da calela da dxunē'.”
- 8 Neda' naca' ca tu xaga olivo xa'a lu xu'u lizre Dios.
Tu dxuxrén lázrezqueza' xel-la' dxexache lazre' chee

Dios chadía chacanna.

- 9 Güe lá'anaqueza' Lue' chadía chacanna lawe' da benu' da caní,
ne cueza lazra' lau Lue' lawe' da naca na xrlátaje lau xúgute
benne' chiu' Lue'.

Salmo 53

- 1 Benne' xala ca' dxelenná lu lázrdawe': Quebe zua Dios.
Xúgute' zaj naque' sban, ne zaj nune' da calela.
Quebe nu chilá' benne' dxune' da xrlátaje.
- 2 Dios zue' xabáa dxenné' bēnneache
chee lé'ene' che zua tu benne' sina,
bēnnea' dxape' Dios ba lá'ana.
- 3 Xúgute' benne' zaj nabéaj xíchaje' Dios.
Xúgute' zaj naque' sban.
Quebe nu chilá' benne' dxune' da xrlátaje, netú gue'.
- 4 Dxenná Dios: “¿Quebe dxeléajni'i benne' caní
dxelune' da calela?
Dxele'aj dxelawe' da dxelebane' chee bēnneache chia',
ne quebe dxelexílaje' neda'.”
- 5 Za zrin zra xelexruse' ca da quebe ne xezezaque',
lawe' da gusedinnaj Dios zrita ca' chee benne'
guledábage' bēnneache chee'.
Dios na' nuzúe' chalá'ala benne' ca',
na' bēnneache chee' xuluzría xi'e benne' ca'.
- 6 Dxenaba' Dios guné' dxuaj Sión da gácale' na
benne' Israel ca'.
Gate ba nun Dios xezezrín bēnneache chee' lu xezr la xu
cheéqueze',
xelebé zri'ine zre sua Jacob,
ne xezezúa lu da ba neza benne' Israel ca'.

Salmo 54

- 1 Bselá neda', Dios, nen xel-la' waca chiu'.
Gúcale' neda', Dios, nen xel-la' wal-la chiu'.
- 2 Bene da dxenaba' lau', Dios, ne bechebe chia'.
Bze naga da guchálajlena' Lue'.

- ³ Za'aca benne' snia ca' xeledíl-lalene' neda'.
Benne' xichaj zra'a ca' dxelaca lazre' xelútie' neda',
benne' ca' quebe dxelape' ba lá'ana Lue', Dios.
- ⁴ Dios naque' Benne' dxácalene' neda'.
Xránadxu Dios zúalene' benne' ca' dxuluxúe' neda'.
- ⁵ Ca naca da calela dxelún benne' dxeledábague' neda',
xuzrí'i Dios na chee benne' ca'.
Guzría xi'e benne' ca' lawe' da naque' li lazre'.
- ⁶ Du lazra' cu'a da gudéa' lau Lue', Xran.
Güe lá'anaqueza' Lau' lawe' da nácale'e na xrlátaje.
- ⁷ Bseláu' neda' lu xúgute da štebe guzúa'.
Ble'eda' gulebía xi' benne' ca' dxeledábague' neda'.

Salmo 55

- ¹ Bze naga, Xran, ca da dxuchálajlena' Lue',
ne quebe guzú' chalá'ala ca da dxenaba' lau'.
- ² Guzúa ban lazre', ne bechebe chia'.
Dxuláwizra' Lue' lu da dxuchálaja', ne zua' štebe,
³ lawe' da benne' dxeledábague' neda' dxelenné' chia',
ne lawe' da dxelún la benne' wen da calela neda'.
Bulusebague' neda' da zrinnaj,
ne duté xel-la' dxelezá'a zaj nau zi' xuzre' neda'.
- ⁴ Dxe' gunne xue lázrdawa' lu be'la' dxen chia',
ne dxuchebe xel-la' gute neda'.
- ⁵ Zua' lu xel-la' dxezrebe, ne dxezríztequeza',
na' zúale neda' da dxuchebe na neda'.
- ⁶ Na' gunnía': ¿Nuzra gunna neda' xrila' ca xrila tu bsia
chee cha'a lu be'la naga xezí' lazra'?
- ⁷ Da líqueze guzrúnnuja' zítu'la,
na' súaqueza' le'e xixre' lawe' lataj.
- ⁸ Guna' ba xuzre la' lu be' bdunu', ne lu be' wal-la.
- ⁹ Bzria xi' benne' ca' dxelune' da calela, Xran.
Bzaga naze da dxelune',
lawe' da ble'eda' da zrinnaj, ne da calela da dxelune'
lu xezre.
- ¹⁰ Te zra chizrela dxeledé' lawe' ze'e da naxechaj na xezre,
ne dxelune' da zrinnaj, ne da calela lu xezre nigá.

- 11 Nazrate xezre nigá da calela da dxeluné',
ne tu dxelúnzqueze' da wen lazre', ne xel-la' dxezí xe
lu neza chee na.
- 12 La guca tu benne' bènnea' dxedábague' neda',
bènnea' ben le' chia',
na' bchaga lawa' da na'.
La guca tu benne' dxecuídene' neda' bènnea' gudábague'
neda',
na' bcache cuina' lau le'.
- 13 Lue', bènnea', gucu' ca tu le sa' ljwezra'.
Bsi'u neda', ne gucu' tuze neda'.
- 14 Tu zren bchálajdxu du lázredxu,
ne lu xel-la' zri'i lazre' gudadxu lu xu'u lizre Dios.
- 15 Dios, ben quela xel-la' gute benne' ca' dxeluné'
da calela chadite.
Ben xelexú'e lu lataj ba xa' zaj naca bane',
lawe' da nazrate xu'u lizre' da calela da dxeluné'.
- 16 Ca naca chia' neda', bláwizra' Dios,
na' Xrana' Dios bselé' neda'.
- 17 Che zílala, ne wagubizra, ne ca dxebía gubizra
guchálajlequeza' Dios, ne guláwizra' Le',
na' Le' xenne' chia'.
- 18 Xexáawe' bènne'du xu'a lu wedil-la da dxaca chia' neda',
ne guné' cueza' zri lazra',
lácala zaj zra' zánete benne' dxeledábague' neda'.
- 19 Wene Dios, na' guzría xí'queze' benne' ca'.
Naque' Bènnea' zúatequeze' dxenná be'e nédxute.
Caní guné' chee benne' ca' lawe' da quebe dxuluché'e
ca dxeluné', ne quebe dxelezrebe' Dios.
- 20 Guchisa na' benne' wen da zrinnaj chee gu'e benne' ca'
dxelebeza zri lazre' nen le'.
Gudíchaje' xrba chee xel-la' wezría da bene' nen benne' ca'.
- 21 Dizra' bchálaje' zaj naca na dizra' zren lazre',
san xu'u lázrdawe' xel-la' dxezrá'a.
Dxuné' xrtante dizra' dxuchálaje',
san zaj naca na ca xia da zaj nalále'e.
- 22 Bda xua chiu' cuzru Xránadxu, na' Le' gutipe' lazru'.
Québequeze gu'e lataj cheajchaze benne' chawe' tu chi'ize.
- 23 Lue', Dios, gunu' xelexú'u benne' ca' dxeluné'

da calela lataj ba xa',
 benne' dxelute benne', ne benne' dxelezí xē'e,
 gate quebe ne xelezrine' gachaj catite dxal-la' xelaca bane',
 san neda' guxrén lazra' Lue'.

Salmo 56

- ¹ Bexache lazre' neda', Dios, chee quebe xuluzría xi'
 bēnneache neda'.
 Tu zra tu zra dxulusaca zi' bēnneache neda', benne' ca'
 dxeledíl-lalēne' neda'.
- ² Te zra chizrela benne' ca' dxeledábague' neda'
 dxulucá'ana dítaje' neda',
 lawe' da zaj zra' benne' zante, benne' dxeledíl-lalēne' neda'
 lu xel-la' dxulucá'ana szren cuine'.
- ³ Lu zra dxezreba', dxuxrén lazra' Lue'.
- ⁴ ¡Dxuxrén lazra' Dios, na' güe lá'ana' xrtizre'!
 ¡Dxuxrén lazra' Dios, na' québedxa zreba'!
 ¿Bízraqueze gaca gun bēnneache chia' neda'?
- ⁵ Xúgute zra dxuluchuque' xrtizra'.
 Ca naca da dxelegú'u be'e zaj naca na chee xelune' chia'
 da calela.
- ⁶ Dxelezrague', ne dxulucache cuine'.
 Dxelenná' xánnie' ca da dxuna'.
 Dxelilaj lazre' ca xelune' xelútie' neda'.
- ⁷ Dios, bxue ca da dxelune',
 na' dutē xel-la' dxezrá'a chiu' bzria xi' benne' ca'.
- ⁸ Nézqueznu' Lue' ca dxuzrúnnuja' lau benne' ca'.
 Bsa lazre' nisa da ba gudxezra'.
 ¿Quebe zaj naxúaj na lu xiche chiu'?
- ⁹ Gate dxuláwizra' Dios, lu zra ná'queze xuluxuzrunnuj
 benne' ca' dxeledábague' neda'.
 Nézquezda' zúale Dios neda'.
- ¹⁰ ¡Dxuxrén lazra' Dios, na' güe lá'ana' xrtizre'!
 ¡Dxuxrén lazra' Xránadxu, na' güe lá'ana' xrtizre'!
- ¹¹ ¡Dxuxrén lazra' Dios, na' québedxa zreba'!
 ¿Bízraqueze gaca gun bēnneache chia' neda'?
- ¹² Nabaga' ca da nachebe lazra' chiu', Dios.
 Gúl-laqueza' da güe lá'ana' Lue'.
- ¹³ Ba bseláu' bēnne'du xu'a lu xel-la' gute,

ne bebéaju' ni'a naga zaj zua cheajlechaze na,
chee gaca chu'a lau Dios lu xel-la' naxaní' da dxunne'
chee benne' ca' zaj naca bane'.

Salmos 57

- 1 Bexache lazre' neda', Dios.
Bexache lazre' neda', lawe' da dxuxrén lazra' Lue'
dute lázrdawa'.
- Quezru' neda' ca dxun bedxuj dxézreba' zrí'ineba'
zran xrílabá', cadxa te chee da štebe caní.
- 2 Guláwizra' Dios, Benne' zrente.
Guláwizra' Dios chee gácalene' neda'.
- 3 Naga zúate' xabáa chee' sel-le' nu guselá neda' lu na'
bénnea' dxáca lazre' guzría xi'e neda'.
- Gusel-la Dios xel-la' dxexache lazre', ne da li chee'.
- 4 Zua' lu da štebe ca tu benne' zue' ládujla bezre xixre' ca'.
Xu'a ládujla bénneache zaj naque' ca bezre xixre' ca'
dxeláguba' bénneache.
- Dizra' da dxelenné' chia' zaj naca na ca tu xia natuche',
ne xaga nalá xéche'ze ca',
na' xrtizre' zaj naca na ca tu xia da nalále'e.
- 5 Xega'ana szrénquezu' lu xabáa, Dios.
Xel-la' szren chiu' sua na lawe' dute xezr la xu.
- 6 Ba zaj nabeche' xralaj chee xel-le' neda'.
Ba dxedú lazra' lu da dxaca chia'.
Ba zaj naxene' tu xedxu chee cheajcházia' lu'u'le na.
Lu'u'le da na' ba xeajlecházqueze le'.
- 7 Ba zúatequeze lázrdawa', Dios.
Ba zúatequeze lázrdawa' chee gúl-laqueza' da güe lá'ana'
Lue'.
- 8 Bebán lazre', bénne'du xu'a, ne le xebán lázrele,
le'e dxínnele da dxúl-lalēnle, ne da zríadi'i na du.
Che zílala chásaqueza'.
- 9 Güe lá'anaqueza' Lue' ládujla bénneache chiu', Xran.
Gúl-laqueza' chiu' lau benne' xúgute cue' xezr la xu,
- 10 lawe' da naca xel-la' dxexache lazre' chiu' zrendxa ca xabáa,
na' da li chiu' naca na zrendxa ca beuj bza ca'.
- 11 Xegá'ana szrénquezu' lu xabáa, Dios.
Xel-la' szren chiu' sua na lawe' dute xezr la xu.

Salmo 58

- 1 Le'e dxenná beale ¿da li dxuchálajle da naca xrlátaje?
¿Dxuchí'ale ca naca da li chee bēnneache chia'?
- 2 ¿Cabíze'!
¡Lu lázrdaule dxugú'u beale da zrinnaj!
¡Stébele'e dxuzúale bēnneache lu xezr la xu chia'!
- 3 Zaj nazrinnaj lázxdau benne' ca' zaj nabéaj xíchaje' neda'
gate gulálajte'!
Belexase dínnaje' dxelún lazre' gate gulezante xrne'e le'.
- 4 Dizra' da dxelenné' zaj naca na da dxelute bēnneache
ca da zria zran lazxa beła'.
Zaj naca na ca beła' snia, be nácaba' be cuezru.
- 5 Quebe dxenba' chi'i benne' dxunné' leba'
lácala dxennéle'e xrtandau'.
- 6 Dios, gudichaj lazxa benne' ca'.
Gudichaj, Xran, lazxa benne' ca' zaj naque' ca bezre xixre'
ca'.
- 7 Ben xelexenítie' ca nisa da dxelalaj na lu xu.
Gate dxulusane' xaga nalá xéche'ze chee',
ben xeledé na chalá'ala.
- 8 Ben xeledé chee' ca dxaca chee be zaga dxelexexúnaba'.
Ben québedxa xeledé'ene' gubizra ca tu bidau' dxálajbe'
ba nátebe'.
- 9 Nédxula gate quebe ne la xesu' lu xi'
xecá'a Dios benne' ca' tu lu be' bdunu',
benne' zaj naca bane', ne benne' ca' zaj zua xelatie'.
- 10 Wabé benne' xrlátaje gate lé'ene' xebéaj lazre' Dios
benne' ca' dxelune' da calela.
Guchuchu guláje' dxen chee benne' zaj nabéaj xíchaje'
Dios.
- 11 Nadxa nne bēnnea': "Da líqueze de lazruj chee
benne' xrlátaje.
Da líqueze zua Dios, Bēnnea' dxuchi'e chee bēnneache
zaj zre'e lu xezr la xu."

Salmo 59

- 1 Bselá neda' lu na' benne' ca' dxeledábague' neda', Dios
chia'.
Bselá neda' lu na' benne' ca' dxelune' chia' da calela.

- 2 Bselá neda' lu na' benne' ca' dxelunę' da zrinnaj.
 Bselá neda' lu na' benne' ca' dxelutię' benne',
- 3 lawe' da dxelilaj lazre' xelútię' neda'.
 Zaj nazraga benne' wal-la ca' chee xeledíl-lalene' neda',
 quegá lawe' da bi zria nabaga', ne quegá ne chee
 dul-la nuna' neda', Xran.
- 4 Lácala quebe bi bena' chee benne' ca',
 zá'aca chégüę', ne dxulucueze' bi xelunę' chia'.
 Bebán chee xidu' naga zua', na' le'enu' da dxelunę'.
- 5 Lue', Xran, Dios chee benne' zan dxjaque' wedil-la,
 ne Dios chee benne' Israel ca',
 bebán chee gudéu' ba xa' benne' xúgute cue' xęzr la xu.
 Quebe xexache lazru' xúgute benne' ca' dxeledábage' Lue',
 ne dxelunę' da zrinnaj.
- 6 Xelelé'e gate cuía gubizra, ne xelebezre xę'e
 ca dxelún becu', na' xeléchaje' xęzre.
- 7 Gunná' xque, da dxuluchálaje' naca na ca da dxexexębe'.
 Dizra' dxelenné' zaj naca na ca xia zaj nalá na,
 lawe' da dxelenné': “¿Nuzra xene?”
- 8 Lue', Xran, guzrizru' chee benne' ca'.
 Gun lau' chee benne' xúgute cue' xęzr la xu ca'.
- 9 Zaj naca wal-la benne' ca' dxeledábage' neda'.
 Cueza lazra' Lue' lawe' da dxucu'uju' neda', Dios.
- 10 Dios, Bénnea' dxexache lazre' neda', cuía lawę' lawa' neda'.
 Dios gunę' le'eda' gaca chee benne' ca' dxeledábage' neda'
 ca da dxezá lazra'.
- 11 Quebe gutiu' benne' ca', chee quebe xelal-la lazre'
 bėnneache chia' ca da gunu'.
 Bese dinnaj benne' ca' nen xel-la' waca chiu'.
 Lue', Xran, Benne' dxucu'uj netu', ben cheajlecházie'.
- 12 Ben xeledule' lu xel-la' dxulucá'ana szren cuine',
 ne chee dul-la dxelunę' lu da dxuluchálaje',
 ne ne chee dizra' schanni', ne da wen lazre' da dxelenné'.
- 13 Bzria xi'e lu xel-la' dxęzrá'a chiu'.
 Bzria xi'e chee québedxa xelezúę'.
 Dios, ben xeleque be'ene' dxenná be'enu' zri'ine zre sua
 Jacob.

Dxenná be'u du ca naca xezr la xu.

- 14 Dxelelé'e gate dxebía gubizra, ne dxelebezre xē'e
ca dxelún becu', ne dxeléchajē' xezre.
- 15 Dxeledé' ca benne' dxeledaze', dxelíljajē' da xelawē',
na' che quebe dxeléljane', na' du xēla dxelawē' zria tuē'
xetúe'.
- 16 Neda' gúl-laqueza' cheē xel-la' waca chiu',
na' che zílala güe lá'ana' xel-la' dxexache lazre' chiu',
lawe' da gúcalēnu' Lué'queze neda',
ne bcu'uju' neda' gate guzúa' lu da stébele'e.
- 17 Lue' dxutipu' lazra', na' gúl-laqueza' chiu',
lawe' da nacu' Lue', Dios, Bénnea' dxucu'uje' neda',
ne Dios, dxexache lazru' neda'.

Salmo 60

- 1 Dios, Lue' ba bzu' netu' chalá'ala, ne bēnu' xejcházentu'.
Bzrá'alē'enu' netu'.
Na'a bedá gácalēnu' netu'.
- 2 Bēnu' guzrú' xezr la xu, ne bēnu' bxalaj na.
Bexún na naga bxalaj na lawe' da dxebía xi na.
- 3 Bēnu' blé'entu' netu', benne' chiu', da naca stébele'e.
Bēnu' guca cheentu' ca güé'entu' tu da bēn na
xeajcházentu'.
- 4 Bnézruju' tu da dxulé'e lau cheē benne' dxelezrebe' Lue',
Da xeluxre' cheē gulé'e lau da naca li.
- 5 Cheē xeelá benne' ca' nazrí'iqueznu' Lue',
bsel-la lē' dutē xel-la' waca chiu', ne bene chia'.
- 6 Dios gunné' lu lataj lá'azxa cheē: "Wabéquezda' neda'.
Gunna' late weaj cheēle xezr la xu cheē benne' Siquem,
ne gudxixra' cheēle xezr la xu de cuita xegu Sucot.
- 7 Chia' naca xezr la xu Galaad, ne chia' naca xezr la xu
cheē zri'ine zre sua Manasés.
Xezr la xu cheē zri'ine zre sua Efraín naca na ca
tu da napa chí'i na xíchaja'.
Xezr la xu cheē zri'ine zre sua Judá naca na naga dxenná
be'a.
- 8 Xezr la xu cheē benne' Moab naca na ca tu

zriga' da xuzru nisa guná'a,
na' xezr la xu chee benne' Edom guchichan' nen zrela'.
Si'a ba neza xezr la xu chee benne' Filistea."

- 9 ¿Nuzra che' neda' chee guzétaja' xezre da naxechaj na ze'e sibe?
¿Nuzra che' neda' chee guzétaja' benne' Edom ca'?
- 10 ¿Quegá Lue' na' che'u neda', Dios, nacu' Bénnea' bzue' netu' chalá'ala,
ne quebe guxeájlenu' benne' cheentu' ca', benne' dxjaque' wedil-la?
- 11 Gúcale netu' chee séquentu' tíl-lalentu' benne' ca' dxeledíl-lalene' netu',
lawe' da naca dácheze xelácale bénneache netu'.
- 12 Tu zren nen Dios gundxu tu da zrente,
na' Le' gulague' benne' ca' dxeledíl-lalene' dxi'u.

Salmo 61

- 1 Bene, Dios, da dxuláwizra' Lue'.
Bze naga da dxuchálajlëna' Lue'.
- 2 Zitu' naga zua lazria' dxuláwizra' Lue', lawe' da dxedú lazra'.
Guché' neda' naga zua Bénnea' naque' ca tu xi'a xiaj,
Bénnea' nácadxe' szren ca neda',
- 3 Nacu' Lue' Benne' nuxrué' neda',
ne nacu' ca tu ze'e xiaj da dxucu'uj na neda' lau benne' ca' dxeledábage' neda'.
- 4 Tu súazqueza' lu xu'u lá'azxa chiu'.
Sua chawa'a cuitu' Lue' ca zaj zua chawe' bedxuj dxé'enedu ca'
zran xrila bedxuj.
- 5 Lawe' da bennu' Lue', Dios, ca da guchebe lazra' chiu',
benu' napa' ca da dxelapa benne' ca' dxelezrebe' Lue'.
- 6 Gunu' gaca bana' neda', wenná bea, zánete zra.
Iza chia' xelaca na ca da zaj naca chee chupa cuen bénneache.
- 7 Tu súazqueza' lau', Dios.
Bcueza xel-la' dxexache lazre' chiu', ne da li chee xulucá'ana chawe' na neda', wenná bea.

⁸ Caníqueze gúl-laqueza' chee lau' tu chí'izqueze,
ne gúnqueza' tu zra tu zra ca da guchebe lazra'.

Salmo 62

¹ Tuze nen Dios dxebeza zri lazre' bènne'du xu'a.
Léqueze' dxuselé' neda'.

² Tuze Le' dxucu'uje' neda', ne dxuselé' neda'.
Naque' Bénnea' dxuxre' neda', na' quebe negue lazra'.

³ ¿Ajatezcha' gucuézale da gunle chee tu benne',
na' dxunle ba xen xúgutēle guzría xile le',
ca dxun tu benne' dxuchínajē' tu ze'e da ba de chalá'ala,
u tu le'aj da ba guzru'?

⁴ Dxunle tuze dizra' ájazra xebéajle neda' lu xel-la' szren
chia'.
Nazrí'ile da wen lazre'.
Nen dxú'ale dxennele da xrlátaje, san xu'u lázrdaule da
calela.

⁵ Lue', bènne'du xu'a, guleza lazre' tuze Dios,
lawe' da naca Le' Bénnea' dxebeza lazra'.

⁶ Tuze Le' dxucu'uje' neda', ne dxuselé' neda'.
Naque' Bénnea' dxuxre' neda', na' quebe negue lazra'.

⁷ Naca Dios Bénnea' dxuselé' neda', ne naque' da ba neza
chia'.
Naca Dios Bénnea' dxucu'uje' neda', ne Benne' dxuxre'
neda'.

⁸ Le cueza lazre' Le' tu chí'izqueze, le'e, bènneache.
Le xe'e ca da dxezá lázrele.
Naca Dios Bénnea' dxuxre' dxi'u.

⁹ Da líqueze, da dácheze zaj naca bènneache,
ne ca tu da wen lazre' benne' zren ca'.
Quebe bi dxel'é tu lu zrgú'unsá.
Zaj nácadxē' zraze ca tu be' da dxecá'a lázredxu.

¹⁰ Quebe guxrén lázrele da sile gate dxexúbele,
ne quebe gucá'ana szren cuínale chee da ca' dxebanle.
Che dxegula xel-la' gunnía chee, quebe xezaca ba lázrele
chee da na'.

¹¹ Tu lászaze gunná Dios:
na' chupa lasa benda' da nigá:

Cheę Dios naca xel-la' waca.

¹² Chiu' Lue', Xran, naca xel-la' dxexache lazre'
lawe' da dxunézruju' lazruj cheę tu tu bėnneache
cáteze da zaj nune'.

Salmo 63

- ¹⁻² Dios, Lue' nacu' Dios chia'.
Dxebile bėnne'du xu'a da naca chiu',
na' bėla' dxen chia' dxezá lazre' na da naca chiu'.
Naca chia' ca zúaqueza' tu xęzr la xu bizre naga
quebe bi nisa de.
Dxaní'siseze xida' lau Lue' cheę le'eda' xel-la' waca
chiu',
ne xel-la' szren chiu',
cáteze ba ble'eda' da naca chiu' lu lataj lá'azxa chiu'.
- ³ Cháwedxa naca xel-la' dxexache lazre' chiu'
ca xel-la' nabánqueze.
Cheę le na' güe lá'anaqueza' Lue'.
- ⁴ Caníqueze nnia' chiu' da xrlátaje dxácate naca bana'.
Cheę gucá'ana szrena' Lau' chísaqueza' na'a.
- ⁵ Xélaje bėnne'du xu'a da naca na ca bese zrita,
ne bėla' da dxánnele'e,
na' dutę xel-la' dxebé güe lá'anaqueza' Lue'
- ⁶ gate dxajsá lazra' chiu', ne dea' ga dxata',
ne gate dxulaba lazra' ca naca chiu' gate dxennaza'
chizrela.
- ⁷ Lawe' da dxácalenu' neda', béle'ęda' cuitu'
ca dxelún bedxuj dxé'enedu ca' zran xrila bedzuj.
- ⁸ Naca bėnne'du xu'a Lue' tuze.
Nen na'u wal-la nuxru' neda'.
- ⁹ Benne' ca' gulezá lazre' xuluzría xi'e neda'
cheajlecházie' lataj ba xa'.
- ¹⁰ Xelebía xi'e lu xia nalá.
Xelaque' da xelagu becu' xixre' ca'.
- ¹¹ Neda', wenná bea, beda' lu da naca cheę Dios.
Xegá'ana ba lá'ana núteteze benne' dxuluchínene' la',
lawe' da xelezxuj dxu'a benne' ca' dxelenné' da węn
lazre'.

Salmo 64

- 1 Dios, bze naga chi'a lawe' da zua' stebe dxuláwizra' Lue'.
Bxue xel-la' nabán chia' lawe' da dxezreba' bi xelún benne'
ca'
dxeledábague' neda'.
- 2 Bcache chawe' neda' chee quebe xelún benne' wen
da calela chia' ca da dxelezá lazre',
ne chee quebe xelún benne' dxelún da zrinnaj chia'
ca da zaj nune' xelune' chia'.
- 3 Dizra' dxuluchálaje' zaj naca na ca xia zaj nalále'e na,
ne dxelenné' schanni' ca dxun tu benne' dxusane'
xaga nalá xéche'ze chee'.
- 4 Caní dxelenné' bagácheze chee xelune' cheajlechaze
benne' zaj naque' li lazre'.
Chadite dxelune' na, ne quebe bi dxelezrebe'.
- 5 Dxelune' ba xuzre xelune' da zrinnaj da zaj nune' xelune',
na' dxuluzúe' xralaj ca' chee xelee' bénneache,
dxelenné': "¿Nuzra le'e da dxundxu?"
- 6 Dxelíflaje' ca zaj naca da zrinnaj xelune',
ne dxelenná' xánnie' ca zaj naca na.
Ca da zaj xu'u xichaj lázrdawe' zaj naca na stébele'e
ca zaj naca lázrdauqueze'.
- 7 Dios guné' benne' ca' we' nen tu xaga nalá xéche'ze chee'.
Chadite xelu'e xízrawe' zren ca'.
- 8 Dizra' buluchalaj benne' ca' xelún na cheajlecházie',
na' xelezrebe xúgute bénneache gate xelee'ene' benne' ca'.
- 9 Nadxa xelezrebe xúgute bénneache, ne xuluzenne'
ca da nun Dios,
na' xuluxúnbe'e ca zaj naca da bene' Le'.
- 10 Béqueze benne' xrlátaje lau Xránadxu, ne guxrén lazre' Le',
na' xelezúa lu da ba neza xúgute benne' zaj naque' li lazre'.

Salmo 65

- 1 Naca chiu' Lue', Dios, güe lá'anantu' Lue' lu xezre Sión,
na' guntu' da guchebe lázrentu' chiu'.
- 2 Lue' dxénqueznu' da dxuchálajlentu' Lue',
na' xelee' lau Lue' xúgute bénneache.
- 3 Nabágale'a da zrinnaj da bena',
san Lue' dxunite lau' ca da gudábagantu' Lue'.

- 4 Ba neza zrentę naca na cheę bénnea' dxeca'u Lue',
ne dxenníu' le' gaque' chiu', cheę súaqueze' lataj lá'azxa
chiu'.
Xélajquezentu' da xrlátaje da de lizru', da ca' da zaj de
xudau' lá'azxa chiu'.
- 5 Lu da xrlátaje chiu' gunu' da zaj naca zrentę gate gunu'
ca da dxenábantu' Lue', Dios, Benne' dxuselé' netu'.
Xúgute bénneache zaj zra' dute xęzr la xu dxelebeza lazre'
Lue',
ne cá'anqueze dxelebeza lazre' benne' dxeledé'
zítu'la lawe' nísadau'.
- 6 Lué'queze dxuzúa chuchu' xi'a zren ca' nen xel-la' waca
chiu'.
Nácaquezu' Benne' wal-la.
- 7 Dxebeche zriu' nísadau' gate dxelucu na,
ne schaga da dxelún xeajxruga cheę na.
Dxebeche zriu' benne' xęzr la xu gate dxeledábague' Lue'.
- 8 Cheę le' na' benne' zaj zre'e dute xęzr la xu
xelezrebe' ca naca da zrentę da dxunu'.
Dxuzú' lu da ba neza bénneache zaj zra' du gabí'i xęzr la xu.
- 9 Dxenna'u xęzr la xu, ne dxesel-lu' nisa xiuj.
Dxunu' dxúnnale'e na lina cheę na.
Nuzúaquezu' lu xęzr la xu xęgu ca' da zaj dele'e na nisa.
Dxucuezu' zrua' za da xelagu bénneache,
ca ba núnquezu' gaca na.
- 10 Dxesel-lu' nisa xiuj naga ba zaj nune' na'.
Dxunu' dxexaca na xu xa'a.
Dxuculu na nen nisa xiuj na'.
Dxunu' dxelegula chawe' da du ca' ba zaj naxaza na.
- 11 Dxunu' dxelexezí' bénneache ba neza tu iza tu iza
ne cheę da dxunézruju',
na' ca zaj naca beuj bza chiu' dxelunna na xiuj
da dxun na dxelegula chawe' da zaj naza bénneache.
- 12 Dxelunna na xiuj naga dxeledá be xíxre'du ca' da
dxeláguba',
na' dxelebé bénneache dxelelé'ene' ca bane zaj zua xí'adu
ca'.
- 13 Lache' ca' zaj zra' zrila' ca',
na' dxu'a xęgudu ca' zaj naxaza zrua' xtila,
na' dxelebezre xa'a bénneache chiu' dute xel-la' dxelebé,

ne dxelúl-laqueze' chiu'.

Salmo 66

- ¹ Le gucá'ana szren Dios dutē xel-la' dxebé,
le'e zrale dutē xēzr la xu.
- ² Le gul-la ca naca xel-la' szren cheē lē'.
Le gucá'ana szreñ' gate dxue lá'anale Lē'.
- ³ Le xē Dios: “Dxebánele'equezentu' ca zaj naca da nunu'.”
Ne cheē xel-la' szren cheē xel-la' waca chiu' xuluzúa
xrtizru' benne' ca' dxeledábague' lue'.
- ⁴ Xúgute bēneache zaj zra' dutē xēzr la xu xelúe
lá'anaqueze' Lue', ne xelúl-laqueze' chiu'.
Tu xelúl-lazqueze' cheē Láquezu'.
- ⁵ Le da, lé'ele ca zaj naca da nun Dios.
Da zrēbedxu zaj naca da bēñ' cheē benne' ca'
belunē' da calēla.
- ⁶ Bēñ' bexaca nísadau' xu bizre.
Guledé bēneache cheē' ní'aze' naga nedxu de tu xegu situj.
Dxu'a nísadau' na' gubéle'edxu lau Dios.
- ⁷ Dute xel-la' waca cheē' nna be'e chadía chacanna.
Dxuxúequeze' ca da dxelún bēneache dutē xēzr la xu.
Benne' dxeledábague' Lē' quebe xelezrué'equezne' xel-la'
szren.
- ⁸ Le'e, bēneache, le gucá'ana szren Dios cheedxu,
ne le guzén bēneache ca da dxue lá'anale Lē'.
- ⁹ Léqueze' bxue' dxi'u cheē naca bandxu,
ne quebe be'e lataj cheajcházedxu.
- ¹⁰ Lué'queze bxu' netu' ca da bēntu', Dios.
Bdeu' netu' xel-la' zi' ca dxelún bēneache dxuludé'
xia plata lu xi' cheē xegá'ana chawe na.
- ¹¹ Bēnu' xeajchú'untu' tu lu xralaj.
Bda'u cúzruntu' tu xua zí'ile'e.
- ¹² Bēnu' guledé xíchajntu' benne' zaj zriē' bzrina' cheē' ca'.
Gudentu' tu lu xi', ne tu lu nisa situj,
na' bebéaju' netu', ne bzu' netu' tu lataj naga zúantu'
lu da ba neza.
- ¹³ Chú'uqueza' lu xu'u lizru' cheē guzézxea' béadu ca',
ne gunna' chiu' ca da guchebe lazra' guna',

- 14 da na' guchebe lazra' ca da gunnía'
gate guzúa' lu da stébele'e.
- 15 Guzézza' béadu ca', be dxelanne lau' Lue',
ne guna' cuen zren chee zríla'du ca' lau',
ne gutia' bezre ca', ne chivo biu ca' lau'.
- 16 Le da, xénele, xúgutele dxezrébele Dios,
na' guzenda' le'e ca da bene' gúcalene' neda'.
- 17 Du lazra' bláwizra' Le',
ne bca'ana szrénqueza' Le'.
- 18 La guzé lazra' tu da calēla,
quebe ben Xránadxu chia'.
- 19 Da líqueze bene Dios chi'a.
Bze nague' ca da gunábeda' Le'.
- 20 ¡Gaca báqueze Dios!
¡Quebe bzue' chalá'ala da bchálajlena' Le',
san bexache lazre' neda'!

Salmo 67

- 1 Dios, bexache lazre' netu', ne ben da chawe' cheentu'.
Dute xel-la' zri'i lazre' chiu' guzúale netu',
- 2 chee xelúnbea bēneache du gabí'i xezr la xu
ca naca da dxaca lazru',
ne chee xeleneze bēneache dute xezr la xu
ca dxuseláu' bēneache.
- 3 Xúgute bēneache dxelúe lá'ane' Lue', Dios.
Dxelúe lá'ana xúgute bēneache Lue'.
- 4 Le be, ne le sua lu da ba neza, le'e, bēneache dute xezr la
xu,
lawe' da guchi'a Dios chee ca naca da xrlátaje,
ne guxúequeze' xúgute bēneache.
- 5 Xúgute bēneache dxelúe lá'ane' Lue', Dios.
Dxelúe lá'ana xúgute bēneache Lue'.
- 6 Xezr la xu nigá ba zria na lina chee na,
lawe' da ben Dios cheedxu da chawe' cheedxu.
- 7 Dios ba bene' chawe' cheedxu,

na' gáteteze dxal-la' xelapa bénneache Le' ba lá'ana.

Salmo 68

- ¹ Guzé, Dios, ne beše dinnaj benne' ca' dxeledábague' Lue',
ne ben xuluzrunnuj benne' ca' dxelecuídene' Lue'.
- ² Ca dxun tu be', dxulaga na zren chee xi',
ca' gulagu' benne' ca'.
Ca dxuna xina' lu xi', ca' xelexenite benne' ca' lau Dios,
benne' ca' dxelune' da zrinnaj.
- ³ Xelebé benne' xrlátaje ca', ne xelezúe' lu da ba neza lau
Dios,
ne xelexrítequeze' lu xel-la' dxelebé chee'.
- ⁴ ¡Le gul-la chee Dios!
¡Le gul-la da du ca' chee Láqueze'!
¡Le gucá'ana szren Bénnea' dxe'e xabáa, nazí le' Jah!
¡Le be lau Le'!
- ⁵ Ca xra bi dxé'enedu ca', ne ca benne' dxuxúe
nu'ula ca' zaj zue' tuze,
naca Dios lu lataj lá'azxa naga zúaqueze'.
- ⁶ Dxun Dios xelezúa xrtia ljwezre bénneache quebe nu
xrtia ljwezre' zaj zra'.
Dxebéaje' benne' zaj xu'e lu na' benne' zitu' ca'
chee xelezúe' lu da ba neza.
Benne' ca' dxeledábaga Dios zaj zue' tu lu xezr la xu bizre.
- ⁷ Dios, gate bdxúaju' lau bénneache chiu',
ne gudáu' lu xezr la xu bizre na',
- ⁸ na' guzrú' xezr la xu na'.
- Cá'anqueze gúcale'e xiuj lau Dios.
Xi'a Sinaí guzrize na lau Dios,
Dios chee benne' Israel ca'.
- ⁹ Gusel-lu' tu nisa xiuj zílale'e, Dios.
Gate belexedú lazre' bénneache chiu', Lue' btipu' lazre'.
- ¹⁰ Bénneache zaj naca chiu' zaj zúaqueze' lu xezr la xu chiu'.
Dute da chawe' chiu', Dios, dxuxú' benne' xache' ca'.
- ¹¹ Xránadxu Dios gusel-le' tu dizra' chawe',

- na' gulezrá' benne' zante, benne' buluzenne' bèneache
ca naca dizra' chawe' na'.
- 12 ¡Buluzrúnnuje'!
¡Buluzrunnuj wenná bea ca' nen
ca naca benne' chee' dxjaque' wedil-la,
na' benne' ca' zaj nagá'ana lu xu'u lizre' belexequé'e
da bulucá'ana benne' ca' buluzrúnnuje'.
- 13 Lácala bcache cuínale naga dxuxúele zrila' ca',
gacu zra lánale da naca na ca xrila bgúgudu ca' da
zaj nazí lechítaje na plata,
na' dube' chee xrílabá' ca' zaj nazí lechítaje na oro.
- 14 Gate bese dinnaj Dios zrente wenná bea ca' lataj na',
na' bexruj bezxe' da bgacu na xi'a Salmón.
- 15 Tu xi'a zrente naca xi'a Basán.
Tu xi'a zri'a naca xi'a Basán na'.
- 16 ¡Bizr chee na' dxenna'le, le'e, xi'a zri'a ca',
xi'a na' naga dxaca lazre' Dios súaqueze'?
Da líqueze súaqueze Xránadxu lu xi'a na' chadía chacanna.
- 17 Da zaj naché' benne' ca' lu wedil-la da napa Dios
zánete cue' gaxúa zaj naca na.
Xránadxu Dios zezé'e xi'a Sinaí chee sue' lataj lá'azxa chee'.
- 18 Begiüenu' xabáa, zeche'u benne' ca' bebéaju'
lu na' xel-la' gute,
na' guzi'u da chawe' ca' da belunna bèneache,
ne cá'anqueze guzúa da bennu' chee benne' ca'
guledábague' Lue',
chee súaquezu' ládujla bèneache, Dios, leu' Jah.
- 19 ¡Gaca ba Xránadxu!
¡Tu zra tu zra dxusezrate' dxi'u da chawe' chee'!
¡Naque' Dios, dxuselé' dxi'u!
- 20 Dios, Bénnea' naque' Dios cheedxu guselé' dxi'u.
Léqueze Xránadxu Dios guselé' dxi'u lu na' xel-la' gute.
- 21 Da líqueze Dios gune' we' xichaj benne' ca'
dxeledábague' Le'.
Gune' we' xichaj benne' quebe dxulusane' ca zaj naca
dul-la da dxelune'.
- 22 Gunná Xránadxu: “Guna' xezrinle lázrele,
xeza'ale lu xi'a Basán.

- Guna' xeza'ale lu da situj chee nísadau', xezrinle lázrele,
 23 lawe' da guna' guchuchu guléajle dxen chee benne' ca'
 dxeledábague' le'e,
 na' xelexé' becu' chee dxen chee benne' ca!'."
- 24 Belexé' benneache ca guledá benneache chiu' belúe
 lá'ane' Lue', Dios.
 Dute xel-la' dxelebé gulu'e lataj lá'azxa chiu', Dios,
 Wenná Bea chia'.
- 25 Benne' ca' dxelul-la zeajzrie' láwe'la,
 na' benne' zaj nu'e da dxulucuezre' zja'aque' bzé'bela.
 Ládujla zjaca nu'ula cuíde'du ca' zaj núxrube'
 da du ca' dxulusézxebe'.
- 26 Le güe lá'ana Dios naga zaj nazraga benneache chee'.
 Le güe lá'ana Xránadxu, le'e nácale zri'ine zre sua Israel.
- 27 Zaj zra' zri'ine zre sua Benjamín na', guque' benne'
 cuídedxa, na' dxeleenná be'e.
 Zaj nazraga benne' xíchaje chee zri'ine zre sua Judá na',
 ne benne' xíchaje chee zri'ine zre sua Zabulón,
 ne benne' xíchaje chee zri'ine zre sua Neftalí.
- 28 Dios, ble'e lau xel-la' wal-la chiu'.
 Bzua chacha, Dios, da na' benu' cheentu'.
- 29 Ne chee xel-la' szren chee xudau' chiu' da zua na
 xezre Jerusalén,
 xelegú'u benne' wenná bea ca' da xelunne' lau'.
- 30 Gudil-la benne' dxjaque' wedil-la chee dute xezr la xu
 zaj nazrague' chee xeledíl-lalene' Lue',
 benne' ca' zaj naque' ca bezre zan ca' nen biadu cheeba' ca',
 cadxa xuluzúa xúgute' dizra' chiu',
 na' xelunne' ca naca xia plata da zaj nape'.
 Beşe dinnaj benne' dute xezr la xu dxelexezaca ba lazre'
 xelexúe' lu wedil-la.
- 31 Xelexá' benne' xíchaje chee xezr la xu Egipto.
 Benne' xezr la xu Etiopía xelune' ba xen xulucá'ana szrene'
 Dios.
- 32 ¡Le gul-la chee Dios, le'e zrale du gabí'i xezr la xu!
 ¡Le gul-la chee Xránadxu!
- 33 ¡Le gul-la chee Bénnea' dxe'e xabáa na'ala,
 da zua na nédxute!
 ¡Le nna' xque, wanné', ne zízrajle'e nne'!
- 34 ¡Le nne nápale'e Dios xel-la' waca!

¡Lu xel-la' szren chee' dxuxúequezē' benne' Israel ca',
 na' zran xabáa nalá' xel-la' waca chee'!
 35 Benne' zrémentu' nacu' Lue', Dios,
 naga zu' lataj lá'azxa chiu'.

Dios chee' benne' Israel ca', Léqueze' dxutipe' lazre'
 bēneache chee'.
 ¡Gaca ba Dios!

Salmo 69

- 1 Bselá neda', Dios.
 Naca' ca tu benne' dxepe' lu nisa.
 2 Naca' ca tu benne' xu'e lu guzra' situj, ne quebe dxaca se'e.
 Naca' ca tu benne' xu'e lu nisa sítujle'e,
 na' nisa na' ba dxacu na xíchaje'.
 3 Ba dxajxréqueda' lawe' da ba gunnéle'a, ne ba da lba'a.
 Ba dxelátete lawa' dxenná'a gácale Dios neda'.
 4 Ba naxándxa benne' dxelecuídenē' neda' ca naxán
 xicha xíchaja', ne quebe bi de bi nuna'.
 Zaj naca benne' wál-lale'e benne' dxeledábague' neda',
 benne' ca' dxuluzría xi'e neda', ne quebe bi de bizr chee' na'.
 ¿Dxal-la' quízruja' da quebe gulana'?'
 5 Dios, nézqueznu' Lue' naca da xálaze da nuna',
 ne dxelé'eequeznu' dul-la da bēna'.
 6 Quebe gu'u lataj xelexedué'e ne chia' neda' benne' ca'
 dxuluxrén lazre' Lue', Xrana' Dios szrente.
 Quebe gu'u lataj xeleque zréaje ne chia' neda' benne' ca'
 dxelebeza lazre' Lue', Dios chee' benne' Israel ca'.
 7 Lawe' da nazrí'ida' Lue' bulucháchalēne' neda',
 na' lu xel-la' stu' zúaqueza'.
 8 Ca tu benne' zitu' naca' lau bi bícha'dau' ca',
 ne quebe zaj núnbea bi chee' xrna'a neda'.
 9 Lawe' da dxé'le'a gunne xue chee' lizru' dxal-la na
 lu lázrdawa'.
 Gate dxeleonné' benne' ca' schanni' chiu' Lue', Dios,
 naca ca dxeleonné' schanni' chia' neda'.
 10 Gudxezra', ne bēna' gubasa, na' bde cuina' xel-la' zi',

- na' cheē lē na' bulucháchalene' neda'.
- 11 Cá'anqueze bgacu cuina' zra lana' tuzruj.
Buluzé' neda' ca tu da dxulé'e na da baxache' zrentē.
- 12 Gulenné chia' benne' ca' zaj xu'ē xu'u lawe',
na' benne' ca' dxelezuzre' belún le' chia' lu da belul-le'.
- 13 Neda' bláwizra' Lue', Xrana' Dios, lu zra
dhezaca ba lazru' Lue'.
Dios, lu xel-la' dxexache lazre' zren chiu', ne lawe' da
líqueze nacu' weselá cheentu', bene chia'.
- 14 Bebéaj neda' lu da stebe zua', naca' ca tu benne'
xu'ē lu guzra' situj, ne quebe gu'u lataj cházedxa'.
Bselá neda' lu na' benne' ca' dxelecuídené' neda'.
Naca' ca tu benne' xu'ē lu nisa situj.
- 15 Quebe gu'u lataj gatia' ca tu benne' xegache' lu nisa situj,
ne quebe gaca' ca tu benne' chu'ē lu da situj,
ne quebe gaca' ca tu benne' cheajchazie' tu lu xedxu situj.
- 16 Bechebe chia', Xrana' Dios, lawe' da chawe' naca
xel-la' dxexache lazre' chiu'.
Gudá, gúcalē neda', lawe' da zrentē naca xel-la'
dxexache lazre' chiu'.
- 17 Gunná' xque ca da dxaca chia' neda', wen zrin chiu'.
lawe' da zua' lu da stébele'e, ben ba xuzre xennu' chia'.
- 18 Gudá naga zua', ne bselá neda'.
Bselá neda' lawe' da zaj naxánle'ē benne' ca'
dxeledábague' neda'.
- 19 Lue' nézqueznu' ca dxulucháchalene' neda', ne ca zua'
lu da stébele'e, ne ca dxulucá'ana dítajé' neda'.
Dxelé'equenzu' xúgutē benne' ca' dxelecuídené' neda'.
- 20 Lawe' da dxelún le' chia' dxedú lazra', ne zua' lu da stebe.
Guleza' nu benne' xexache lazre' neda', san quebe nu chilá'.
Guleza' nu benne' xelexúe zrene' neda', san quebe nu chilá'.
- 21 Bulugawe' neda' da sla',
na' gate gubíleda', buluxí'aje' neda' da zichaj.
- 22 Ca naca laní cheē benne' ca' ben gaca na ca tu
xralaj naga cheajlecházie',
ne ben xexaca da ba neza chee' tu da gun na cheajlecházie'.
- 23 Ben xelechul-la xiaj lawe' cheē québedxa xeledé'ene',
ne ben tu xelexrízrezqueze benne' ca'.
- 24 Dutē xel-la' dxezrá'a chiu' ble'e benne' ca',
ne dutē xel-la' xichaj zra'a chiu' be' benne' ca'.

- 25 Ben quebe nu chilá' lu xu'u lizre benne' ca',
ne quebe nu sua lu xezr la xu chee',
- 26 lawe' da guláu zi' xuzre' bènea' benu' Lue' we',
ne dxuluzrizre' ca naca xel-la' zi' dxedé bènea' be'u Lue'.
- 27 Ble'e dul-la da zaj nabaga benne' ca',
ne quebe gu'u le' lataj xelaque' tuze benne' xrlátaje chiu'.
- 28 Busula la benne' ca' lu xiche chee benne' ca'
zaj nape' xel-la' nabán,
ne quebe guzúaju' le' naga zaj naxúaj la benne' xrlátaje ca'.
- 29 Neda' zua' lu da ba xa', ne lu da stébele'e.
Bselá neda', Dios, ne bechisa neda'.
- 30 Gúl-laqueza' da güe lá'ana' La Dios chia'.
Gucá'ana szrena' Le' nen da dxue lá'ana' Le'.
- 31 Da nigá xezaca ba lázredxa Dios ca tu bezre, be gutia' lawe',
u ca tu me', béadu zaj zua lúzuba', ne xrúguba'.
- 32 Xelelé'eqeze benne' baxache' ca' da nigá, na' xelebene'.
- Le biga lau Dios, na' gaca bánquezle,
- 33 lawe' da dxene Xránadxu benne' ca' dxelexárzjene',
ne quebe dxuzúe' chalá'ala benne' chee' ca', benne'
zaj xu'e lizre xia.
- 34 Le güe lá'ana Le', le'e zrале xabáa, ne le'e, zrале lu xezr la
xu,
ne le'e zrале lawe' nísadau', ne cá'anqueze xúgute
da zaj naca ban xúgute lataj caní.
- 35 Dios guselé' benne' zaj zre'e xezre Sión,
ne xexune' xezre ca' zaj zra na lu xezr la xu chee
benne' Judá ca',
na' tu xelezúazqueze' na', ne gata' chee' xezr la xu na'.
- 36 Zri'ine zre sua benne' wen zrin chiu' ca', gaca
chee' xezr la xu na',
na' benne' ca' zaj nazrí'ine' Lau' Lue' xelezúe' na'.

Salmo 70

- 1 Bselá neda', Dios.
Gúcalęche neda', Xran.
- 2 Ben xelxedué'e, ne xelezúa lu da stębe benne' ca'
dxelaca lazre' xelútię' neda'.

- Ben xelexebigue', ne xelexala benne' ca' dxelebene'
lawe' da zua' lu da stebe.
- ³ Ben xelexegá'ana xala benne' ca' dxelún le' chia'.
- ⁴ Benne' ca' zá'aque' lau Lue' xelebene',
ne xelezúe' lu da ba neza.
Benne' ca' dxelé'e Lue': "Xcalenu'" lawe' da bseláu' le',
tu dxelennázqueze': "¡Zrentę naca Dios!"
- ⁵ Zua' lu da stebe, ne nate ni'a na'a.
Gudázega gácalenu' neda', Dios.
Nacu' Weselá chia', ne Xrana'.
Quebe chenu', Xran.

Salmo 71

- ¹ Za'a lau' Lue', Xran, chee guxrú' neda'.
Ben québedxa xedué'eda'.
- ² Gúcale neda', ne bselá neda' nen dutę da naca xrlátaje chiu'.
Bze naga chi'a, ne bselá neda'.
- ³ Nacu' ca tu xiaj xre naga sua' chawe', na' waca xida'
naga zu' te zra chizrela.
Gunná be'enu' nu guselá neda', lawe' da nacu' Lue'
ca tu xiaj xre naga dxaca dipa lazra'.
- ⁴ Dios chia', bselá neda' lu na' benne' ca' zaj nabéaj xíchaje'
Lue',
ne lu na' benne' ca' dxelunę' da caleła ne zaj naque' xichaj
zra'a,
- ⁵ lawe' da dxebeza lazra' Lue', Xrana' Dios.
Nacu' Bénnea' dxuxúe' neda' gate nácatea' bídau'tę.
- ⁶ Lue' núxruquezu' neda' gate gúlajtea'.
Lue' benu' bdxuaja' lu le'e xrna'a.
¡Tú güe lá'anazqueza' Lue'!
- ⁷ Belexebane benne' zante ca naca chia',
ne ca naca chiu', dxuxúe xánniu' neda'.
- ⁸ Ben tu gul-lazqueza' da güe lá'ana' Lue',
ne gucá'ana szrena' Lue' du zra.
- ⁹ Quebe guzú' neda' chalá'ala gate ba guxrúa'.
Gate ba bedú lazra', quebe gusanu' neda'.
- ¹⁰ Benne' dxeledábage' neda' dxelenné' chia',
na' benne' ca' dxelezá lazre' xelútie' neda' belunę' tuze
dizra',

- 11 dxelenné': "Ba bsan Dios le'.
Chéajdxu cheajtéladxu le' lawe' da québedxa nu zua
nu guselá le'."
- 12 ¡Dios, quebe su' zitu' naga zua!
¡Dios chia', gudázega gácalenu' neda'!
- 13 ¡Ben xelexedué'ene'!
"Ben xelexenite benne' ca' dxeledábague' neda'."
"Ben xelezúa xel-la' stu', ne xeleque zréaje benne' ca'
dxelezá lazre' xelune' chia' da calela."
- 14 Neda' tu cueza lázrezqueza' Lue',
ne tu güe lá'anazqueza' Lue'.
- 15 Guzenda' bénneache nacu' xrlátaje,
ne tu guzénzquezda' le' ca da benu' bseláu' neda',
láqueze quebe nezda' bal-la lasa bseláu' neda'.
- 16 Tu guchálajzqueza' chee da zrente da benu' Lue',
Xrana' Dios,
ne gusá'a lazre' bénneache chee da xrlátaje cheéquezu'.
- 17 Dios, Lue' bsédenu' neda' gate nácatea' bidau'te.
Dxulé'eda' bénneache ca naca da zrente da benu'.
- 18 Dios, quebe gusán lazru' neda' gate bache guxrúa',
ne ba bgucha'.
Be' neda' lataj guzenda' zri'ine zre sua' ca naca
xel-la' waca chiu',
ne guzenda' bi za xelalaj ca naca xel-la' wal-la chiu',
- 19 ne ca naca da xrlátaje chiu', da naca na da zrente, Dios.
Lue' ba benu' da zaj nácale'e na zrente.
Dios, ¿Núzraqueze ca Lue'?
- 20 Lue' benu' gudéa' lu da stebe zante, ne lu da calela ca',
na' gunu' xexaca bana', na' da xula xechisu' neda' lu xedxu
ba.
- 21 ¡Gucá'ana szrendxu' neda',
ne xue zrénquezu' neda'!
- 22 ¡Cá'anqueze güe lá'anaqueza' Lue', quínnia' da gul-lalena'!
¡Dios chia', gúl-laqueza' chee da li chiu', quínnia'
da du' zríadi'i na du'
¡Nacu' Benne' Lá'azxa chee benne' Israel ca'!
- 23 ¡Sua' lu da ba neza gate gúl-laqueza' chiu' Lue',
ne béqueze bénne'du xu'a, bénne'du' bexa'u!
- 24 ¡Tu guchálajzqueza' chee da xrlátaje chiu' te zra chizrela,
lawe' da benu' belexedué'e, ne guleque zréaje

benne' ca' belunē' ba xuzre xelunē' chia' da calela!

Salmo 72

- ¹ ¡Dios, ben guchi'a wenná bea da dxaca cheentu'
ca dxuchí'aquezu' Lue',
ne ben xelaca xrlátaje zri'ine wenná bea na'!
- ² Nadxa le' guchi'a chee bēnneache chiu' ca naca
da naca xrlátaje,
ne ca naca da li guchi'e chee benne' chiu' ca' zaj zue'
lu da ba xa'.
- ³ Lu xi'a ca' xelebeza zri lazre' bēnneache chiu',
ne lu xí'adu ca' xelezúe' lu da naca chawe'.
- ⁴ Guchi'e chee benne' ca' zaj zue' lu da ba xa'
lu xezre cheentu',
ne guselé' bidu ca' chee benne' ca' dxelexázejene',
ne guzría xi'e benne' ca' dxulusaca zi'e bēnneache.
- ⁵ Xelezrebe' Lue' dxácatē ne zua gubizra,
ne beu' lawe' tu cuen tu cuen bēnneache.
- ⁶ Gaca wenná bea na' ca nisa xiuj da dxaca naga ba nadín,
ne ca xrlē'ela da dxaca dxēla lu xezr la xu.
- ⁷ Lu zra chee wenná bea na' gaca da xrlátaje,
ne xelebeza zri lazre' bēnneache dxácatē ne zua beu'.
- ⁸ Nna be'e dute xezr la xu,
ne dxu'a xegu Eufrates, ga zrintē dxu'a nísadau'.
- ⁹ Lau le' xuluzú zribe benne' ca' zaj zre'e xezr la xu,
na' guzérxruje' lazre' benne' guledábague' Le'.
- ¹⁰ Benne' wenná bea chee xezr la xu Tarsis,
ne wenná bea ca' chee tu tu cue' xezr la xu zitu' ca'
xelelé'e zaj nu'e da xulunézruje' chee',
na' benne' wenná bea chee xezr la xu Sabá,
ne wenná bea chee Seba xulunézruje' chee' da gunnía'.
- ¹¹ Xúgute benne' wenná bea ca' xuluzú zribe' lau le',
na' benne' xúgute cue' xezr la xu xelunē' zrin chee'.
- ¹² Le' guselé' benne' ca' dxelexázejene',
benne' dxululáwizre' le',
ne guselé' benne' ca' zaj zue' lu da ba xa',
ne quebe sua nu benne' gácalene' le'.
- ¹³ Xexache lazre' benne' xache' ca', ne benne' ca'
dxelexázejene',

- na' guselé' benne' xache' ca' cheē xelaca banē'.
 14 Xexá'awe' benne' xache' ca' lu na' benne' wen̄ lazre' ca',
 ne benne' snia ca'.
 Gunē' ba xuzre guselé' benne' ca' lu na' benne' ca'
 dxelutie' benne'.
- 15 Gaca ban wenná bea nigá,
 na' xuluné̄zruje' cheē' oro cheē xez̄r la xu Sabá,
 na' tu xelenábazqueze bē̄neache Dios gácalene' le',
 ne te zra chizrela xelenabe' Dios gune' gaca chawe'
 cheē wenná bea na'.
- 16 Tu zrigadauze zrua' xtila xelaze' lu xez̄r la xu,
 ne lu xí'adu ca',
 da cuíalēē na ca da dxebía lu xi'a Líbano,
 na' benne' zaj zrēē lu xez̄re ca' xelane' ca xixre' zē lu xez̄r
 la xu.
- 17 Tu súazqueze la benne' wenná bea na'.
 Tu xuluchálajzqueze' cheē la le' dxácatē ne zua gubizra.
 Nē cheē le' gaca da ba neza cheē bē̄neache xúgutē
 cue' xez̄r la xu,
 na' xelenné' chee' naca chee' da ba neza zrente.
- 18 Xrlátaje naca Xránadxu Dios, Dios cheē benne' Israel ca',
 na' tuze Le' dxune' da dxexebánedxu.
- 19 Xrlátaje naca La Le' da naca na da xabáa chadía chacanna,
 na' dutē xez̄r la xu nigá xelelé'ene' da xabáa chee'.
 ¡Ca'an naca na, ne ca'an gaca na!
- 20 Nigá dxexuzre xrtizra' David, da dxuchálajlene' Dios.
 David nigá naque' zri'ine Isaí.

Salmo 73

- 1 Da líqueze ba ben̄ Dios da chawe' cheē benne' Israel ca',
 benne' ca' zaj naque' du lazre' lau Dios.
- 2 Neda' ba guzúa cheajcházia' lu dul-la.
 Ba guzúa guna' tu da zrinnaj,
- 3 lawe' da guca' zre'e lazre' nē cheē benne' gunnía' ca',
 gate ble'eda' ca dxelepe ban benne' ca' zaj nabéaj xíchaje' Dios.
- 4 Benne' caní quebe zaj zue' stēbe cheē xel-la' gute,
 lawe' da zaj zúalēē chawe'.
- 5 Quebe dxeledé̄e' lu da ba xa' ca da dxeledé xúgutē benne'
 ca',

- ne quebe dxelezaca zi'e ca da dxaca chee xezícadxa
bénneache.
- 6 Chee le na' dxulucá'ana szren cuine'.
Tu dxelexúbequezne' dxelune' da calela.
- 7 Dxelánnie' lawe' da dxelagu cháwele'e.
Dxelezíle'e ca naca da dxelezá lazre'.
- 8 Dxelún le' chee Dios, ne dxelenné' calela ca da zrinnaj
da xelune'.
- Dute xel-la' dxulucá'ana szren cuina dxuluchálaje' da
zrente.
- 9 Dxelenné' chee da ca' zaj zua xabáa,
ne dxuluchálaje' ca benne' zaj nape' dute xezr la xu.
- 10 Chee le na' xúgute bénneache dxelune' le' tu zren,
ne dxelezi'e ca da dxelenná benne' gunni'a ca'.
- 11 Dxelenná benne' ca' dxelune' da calela:
“¿Ájazra gaca neze Dios?
¿Dxelé'eqeze Bénnea' zue' na'ala?”
- 12 Benne' caní zaj naque' benne' zaj nabéaj xíchaje' Dios,
na' dxelepe bane' lu xezr la xu, ne dxelaque' gunni'a.
- 13 Da líqueze, dácheze naca guca' du lazre',
ne quebe bi da calela nuna'.
- 14 Gudéa' lu da ba xa' tu zra tu zra,
ne gudéa' xel-la' zi' xúgute zra.
- 15 La nnia' neda': Guchálaja' ca dxuluchalaj benne' ca',
na' si xe'a bénneachedu ca' chiu', Dios.
- 16 Gate blaba lazra' chee chéajni'ida' da nigá,
guca na stébele'e chia' neda'.
- 17 Gate guxu'a lu lataj lá'azxa chee Dios,
na' guque be'eda' da gaca chee benne' ca' gate cheajsé.
- 18 Da líqueze nunu' chee benne' ca' cheajlecházie',
ne gunu' xelebía xí'queze'.
- 19 Chadite gulebía xí'queze'.
Belexenite' lu xel-la' gulezrébele'e.
- 20 Zaj naque' ca tu da ble'edxu lu xela da dxexenite na
gate dxexebandxu.
Ca'an gaca, Xran, gate chasu', guzú' chalá'ala ca da
gulaca benne' ca'.
- 21 Gate guca' zre'e lazre' chee benne' ca',
guzúa lázrdawa' lu da stebe.

- 22 Lawe' da guca' xichaj zide', na' quebe guxéajni'ida'
guca' ca tu be xixre' lau Lue'.
- 23 Tu guzúazqueza' nen Lue', na' guca'u na'a xabela.
- 24 Bsi'u neda' chee guna' da dxulé'enu' neda',
na' te nigá xezí' lu na'u neda' lu xabáa chiu'.
- 25 Quebe nu xetú zua chia' xabáa san tuzu' Lue',
ne quebe nu xetú dxezá lazra' lu xezr la xu, san tuzu' Lue'.
- 26 Dxelexedú lazre' be'la' dxen chia', ne lázrdawa'.
Dios naque' Benne' dxutipe' lazra',
ne naque' da ba neza chia' chadía chacanna.
- 27 Benne' ca' dxelexecuase' naga zu' xelexenítie'.
Guzría xi'u xúgute benne' ca' xelexebeaj xíchaje' Lue'.
- 28 Ca naca chia' neda', dxaca chawe' chia' lawe' da gubiga'
lau Dios.
Tu dxebeza lázrezqueza' Xránadxu Dios,
chee guchálajqueza' ca naca da zrenté da nune'.

Salmo 74

- 1 Dios, ¿tu chí'izqueze nuzú' netu' chalá'ala?
¿Dxezra'u netu', nácantu' ca zrila' chiu' ca'?
- 2 Bsá lazre' bénneache chiu', benne' ca' guzi'u nédxudaute.
Benne' ca' bexa'u chee gunu' xelaque' benne' cheéquezu',
benne' ca' zaj zre'e lu xi'a Sión nigá, naga zúaquezu' Lue'.
- 3 Gudá xedajnná'u ca nabía xi' xezre nigá,
ne ca naca da cale'la da belún benne' ca'
dxeledábage' netu', lu lataj lá'azxa chiu'.
- 4 Dxelebezre xa'a benne' ca' dxeledábage' Lue'
laduj naga zaj nazraga bénneache chiu'.
Zaj nuzúe' nigá da dxululé'e na xu'untu' lu na' benne' ca'.
- 5 Buluzría xi'e xezre nigá,
ca dxun tu benne' dxine' ca naca xaga zaj ze tu xi'a.
- 6 Na'a nen xa waga chee' ca', ne nen xaga chee' ca',
ba buluzría xi'e ca naca lechítaje chee xudau' chiu'.
- 7 Ba buluzéxxie' lataj lá'azxa chiu'.
Bulucá'ana dí'taje' xu'u lizru'.
Buluchínnaje' na.
- 8 Lu lázrdawe' gulenné': "Guzría xí'tegadxu na tu chi'ize."
Ba buluzéxxie' xúgute xu'u naga bezrágantu' chiu'

- lu xęzr la xu chiu'.
- 9 Québedxa dxelé'entu' da la'axza ca' da dxulul'é na
da guchísantu' lu xęzr la xu cheętu'.
- Québedxa nu chilá' benne' guchálaje' waláz chiu',
ne quebe nu zua ládujla netu', benne' nézene' bátaqueze
lantu'.
- 10 Dios, ¿Báta cueza na xulucháchale benne' ca' netu',
benne' ca' dxulusaca zi'e netu'?
- ¿Chadía chacanna welenné benne' dxeledábague' lue'
schanni' cheę Lau'?
- 11 ¿Bizr cheę na' quebe dxebéaj lazru' benne' ca'?
- ¿Bizr cheę na' quebe dxuzría xi'u benne' ca' dxelunę' da
calela?
- 12 Lue', Dios, nacu' Wenná Bea chia' nédxudaute.
Lue'queze dxuseláu' bėnneache dute xęzr la xu.
- 13 Xel-la' waca chiu' bėnu' nísadau' chupa la'a.
Gula'u xichaj bę schanni' ca' lu nísadau'.
- 14 Bzúzruju' xichaj bę schanni' lęba' leviatán,
Na' bėnu' gulagu bę xixre' lęba', bea ca' zaj zra'ba' lu xu
bizre.
- 15 Bėnu' gulaj nisa beaj, ne nisa xęgu ca'.
Bsebizru' xęgu zri'a ca'.
- 16 Chiu' Lue' naca te zra, ne cá'anqueze chiu' naca dxęla.
Lue' bzu' beu', ne gubizra naga dxeledé na.
- 17 Lue' bzu' tu chi'ize ca naca da zaj dę xęzr la xu nigá.
Lue' bėnu' beu' la ca', ne beu' zaga ca'.
- 18 Bsa lazre' da nigá: Benne' ca' dxeledábague' lue'
ba zaj nun le' chiu' Lue', Xran.
Benne' xala ca' ba gulenné' schanni' cheę Lau'.
- 19 Quebe gusanu' lu na' benne' zaj naque' ca bę snia ca'
benne' ca' nazrí'iquezu',
ne quebe gal-la lazru' tu chi'ize bėnneache chiu' zaj
zue' lu da ba xa'.
- 20 Gunná' ca naca xel-la' wezría da bėnu',
lawe' da gáteteze naca chul-la lu xęzr la xu,
na' zaj zra' benne' ca' dxelunę' da zrinnaj.
- 21 Quebe gu'u lataj xelegá'ana lu xel-la' stu' benne'
ca' zaj zue' lu da baxache'.
Benne' dxelezaca zi'e, ne benne' dxelexá'zrjene'
xelúe lánę' Lau'.

- 22 ¡Guzé, Dios!
 ¡Ben ca ba gunnáu!
 ¡Bsa lazre' ca dxelún benne' xala ca', dxelún le' chiu'
 te zra te zra!
- 23 Quebe gal-la lazru' ca da gulenná benne' ca'
 dxeledábage' lue'.
 Da schaga dxelún benne' ca' dxeledábage' Lue'
 tu dxénzqueze na.

Salmo 75

- 1 “Xcalenu”, dxentu' Lue', Dios: “Xcalenu!”
 Dxuzentu' bēnneache zúalenu' netu', ne ba nunu' da ca'
 dxexebánequezentu'.
- 2 Dxenná Dios: “Ba nuzúa' zra guchi'a chee bēnneache.
 Guchi'a ca naca da xrlátaje.
- 3 Lácala xru' dutē xēzr la xu, ne xelezrize xúgute
 da zaj naca ban na,
 neda' gúxruqueza' ca naca lane xēzr la xu na'.
- 4 Dxapa' benne' xala ca': Quebe gáwele.
 Dxapa' benne' ca' dxelune' da calela:
 Quebe gucá'ana szren cuínale.
- 5 Quebe guxrén lázrele xel-la' wal-la chee.
 Quebe gácale benne' lázxdau zide'.”
- 6 Quebe za xel-la' szren naga dxalaj gubizra,
 ne naga dxebía na,
 ne quebe za na le'e xixre' lawe' lataj.
- 7 Dios naque' Bēnnea' guchi'e chee bēnneache.
 Dxucá'ane' cá'aze tu benne', ne dxucá'ane' szren xetú
 benne'.
- 8 Dios nuxre' tu zriga', da nazrate na xrise uva wal-la,
 da zeaje na xel-la' dxezrá'a chee'.
 Dxulálaje' na chee xele'aj benne' ca' dxelune' da
 calela.
 Xelé'aje' na xebizrtē na.
- 9 Neda' guzénquezda' bēnneache,
 ne gul-la' da güe lá'ana' Dios chee Jacob.
- 10 Le' guchínnajqueze' xel-la' waca chee benne'
 wen da calela ca'.
 Gusezrendxe' xel-la' waca chee benne' xrlátaje ca'.

Salmo 76

- 1 Zaj núnbea benne' Judá ca' Dios,
na' ládujla benne' Israel zrente nácaqueze La Le'.
- 2 Lu xezre Salem zua lataj lá'azxa chee'!
Lu xezre Sión zua naga zúaqueze'.
- 3 Lataj na' gudíchaje' xaga nalá xéche'ze ca',
ne xia da dxucu'uj na benne' lu wedil-la,
ne ca naca da dxuluchínene' lu wedil-la.
- 4 Benne' xabáa nacu' Lue',
ne Benne' wál-ladxa ca xi'a zri'a ca'.
- 5 Xeailechaze benne' wal-la ca', ne guláse dinnaje'.
Netú benne' wal-la ca' quebe belexechisa ne'e chee
xelune' wedil-la.
- 6 Dios chee benne' Israel ca', gate gudil-lu' benne' ca',
guláse dinnaj bzrina' ca', ne benne' gulebíe'-ba'.
- 7 Nacu' Lue' Benne' zrébedxu.
¿Nu benne' gaca se' lau Lue' gate dxezra'u?
- 8 Xabáate gunná'u, na' guchi'u chee bénneache.
Dxelezrebe bénneache lu xezr la xu, na' dxelebeze'
- 9 zra seu' Lue', Dios, chee guchi'u chee bénneache,
ne chee guseláu' xúgute benne' dxexruj lazre' zaj
zre'e lu xezr la xu.
- 10 Da líqueze xel-la' dxelezá'a chee bénneache
gaca na tu da gucá'ana szren na Lue'.
Guzúa zriu' xel-la' dxelezá'a chee bénneache zaj nagá'ane'.
- 11 Le chebe lázrele da gunle chee Dios,
na' le gun da na' chee Xránadxu, Dios chee.
Xúgute benne' zaj zre'e du gabi'ila xeledé'e,
na' xulunézruje' da zaj nu'e chee Dios,
Bénnea' dxezrébedxu.
- 12 Guzague' da xu'u lu xichaj lázxdau benne' blau ca'.
Le' dxuchebe' benne' wenná bea ca' zaj zre'e lu xezr la xu.

Salmo 77

- 1 Nen chi'a bláwizra' Dios.
Bláwizra' Dios, na' Le' buzé nague' chi'a.
- 2 Guxu'a lau Xránadxu lu zra guzúa' lu da ba xa'.

- Chizrela guchisa na'a lau Le', ne quebe guzúa zria'.
 Quebe be'a lataj nu benne' xue zrene' neda'.
 3 Bsa lazra' chee Dios, ne guzúa' stebe.
 Gudawa' zria lawe', ne bedú lazra'.
 4 Begúe' bchigala chia'.
 Guzúa' stébele'e, ne quebe guca guchálaja'.
 5 Blaba lazra' ca naca zra nédxute.
 Ca naca iza zan ca' da ba guledé chee na.
 6 Bsa lazra' ca naca da bil-la' chizrélala,
 ne blaba lázrequeza' ca zaj naca na, na' gunaba be' xu'a:
 7 ¿Guzúa Xránadxu dxi'u chalá'ala tu chi'ize
 ne québedxa gácalene' dxi'u?
 8 ¿Cabátadxu xexache lazre' dxi'u?
 ¿Cabátadxu gune' ca da guchebe lazre'?
 9 ¿Gul-la lázrequeze Dios xexache lazre' dxi'u?
 ¿Dxezré'e dxi'u, na' québedxa xexache lazre' dxi'u?
 10 Nadxa gunnía': Caní dxuna' lawe' da quebe chawe' zua'.
 Chee le na' cheajsá lazra' chee xúgute da zrente
 da ben Dios zrente lu iza ba guledé chee na.
 11 Cheajsá lazra' chee da zrente ca' da ben Jah.

- Awe', cheajsá lazra' chee da benu' nédxudaute da ca'
 dxexebánetu'.
 12 Gulaba lazra' ca naca xúgute da ba benu',
 ne guchálaja' ca zaj naca da nunu'.
 13 Dios, lá'azxa naca da dxusédenu' netu' ca guntu'.
 ¿Zua xetú Dios naque' benne' zren ca naca Dios cheentu'?
 14 Lue' nacu' Dios, dxunu' da ca' dxexebánetu'.
 Blé'enu' xúgute bénneache lu xezr la xu ca zrente
 naca xel-la' waca chiu'.
 15 Nen xel-la' waca chiu' bexa'u bénneache chiu',
 zri'ine zre sua Jacob, ne zri'ine zre sua José.
 16 Xegu nisa ca' belelé'en Lue', Dios.
 Belelé'e xegu nisa ca' Lue', na' belezrébele'e na.
 Cá'anqueze gulezúa stebe nísadau' situj ca'.
 17 Nisa xiuj zila bdxuaj na lu beuj bza ca',
 ne gulennéle'e guziu', ne gulépele'e xesa.
 18 Lu be' bdunu' ben guziu' chiu' da gunnéle'e na.
 Bulusaní' xesa guziu' ca naca xezr la xu.
 Guzúa stebe, ne guzrize xezr la xu.

- 19 Lawe' nísadau' guza'u,
 ne lawe' nisa zila ca' gudéquezu',
 ne quebe naca bea naga bléaju'.
 20 Guche'u bénneache chiu' ca' zrila' ca'
 lu na' Moisés, ne lu na' Aarón.

Salmo 78

- 1 Le xen, le'e, bénneache chia', ca da dxusédeda'.
 Le xen xanne' ca da dxuchálaja'.
 2 Guchíneda' dizra' ca da dxuluchalaj benne' sina ca',
 na' guzéajni'ida' le'e da ca' gulezúa na bagácheze gate nate,
 3 da ca' bendxu, ne bénbeadxu na,
 da ca' belixru be'e xra xrtáudxu ca' dxi'u.
 4 Quebe gucáchedxu na lau zrí'inedxu ca'.
 Guzénquezdxu zrí'inedxu ca' ca naca xel-la' szren
 chee Xránadxu,
 ne ca naca xel-la' waca chee', ne ca zaj naca da zren ca'
 da bene'.
 5 Bzue' tu da nadxixruj bea na da xelún benne' Israel ca',
 ne da bdxixruj be'ene' ca' da xelún zrí'ine zre sua Jacob.
 Gunná bé'ene' xra xrtáudxu ca' xuluzenne' bi chee' ca'
 ca naca da gunná bé'ene',
 6 chee xelúnbea zrí'ine' bidu ca' za xelálajbe' ca naca na,
 na' bi caní xuluzenbe' zrí'inebe' da na',
 7 chee xuluxrén lázrebe' Dios,
 ne quebe xelal-la lázrebe' da ca' ben Dios,
 ne chee xuluzúabe' dizra' da ca' gunná be'e.
 8 Quebe xelácabe' ca gulaca xra xrtáube' ca'.
 Benne' ca' quebe buluzúe' dizra' chee', ne guledábague' Le',
 ne quebe buluzúa chúchue' ca buluxrén lazre' Dios,
 ne quebe gulaque' li lazre' lu da naca chee Dios lu
 be' zaj nácaqueze'.
 9 Benne' zrí'ine zre sua Efraín, benne' zaj nu'e
 da dxuluchínene' lu wedil-la
 buluzrúnnuje' naga dxaca wedil-la.
 10 Quebe belune' ca naca xel-la' wezría da ben Dios,
 ne quebe buluzúe' dizra' da gunná bé'ene'.
 11 Gulal-la lazre' da ca' ben Dios,
 ne xel-la' waca ca' blé'ene' Le'.

- 12 Lau xra xrtawe' ca' bene' xel-la' waca ca'
lu xezr la xu Egipto, ne lu xezr la xu Zoán.
- 13 Gusalje' neza lu nísadau' naga guledé benne' ca'.
Bene' nísadau' na' ca xi'a ca' chalá'a weaj.
- 14 Te zra blé'ene' benne' ca' neza nen tu beuj bza da xjácalene',
ne chizrela nen beuj bza da naca na ca tu xi'.
- 15 Gulé'e xiaj ca' naga naca xu bizre,
na' bxí'aje' benne' ca' nisa da gulaj na le'e xiaj ca'
ca tu xegu nisa.
- 16 Bene' gulaj tu xegu nisa le'e xiaj na',
na' bzriluj na ca tu xegu zren.
- 17 Lácala bene' caní belúndxaqueze' dul-la lau Dios
le'e xixre' lawe' lataj,
ne guledábague' Dios nape' dute xel-la' szren.
- 18 Gulegú'u lazre' xulu'zúa zrie' Dios.
Gulenabe' xelawe' ca da dxelezá lazre' le'.
- 19 Gulenné' chee Dios, gulenné':
¿Wazeque Dios na' gunne' da gágudxu le'e xixre' nigá?
- 20 Da líqueze gulé'e xiaj na', na' gulaj nisa na',
na' bzriluj na ca tu xegu zren.
¿Wazéquequezne' gunne' dxi'u xeta, ne gunne' bela'
da gágudxu?
- 21 Chee le na' bzra'a Xránadxu gate benne' da na',
ne gusel-le' xi' da bzezxe na bal-la bénneache chee',
na' bsedxí'ule'e xel-la' dxezrá'a chee' nen benne' Israel ca',
- 22 lawe' da quebe guléajle'e chee Dios,
ne quebe buluxrén lazre' Le' guselé' le'.
- 23 Gunná bé'ene' beuj zran xabáa,
ne gusalaje' dxa xu'u chee xabáa,
- 24 na' bene' bxinnaj xeta maná ca dxinnaj xiuj chee
gulagu benne' chee' na.
Bnézruje' le' da naca ca zrua' chee xabáa.
- 25 Gulawe' da dxelagu gubáz chee xabáa ca'.
Gusél-lale'e da gulawe', na' gulélajtequezene'.
- 26 Bene' guca be' da za' chalá'ala naga dxalaj gubizra,
ne xel-la' waca chee' bene' guca be' za' chalá'ala
naga dxedé gubizra beu' zaga,
- 27 na' gusel-le' chee benne' ca' bela' ca ze bxrte xu,
béadu zaj zua xrila naxanba' ca xuzre' da dxe' dxu'a
tu xegu zren.

- 28 Bene' guléxrujba' chale'aj chee benne' ca'.
 Guléxrujba' dútequeze naga zaj zua xu'u xide chee'.
- 29 Gulawe'-ba', ne gulélajquezene'.
 Dios bnézruje' chie' ca naca da gulaca lazre'.
- 30 Gate quebe ne xelélajene', ne ne dxelawe'-ba',
 31 bzra'a Dios benne' ca',
 na' betie' benne' zaj nácadxé' benne' wal-la,
 ne benne' Israel ca' zaj nácadxé' benne' waca.
- 32 Láqueze bene' caní, na' belúndxaqueze' dul-la,
 ne láqueze belelé'ene' xel-la' waca ca' da bene',
 quebe buluxrén lazre' Le'.
- 33 Chee le na' guchugue' zra chee benne' ca' ca
 tu be' dxecá'adxu,
 ne ca zaj naca iza da gulezúe', bdee' le' lu da zi' da xa'.
- 34 Gate betie' bal-la benne' ca', na' xezícadxe'
 belexaque' chee Dios.
 Belexebí'i lazre', ne du lazre' buluchálajlene' Le'.
- 35 Xeañlesá lazre' naca Dios Benne' dxuxúe' le',
 ne Dios na' nape' duté xel-la' szren naque' Bénnea'
 bxá'awene' le',
- 36 san quebe guca li lazre' da gulenné'
 lawe' da belún lazre' lau Dios.
- 37 Quebe gulaque' li lazre' nen Le',
 ne quebe belune' du lazre' ca naca xel-la' wezría chee'.
- 38 Dios bexache lazre' chee benne' ca',
 ne bnite lawe' dul-la belune', ne quebe bzria xi'e le'.
 Zane' lásate bzue' chalá'ala xel-la' dxezrá'a chee',
 ne quebe bzre'e le' duté ca da dxéquene'.
- 39 Xeañsá lazre' Dios zaj naque' bela' dxen.
 Zaj naque' ca tu be' da dxedé na, ne quebe xezrín na.
- 40 Zane' lasa guledábague' Le' le'e xixre' lawe' lataj na',
 ne zane' lasa buluzúe' Le' baxache'.
- 41 Zane' lasa buluzúe' Dios chalá'ala,
 ne buluché'e Dios lá'azxa chee benne' Israel ca'.
- 42 Gulal-la lazre' ca naca xel-la' waca zren chee',
 ne ca bene' lu zra na' bxá'awene' le' lu da zi' da xa',
- 43 gate bene' xel-la' waca ca' lu xezr la xu Egipto,
 ne blé'ene' da ca' da dxebánedxu lu xezr la xu Zoán.
- 44 Bexune' xegu chee' ca' dxen,
 na' québedxa guca da xele'aj benne' Egipto ca'.

- 45 Gusel-le' be'a ládujla benne' ca', be buludeba' le' xel-la' zi'.
Gusel-le' bluzru ca' buluzría xiba' xezr la xu chee'.
- 46 Gusel-le' biche zu ca' guláguba' lina chee',
ne buluzría xiba' da zaj zua lu xezr la xu chee'.
- 47 Gusel-le' xiaj bezxe' zri'a da bzria xi na lba uva chee' ca',
ne gusel-le' da zaga da bsebizre na xaga higo chee' ca'.
- 48 Gusel-le' xiaj bezxe' zri'a da bete na be xixre' chee' ca',
ne gusel-le' xesa da bete na zrila' chee' ca'.
- 49 Bdee' benne' Egipto ca' lu xel-la' zi' zren,
lawe' da bzrá'ale'e benne' ca',
na' guca da ca' ca zánete gubáz ca' chee xel-la' gute.
- 50 Quebe bzague' xel-la' dxezrá'a chee',
ne quebe bnite lawe' chee' chee quebe xelátie',
san betie' le' nen tu xízrawe' wal-la.
- 51 Betie' bi biu nedxu chee benne' ca',
bi biu nedxu ca' chee benne' Egipto ca'.
- 52 Nadxa beche'e benne' chee' ca' ca tu benne'
dxeche'e zrila' ca',
ne bsi'e le' le'e xixre' lawe' lataj.
- 53 Bsi'e le' zri'a chawe', ne quebe bi belezrebe',
san gulate benne' guledábague' Le' lu nísadau'.
- 54 Beche'e le' lu xezr la xu lá'azxa chee',
naga zua xi'a nigá da guca cheéqueze'.
- 55 Bebáje' benne' zaj zre'e lu xezr la xu na' lau
benne' chie' ca',
na' gulé'e xezr la xu chee' cha chee benne' Israel ca',
ne bzre'e le' lizre benne' ca' bebáje'.
- 56 Da xula buluzúe' Dios chalá'ala, ne buluché'e
Dios, nape' dute xel-la' szren.
Quebe buluzúe' dizra' da ca' gunná be'ene' le'.
- 57 Da xula guledábague' Dios ca belún xra xrtawe' ca'.
Gulaque' ca tu bdxeque' xala chee xaga nalá xéche'ze.
- 58 Buluché'e Le' ne chee lataj ca' naga bulucá'ana
szrene' bedáu' xiaj xaga ca',
ne ne chee bedáu' xiaj xaga chee' ca' bzrá'ale'e Dios.
- 59 Bzra'a Dios gate blé'ene' na,
na' gucuídelé'ene' benne' chee' ca', benne' Israel.
- 60 Guleaj xíchaje' xu'u xide lá'azxa chee' zua na xezre Silo,
xu'u xide na' guzuáqueze' ládujla benne' ca'.
- 61 Be'e lataj belecá'a benne' ca' dxeledábague' dxi'u

- xi'ina lá'azxa chee',
da na' dxulé'e na xel-la' waca, ne xel-la' szren chee'.
- 62 Bzre'e benne' chee' ca',
na' bdee' le' lu na' benne' ca' belútie' le'.
- 63 Benne' wal-la ca' gulátie' lu wedil-la.
Quebe nu zra' benne' wegu', benne' xelezúalene'
nu'ula wegu' ca'.
- 64 Cá'anqueze gulate bxruze ca' lu wedil-la,
na' nu'ula chee' bxruze ca' quebe gulebezre xache'
chee' bxruze ca'.
- 65 Nadxa guca Xránadxu ca tu benne' dxexebane' lu bchigala.
Guque' ca tu benne' wal-la dxebezre xe'e gate ba né'aje'
xrise uva wal-la.
- 66 Na' blague' benne' guledábague' Le',
ne bca'ane' le' cá'aze chadía chacanna.
- 67 Bzue' chalá'ala zri'ine zre sua José,
ne quebe bequé'e zri'ine zre sua Efraín,
- 68 san bequé'e zri'ine zre sua Judá,
ne xi'a Sión, da na' nazrí'ile'ene'.
- 69 Lu xi'a na' bene' xudau' lá'azxa chee',
da guca na ca naca da zua na xabáa.
Bzua chúchue' na chadía chacanna,
ca nácaqueze xezr la xu nigá.
- 70 Bequé'e David, benne' wen zrin chee'.
Bebéaje' le' naga zaj zra' zrila' ca'.
- 71 Beche'e le' naga zue' dxuxúe' zrila' ca' zaj nache'eba'
bedau',
chee' gaque' wenná bea, benne' guxúe' bèneache chee',
zri'ine zre sua Jacob, benne' zaj naque' benne' Israel ca'.
- 72 Dute xel-la' du lazre' chee' bxue' benne' ca'.
Bxue' le' dute xel-la' waca zren chee'.

Salmo 79

- 1 Dios, ba gulú'u benne' xezr la xu zitu' ca' lu xezr la xu
chee' bèneache chiu'.
Bulucá'ana dí'taje' xudau' lá'azxa chiu'.
Buluzría xi'e xezre Jerusalén.
- 2 Bulucá'ane' bela' dxen chee' wen zrin chiu' ca' naga
gulagu be zua xrila le'.

- Be xixre' ca' guláguba' be_{la}' dxen chee benne' ca'
zaj naque' chiu'.
- 3 Ca nisa bululálaje' dxen chee benne' ca' xúgute lu neza
chee xezre Jerusalén,
ne quebe nu chilá' benne' gucache' benne' ca'.
- 4 Benne' xezr la xu walizre' cheentu' ca'
dxulucháchalene' netu'.
Benne' zaj zre'e xezre walí_zr ca' dxulucá'ana dí_taje' netu',
ne dxelún le' cheentu'.
- 5 ¿Bata cuézaqueze gaca caní cheentu', Xran?
¿Tu chí'izqueze dxezra'u netu'?
¿Tu chí'izqueze gaca xel-la' dxezrá'a chiu' ca tu xi'?
- 6 Bzra'a benne' xezr la xu ca' quebe zaj núnbe'e Lue',
na' benne' xezr la xu ca' quebe dxululáwizre' Lue',
- 7 lawe' da ba buluzría xi'e zri'ine zre sua Jacob,
ne bulucá'ana dí_taje' xu'u lizre benne' ca'.
- 8 Quebe gusebahu' netu' ca naca da zrinnaj da belún
xra xrtauntu' ca'.
Gudázega xexache lazru' netu', lawe' da dxezraga láule'entu'.
- 9 Gúcale netu', Dios, nacu' Bénnea' dxuselé' netu',
chee gaca ba Lau'.
Bselá netu', ne bnite lau dul-la nuntu' chee xegá'ana szren
Lau',
- 10 lawe' da xelenná bénneache: “¿Ga na Dios chee benne' ca'?”
Bebéaj lazre' benne' ca' belútie' wen zrin chiu' ca'.
- 11 Caní ben chee xelélé'e xúgute benne' chiu' ca' zaj xu'e
lu na' benne' ca' dxeledábage' netu'.
Dute xel-la' waca zren chiu' bselá benne' ca' ba zaj nachugue'
chee' xelatíe'.
- 12 Bunezruj chee benne' xezr la xu walizre' cheentu'
ca' xegazre cue'
ca da calela da belune', bulucá'ana dí_taje' Lue', Xran.
- 13 Netu', bénneache chiu', nácantu' ca zrila' chiu' ca',
güe lánanaquezentu' Lue' chadía chacanna.
Tu cuen tu cuen zri'ine zre suantu' gúl-laquezentu' da
güe lánanantu' Lue'.

Salmo 80

- 1 Bene cheentu', Lue' dxuxú' benne' Israel ca',

- Lue' na', dxuxú' zri'ine zre sua José ca zríla'du ca',
ne dxe'u lataj blau chiu' da zua na lówela querubín ca'.
- ² Ble'e xel-la' szren chiu' lau zri'ine zre sua Efraín,
ne Benjamín, ne Manasés.
Ble'e xel-la' waca chiu', ne gudá guseláu' netu'.
- ³ Beché' netu', Dios.
Bexache lazre' netu', na' lantu'.
- ⁴ Xránantu' Dios, napu' dutę xel-la' waca,
¿bata chajsequeze zra'u netu',
ne quebe xennu' ca da nábantu' Lue'?
- ⁵ Bzúale'u netu' lu xel-la' dxewí'ine lazre',
ne bzílale'u nisa dxebézrentu'.
- ⁶ Bę'u lataj xęzr la xu walizre ca' bulucá'ana dítaje' netu',
na' benne' ca' dxeledábague' netu' belún le' cheentu'.
- ⁷ Beché' netu', Dios, napu' dutę xel-la' waca.
Bexache lazre' netu', na' lantu'.
- ⁸ Bebėjaju' tu zrigu' lba uva lu xęzr la xu Egipto da naca na
bénneache chiu'.
Blagu' benne' xęzr la xu gulezré'e nigá, na' guzu' nigá
zrigu' lba uva na'.
- ⁹ Gú'unu' lba uva na' cheę gula na.
Bdéle'e lue zrigu' lba uva na', na' gucu na xęzr la xu na'.
- ¹⁰ Gulú'u na zrul-la xúgute xi'a ca',
na' zruze na ca' gulegú'u na zrul-la xaga cedro zren ca'.
- ¹¹ Gulechiluj zruze na, belezrintę na dxu'a nísadau',
ne belezrintę na dxu'a xęgu Eufrates.
- ¹² ¿Bizr cheę na' gucá'u le'aj da naxechaj na le na?
Na'a xúgute benne' dxeledé na' dxelebane' da zixre cheę na.
- ¹³ Dxuluchuchu dxululáj cuche xixre' ca' lba uva na',
na' bę xixre' ca' dxeláguba' na.
- ¹⁴ Bedá cheentu', Dios, napu' dutę xel-la' waca.
Gunná' netu' ga na' zu' xabáa, ne gudá xedajnná'u lba uva
chiu'.
- ¹⁵ Gudá, guseláu' lba uva nigá, da gúzaquezu'.
Bechuj cheę lba uva na', ba bzua chuchu' gaca na chiu'.
- ¹⁶ Benne' ca' dxeledábague' netu' ba gulechúguę' lba na',
ne ba guládue' na xi'.
Gunná' benne' ca' lu xel-la' dxezrá'a chiu',
ne bzria xi' benne' ca'.
- ¹⁷ Bzua chuchu, ne bxue benne' ca' ba guca'u,

- benne' xęzr la xu na' ba nuzúa chuchu'.
 18 Cabátadxa cueaj xíchajntu' Lue' xecha lasa.
 Bcache chawe' netu', naca bantu', na' güe lá'anantu' Lau'.
 19 Xránantu' Dios, napu' dutę xel-la' waca, beché' netu'.
 Bexache lazre' netu', na' lantu'.

Salmo 81

- 1 Lu dutę xel-la' dxebé le gul-la cheę Dios, Bénnea' dxutipe'
 lázredxu.
 Lu da ba neza cheęle le cuezre xa'a lau Dios cheę
 zri'ine zre sua Jacob.
 2 Le gul-la, ne le capa xidedau'.
 Le quinne xrtan da con zríadi'i na du, ne da dxúl-lalenle.
 3 Le gucuezre luzu da dxulucuezre' gate naca beu' dxe'ene,
 da naca na zra nuzúadxu gundxu laní lá'azxa.
 4 Naca na tu da dxun na ba xen xelún benne' Israel ca',
 da bdxixruj bea Dios xelún zri'ine zre sua Jacob.
 5 Bzue' na ca tu da gulé'e lau na zri'ine zre sua José
 gate beledxúaje' lu xęzr la xu Egipto,
 naga benda' tu xrtizra' bénneache da quebe guxéajni'ida'.
 6 Gunná Dios: "Begúa' xua' da buludé'e' benne' chia' ca'.
 Bsezá'a benne' chia' ca' da zi'i."
 7 Lu da ba xa' da guzúale, bláwizrale neda', na' bselá' le'e.
 Bechéba' cheęle naga nagacha' lu beuj bza gate na'
 gunnéle'e guziu',
 na' bxua' ájala gunle naga zaj de beaj nisa zaj nazí le
 Meriba.
 8 Le xene, bénneache chia', na' guszreda' le'e.
 Le'e, benne' Israel, che dxaca lázrele sile da dxennía',
 9 quebe gápale tu dios cheę benne' xula,
 ne quebe guzú zríbele lau tu dios cheę benne' zitu'.
 10 Neda', Xránale, naca' Dios cheęle.
 Bebéaja' le'e lu xęzr la xu Egipto.
 Le salaj dxú'ale, na' gunna' da gágule.
 11 Bénneache chia' quebe belúe lazre' da gunnía'.
 Benne' Israel ca' quebe gulaca lazre' xelezí' lu ne'e neda'.
 12 Cheę le na' bsana' benne' ca' lawe' da gulaque'
 lázxdau zide'.
 Belune' ca da guléquene' xrlátaje.

13 Che la gulebé' gunne xue bēnneache chia' chee da gunnía',
ne che la belún benne' Israel ca da ble'eda' le',

14 na' chadite bzria xi'a benne' guledábage' le',
ne gudíl-lalena' benne' guledíl-lalene' le'.

15 Che la belún benne' Israel caní,
na' benne' ca' dxelecuídene' Xránadxu buluzúe' xrtizre',
(san chadía chacanna zaj nabague' zria),

16 na' Dios gunē' xelawe' zrua' xtila cháwedau',
ne gunē' xelélajquezne' nen bzrina'dau'.

Salmo 82

1 Zua Dios naga zaj nazraga benne' dxuluchi'e chee
bēnneache chee'.

Dios dxuchi'e chee benne' ca' dxuluchi'e chee bēnneache.

2 Dxenná Dios: “¿Bátadxa guchí'ale chee bēnneache chia' da
quebe naca xrlátaje,

ne gápale ba lá'ana benne' ca' zaj nabéaj xíchaje' Dios?”

3 Le gácale benne' xache' ca', ne bidau' wezebe ca'.

Le gun da xrlátaje chee benne' baxache' ca'
ne chee benne' ca' dxelexázejene'.

4 Le guselá benne' ca' dxeledé' lu da ba xa',
ne benne' ca' quebe bi zaj nape'.

Le guselá benne' ca' lu na' benne' ca' zaj nabéaj xíchaje'
Dios.

5 Quebe bi zaj nézene', ne quebe dxeléajni'ine',
na' dxeledé' lu da chul-la.

Dxuluzrizre' ca naca da zaj de lu xezr la xu.

6 Neda' gunnía': Le'e nácaquezle ca dios ca',
ne nácale xúgutele ca zrí'inequeze Dios szrente',

7 Wátele ca dxelate xezícadxa bēnneache,

na' cheajcházele ca cheajchaze núteteze benne' dxenná be'e.

8 ¡Guxasa, Dios!

¡Bchi'a chee bēnneache zaj zra' lu xezr la xu,
lawe' da naca dutē xezr la xu chiu' Lue'!

Salmo 83

1 ¡Dios, quebe sua zriu'!

- Quebe su' zrize, Dios, ne quebe gusezxuj dxu'u,
 2 lawe' da dxelebezre xa'a benne' ca' dxeledábague' Lue',
 ne dxulucá'ana szren cuina benne' ca' dxelecuídene' Lue'.
 3 Bagácheze ba zaj nune' tuze dizra' bi xelune' chee
 bénneache chiu',
 ne ba zaj nune' bi xelune' chee benne' ca' dxuxúequezu'
 Lue'.
 4 Gulenné': "Le chu'u, guzría xidxu benne' ca'
 chee québedxa xelaque' tu cue' xezr la xu,
 ne québedxa nu sua benne' cheajsá lazre' la Israel."
 5 Ba belune' tuze dizra'.
 Zaj nune' tuze dizra' xeledábague' Lue'
 6 benne' Edom ca', ne benne' Ismael ca',
 ne benne' Moab ca', ne benne' zri'ine zre sua ca' Agar,
 7 ne benne' Gebal ca', ne benne' Amón ca', ne benne' Amalec
 ca',
 ne benne' Filistea ca', ne benne' zaj zre'e xezre Tiro.
 8 Cál'aqueze benne' Asiria ca' zaj nune' le' tuze.
 Xúgute' benne' caní dxelune' zrin chee zri'ine zre sua Lot.
 9 Ben chee' benne' caní ca' benu' chee' benne' Madián ca',
 ne ca' benu' chee' Sísara, ne ca' benu' chee' Jabín dxu'a xegu
 Cisón,
 10 benne' ca' gulátie' lu xezr la xu Endor,
 na' belexaque' ca' xrche'e bezre da gun na bebe lu xezr la
 xu.
 11 Ben gaca chee' benne' blau ca' chee' benne' caní
 ca' guca chee' Oreb, ne chee' Zeeb,
 ne ben gaca chee' benne' dxelenná bé'ene' benne' caní
 ca' guca chee' Zeba, ne chee' Zalmuna,
 12 lawe' da gulenná benne' caní: "Gaca cheedxu xezr la xu
 naga zaj zra' bénneache chee' Dios."
 13 Dios chia', ben xelaque' ca' xizre bebe da dxua be' gate
 dxedube na.
 Ben xelaque' ca' xrlácue xia xéladu ca' da dxua be' bdunu'.
 14 Ca dxun tu xi' da dxuzezxe na tu xi'a zren,
 ne ca dxun xi' da dxuzezxe na tu din zren,
 15 ca'an gudáu zi' xuzre benne' caní tu lu be' bdunu',
 ne bchebe le' nen tu be' bdunu' chiu'.
 16 Ben xelxedué'ele'ene',
 ne ben xelape' Lue' ba lá'ana, Xran.

- 17 Ben xeleque zréajene' ne xelezúa stébele'e tu chí'izqueze.
Ben xelexegá'ana dí'taje', ne xelexenítie'.
- 18 Ben xelexúnbe'e nacu' Lue' Xránantu' Dios.
Tuzu' Lue' nacu' Dios zrente lawe' duté xezr la xu.

Salmo 84

- 1 Nazrí'ile'eda' xudau' chiu' Lue', Dios, napu' duté xel-la' waca.
- 2 Dxaca lázrele'eda' sua' ga na',
ne dxezá lazra' sua' lu xudau' chiu', Xran.
Duté da naca', ne duté lázrdawa' dxul-la' chiu' Lue', Dios ban.
- 3 Ba belún chjegu ca' xrú'uneba',
na' buchuj ca' zaj de lataj naga dxuluzríaba' biadu cheeba' ca'
naga zua lu cugu chiu' Lue', Dios, napu' duté xel-la' waca.
Nacu' Lue' Wenná Bea chia', ne Dios chia'.
- 4 Ba neza zrente naca na chee benne' ca' zaj zre'e xudau' chiu'.
Chadía chacanna xelúe lá'anaqueze' Lue'.
- 5 Ba neza zrente naca na chee benne' ca',
Lue' dxuzúa chuchu' le',
benne' ca' dxelezá lazre' chjaque' xi'a lá'azxa chiu', xi'a Sión.
- 6 Gate dxeledé'e lache' bizre nazí le na
Lache' Nisa Dxebézredxu,
dxexaca na lataj naga dxalaj nisa,
na' gusezrá nisa xiuj ca zaj naca beaj ca'.
- 7 Dxelácadxe' benne' wal-la dxácaté ne zaj xu'e neza
lawe' da xeledé'ene' Dios lu xi'a lá'azxa chee', xi'a Sión.
- 8 Bene, Xran, ca naca da dxenaba' Lue', Dios, napu' duté xel-la' waca.
Bene, Dios, nacu' Dios chee Jacob.
- 9 Ben da xrlátaje chee benne' wenná bea cheentu', Dios,
benne' wenná bea na' guca'u Lue'.
- 10 Cháwedxa naca sua' tu zraze lu xudau' chiu'
quézcala sua' chi gaxúa iza naga xula.
Dxaca lazredxa' sua' dxa xu'a xudau' chee Dios chia'
ca tu benne' nada'u,

- quézcala súaqueza' tu lizra' zaca naga quebe zua Dios.
 11 Xránadxu Dios naque' Benne' dxuxúe' dxi'u,
 ne Benne' Wenná Bea xabáa cheedxu.
 Dxune' dxi'u da chawe' duté xel-la' zri'i lazre' chee',
 ne dxune' dxelapa bénneache dxi'u ba l'ána.
 Quebe xezúene' zi' gune' da chawe' chee benne' ca' zaj
 naque' du lazre'.
 12 ¡Dios, napu' duté xel-la' waca!
 ¡Ba neza zrente naca na chee benne' ca' dxuluxrén lazre'
 Lue'!

Salmo 85

- 1 Benú' da xrlátaje chee bénneache chiu', Xrana' Dios.
 Benú' belexelá zri'ine zre sua Jacob,
 benne' ca' gulu'e lu na' benne' zitu' ca'.
 2 Bnite lau' da zrinnaj da belún bénneache chiu'.
 Bdeu' chalá'ala ca zaj naca dul-la chee benne' ca'.
 3 Bzua zriu' xel-la dxezrá'a chiu',
 ne bsanu' xel-la' xichaj zra'a chiu'.
 4 Ben xezúantu' lu da ba neza chee xel-la' weselá chiu', Dios,
 ne québedxa zra'u netu'.
 5 ¿Tu chí'izqueze zra'u netu'?
 ¿Wazrá'aquezu' tu cuen tu cuen zri'ine zre suantu'?
 6 ¿Québedxa gunu' xexaca bantu',
 chee súantu' lu da ba neza lau Lue'?
 7 ¡Xran, bexache lazre' netu', ne bselá netu'!
 8 Guzé naga' da nne Xrana' Dios.
 Nne' da guzúa na bénneache chee'
 lu xel-la' dxebeza zri lazre',
 chee québedxa xelún benne' l'azxa chee' da xálaze.
 9 Da líqueze Le' zúatequeze' guselé' benne' ca' dxelezrebe'
 Le',
 chee sua da xabáa chee' lu xezr la xu cheedxu.
 10 Zaj nazraga xel-la dxexache lazre', ne da li chee Dios.
 Zaj naca tuze da xrlátaje, ne xel-la' dxebeza zri lazre'.
 11 Da li chee' gusezrá na xezr la xu nigá,
 na' sel-le' da xrlátaje chee' da za xabáa.
 12 Xránadxu gúnnaqueze' dxi'u da cháwedau',
 na' gúnnale'e xezr la xu cheedxu.

¹³ Nu benne' naque' xrlátaje waca xezrine' lau Dios,
na' gune' gundxu ca da ba blé'ene' gundxu.

Salmo 86

- ¹ Bze naga, Xran, ne bene chia',
lawe' da zua' lu da ba xa', ne dxexázejeda'.
- ² Bxue neda' lawe' da naca' chiu'.
Bselá neda', Dios chia', naca' wen zrin chiu',
ne dxuxrén lazra' Lue'.
- ³ Bexache lazre' neda', Xrana' Dios,
lawe' da dxuláwizra' Lue' te zra chizrela.
- ⁴ Ben béle'eda' neda', wen zrin chiu',
lawe' da dxuzúa cuina' lau Lue', Xran,
- ⁵ na' Lue', Xran, nacu' xrlátaje, ne dxunite lau' cheentu'.
Zúatequezu' xexache lazru' benne' ca' dxululáwizre' Lue'.
- ⁶ Xrana' Dios, bene da dxuchálajlena' Lue',
ne bze naga ca da dxenaba' lau'.
- ⁷ Lu zra sua' lu da stébelé'e wannéqueza' Lue',
lawe' da dxexechébequezu' Lue' chia'.
- ⁸ Xran, quebe nu chilá' Dios ca Lue',
ne quebe nu dxun ca da dxunu' Lue'.
- ⁹ Xelélé' bénneache duté xezr la xu da benú' Lue',
na' xelúe lá'anaqueze' Lue', Xran,
ne xulucá'ana szrene' Lau' Lue',
- ¹⁰ lawe' da nacu' Lue' szren, ne dxunu' da dxexebánentu'.
Tuzu' Lue' nacu' Dios.
- ¹¹ Bsede neda' da dxaca lazru' guna', Xrana' Dios,
na' guna' ca naca da li chiu'.
Gunná be'e lázrdawa' chee zreba' La cuinu'.
- ¹² Duté lázrdawa' güe lá'anaqueza' Lue', Xrana' Dios,
ne gucá'ana szrénqueza' Lau' chadía chacanna,
- ¹³ lawe' da zúatequezu' xexache lazru' neda',
ne bseláu' bénne'du xu'a lu lataj ba xa'.
- ¹⁴ Dios, belasa benne' dxulucá'ana szren cuine',
ne dxeledábague' neda',
na' benne' xichaj zra'a ca' belune' tuze dizra' xelútié' neda',
ne quebe dxelezrebe benne' ca' Lue'.
- ¹⁵ Lue', Xrana', nacu' Dios dxexache lazru' netu',
ne nacu' zren lazre',

- ne quebe dxezrá'azeu', san zúatequezu' xexache lazru' netu',
ne nacu' li lazre'.
- 16 Gunná' ca naca chia', ne bexache lazre' neda'.
Benna chia' neda', wen zrin chiu', xel-la' waca chiu',
na' bxue neda', zri'ine nu'ula wen zrin chiu'.
- 17 Ble'e neda' tu da gaca bea na gaca chawe' chia',
ne ben xeledé'e benne' ca' dxelecuídene' neda' da na',
ne ben xelexedué'ene',
lawe' da nacu' Lue', Xrana' Dios, Bénnea' gúcalene' neda',
ne bexúe zrene' neda'.

Salmo 87

- 1 Lane xezre Sión zria na lu xi'a lál'azxa.
- 2 Nazrí'idxa Xránadxu Dios lataj naga dxuluchi'a benne' zaj
zre'e xezre Sión,
ca nazrí'ine' xúgute xu'u lizre zri'ine zre sua Jacob.
- 3 Da xrtante ca' dxelenná bénneache ca naca xezre chee Dios.
- 4 Cheajsá lazra' lu xezr la xu Egipto, ne lu xezr la xu
Babilonia
ga na' zaj zra' bénneache zaj núnbe'e neda'.
Le nna' xque, lu xezr la xu Filistea, ne lu xezre Tiro, ne lu
xezr la xu Etiopía gulalaj benne' caní zaj naque' chia'.
- 5 Ca naca chee xezre Sión nnia':
Benne' nigá, ne bénnea' gulálaje' ga na', na' neda',
Dios zrente, guzúa chúchua' xezre na'.
- 6 Gate gulaba Xránadxu Dios benne' ca' zaj naque' chee',
nne': "Benne' nigá gúlaje' lu xezre na'."
- 7 Benne' ca' dxelul-łe', ne benne' ca' dxeline' xide xelenné':
Ca naca da ba neza zúantu' lu xezre na'.

Salmo 88

- 1 Xran, nacu' Dios dxuseláu' neda'.
Te zra, ne chizrela dxuláwizra' Lue'.
- 2 Bene da dxuchálajlena' Lue',
ne bze naga da dxuláwizra' Lue'.
- 3 Dxedú lazra' lu da calęla ca' da dxaca na chia',

- ne ba zua' gatia'.
- 4 Dxeleque bēneache neda' ca tu benne' gate,
lawe' da dxátele'ē ni'a na'a.
- 5 Nagá'ana' cá'aze ládujla benne' gate.
Naca' ca benne' gulátie' lu wedil-la, ne zaj de' xēdxu ba ca',
benne' ca' québedxa dxajsá lazru', Dios,
ne québedxa zaj xu'ē lu na'u Lue'.
- 6 Dxaca chia' cáteze ba nuzú' neda' tu xēdxu zren
naga naca chul-la, ne nácale'ē situj.
- 7 Dxéqueda' dxezrá'le'u neda'.
Da dxaca chia' naca na ca dxazia' zran xeajxruza zri'a
cheē nísadau'.
- 8 Bēnu' belexebiga bi ljwezra' ca' naga zua'.
Bēnu' neda' ca tu da dxusegute na benne' ca'.
Naca' ca tu benne' xu'ē lizre xia ne quebe gaca xedxúaje'.
- 9 Dxelechul-la xiaj lawa' ne cheē da dxezí dzezaca'.
Xúgute zra dxuláwizra' Lue', Xrana' Dios.
Dxechisa na'a lau Lue'.
- 10 ¿Dxúnquezu' xel-la' waca cheē xabáa dxácalēnu'
benne' gate ca'?
- ¿Dxelexasa benne' gate ca' dxelúe lá'ane' Lue'?
- 11 ¿Dxuluchalaj benne' zaj nagache' lu xēdxu ba cheē
xel-la zri'i lazre' chiu',
na' dxuluchalaj cheē da li lazre' chiu' benne' zaj xu'ē
lataj chul-la cheē benne' gate ca'?
- 12 ¿Welexúnbea benne' zaj xu'ē lataj chul-la na' ca
naca da zrente da dxunu',
na' welexúnbea benne' zaj xu'ē naga quebe nu dxajsá lazre'
le'
ca nacu' xrlátaje?
- 13 Neda' dxuláwizra' Lue', Xrana' Dios.
Xúgute zila dxezrín lau' da dxenaba' Lue'.
- 14 ¿Bizr cheē na' dxebéaj xíchaju' neda', Xran?
¿Bizr cheē na' quebe dxenná'u neda' cheē gácalēnu' neda'?
- 15 Dxezí dzezaca', ne ba zua' gatia'.
Nácatea' bi cuíde'tē dxedéa' xel-la' zi' da dxudeu' neda',
na' dxedú lazra'.
- 16 Dxéqueda' dxezrá'le'u neda'.
Da dxuchebu' neda' ba bsedú na lazra'.
- 17 Zaj naxechaj da caní neda' du zra.

Dxulusaca zi na neda' gáteteze na'.
 18 Benu' belexebiga bi ljwezra' ca' naga zua',
 na' tuze da naca chul-la dxedále na neda'.

Salmo 89

- 1 Tu gúl-lazqueza' chee xel-la' zri'i lazre' chiu', Xran.
 Guzenda' tu cuen tu cuen zri'ine zre súantu' nacu' li lazre'.
- 2 Nezda' tu súazqueze xel-la' zri'i lazre' chiu',
 ne chadía chacanna zua xel-la li lazre' chiu',
 cáteze zúaqueze xabáa.
- 3 Lue' gunnáu': "Bena' xel-la wezría nen bénnea' ba gucá'a.
 Guchebe lazra' chee David, wen zrin chia',
- 4 gunnia': Guna' tu cházqueze zri'ine zre su'.
 Guna' xelenná be'e tu chí'izqueze lu waláz chiu'."
- 5 Benne' zaj zra' xabáa dxelúe lá'ane' Lue',
 ne chee da zrente' ca' da dxunu', Xran,
 ne ne chee xel-la' li lazre' chiu', naga zaj nazrague'.
- 6 Quebe nu zua xabáa, benne' naque' ca Lue', Xran.
 Quebe nu zua benne' szrente, benne' naque' ca Lue'.
- 7 Benne' zaj zra' xabáa dxelape' Dios ba lá'ana,
 na' xúgute benne' ca' zaj nazraga chee' dxelezrebe' Le'.
- 8 Xran, nacu' Dios chee benne' zante, benne' zaj zra' xabáa.
 Quebe nu zua, benne' naque' ca Lue', Xran.
 Nacu' Benne' wál-late, ne tu nácazquezu' li lazre'.
- 9 Xu'u lu na'u xeajxruza zren chee nísadau'.
 Gate dxelasa xeajxruza ca' Lue' dxebeque zriu' na.
- 10 Bchúchuju' benne' Egipto ca', na' belexegá'ane'
 ca tu da gate.
 Beše dínnaju' benne' ca' dxeledábague' lue' nen na'u
 wál-late.
- 11 Chiu' Lue' naca xabáa, ne chiu' Lué'queze naca xezr la xu.
 Benu' xezr la xu nigá, ne da ca' zaj nnita lawe na.
- 12 Benu' da de chalá'a naga za' be' zaga,
 ne da de chalá'a naga dxedé gubizra beu' zaga ca'.
 Xel-la dxelebe dxelul-la chiu' xi'a Tabor, ne xi'a Hermón.
- 13 Benne' wál-late nacu' Lue'.
 Da zrente naca xel-la waca chiu', ne nagá'ana szren na.

- 14 Lu da xrlátaje, ne lu da li lazre' dxenná be'u.
Lu xel-la zri'i lazre', ne lu da li lazre' zaj zua ca da dxunu'.
- 15 Ba neza zrente naca na chee benne' ca' dxelul-le'
da dxue lá'ana na Lue',
ne zaj zue' lu xel-la naxaní' chiu', Xran.
- 16 Ne chiu' Lue' dxelebéle'ene' du zra,
ne dxulucá'ana szrene' Lue' ca naca da xrlátaje chiu'.
- 17 Lué'queze nacu' xel-la wal-la chee benne' ca',
ne xel-la xrtan chee'.
Dxúnnadxu' netu' xel-la' waca lawe' da ca' dxéquenu'
xrlátaje.
- 18 Xránadxu Dios dxucu'uje' dxi'u,
na' Dios lá'azxa chee benne' Israel ca' naque'
Wenná Bea cheedxu.
- 19 Nédxudaute bchálaju' lu da blé'enu' benne'
wen zrin chiu' ca', benne' zaj naque' li lazre', gunnáu':
Ba gucá'a tu benne' wal-la ládujla bénneache chia',
ne ba bzua' le' gaque' wenná bea, ne dxácalena' le'.
- 20 Ba gucá'a David, wen zrin chia'.
Bzúaqueza' le' gaque' wenná bea.
- 21 Neda' tu gácalezqueza' le'.
Xel-la waca chia' gutípaqueza' lazre'.
- 22 Benne' ca' guledábague' Le' quebe xelezéquene'
bi xelune' chee',
na' benne' ca' dxelune' da calela quebe xelezéquene'
xuluchúhuje' le'.
- 23 Guchúchujqueza' benne' dxeledábague' Le', ne gucuasa'
benne' ca' lau le'.
Guna' we' benne' ca' dxelecuídené' le'.
- 24 Tu zrí'izqueza' le', ne gaca' li lazre' nen le',
na' ne chia' neda' gápadxe' xel-la' wal-la.
- 25 Guna' nna be'e dute dxu'a nísadau' zren,
ne dute dxu'a xegu Eufrates.
- 26 Le' xe'e neda': "Lue' nacu' Xra'.
Nacu' Dios chia', dxucu'uju' neda', ne dxuseláu' neda'."
- 27 Neda' guzúa' le' ca zri'ina' blau,
na' nna bé'ene' xúgute benne' wenná bea zaj zre'e
lu xezr la xu.

- 28 Tu chí'izqueze nuzúa' chee' xel-la' zri'i lazre' chia',
na' ca naca xel-la' wezría chia' gaca líqueze na nen le'.
- 29 Guna' tu cházqueze zri'ine zre sue',
na' xelenná be'e lu waláz chee' dxácatē ne zua xabáa.
- 30 Che xulusán zri'ine zre sua David da nadxixruj be'a,
ne che quebe xelunē' ca da nuchi'a chee',
- 31 ne che xelecuase' lu da dxenná be'a,
ne che quebe xelunē' ca da dxapa' le',
- 32 na' gu'a le' zrise lawe' da dxeledábague' neda',
ne quina' le' xide lawe' da dxelunē' da calela.
- 33 Quebe gusana' ca nazrí'ida' David,
ne quebe gusana' gaca' li lazre' nen le',
- 34 ne quebe gal-la lazra' xel-la' wezría da nuna',
ne quebe guchá'a ca da ba gunnía'.
- 35 Tu lásaze bzetaj cuina' guchebe lazra',
na' cabata' gun lazra' chee' David,
- 36 gunnia': Tu cházqueze zri'ine zre sue',
na' xelenná be'e lu waláz chee' lawa' neda'
dxácatē ne zua gubizra.
- 37 Xel-la' dxenná bea chee' tu sua chúchuzqueze na
ca zua beu' zran xabáa.
Tu sua chúchuzqueze na dxácatē ne zua xabáa.
- 38 Lue', Dios, guleaj xíchaju', ne bzu' chalá'ala bēnnea' guca'u,
ne dxezrá'le'u le'.
- 39 Nuzú' chalá'ala xel-la' wezría bēnlenu' David,
wēn zrin chiu',
ne nucá'ana dítaju' xel-la' dxenná bea chee'.
- 40 Nuxrínajaju' ze'e da naxechaj na xezre zréntau' chee',
ne nuzría xi'u ca naca lataj wal-la chee' chee' wedil-la.
- 41 Xúgutē bēnneache, benne' dxeledaze ga na' dxelebane'
chee' da zaj dē chee',
na' benne' xezre walíZR chee' dxelún le' chee'.
- 42 Ba bēnu' bedxúaj chawe' benne' guledábague' Le',
na' dxelebéle'ene'.
- 43 Bēn dítaju' da ca' dxuchínene' lu wedil-la,
ne quebe gúcalēnu' le' lu wedil-la na'.
- 44 Ba gudú' ca naca da xrtantē chee',
ne nucá'ana dítaju' xel-la' dxenná bea chee'.
- 45 Bēnu' naque' ca tu benne' gula gate ne zue' iza cuide' chee',
ne bsi'u le' xel-la' stu'.

- 46 Xrana' Dios, ¿bátaqueze quebe xennu' cheentu'?
¿Tu chí'izqueze dxezrá'aquezu' netu'?
- 47 Bsa lazre' látega sua' lu xęzr la xu.
Látega nunu' xel-la' nabán chee xúgute bėnneache.
- 48 Quebe zua nu benne' gaca bane' tu chí'izqueze.
Xúgute' xelatıe'.
Quebe zua nu benne' ęe' lu na' xel-la' gute.
- 49 Xran, ¿ba bsanu' David, ne québedxa nazrí'ınu' ęe',
ca bzetaj cuınu' guchebe lazru' zrí'iquezenu' ęe'?
- 50 Gunná' xque, Xran, ca dxelún ęe' chia' neda',
wen zrin chiu',
ne ca dxuchaga lawa' da dxelún lala benne' xúgute xęzr la
xu
chia' neda'.
- 51 Benne' ca' dxeledábague' lue' dxulucá'ana dıtaje'
bėnnea' guca'u Lue', Xran.
Dxulucá'ana dıtaje' ęe' gáteteze zéaje'.
- 52 Ba neza zrente' gaca Xránadxu Dios chadıa chacanna.
Ca' naca na, ne ca' gaca na.

Salmo 90

- 1 Xránantu' Dios, ba cua ba cua,
Lue' nacu' ca tu xu'u naga zra cháwentu'.
- 2 Nédxudaute' ca za gunu' xi'a zrı'a ca',
ne ca za sua xęzr la xu, ne bėnneache,
na' nédxudaute', ne lu da za za' nácaquezu' Lue' Dios.
- 3 Dxu'u bėnneache xelexaque' da gulaque',
dxelexaque' xu xrte.
- 4 Chiu' Lue' chi gaxúa iza zaj naca na ca neaje, da ba gudé
na,
ne ca tu chí'idau'ze chizrela.
- 5 Dxegú' bėnneache ca dxun guba'u,
da dxua na xúgute' xizre laga ca'.
Zaj naque' ca tu bchigala da dxexenite na gate
dxexebandxu.
- 6 Zaj naque' ca tu xixre' da dxegula na che zılala.
Dxegula na, ne dxelá'te' na xıaj,
na' xelate' zua gubizra dxelechuge' na, na' dxebizre na.
- 7 Dxebía xi'ntu' lawe' da dxezra'u netu'.

- Stébele'e zúantu' lawe' da dxezrá'le'u netu'.
 8 Dxenna'u ca da calela da nuntu'.
 Dxulé'enu' lówela zria da nabágantu'.
 9 Dxuzáchiu' iza cheentu' lawe' da dxezra'u netu'.
 Dxelexedú iza cheentu' ca tu be' da dxecá'antu'.
 10 Ca zaj naca zra naca bantu', zaj naca na ga xun chi iza,
 na' che nácantu' benne' wal-la, waca bantu' du tápalalaj iza,
 san ca zaj naca iza ca', dxedentu' xel-la' zi',
 ne dxéquentu' zede.
 Chadí dxeledé iza ca', na' xenítentu'.
 11 ¿Nuzra núnbea xanne' ca naca xel-la' dxezrá'a chiu'?
 ¿Nuzra núnbea ca naca xel-la' xichaj zra'a chiu'?
 12 Ble'e netu' ca láteze zaj naca zra cheentu'
 chee gácantu' benne' dxeléajni'ine'.
 13 Xran, bexaca netu' tuze.
 ¿Bátadxa chenu'?
 Bexache lazre' netu', wən zrin chiu'.
 14 Tu tu zila bzua xichaj lázrdauntu' xel-la' zri'i lazre' chiu',
 na' dutē xel-la' dxebé tu gul-lazquezentu' chiu'
 xúgute zra naca bantu'.
 15 Benna netu' zane' iza chee bentu' ca zaj naca iza
 bsaca zi'u netu',
 ne ca zaj naca iza guzúantu' lu da stēbe.
 16 Bē lataj netu', wən zrin chiu', le'entu' da zrentē da dxunu',
 ne xeledé'e zri'ine zre suantu' da xabáa chiu'.
 17 Xránantu' Dios, bən gaca cheentu' da chawe' chiu'.
 Bən chepe ban ca naca zrin dxuntu'.
 Awe', Xran, bən chepe ban ca naca zrin dxuntu'.

Salmo 91

- 1 Bénnea' dxuxrén lazre' Xránadxu Dios chee guxúe' le',
 ne dxuzúe' Dios, Bénnea' nape' dutē xel-la' waca,
 chee gácalene' le',
 2 waca xe'e Dios: Nacu' Bénnea' dxebeza lazra',
 ne Bénnea' dxucache chawe' neda'.
 Nacu' Dios chia', na' dxuxrén lazra' Lue'.
 3 Dios gucacha chawe' lue' lu xúgute da stēbe da quebe zaj
 nalá',
 ne lu xúgute xízrawe' da dxelute na bēnneache.

- 4 Gucache chawē' lue' ca dxun tu bedxuj dxézreba' biadu
cheēba' zran xrílaba', na' chu'u chawu' lu na' Lē'.
Xel-la' li lazre' cheē' gácale na lue', ne gucache chawe na
lue'.
- 5 Quebe bi guchebe lue' chizrela, ne quebe bi da stebe te zra,
6 ne quebe bi xízrawē' cheē da chul-la,
ne quebe bi da calela ca' da dxelute na bēneache te zra.
- 7 Welate chi gaxúa bēneache cuitu' lue',
ne gaxúa gaxúa bēneache gáguze naga zu',
san quebe bi sacu' lue'.
- 8 Wanna'u, na' walé'enu'
ca ba xa' xeledé benne' ca' dxelunē' da calela.
- 9 Nuzú' Xránadxu Dios ca Benne' dxebeza lazru', ne Dios,
Bēnea' nape' dutē xel-la' waca, cheē gucache chawē' lue'.
- 10 Cheē lē na' quebe bi da calela gaca na chiu',
ne quebe bi xízrawē' chu'u na lizru'.
- 11 Dios gusebage' gubáz cheē xabáa cheē' ca' chee
xelácalēne' lue',
na' xuluxúē' lue' gáteteze chéaju'.
- 12 Xeluxre' lue' lu ne'e cheē quebe ga'a xiaj ni'u.
- 13 Guléajquezu' bezre xixre' ca', ne belá' ca',
bezre xixre' schanní' ca', ne be snia ca'.
- 14 Dxenná Dios: "Guselá' xúgute benne' ca' zaj
nazrí'ine' neda',
ne gucache chawa' benne' ca' dxelexechebe' naca' Xrane'.
- 15 Gate xelennē' neda', na' xechēba' cheē'.
Gate zaj xu'e lu da stebe, súalequeza' le'.
Guselá' le', ne guna' le' ba lá'ana.
- 16 Guna' xelaca bane' zánete iza, ne guselá' le'."

Salmo 92

- 1 Chawe' naca dxue lá'anantu' Lue', Xrana' Dios,
ne gúl-lantu' da dxucá'ana szren na Lue', Dios szrente.
- 2 Chawe' naca dxuzéentu' bēneache tu zra tu zra
ca dxexache lazru' netu',
na' dxela dxulé'entu' nacu' li lazre'.
- 3 Dxúl-lantu' da caní, dxínentu' da dxúl-lalēntu'
da zē chi du cheē na,
ne dxínentu' da con zríadi'i na du da dxennēle'e xrtandau'.

- 4 Xrana' Dios, ne chee da dxunu' Lue', dxunu' dxebele'eda'.
Ca zaj naca da nun na'u zua' lu da ba neza.
- 5 Da zrente zaj naca da nunu', Xrana' Dios.
Da zrenle'e zaj naca da dxugu'u lazru' gunu'.
- 6 Québequeze neze benne' lázxdau zide',
ne quebe dxéajni'i benne' xala ca naca da nigá.
- 7 Gate dxelegula benne' dxelebéaj xíchaje' Dios
ca dxegula xixre',
ne dxepe ban da dxelún benne' wen da zrinnaj,
naca na chee xelebía xi'e tu chí'izqueze.
- 8 Lue', Xrana' Dios, tu nácazquezu' Dios szrente.
- 9 Dxunna bea na ca gaca chee benne' dxedábage' Lue',
Xrana' Dios.
Dxunna bea na xelebía xi' benne' ca' dxeledábage' Lue'.
Xelase dinnaj xúgute benne' ca' dxelune' da zrinnaj.
- 10 Lue' dxunu' dxezrendxa xel-la' wal-la chia' ca naca
xel-la' wal-la chee bezre.
Dxugu'u da za xíchaja' da dxutipa na lazra'.
- 11 Dخال-la' le'eda' xelezrá' zran ni'a benne'
dxeledábage' neda',
na' xenda' xelebezre xache' benne' ca' guledíl-lalene' neda',
benne' ca' dxelune' da calela.
- 12 Welexán benne' xrlátaje ca' ca dxun xaga zina'.
Xelegule' ca dxun xaga cedro lu xi'a Líbano.
- 13 Zaj naque' ca tu xaga ze na lu xudau' chee Xránadxu Dios,
da dxegúlale'e na lu chale'aj chee xu'u lizre Dios cheedxu.
- 14 Zaj naque' ca xaga ca' dxelebía da zixre chee na gate
ba zaj nagula na, ne zaj naca na xaga xa'a wal-la.
- 15 Benne' caní xuluzenne' bénneache naca li lazre'
Xrana' Dios, Bénnea' dxuzé chúchue' neda',
ne quebe bi zúale Le' da quebe naca xrlátaje.

Salmo 93

- 1 Xránadxu Dios naque' Wenná Bea,
ne nacue' zra lane' da zácale'e.
Nácue' zra lane', ne da nagú'u le'e naca na xel-la' waca zren.
Nuzúa chúchue' xezr la xu nigá, na' quebe nu seque' gutá
na.
- 2 Lataj naga dxe'u dxenná be'u, Xran,

- zua chuchu na nédxudaute,
na' Lue' zúaquezu' chadía chacanna.
- ³ Dxelebezre xa'a xegu ca', Xran.
Dxelebezre xa'a na, ne dxelenné na zizraj.
- ⁴ Xránadxu, Bénnea' zue' xabáa nápadxe' xel-la' waca
ca da zaj napa xegu ca' dxelebezre xa'a na,
ne ca da zaj napa xeajxruza chee nísadau'.
- ⁵ Chúchule'e zaj naca da nadxixru be'u, Xran.
Lá'azxa nácaqueze xudau' chiu' chadía chacánnaqueze.

Salmo 94

- ¹ Xrana' Dios, dxebéaj lazru' bénneache.
Lue', Bénnea' dxebéaj lazre' bénneache, ble'e cuinu'.
- ² Dxuchi'u Lue' chee da dxelún xúgute bénneache.
Guxasa, bexizruj da dxal-la' xelezí' benne'
dxulucá'ana szren cuine'.
- ³ Xrana' Dios, ¿Bátadxaqueze xelún benne' wen da calela
caní?
¿Bátadxaqueze xelebé benne' ca' dxelebéaj xíchaje' Dios?
- ⁴ ¿Bátadxaqueze xulucá'ana szren cuine', ne xelenné' dizra'
zi'?
¿Bátadxaqueze xulucá'ana szren cuina benne' ca'
dxelebéaj xíchaje' Dios?
- ⁵ Benne' caní dxuluxrínna' bénneache chiu' Lue', Xran,
ne dxulusaca zi'e bénneache guca'u Lue'.
- ⁶ Dxelútie' nu'ula tuze ca', ne benne' zitu' ca',
ne dxelune' xelátebe' bidau' wezebe ca'.
- ⁷ Dxelenné': "Quebe bi dxelé'e Dios, Xrana benne' ca'.
Dios chee benne' Israel ca' quebe dxue lazre' chee da na'."
- ⁸ Le chéajni'i, le'e, benne' lázxdau zide'.
Le'e, benne' xala, ¿bátadxaqueze quebe chéajni'ile?
- ⁹ Dios bene' nágadxu.
¿Québequeze dxénne' da dxennale?
Dios bene' xiaj laudxu.
¿Québequeze dxelé'ene' da dxunle'?
- ¹⁰ Díósqueze dxuzúe' lu da ba xa' benne' xezr la xu ca'.
¿Québequeze til-le' le'e?

- Diósqueze dxunę' dxeléajni'i bėnneache.
 ¿Québequeze gueque be'ene' da xu'u xichaj lázrdaule?
 11 Xránadxu Dios nézquezne' da xu'u xichaj lázxdau
 xúgute bėnneache.
 Nézene' zaj naca na da dácheze.
 12 Ba neza zrente naca na chee bėnnea' dxuzéajni'inu', Xran,
 ne dxusédenu' le' ca naca da nadxixruj be'u,
 13 chee cueza zri lazre' gate za zra dxaca da calela,
 ca zrin zra xelexú'u xędxu ba benne' dxelunę' da zrinnaj.
 14 Québequeze cueaj xichaj Xránadxu Dios bėnneache chee',
 ne quebe gusán lazre' benne' ca' ba gucá'a Le'.
 15 Naca xrlátaje ca xuluchí'e chee bėnneache,
 na' xelúnqueze da xrlátaje xúgute benne' zaj naque' li lazre'.
 16 ¿Núzraqueze gácale neda' tıl-lalędxu benne'
 wen da calela ca'?
 ¿Núzraqueze súale neda' tıl-lalędxu benne'
 dxelunę' da zrinnaj?
 17 Chela ca gúcale Xránadxu neda', bachelja xu'a xędxu ba.
 18 Gate gunnía': Xran, ba zua cheajcházia',
 na' Lue', dute xel-la' zri'i lazre' chiu' gúcalęnu' neda'.
 19 Gate dxela gunne xue, ne zua' lu da stębe,
 Lué'queze dxexúe zrenu' neda', na' dxebéle'ęda'.
 20 Québequeze nacu' tuze benne' ca' dxuluchi'e chee
 bėnneache da quebe naca xrlátaje,
 benne' ca' dxulucá'ane' ca xrlátaje da quebe naca na
 xrlátaje.
 21 Benne' caní dxelunę' tuze dizra' da xelunę' chee
 benne' xrlátaje,
 na' dxelechugue' chee gate bėnnea' quebe bi zria nabague'.
 22 Xránadxu Dios naque' ca tu xu'u naga zua chawa'.
 Dios chia' naque' ca tu xiaj xre da dxuzé chacha na neda'.
 23 Le' xexízruje' benne' ca' dxelunę' da calela cáteze naca
 da zrinnaj da belunę'.
 Guzría xi'e benne' ca' lu da calela da dxelunę'.
 Xránadxu Dios guzría xi'e benne' ca' dxelunę' da calela.

Salmo 95

- 1 Le da, güe lánadxu Xránadxu Dios dute xel-la' dxebé.
 Dute xel-la' dxebé gıl-ladxu chee Bėnnea' nuzúa chúchue'

dxí'u naga ladxu.

² Cheajdxu lau Le', ne xedxu Le': Xcalenu'.

Dute xel-la' dxebé gúl-ladxu da güe lá'anadxu Le'.

³ Naca Xránadxu tu Dios szrente,

ne naque' Wenná Bea szrente lawe' dios ca' chee bèneache.

⁴ Dxenná bé'ene' du gabí'i xezr la xu,

naga naca situj, ne naga naca sibe chee xi'a ca'.

⁵ Dxenná bé'ene' nísadau' da núnqueze Le',

ne cá'anqueze xezr la xu da bene'.

⁶ Le da, gucá'ana szrendxu Le', gátadxu sudxú'ala.

Guzú zríbedxu lau Xránadxu, Bénnea' nune' dxi'u.

⁷ Le' naque' Dios cheedxu.

Nácadxu benne' ca' dxuxúequeze', ne nácadxu ca zríla'du
ca'

cheéqueze'.

⁸ Che dxenle chi'e na'a zra, quebe gun zide' lázrdaule

ca belún xra xrtáule ca' naga nazí le na Meriba,

ne ca belune' lu zra na' le'e xixre' lawe' lataj naga

nazí le na Masah,

⁹ naga buluchá'a xra xrtáule neda', ne belune' neda' da stebe

lácala belelé'ene' xúgute da bena'.

¹⁰ Lawe' chua iza beditaj lazra' chee benne' ca',

na' gunnía': Zaj naque' benne' dxelebéaj xíchaje' neda',

ne quebe dxelune' ca da dxulé'eda' le'.

¹¹ Chee le na', dute xel-la' dxezrá'a chia' bzetaj cuina' gunnía':

Quebe xelexú'uqueze' naga xelexezí' lazre' nen neda'.

Salmo 96

¹ Le gul-la chee Xránadxu tu da cube.

Le gul-la chee Xránadxu, le'e zrle du gabí'i xezr la xu.

² Le gul-la chee Xránadxu, ne le güe lá'ana La lá'azxa chie'.

Tu zra tu zra le guzén ca naca xel-la' weselá da dxunne'.

³ Le guzén benne' xezr la xu ca' ca naca xel-la' szren chee',

Ne benne' xúgute xezre ca zaj naca xel-la' waca zren nune'.

⁴ Szrente naca Xránadxu, ne naca chee' güe lá'anale'edxu Le'.

Naca chee' gápadxe' xel-la' ba lá'ana ca dios ca'

chee bèneache,

⁵ lawe' da zaj naca xúgute dios ca' bedáu' xiaj xaga ca'.

Xránadxu Dios bene' xabáa na'.

- 6 Zúale Le' da xabáa, ne xel-la' szren.
 Nazrate xudau' chee' xel-la' waca, ne da xrtante.
- 7 Le güe lá'ana Xránadxu, le'e zrale du gabí'i xezr la xu.
 Le güe lá'ana xel-la' szren chee', ne xel-la' waca chee'.
- 8 Le gapa ba lá'ana Xránadxu ca da naca chee' si'e.
 Le gua da gunézrújle, ne le da chale'aj chee xudau' chee'.
- 9 Le gucá'ana szren Xránadxu lu xel-la' xrtante chee
 da naca lá'azxa chee'.
 Le zrebe lau Le', le'e zrale du gabí'i xezr la xu.
- 10 Le xē bēnneache xezr la xu: Naca Xránadxu Wenná Bea.
 Nuzúa chúchue' xezr la xu nigá, na' quebe nu seque' gutá
 na.
 Guchi'e chee bēnneache ca naca da xrlátaje.
- 11 Le be, le'e, xabáa, ne xezr la xu.
 Le cuezre xa'a, le'e, nísadau', ne bea ca' zrale na'.
- 12 Le be, le'e, le'e xixre', ne bea ca' zrale na'.
 Xaga ca' zaj dxē' xi'a ca' welunna schaga lu xel-la' dxebé
- 13 lau Xránadxu gate xidē'.
 Xidē' guchi'e chee bēnneache zaj zre'e xezr la xu.
 Nna bé'ene' bēnneache du gabí'i xezr la xu.
 Nna be'e Le' ca naca da xrlátaje, ne ca naca da li.

Salmo 97

- 1 Naca Xránadxu Benne' Wenná Bea.
 Le be, le'e zrale xezr la xu.
 Le be, le'e zrale dxu'a nísadu ca'.
- 2 Zaj naxechaj beuj, ne da chul-la Le'.
 Ca naca da li, ne da xrlátaje dxenná be'e.
- 3 Cuía lau xi' lau Le',
 ne guzezxe na benne' guledábage' Le'.
- 4 Ca naca xesa ca' chee' bulusení na xezr la xu.
 Dxelé'e xezr la xu na, ne dxezrize na.
- 5 Dxelexuna xi'a ca' ca da zixre chee bēzudau' lau Xránadxu,
 lau Xrana bēnneache zaj zre'e du gabí'i xezr la xu.
- 6 Dxulé'e xabáa ca naca da xrlátaje chee',
 na' dxelélé'e bēnneache dutē xezr la xu ca naca
 xel-la' szren chee'.
- 7 Dخال-la' xelexedué'e xúgute benne' ca' dxulucá'ana szrene'
 bedáu' xiaj xaga ca',

benne' ca' dxulucá'ana szren cuine' ca zaj naca bedáu' xiaj
xaga ca'.

Xúgute dios chee bēnneache ca' dxal-la' xuluzú zribe na
lau Xránadxu Dios.

⁸ Belén benne' zaj zre'e Sión, na' gulebene'.

Gulebé benne' zaj zre'e Judá, ne chee da guchi'u Lue', Xran.

⁹ Szrentē nacu' Lue', Xran, lawe' dutē xēzr la xu.

Szrendxa nacu' Lue' ca xúgute dios chee bēnneache.

¹⁰ Le'e, núlale nazrí'ile Xránadxu, le cuide da calela.

Le' dxuxúe' bēnne'du zaj xu'e bēnneache chee'.

Dxuselé' le' lu na' benne' dxelebéaj xíchaje' Dios.

¹¹ Zualē da dxusení na benne' xrlátaje ca',

na' xel-la' dxebé zúale na benne' li lazre' ca'.

¹² Le be, le'e, benne' xrlátaje, lau Xránadxu.

Le gusá lázrele ca da nun Dios lá'azxa, ne le güe lá'ana Le'.

Salmo 98

¹ Le gul-la chee Xránadxu tu da cube lawe' da nune' da ca'
da dxebénedxu.

Ne chee xel-la' wal-la chee', ne xel-la' waca lá'azxa chee'
ba bdinne'.

² Ba nuzén Xránadxu ca dxune' dxuselé' bēnneache.

Ba bzenne' bēnneache xēzr la xu ca' ca naca da xrlátaje
chee'.

³ Ba nune' ca da guchēbe lazre' chee benne' Israel ca'

ca naca xel-la' li lazre' chee', ne xel-la' nazrí'i zren chee'.

Bēnneache du gabí'i xēzr la xu ba belelé'ene' ca naca da ben
Dios cheedxu.

⁴ Le gul-la lu xel-la' dxebé lau Xránadxu, le'e zrle du gabí'i
xēzr la xu.

Le güe lá'ana Le' nen da gúl-lale, ne lu xel-la' dxebé chee
le cuezre xa'a.

⁵ Le gul-la da güe lá'anale Xránadxu.

Le gul-la nen da con zríadi'i na du ca' da quínnele.

⁶ Le gucuezre luzu da ca' dxulucuezre', ne da dxutíl-lale ca',

ne le cuezre xa'a lu xel-la' dxebé lau Xránadxu,

Wenná Bea cheedxu.

⁷ Le gun schaga nísadau', ne bea ca' zrle na'.

Le gul-la, le'e, xēzr la xu, ne le'e zrle na'.

- 8 Le capa na'le, le'e xegu ca'.
 Le gul-la lu xel-la' dxebé, le'e, xi'a ca', lau Xránadxu
 9 lawe' da xide' xedajnná bé'ene' xęzr la xu nigá.
 Nna bé'ene' benne' zaj zre'e du gabí'i xęzr la xu lu da
 xrlátaje,
 ne bénneache dute xęzr la xu lu da naca li lazre'.

Salmo 99

- 1 Naca Xránadxu Dios Benne' Wenná Bea,
 na' dxelezrize xúgute bénneache lau Le'.
 Dxe'e lataj blau chee' da zua na lówela querubín ca',
 na' dxezrú' lu xęzr la xu.
 2 Szrente naca Xránadxu lu xi'a Sión.
 Naque' szren lawe' xúgute cue' xęzr la xu ca'.
 3 Le güe lánana La Xránadxu da naca na szren,
 ne da dxal-la' zrédexu.
 ¡Lá'azxa naca Le'!
 4 Lue', Wenná Bea szrente, nazrí'inu' da naca xrlátaje.
 Nuzúa chachu' da naca li lazre'.
 Ba nunu' da naca xrlátaje, ne da naca li lazre'
 ládujla zri'ine zre sua Jacob.
 5 Le gucá'ana szren Xránadxu Dios.
 Le guzú zríbele lau Le' naga dxe'e.
 ¡Lá'azxa naca Le'!
 6 Moisés, ne Aarón gulaque' bxruze chee' ca'.
 Samuel guque' tu benne' bchálajlene' Le'.
 Gulenné' Xránadxu Dios, na' Le' bechebe'.
 7 Tu lu beuj bza bchálajlene' benne' ca'.
 Buluzúe' dizra' da gunná bé'ene',
 ne da ca' bdxixruj be'ene' le'.
 8 Xránantu' Dios, bechebu' lau benne' ca'.
 Blé'enu' le' nacu' Dios, dxunite lau' chee' bénneache,
 lácala dxudéu' le' xel-la' zi' ne chee' dul-la da zaj
 nabagué'.
 9 Le gucá'ana szren Xránadxu Dios.
 Le guzú zríbele lau Le' lu xi'a lánaxa chee',
 lawe' da lánaxa naca Xránadxu Dios.

Salmo 100

- 1 ¡Le gul-la lau Xránadxu Dios, le'e zrale du gabí'i xęzr la xu!
 2 ¡Le gucá'ana szren Le' dute xel-la' dxebé!
 ¡Le da lau Le', dxúl-lale dute xel-la' dxebé!
 3 Cabata' gal-la lázrele naca Xránadxu Diósqueze.
 Le' bene' dxi'u, na' nácadxu chee Le'.
 Nácadxu xęzre chee', ne zríla'du chee'.
 4 Le chu'u lataj naga zua xudau' chee', xęle Le': Xcalenu',
 ne chale'aj chee na, güe lá'anale Le'.
 Le xę Le': Xcalenu', ne le güe lá'ana Le'.
 5 Chawe' naca Xránadxu, na' chadía chacanna zua
 xel-la' zri'i lazre' chee'.
 Xel-la' li lazre' chee' tu súazqueze na chadía chacanna.

Salmo 101

- 1 Tu gúl-lazqueza' ca naca xel-la' zri'i lazre',
 ne xel-la' li lazre' chiu'.
 Tu gúl-lazqueza' chiu' Lue', Xrana' Dios.
 2 Dxaca lazra' guna' da naca li lazre'.
 ¿Bátala xidu' gácalenu' neda'?
 Guna' da naca du lazre', ne cá'anqueze guna' caní
 lu xu'u lizra'.
 3 Québequeze cu'u lazra' guna' tu da zrinnaj.
 Dxecuída' da dxelún benne' ca' dxelebéaj xíchaje' Dios.
 Québequeze gu'a lataj xelebigue' naga zua' neda'.
 4 Gucua'sa' lu xichaj lázrdawa' da caleļa,
 ne quebe cu'u lazra' chee da caleļa.
 5 Guzúa' chalá'ala benne' dxelenné' bagácheze
 chee benne' xula.
 Quebe gu'a lataj súale neda' tu benne' dxucá'ana szren
 cuine',
 u naque' benne' wenná be'e.
 6 Le'eda' chawe' benne' ca' zaj naque' li lazre' lau Dios,
 chee xelezré'e lawa' neda'.
 Tuze benne' ca' zaj naque' du lazre' xelune' zrin chia'.
 7 Quebe gu'a lataj benne' wecache lan chu'e lizra'.
 Quebe gu'a lataj tu benne' wen lazre' xegá'ane' naga zua'.
 8 Tu zra tu zra guzrí'a xi'a benne' ca' dxelune' da caleļa,
 benne' ca' zaj zre'e lu xęzr la xu chia'.

Gucuasa' xúgute benne' ca' dxelune' da zrinnaj lu xezre
chee
Xránadxu Dios.

Salmo 102

- 1 Xrana' Dios, bene da dxenaba' lau',
ne bze naga da dxuláwizra' Lue'.
- 2 Quebe gucache lau' lawa' neda', lawe' da lu da stēbe zua'.
Bze naga neda', ne bechébeche chia' gate dxuláwizra' Lue'.
- 3 Naca xel-la' nabán chia' ca zren chee xi' da dxexenítete.
Xu'u da la lu zrita chia' ca tu xi' da dxálale'e na.
- 4 Dxedú lazra', ne naca lázrdawa' ca tu xixre' da dxecuade,
na' québedxa dxenná na gudagu xeta.
- 5 Lawe' da dxebezre wé'le'a ba nazrítale'a.
- 6 Naca' ca tu situgún dxedaba' tu lu xezr la xu bizre,
ne ca tu bzriu zríaba' lawe' tu xu'u ze la'a.
- 7 Dxíchaja' bchigala, ne naca' ca tu bxinne zríaba' túzeba'
xrgu'u sibe.
- 8 Tu zra tu zra tu dxulucháchalezqueze benne'
dxeledábague' neda'.
Benne' ca' dxelecuídene' neda' dxuluchínene' la' neda'
gate nu benne' dxelegú'e de'.
- 9 Lu waláz chee xeta dxawa' de,
na' nisa dxebezra' dxechixre na da dxé'aja'.
- 10 Caní dxaca chia' lawe' da dxezra'u neda',
ne dxecuídenu' neda'.
Guca'u neda', na' gudxú'unu' neda'.
- 11 Naca xel-la' nabán chia' ca tu zrul-la da dxedeze,
na' naca' ca tu xixre' da ba nabizre.
- 12 Lue', Xrana' Dios, tu chí'izqueze zu',
na' cheajlesá lazre' xúgute cuen bēneache Lau'.
- 13 Chasu', ne xexache lazru' benne' zaj zre'e xezre Sión,
lawe' da ba bzrin zra xexache lazru' benne' ca'.
- 14 Netu', wen zrin chiu', nazrí'intu' xiaj ca' chee xezre na'.
Dxéquentu' zi' lawe' da ba nabía xi na.
- 15 Nadxa benne' xezr la xu ca' xelezrebe' lau Lue', Xran.
Xelezrebe xúgute benne' wenná bea chee xezr la xu nigá
da xabáa chiu',
- 16 gate ba bechisu' xezre Sión, Xran,

- ne xeelé'equezne' ca naca da xabáa chee na,
 17 gate na' guzé nagu' da dxelenaba benne' ca' guleaj xíchaju',
 ne québedxa guzú' chalá'ala da dxelata' xuene' Lue'.
 18 Xuaj da nigá chee xululaba benne' ca' za zá'aca,
 na' benne' ca' za xelalaj xelúe lá'ane' Xránadxu Dios.
 19 Naga zua Xránadxu xabáa gunné'e.
 Naga zué' xabáa blé'ene' lu xezr la xu nigá.
 20 Dxelé'ene' benne' dxelebezre xache', benne' zaj xu'e
 lizre xia,
 na' gusané' benne' ca' ba zaj nachugue' chee' xelatie'.
 21 Xuluzenne' benne' zaj zre'e xezre Sión ca szren naca
 La Xránadxu Dios,
 chee xelúe lá'ane' Le' lu xezre Jerusalén,
 22 gate xelezraga bénneache chee xúgute xezre, ne xúgute cue'
 xezr la xu
 chee xulucá'ana szrene' Xránadxu Dios.
 23 Xránadxu Dios bene' gute ni'a na'a gate ne naca' cuide'.
 Xeláteze ca be'tie' neda'.
 24 Nadxa gunnía': Dios chia', quebe gutiu' neda',
 gate quebe ne guéxrúa'.
 Lue' tu chí'izqueze zu'.
 25 Nédxudaute Lue' bzu' xezr la xu nigá, na' nen na'u
 benu' xabáa.
 26 Xelebía xi' da ca', san tu zúazquezu' Lue'.
 Welexru xúgute da ca' ca tu ladxe'.
 Ca dxuchadxu zra lánadxu tuzruj, ca' gucha'u da ca',
 na' xucúbeu' na.
 27 Túzqueze ca nacu' Lue',
 ne québequeze te chiu' Lue'.
 28 Zrí'inentu' netu', wen zrin chiu', xelezrabe' chawe',
 na' guzé chúchuquezu' zri'ine zre súantu' lau Lue'.

Salmo 103

- 1 Be lá'ana Xránadxu Dios, lue', bénne'du xu'a.
 Be lá'ana Le' lá'azxa, dute da naca'.
 2 Be lá'ana Xránadxu, lue', bénne'du xu'a,
 ne quebe gal-la lazru' ca da chawe' da nune' chiu'.
 3 Dxunite lawe' chee xúgute dul-la nabaga'a.
 Dxexune' neda' ca naca xúgute xízrawe' da xu'a.

- 4 Dxuxúe' neda' chee quebe gatia'.
Lu xel-la' zri'i lazre' chee', ne xel-la' dxexache lazre' chee'
dxune' chawe' chia'.
- 5 Dxuzánle'e da chawe' da dxaca chia' chee xegá'ana'
benne' cuide',
ne benne' wal-la ca dxaca chee tu bsia.
- 6 Xránadxu Dios dxuchi'e chee da dxaca chee benne'
dxeledé'e da ba xa',
ne dxucá'ana chawe' da dxaca chee'.
- 7 Blé'ene' Moisés da ca' gulú'u lazre' guné',
ne be'e lataj benne' Israel ca' belelé'ene' da ca' bene'.
- 8 Naca Xránadxu Benne' dxexache lazre', ne Benne' zri'i
lazre'.
Quebe dxezrá'azie', san zrente naca xel-la' zri'i lazre' chee'.
- 9 Quebe nníaqueze', ne quebe zrá'aqueze'.
- 10 Quebe dxudé'e dxi'u lu da ba xa' ca naca zria
da nabágadxu,
ne quebe ne guzría xi'e dxi'u ne chee dul-la da nabágadxu.
- 11 Ca sibe naca xabáa lawe' xezr la xu,
caníqueze naca xel-la' zri'i lazre' zren chee' nen benne' ca'
dxelape' Le' ba lá'ana.
- 12 Ca zitu' naca naga dxalaj gubizra, ne naga dxebía na,
caníqueze dxucuase' zitu' dul-la da nabágadxu.
- 13 Ca zri'i lazre' naca xra bidu ca' nen zrí'inequeze',
caníqueze naca zri'i lazre' Xránadxu nen benne' ca'
dxelape' Le' ba lá'ana.
- 14 Le' nézene' ca nácadxu lu be'la' dxen cheedxu.
Dxajsá lazre' nácadxu xu xrte.
- 15 Ca naca xel-la' nabán cheedxu, nácadxu ca tu xixre'.
Dxegúladxu ca tu xiaj xixre'.
- 16 na' dxedé be' dxua na le na, na' dxexenite na,
na' québedxa nu dxelé'equeze le na.
- 17 Ca naca chee benne' ca' dxelape' ba lá'ana Xránadxu,
zúale xel-la' zri'i lazre' chee' benne' ca' chadía chacanna,
na' xel-la' xrlátaje chee' zúalequeze na xúgute zri'ine zre sua
benne' ca',
- 18 benne' ca' dxelúnqueze' ca naca xel-la' wezría nune',
ne benne' ca' dxelune' ca zaj naca da nadxixruj be'e.
- 19 Nuzúa Xránadxu lataj chee' xabáa naga dxe'e dxenná be'e.
Nácaqueze' Wenná Bea lawe' xúgute da zaj zua.

- 20 Le güe lá'ana Xránadxu, le'e, gubáz chee xabáa ca',
 Nácale benne' wal-la, ne benne' chúchule'e,
 na' dxunle ca dxenná Le', ne dxuzé nágale ca dxe'e le'e.
- 21 Le güe lá'ana Xránadxu, le'e, dxenná beale xabáa.
 Nácale wen zrin chee', ne dxunle ca dxaca lazre' Le'.
- 22 Le güe lá'ana Xránadxu, xúgutele le'e ba nun Dios le'e,
 zrale xúgute lataj naga dxenná bea Le'.
 ¡Be lá'ana Xránadxu, lue', bénne'du xu'a!

Salmo 104

1 Be lá'ana Xránadxu Dios, lue', bénne'du xu'a.

- ¡Xrana' Dios, szrente nacu' Lue'!
 Nacu' zra lanu' da xabáa, ne da xrtante.
- 2 Dxugacu cuinu' xel-la' naxaní' ca zra lanu'.
 Dxechilju' xabáa ca tu xu'u ladxe' chiu'.
- 3 Nunu' lizru' lawe' nisa da ze ná'ala.
 Dxuchínenu' beuj ca' ca tu da dxudé xua naga dxe'u Lue',
 da dxedá na lu be'.
- 4 Dxuchínenu' be' ca' ca gubáz chiu' ca',
 ne xesa ca' ca wen zrin chiu' ca'.
- 5 Bzua chuchu' xezr la xu nigá lu lane na,
 na' quebe nu gaca gutá le na.
- 6 Bgacu' xezr la xu nigá nen nísadau' ca dxun tu benne'
 dxacue' zra lane',
 na' nisa na' bgacu na xi'a ca'.
- 7 Gate gudil-lu' nisa na', na' bzrunnuj na.
 Bebiga na gate ben na chi'u zizraj.
- 8 Nisa na' bgacu na xi'a ca' xajxedxé na dxu'a xegu ca',
 lataj ca' ba nunu' chee nisa na'.
- 9 Bzu' naga ze lau cheajsé na, naga québedxa gaca te na,
 chee québedxa gacu na xezr la xu bizre na'.
- 10 Dxunu' beaj ca' dxelalaj na dxu'a xégudu ca',
 ne xegu ca' dxeledé na ládujla xi'a ca'.
- 11 Lu xegu ca' dxelé'aj be xixre' ca' nisa,
 na' dxegúa na xel-la' dxelebile chee burro xixre' ca'.
- 12 Lu xaga zaj nnita dxu'a xegu ca' zaj zra' béadu ca'
 zaj zua xrila.
 Dxelúl-laba' ládujla zruze na ca'.

- 13 Zran xabáa dxesel-lu' xiuj da dxaca na lu xi'a ca',
na' dxezrate xezr la xu na' ca naca da xrlátaje da dxunu'.
- 14 Dxusegulu' xixre' da dxelagu bezre ca',
ne xíxre'du ca' da dxelagu bénneache,
ne da ca' dxuluchine bénneache dxelunē' xel-la' wagu,
15 ne uva ca' da dxelunē' xrise uva wal-la da dxuzúa na
bénneache ca' xel-la' dxelebé,
ne olivo ca' da dxelunē' da za da dxelegú'ē xíchaje',
ne zrua' da dxelunē' xeta chee xelaca banē'.
- 16 Xaga cedro ca' da zaj zua na xi'a Líbano dxelezíle'ē na nisa
xiuj.
Zaj naca na xaga chee Xránadxu Dios, da ca' guza Le'.
- 17 Lu xaga ca' dxuluzría bxínnedu ca' xrú'uneba',
na' lu zruze na ca' zaj zua lizre bxuze' ca'.
- 18 Zaj zua chivo xi'a ca' lu xi'a zri'a ca',
na' lu bluaj ca' chee xi'a ca' zaj zua bzrizru' ca'.
- 19 Benu' beu' da dxulé'e na tu beu' tu beu' chee iza,
na' gubizra núnbea na gate dxal-la' cuía na.
- 20 Benu' dxēla, na' gate bache nachul-la,
na' dxeledxúaj bē dxēla ca'.
- 21 Dxelebezre xa'a bezre xixre' ca', zaj nauba' bē xeláguba'.
Dxelíljaba' da nun Dios xeláguba'.
- 22 Gate dxalaj gubizra, na' dxelexezrinba' lu bluaj cheēba',
naga dxeláseba' te zra.
- 23 Nadxa dxeledxúaj bénneache dxelunē' zrin,
na' dxelúnqueze' zrin ca dxebía gubizra.
- 24 Xran, da zante zaj naca da benu'.
Dute xel-la' sina chiu' benu' da ca'.
Nazrate xezr la xu nigá da ca' benu'.
- 25 Na' zua nísadau', da zri'a, ne da laga,
naga zaj xu'u zánete bea ca', béadu ca', ne bē zri'a ca'.
- 26 Lu nísadau' na' zaj zra' da dxeledá lawe' nísadau' ca'.
Zua bē zri'a na' benu' Lue', nazí' laba' leviatán.
- 27 Xúgute bea ca' dxuluxrén lázreba' Lue',
chee gunézruju' da xeláguba' ca zrin chee na.
- 28 Dxunézruju' lēba', na' dxelecá'aba' na.
Dxunézruju' da dxeláguba', na' dxeléljeba'.
- 29 Gate quebe dxenná'u-ba', na' dxelezhébeba'.
Gate dxucusu' be' dxelecá'aba', na' dxeláteba',
ne dxelexácaba' xu xrte.

- 30 Gate dxesel-lu' be' chiu', na' xelexaca banba'.
Dxunézruju' xel-la' nabán cube chee da ca' zaj zua
xezr la xu nigá.
- 31 ¡Chadía chacanna gaca ba Xránadxu Dios!
Dxezaca ba lazre' Xránadxu chee da ca' ba núnqueze'.
- 32 Dxenné'e xezr la xu nigá, na' dxezrú' na.
Dxuté' xi'a ca', na' dxeledxúaj na zren.
- 33 Gúl-laqueza' chee Xránadxu dxácate na' naca bana'.
Xúgute zra zúaqueza' neda' gul-la' da güe lá'ana' Dios chia'.
- 34 Chawe' naca chia' da ca' dxulaba lazra' ca naca chee',
na' dxebéle'eda' ne chee Xrana' Dios.
- 35 Welebía xi' benne' dul-la ca' zaj zre'e lu xezr la xu nigá,
Na' québedxa cha benne' ca' dxelebéaj xíchaje' Dios.

¡Be lá'ana Xránadxu Dios, lue', bénne'du xu'a!
¡Le güe lá'ana Xránadxu!

Salmo 105

- 1 ¡Le güe lá'ana Xránadxu Dios!
¡Le gucá'ana szren La Le'!
¡Le guzén bénneache duté xezr la xu ca naca da nune'!
- 2 ¡Le gul-la chee'!
¡Le gul-la da güe lá'anale Le'!
¡Le guchalaj chee da zrente ca' da nune'!
- 3 ¡Le be lu da naca chee'!
- Xúgute benne' ca' dxelapa ba lá'ana Xránadxu dxal-la'
xelebéle'ene'.
- 4 Le naba Xránadxu gácalene' le'e.
Tu zra tu zra le guxrén lazre' Xránadxu Dios.
- 5-6 Le'e, zri'ine zre sua Abraham, wen zrin chee Xránadxu.
Le'e, zri'ine zre sua Jacob, bénnea' guqué'e,
Le gusá lazre' xel-la' waca ca', ne da zrente ca' da bene',
ne ca naca da bchi'e chee.
- 7 Le' naque' Xránadxu, ne Dios cheedxu.
Le' dxenná bé'ene' bénneache zaj zre'e duté xezr la xu.
- 8 Lácala te chee chi gaxúa cuen bénneache,
québequeze gal-la lazre' da guchebe lazre'
lu xel-la' wezría chee',

- 9 xel-la' wezría na' bénlɛnɛ' Abraham,
 da na' bzetaj cuine' guchebe lazrɛ' chee Isaac,
 10 na' bzua chúchue' na ca tu da nadxixruj bea na,
 da gun Jacob,
 da gaca na tu xel-la' wezría da zeajlí canna nen
 benne' Israel ca',
 11 da beñɛ' gate na' gunné': "Chiu' lue' gunna' xɛzr la xu chee
 benne' Canaán ca',
 da gaca na tu da xudele lu na' zri'line zre súale."
 12 Gate na' bábase zaj naque'
 gulezré'ɛ lu xɛzr la xu nigá ca benne' zitu' ca',
 13 ne guledéɛ' tu xɛzr la xu xetú xɛzr la xu, ne tu xɛzre
 xetú xɛzre.
 14 Quebe be' Dios lataj nu benne' bi gunɛ' chee
 bénneache chee',
 na' nɛ chee benne' ca' gudil-lɛ' benne' wenná bea ca'.
 15 Guzrɛ' le': "Quebe bi gunle chee benne' ca' gucá'a,
 ne quebe gunle da calɛla chee benne' ca' dxuluchalaje'
 waláz chia'."
 16 Beñɛ' guta' tu gubina' lu xɛzr la xu na',
 na' gudúɛ' ca naca xeta xelawe'.
 17 Gusel-lɛ' tu benne' cuía lawɛ' lau benne' chie' ca',
 bénnea' naque' José, bi na' belutie'-be' chee gácabe'
 wɛn zrin chee benne' zitu'.
 18 Buluzré'ɛ ní'abe' lu xɛdxu chee cuaga da bɛxru na ní'abe',
 gate na' gulu'e-be' lizre xia lu xɛzr la xu Egipto,
 19 ca bzin zra guca li ca da gunná José dxal-la' gaca.
 Caní guca, ble'e xrtizra' Xránadxu cúnnabe' da li.
 20 Nadxa benne' wenná bea chee Egipto gusel-lɛ'
 nu gusán José na'.
 Bénnea' dxenná bé'ene' zánete cue' xɛzr la xu bsanɛ'-be'.
 21 Bzue'-be' gácabe' xrana benne' zaj zre'ɛ lizre',
 ne chee nna be'ebe' ca naca da xu'u lu nɛ'e,
 22 chee tíl-labe' benne' szren ca' chee wenná bea cáteze
 dxaca lázrebe',
 ne chee guzéajni'ibe' benne' gula chee xɛzr la xu Egipto
 chee xelaque' benne' sina.
 23 Gudé na' gulu'e benne' Israel ca' lu xɛzr la xu Egipto,
 na' guzúa Jacob lu xɛzr la xu chee zri'line zre sua Cam.
 24 Gulánlɛ'ɛ bénneache chee Xránadxu lu xɛzr la xu na',

- na' bēne' gulaque' wál-ladxa ca benne' guledábage' Le'.
- 25 Bcha Dios lázxdau benne' Egipto ca' chee' xelegú'ne'
 bēneache chee',
 chee' xelegú'u lazre' xelune' da calela chee' wen zrin chee'
 ca'.
- 26 Nadxa gusel-le' Moisés, wen zrin chee', lau bēneache
 chee' ca', ne Aarón, bēnea' guqu'e'.
- 27 Benne' caní be'e' Dios lataj belune' xel-la' waca ca'
 chee' xabáa,
 ne xel-la' waca zrente' ca' lu xezr la xu chee' zri'ine zre sua
 Cam.
- 28 Gusel-la Dios tu da chul-la da bgacu na dute' xezr la xu na',
 san benne' Egipto ca' quebe buluzú'e' dizra' da gunná
 be'ene' le'.
- 29 Nadxa bēne' bexaca nisa xegu chee' benne' ca' dxen,
 ne betie' xúgute' bela zaj zraba' xegu ca'.
- 30 Busezrate' xezr la xu chee' bluzru ca' ga bzrinte' gulezraba'
 xu'u lize benne' wenná bea chee' benne' Egipto ca'.
- 31 Gunnaze Dios, na' belelá' zánete' be'a chee' bezre,
 ne be'a lase ca' dute' lu xezr la xu chee' benne' ca'.
- 32 Waláz chee' nisa xiuj gusel-le' xiaj bezxe' lu xezr la xu
 chee' benne' ca',
 ne xi' da bzezxe na ca naca xezr la xu chee'.
- 33 Bzria xi'e' ca zaj naca lba uva chee', ne ca zaj naca xaga higo
 chee',
 na' bzúzxuje' ca zaj naca xaga zaj ze' lu xezr la xu chee'.
- 34 Gunnaze', na' belelá' biche zu ca',
 da quebe nu seque' gulaba leba',
- 35 na' guláguba' dute' xixre' xa'a lu xezr la xu chee',
 ne guláguba' dute' lina da dxunna xezr la xu na'.
- 36 Nadxa betie' xúgute' bi biu nedxu chee' benne' Egipto ca',
 bi zaj nácabe' bi blau chee'.
- 37 Bebéaje' bēneache chee' na' zaj nu'e' dumí plata,
 ne dumí oro,
 na' quebe nu chilá' benne' ládujla le', benne' quebe
 chawe' zue'.
- 38 Gulebé benne' Egipto ca' gate beledxúaj benne' ca' ga na',
 lawe' da belezrébele'e' le'.
- 39 Bzalaj Dios tu beuj da gulú'u na benne' ca' zrul-la,
 ne tu xi' da bsaní na chee' chizrela.

- 40 Gulenabe' Dios, na' gusel-le' chee' btau ca',
ne bene' gulélajene' xeta da bdxuaj na xabáa.
- 41 Gule'e tu xiaj xre, na' gulaj nisa
da gudé na lu xezr la xu bizre na' ca tu xegu nisa.
- 42 Caní ben Dios lawe' da bsa lazre' xrtizre' lá'azxa
da guchebe lazre' guné' chee Abraham, wen zrin chee'.
- 43 Bebéaje' bènneache chee' lu xezr la xu Egipto, dxelebene'.
- Lu da ba neza gulezrá' benne' ca' guqu'é.
- 44 Bnézruje' benne' ca' xezr la xu chee benne' xezica ca',
na' da belún benne' xezr la xu ca' bexaca na chee benne'
chee' ca',
- 45 chee xulupá'ane' ca naca xrba chee' ca',
ne xelune' ca naca da gunná bé'ene' ca'.

¡Gaca ba lá'azxa Xránadxu Dios!

Salmo 106

- 1 ¡Gaca ba lá'azxa Xránadxu Dios!
¡Le xe Xránadxu Dios: “Xcalenu!”
Caní dxal-la' gunle lawe' da naque' xrlátaje,
ne lawe' da tu chí'izqueze dxexache lazre' dxi'u.
- 2 ¿Núzraqueze seque' gulé'ene' ca naca xel-la' waca zrente' ca'
da nune' Xránadxu?
¿Núzraqueze seque' güe lá'ane' Le' ca dxal-la' gundxu?
- 3 Ba neza zrente' naca na chee benne' ca' dxelune' da xrlátaje,
benne' ca' tu dxelúnzqueze' da naca xrlátaje.
- 4 Bsa lazre' chia', Xrana' Dios, gate dxunu' da chawe'
chee bènneache chiu'.
- 5 Gudá bselá neda' chee gaca le'eda' da chawe' gunu'
chee benne' ca' ba guca'u Lue',
ne chee beda' gate xelezrá' bènneache chiu' lu da ba neza,
ne chee béləna' bènneache chiu'.
- 6 Ba bentu' dul-la cáqueze belún xra xrtáuntu' ca'.
Bentu' da calela, ne bentu' da zrinna.
- 7 Gate gulezrá' xra xrtáuntu' lu xezr la xu Egipto,
quebe bululaba lazre' ca naca xel-la' waca ca' chee xabáa
da bənu'.
- Quebe xeajlesá lazre' ca bexache lázrele'u le'.
Guledábage' Lue' dxu'a nísadau' da nazí le na Xrna.

- 8 Le' bselé' benne' ca' chee gaca ba lá'ana La Le',
ne chee gulé'e lau ca naca xel-la' waca chee'.
- 9 Gudil-le' nísadau' Xrna na', na' bebizre na,
na' guledé bénneache chee' laduj nísadau' na' lu xu bizre.
- 10 Bselé' benne' ca' lu na' benne' guledábage' Le',
ne bebéajé' le' lu na' benne' ca' bulusaca zi'e le'.
- 11 Nadxa nísadau' na' bgacu na benne' ca' guledábage' le'.
Netú benne' ca' quebe nu begá'ana.
- 12 Nadxa benne' chee' ca' guléajle'e dizra' chee',
ne belul-le' da belúe lá'ane' Le'.
- 13 Chadí gulal-la lazre' ca da bene'.
Quebe gulebeze' ca la' dizra' chee Dios.
- 14 Gulezá lazre' tu da calela le'e xixre' lawe' lataj na',
na' buluché'e Dios le'e xixre' na'.
- 15 Gudé na' bnezruj Dios ca da gulenabe',
san gusel-le' ládujla le' tu da gute na bal-la benne' ca'.
- 16 Gulaque' xa lazre' chee Moisés naga zaj zre'e,
ne chee Aarón, Bénnea' gucá'a Xránadxu Dios.
- 17 Nadxa bzra xezr la xu na', ne gudébe na Datán,
ne bgacu na benne' ca' zaj de'e Abiram.
- 18 Nadxa guxalaj xi' naga zaj nazraga benne' ca',
na' bzezxe na benne' ca' dxelune' da calela.
- 19 Belune' tu bedáu' bezre da naca na oro lu xi'a Horeb,
na' buluzú zribe' lau bedáu' oro na'.
- 20 Caní bulucá'ane' Dios, Benne' xabáa,
chee xulucá'ana szrene' tu bedáu' bezre,
da naca na ca tu bezre dxáguba' xixre'.
- 21 Gulal-la lazre' Dios, Bénnea' bselé' le',
Bénnea' bene' xel-la' waca zrente' ca' lu xezr la xu Egipto,
22 ne bene' xel-la' waca ca' chee xabáa lu xezr la xu
chee zri'ine zre sua Cam,
ne da ca' buluchebe na dxi'u dxu'a Nísadau' Xrna.
- 23 Nadxa guca lazre' Dios guzría xi'e bénneache chee',
san Moisés, bénnea' gucá'a Dios, bzua cuine' lau Dios
chee guzúa zrie' xel-la' dxezrá'a chee Dios,
na' bene' quebe guzría xi' Dios benne' ca'.
- 24 Buluzúe' chalá'ala xezr la xu xrtante' da gunezruj Dios le',
ne quebe guléajle'e dizra' chee'.
- 25 Tu gulennézqueze' chee Dios lu xu'u xide chee' ca',
ne quebe buluzé nague' da gunná Xránadxu Dios.

- 26 Chee le na' bzetaj cuine' gunné' ca da gune' chee benne' ca'.
 Gunné' gune' xelate benne' ca' le'e xixre' lawe' lataj na',
- 27 ne gusi'e bénneache chee' lu xel-la' stu' lau benne'
 xezr la xu ca',
 ne guse dínnaje' le' ládujla benne' xezr la xu ca'.
- 28 Nadxa belune' tuze benne' ca' dxulucá'ana szrene'
 bedáu' xia nazí le na Baal-peor,
 ne gulawe' béadu ca' belútie' lau dios gate ca'.
- 29 Buluché'e Dios ne chee da belune',
 na' guxalaj tu xízrawe' zren da bete na benne' zan benne'
 ca'.
- 30 Nadxa guxasa Finees, ne betie' bénnea' bene' dul-la,
 na' guleza xízrawe' zren na'.
- 31 Da na' ben Finees guzí' Dios ca tu da dxucá'ana xrlátaje na
 bénnea',
 da gulé'e lawe na lau xúgute cuen bénneache ca'.
- 32 Cá'anqueze buluché'e Dios dxu'a beaj nisa nazí le na
 Meriba,
 na' guca da calela chee Moisés ne chee benne' ca',
- 33 lawe' da ne chee da belune' guca Moisés xichaj zra'a,
 na' bexúbete Moisés da gunné'.
- 34 Gate gulu'e lu xezr la xu nigá quebe buluzría xi'e
 bénneache zaj nite' ga na'.
 Caní guca, quebe belune' ca da guzre Dios le' xelune'.
- 35 Gulaque' tuze benne' xezr la xu ca',
 ne bulusédie' benne' Israel ca' xelune' ca dxelún benne' ca',
- 36 na' bulucá'ana szrene' bedáu' xia xaga ca' chee benne' ca',
 da na' ben na bxrinnaj Dios bénneache chee'.
- 37 Belútie' zrí'ine' bi biu, ne bi nu'ula chee'
 lau bedáu' chee da xriwe' ca',
- 38 ne bululálaje' dxen chee bi dxé'enedu ca',
 bi quebe zaj nunbe' dul-la,
 da naca na dxen chee zrí'ine' bi biu, ne bi nu'ula,
 bi ca' belútie' lau bedáu' xia xaga ca' chee bénneache
 Canaán,
 na' guca sban xezr la xu na' ne chee dxen chee bidu ca'.
- 39 Da ca' belune' ben na le' sban,
 na' gulebéaj xíchaje' Dios lu da belune'.
- 40 Chee le na' bzrá'ale'e Dios bénneache chee',
 na' gucuídene' benne' ca' zaj naca chee'.

- 41 Nadxa bdeę' benne' ca' lu na' benne' xęzr la xu ca',
na' benne' ca' dxelecuide bęnneache cheę Dios
gulenná bę'ene' le'.
- 42 Benne' ca' guledábage' le' bulusaca zi'e bęnneache
cheę Dios,
ne buluxrinnaje' le' lu xel-la' dxenná bea cheę'.
- 43 Zánete lasa Dios bselé' bęnneache cheę' ca',
san guledábage' ca da bsízrene' le',
na' gulape' xel-la' stu' lawe' da belune' da calela.
- 44 Lácala caní belune', gate gulezré'e lu da stebe,
Dios gunné'e ca da dxelezaque',
ne benne' ca da bululáwizre' Le',
- 45 na' xeajsá lazre' xel-la' wezría da bęnlene' benne' ca',
na' bexíaje lazre' cheę xel-la' dxezrá'a cheę'
lawe' da nácale'e benne' dxexache lazre'.
- 46 Cá'anqueze bene' belexache lazre' benne' ca'
benne' ca' guleché'e le' ca benne' zaj nada'u.
- 47 ¡Bselá netu', Xránantu', nacu' Dios cheęntu'!
¡Becá'a netu' ládujla benne' xęzr la xu ca',
cheę güe lá'anantu' Lau' lá'azxa,
ne cheę béle'entu' lu da dxúl-lantu' chiu'!
- 48 Cháwedau' naca Xránadxu, Bęnnea' naque' Dios cheę
benne' Israel ca' nédxudaute, ne chadía chacanna.
Xúgute bęnneache dxal-la' xelenné': ¡Ca'an gaca na!
¡Gaca ba lá'azxa Xránadxu Dios!

Salmo 107

- 1 ¡Le güe lá'ana Xránadxu, Benne' xrlátaje!
¡Chadía chacanna naque' Benne' zri'i lazre'!
- 2 Da nigá dxal-la' xelenná benne' ca' ba naxá'awe Xránadxu
le',
benne' ca' bselé' lu na' benne' guledábage' Le'.
- 3 Beche'e le' naga gulezrá' benne' xęzr la xu zitu' ca',
da zaj zua naga dxalaj gubizra, ne naga dxebía na,
ne naga za' be' zaga, ne naga dxedé gubizra beu' zaga ca'.
- 4 Bal-la benne' ca' guledé' le'e xixre' naga quebe bi neza zua,
ne quebe belezrelne' xęzre naga xelezúe'.
- 5 Guledune', ne gulebílene',

- ne québedxa bi gulebeza lazre'.
- 6 Nadxa lu da dxelezaque' gulenné' Xránadxu,
na' bselé' benne' ca' lu da dxelezaque'.
- 7 Na' buzre'e le' tu neza li,
chee chjaque' tu xezre naga xelezúe'.
- 8 Dخال-la' xelúe lá'ane' Xránadxu lawe' da bexache lazre'
Xránadxu le',
ne lawe' da bene' chee' da ca' da dxebánedxu.
- 9 Dxuxí'aje' benne' ca' dxelebile lazre',
ne dxugawe' benne' ca' dxeledún nen da chawe' chee'.
- 10 Bal-la benne' caní gulezúe' lu da chul-la, ne lu da stebe
chee xel-la' gute.
Gulaque' ca benne' zaj xu'e lizre xia,
ne zaj nadxéaj du xia, ne dxeledée' ba xa',
- 11 lawe' da guledábage' xrtizra' Xránadxu,
ne buluzúe' chalá'ala da bzéajni'i Dios zrente le'.
- 12 Belexedú lazre' lu zrin zí'ite da dxelune'.
Xelejcházie' zran xua da zaj nu'e,
ne quebe nu chilá' gácalene' le'.
- 13 Nadxa lu da dxelezaque' gulenné' Xránadxu,
na' bselé' benne' ca' lu da dxelezaque'.
- 14 Nadxa bebéaje' benne' ca' lu da chul-la
ne lu da stebe chee xel-la' gute,
ne bzúzruje' du xia ca' da zaj nadxéaje'.
- 15 Dخال-la' xelúe lá'ane' Xránadxu lawe' da bexache lazre' le',
ne lawe' da bene' chee' da ca' da dxebánedxu.
- 16 Bchínnaje' dxa xu'u ca' zaj naca na xia gache,
ne bzúzruje' xia ca' da zaj naxechaj na benne' ca'.
- 17 Bal-la benne' ca' gulaque' benne' xala,
ne guledée' xel-la' zi' ne chee dul-la da zaj nabague',
ne ne chee da zrinnaaj ca' da belune'.
- 18 Belexegútene' da dxelé'aj dxelawe',
na' xáteze ca gulátie'.
- 19 Nadxa lu da dxelezaque' gulenné' Xránadxu,
na' bselé' benne' ca' lu da dxelezaque'.
- 20 Gusel-le' dizra' chee' chee benne' ca',
na' bexune' le', ne bselé' le' lu xel-la' gute.
- 21 Dخال-la' xelúe lá'ane' Xránadxu lawe' da bexache lazre' le',

- ne lawe' da bene' chee' da ca' da dxebánedxu.
 22 Dxal-la' xelé'e Le': Xcalenu'.
 Dxal-la' xelú'e da xulunéruzje' Le',
 na' lu xel-la' dxelebé chee' dxal-la' xelúl-le',
 ne xuluzenne' bénneache ca zaj naca da nune'.
- 23 Bal-la benne' ca' guledé'e lu nísadau'
 lu da zren ca' da dxedá lawe' nísadau'.
 Belezi'e dumí zren lu zrin dxelune' lu nísadau'.
- 24 Belelé'ene' ca naca da ca' dxun Xránadxu,
 da ca' dxune' lu nísadau' da zaj naca na da dxebánedxu.
- 25 Gunnéze', na' guzú lau dxaca be' bdunu',
 na' gulasaxeajxruza zren lu nísadau'.
- 26 Belegüén da dxedá lawe' nísadau' ca' ca lu xi'a zri'a
 da naca na nísadau',
 na' belexetaj na lu da situj lawe' nísadau' na'.
- 27 Gulechégüe', ne xeajleté' ni xeajleté' na' ca
 benne' dxelezuzre,
 na' guca dácheze ca da zaj nusé'die'.
- 28 Nadxa lu da dxelezaque' gulenné' Xránadxu,
 na' bselé' benne' ca' lu da dxelezaque'.
- 29 Bzua zrie' be' bdunu' na' da dxaca na,
 ne gulezúa zri xeajxruza chee' nísadau' na'.
- 30 Gulebéle'ene' lawe' da zaj zua zri xeajxruza ca',
 na' guché'e Dios le' cháwedau' naga zjaque'.
- 31 Dxal-la' xelúe lán'e' Xránadxu lawe' da bexache lazre' le',
 ne lawe' da bene' chee' da ca' da dxebánedxu.
- 32 Dxal-la' xuluzenne' ca naca xel-la' szren chee' naga
 zaj nazraga bénneache chee',
 ne xelúe lán'e' Le' naga zaj nazraga benne' gula ca', benne'
 dxelenná be'e.
- 33 Ben Xránadxu gulebizre xegu nisa ca',
 ne busú'aje' beaj nisa ca'.
- 34 Xu xa'a bexune' na xu bizre,
 ne chee' da caléla da belún benne' ca' zaj zre'e na'.
- 35 Naga naca xu bizre bexune' na xu nisa,
 na' xu xiaj bexune' na naga dxalaj nisa.
- 36 Bzre'e ga na' benne' ca' benne' dxeledún,
 na' belune' tu xezre naga xelezúe'.
- 37 Gulaze' xezr la xu na', na' belexaze' lba uva ca',

- na' belexezí'le'e lina chee na.
- 38 Bene' da chawe' chee benne' ca', na' gulánle'e
bidu chee' ca',
ne quebe be'e lataj xelexe ca zaj naca be xixre' chee' ca'.
- 39 Gate buludé benne' dxelenná bea benne' ca' lu xel-la' zi',
ne bulusaca zi'e le',
ne gulenná bé'edxene' le', ne belune' le' da calela,
ne buludé'e le' lu da ba xa',
- 40 bca'ana ditaj Dios benne' xíchaje ca',
ne bene' guledé'e le'e xixre' lawe' lataj naga quebe bi neza
de.
- 41 Bselé' benne' xache' ca' lu da zi' da xa' da dxeledé'e',
ne bzánle'e zri'ine benne' ca' ca dxelán zri'la' ca'.
- 42 Gate dxelelé'e benne' xrlátaje ca' da caní, na' dxelebéle'ene',
na' benne' ca' dxelune' da calela quebe bi gaca xelenné'.
- 43 Benne' ca' zaj naque' sina dxal-la' xulaba lazre'
ca zaj naca da caní,
ne dxal-la' xelexúnbe'e ca naca xel-la' zri'i lazre'
chee Xránadxu.

Salmo 108

- 1 Ba zúatequeze lázrdawa', Dios,
chee gúl-laqueza' da güe lá'ana' Lue'.
Da nigá dxugú'u na neda' lu da ba neza.
- 2 Bebán lazre', bénne'du xu'a, na' le xebán lázrele,
le'e dxínnele da dxúl-lalene, ne da con zríadi'i na du.
Che zílala cheajsá'queza'.
- 3 Güe lá'anaqueza' Lue' ládujla bénneache chiu', Xran.
Gúl-laqueza' chiu' lau benne' duté xezr la xu,
- 4 lawe' da naca xel-la' dxexache lazre' chiu' zrendxa ca xabáa,
na' da li chiu' naca na zrendxa ca beuj bza ca'.
- 5 Xegá'ana szrénquezu' xabáa, Dios.
Xel-la' szren chiu' sua na lawe' duté xezr la xu.
- 6 Chee xelexé' benne' ca' nazrí'iqueznu' Lue',
bselá le' duté xel-la' waca chiu', ne bene chia'.
- 7 Lu lataj lá'azxa chee' gunná Dios: “Wabéquezda' neda'.

- Gunna' late weaj cheeḷe xezr la xu cheeḷ benne' Siquem ca',
ne gudixra' cheeḷe xezr la xu de cuite xegu Sucot.
- ⁸ Chia' naca xezr la xu Galaad,
ne chia' naca xezr la xu chee zri'ine zre sua Manasés.
Xezr la xu chee zri'ine zre sua Efraín naca na ca tu
da napa chi'i na xíchaja'.
Xezr la xu chee zri'ine zre sua Judá naca na naga dxenná
be'a.
- ⁹ Xezr la xu chee benne' Moab naca na ca tu zriga'
da xuzru nisa guná'a,
na' lu xezr la xu chee benne' Edom chu'una' zrela' gula.
Si'a ba neza xezr la xu chee benne' Filistea."
- ¹⁰ ¿Nuzra che' neda' chee chu'a xezre da naxechaj ze'e sibe?
¿Nuzra che' neda' chee guzétaja' benne' Edom ca'?
- ¹¹ ¿Quegá Lue' na' che'u neda', Dios.
Nacu' Bénnea' bzua netu' chalá'ala,
ne quebe guxéajḷenu' benne' cheentu' ca', benne' dxjaque'
wedil-la, Dios?
- ¹² Gúcale netu' chee séquentu' tíl-lalentu' benne' ca'
dxeledíl-lalene' netu',
lawe' da naca dácheze xelácale bènneache netu'.
- ¹³ Tu zren nen Dios gundxu tu da zrente,
na' Le' gulague' benne' ca' dxeledil-lalene' dxi'u.

Salmo 109

- ¹ ¡Dios, dxue lá'ana' Lue'!
Quebe xegá'anu' zrize
- ² lawe' da dxelenná benne' ca' dxelune' da caleḷa,
ne benne' wen lazre' ca' chia' neda'.
Dxelenné' chia' da naca da wen lazre'.
- ³ Lu xel-la' dxelecuide chee' zaj naxéchaje' neda',
ne dxelenné' chia'.
Dxeledíl-lalene' neda', ne quebe bi nuna' chee benne' ca'.
- ⁴ Lácala bzri'ida' benne' ca', na'a dxeledábague' neda',
san neda' dxenaba' gaca da chawe' chee benne' ca'.
- ⁵ Lácala bēna' neda' da chawe' chee benne' ca', dxelune' chia'
da caleḷa,
ne lácala bzri'ida' le', dxelecuídenē' neda'.

- 6 Bzua tu benne' wən da zrinnaj chee guchi'e chee
 benne' wən da calela ca',
 ne bən sua tu benne' nnie' chee benne' ca',
 benne' guzúe' ca naca da calela belún benne' ca'.
- 7 Gate na' zri'a chee', bən gaca bea na zaj nabague' zria.
 Ble'e da xelenabe' lau' ca tu dul-la da dxelune'.
- 8 Bzache zra xelaca ban benne' ca',
 ne bən xelú'u xezica' benne' waláz chee'.
- 9 Bca'ana zrí'ine' ca' bidau' wezebe,
 ne xelaca zru'ule' nu'ula tuze ca'.
- 10 Bən xelaca zrí'ine' bi dxeledaze chee xelenábabe' guna',
 ne bən xelezrélebe' xeta xelágube' zitu' naga zaj zua lízrebe'
 da zaj naxinnaj.
- 11 Bən xelú'u da ca' zaj nape' lu na' bénne' ca'
 bulusanē' le' dumí.
 Bən xelexúa benne' zitu' ca' da ca' zaj nune'.
- 12 Bən quebe nu zrel-la benne' xexache lazre' le',
 ne quebe nu benne' zrel-la xexache lazre' bidau' wezebe
 chee' ca'.
- 13 Bən xelebía xi' zri'ine zre sua benne' ca',
 ne québedxa nu cha' zri'ine zre sue',
 si' le' ca zaj nazi'i la benne' ca'.
- 14 Bsa lazre' ca da calela da belún xra xrtawe', Xran,
 ne quebe xusulu' dul-la da gulún xrne'e ca'.
- 15 Tu chí'izqueze bsa lazre' ca da calela da zaj nune'.
- Québedxa cheajsá lazru' benne' ca'
- 16 lawe' da quebe xeleajsá lazre' xelexache lazre' le sa' ljwezre'
 ca',
 san bulusaca zi'e benne' baxache' ca', benne' dxelexázejene',
 ne benne' dxexruj lazre' ca', na' belútiē' bénne'du ca'.
- 17 Beledánene' da dxugú'u na de', na' da caníze guca na chee'.
 Quebe gulaca lazre' xelenabe' gaca chawe' chee bénneache,
 na' da chawe' bebiga na naga zaj zue'.
- 18 De' da gulegú'e bénneache guca na ca tu da gulacu cuine',
 na' guxú'u na le'e ca nisa gulé'aje',
 ne guxú'u na zrita chee' ca da za.
- 19 Tu chí'izqueze bən gaca na chee' ca xicha da dxelácuē',
 ne gaca na ca tu xpádxue' dxuluchela le'e.
- 20 Gaca da nigá da quizruj Xránadxu Dios benne' ca'
 dxelenné' calela chia',

- ne da quízruje' benne' ca' dxelune' da calela,
ne dxelenné' calela chee bénne'du xu'a.
- 21 Xrana' Dios, ben culuén chia' chee xegá'ana'
xrlátaje lau'.
- Bselá neda' lawe' da dxexache lázrele'u bénneache,
22 ne lawe' da dzezaca zi'a, ne dxexáxrjeda',
ne dxeque zi' lázrdawa'.
- 23 Dxedé chia' ca dxedé chee tu zrul-la gate dxebía gubizra.
Dxaca chia' ca dxaca chee biche xuaj gate dxua be' leba'.
- 24 Dxelate zriba' lawe' da dxuna' gubasa,
ne nazrítale'a lawe' da quebe bi dxawa'.
- 25 Naca' ca tu da dxulucá'ana dítaje'.
Dxelenné'le neda', ne dxelún le' chia', dxulutá xíchaje'.
- 26 Gúcale neda', Xrana' Dios.
Bselá neda' lawe' da dxexache lazru' bénneache.
- 27 Ben xeque be'ene' Lué'queze dxácalenu' neda'.
Lué'queze, Xrana' Dios, ba nunu' da nigá.
- 28 Dxelegu'e neda' de', san ben Lue' gaca chawe' chia'.
Guxasa, ben xelexedué'e benne' ca' dxeledábague' neda',
san ben beda' neda'.
- 29 Ben xelezrá' lu xel-la' stu' benne' ca' dxelenné'
da calela chia'.
Ben xeque zréajene' tu chí'izqueze.
- 30 Du lazra' gúl-laqueza' da güe lá'anale'a Xránadxu Dios.
Ládujla benne' zan ca' güe lá'ana' Le'.
- 31 Le' zue' cuita xabela chee benne' xache' ca'
chee guselé' bénne'du zaj xu'e lu na' benne' ca'
dxuluchi'e chee'.

Salmo 110

- 1 Xránadxu Dios guzre' Xrana': "Gudxé'e chalá'a xabela chia'
cadxa zrin zra guna' ga benne' ca' dxeledábague' lue'
xuluzúa zribe' lau'."
- 2 Naga zu' Sión, gun Xránadxu zriluj xel-la' dxenná bea chiu'.
Dxenné': "Gunná be'e benne' ca' dxeledábague' lue'.
- 3 Lu zra gate tíl-lalenu' benne' ca' dxeledábague' lue',
du lázrequeze benne' chiu' ca' chjaque' wedil-la.
Ca dxun xrlé'ela chee bálala, dxacu na xi'a lá'azxa,

- caníqueze xelaca benne' cuide' chiu' ca',
 xelexé'ē naga zu' xelácalene' lue'.”
- 4 Guchebe lazre' Xránadxu, ne quebe gunítie' xrtizre',
 gunné': “Chadía chacanna nacu' bxruze ca guca bxruze
 Melquisedec.”
- 5 Zua Xránadxu chalá'a xabela chiu'.
 Gate zre'ē, na' guzría xi'ē benne' wenná bea ca'.
- 6 Guchi'ē chee benne' dute xezr la xu, na' gutie' zánete
 benne' xezr la xu ca'.
 Guzría xi'ē benne' dxelenná be'ē dute xezr la xu.
- 7 Xi'aj benne' wenná bea nigá nisa xégudu zua na dxu'a neza,
 na' xexape' xel-la' wal-la chee'.

Salmo 111

- 1 Dute lázrdawa' güe lá'ana' Xránadxu Dios tu zren nen
 benne' xrlátaje ca', benne' zaj nazrague' lau Le'.
- 2 Da zrente zaj naca da ca' nun Xránadxu Dios,
 na' xúgute benne' ca' dxelezaca ba lázrele'ē da nune',
 ne dxelaca lazre' xelexé'ene' na.
- 3 Da xabáa, ne da xrtante zaj naca da dxune' Le',
 ne tu chí'izqueze zua da xrlátaje chee'.
- 4 Dxune' dxeajsá lázredxu ca naca xel-la' waca zrente
 da dxune'.
 Xránadxu Dios naque' zren lazre', ne dxexache lazre'
 bēneache.
- 5 Dxugawe' benne' ca' dxelezrebe' Le'.
 Tu chí'izqueze dxeajsá lazre' xel-la' wezría da nune'.
- 6 Blé'ene' bēneache chee' ca' ca naca xel-la' waca chee
 da ca' bene'.
 Dxunézruje' benne' chee' ca' da zaj napa benne' xezica
 xezr la xu ca'.
- 7 Li lazre', ne xrlátaje zaj naca da ca' dxune'.
 Li lazre' zaj naca xúgute da bdxixruj be'ē.
- 8 Tu chí'izqueze, ne chadía chacanna zaj zua da ca'
 bdxíxruje'.
 Lu da li, ne lu da li lazre' nune' ca zaj naca na.
- 9 Gusel-le' tu benne' weselá chee guselé' bēneache chee'.
 Tu chí'izqueze nadxixruj be'ē xel-la' wezría chee'.
 Lá'azxa, ne tu da zrēbedxu naca La Le'.

- 10 Chee su laudxu gácadxu sina, dxun na ba xen zrédexu
 Xránadxu Dios.
 Dxeléajni'li xanne' xúgute benne' ca' dxelune' ca' zaj naca
 da nadxíxruje'.
 Tu chí'izqueze dxal-la' güe lá'anadxu Le'.

Salmo 112

- 1 Ba neza zrente naca na chee bēnea' dxezrebe'
 Xránadxu Dios,
 ne ca zaj naca da bdxixruj be'e dxezaca ba lázrele'ene'.
 2 Zri'ine zre sua bēnea' xelape' xel-la' dxenná bea
 lu xezr la xu,
 na' gaca chawe' chee benne' xrlátaje ca'.
 3 Da zan da de, ne xel-la' gunní'a zaj zra na xu'u lizre',
 ne tu chí'izqueze zua da xrlátaje da dxun bēnea'.
 4 Dxusaní' tu xi' lu da chul-la naga zaj zra' benne' li lazre' ca',
 benne' ca' zaj naque' zren lazre', ne xrlátaje,
 ne dxelexache lazre' bēneache.
 5 Tu benne' xrlátaje dxexache lazre' bēneache,
 ne dxusané' le' dumí.
 Lu da xrlátaje dxenná bé'ene' da zaj xu'u lu ne'e.
 6 Chee le' na' quebe bi gutá na le' lu lataj naga zue',
 na' tu chí'izqueze xejlesá lazre' bēneache ca'.
 7 Quebe zrebe' gate xenne' dxaca da calela chee
 da xu'u lu ne'e.
 Ze chacha lázrdawe' lawe' da dxuxrén lazre' Xránadxu
 Dios.
 8 Zua chawe' lázrdawe', ne quebe bi dxezrebe',
 ca zrindxa zra lé'ene' gaca chee benne' ca' guledábague'
 le'
 ca da dxezá lazre'.
 9 Dxisie' da de chee', ne dxunézruje' da gácale
 benne' xache' ca',
 ne tu chí'izqueze zua da xrlátaje da dxune'.
 Lu da xabáa xegá'ana szren xel-la' dxenná bea chee'.
 10 Wal'é benne' wen da calela da nigá, na' gueque zrējene'.
 Gágu xa'ate lazxe', ne cue'e gunne xue.
 Xelenite da ca' dxelezá lazre' benne' ca' dxelune' da
 calela.

Salmo 113

- 1 ¡Le'e, wen zrin chee Xránadxu Dios, le güe lá'ana Le'!
¡Le güe lá'ana La Xránadxu Dios!
- 2 ¡Gaca ba lá'azxa La Xránadxu Dios,
na'a zra, ne chadía chacanna!
- 3 ¡Naga dxalaj gubizra ca zrinte naga dxebía na
gaca ba lá'azxa La Xránadxu Dios!
- 4 ¡Szrente nagá'ana Xránadxu Dios lawe' dutē xezr la xu,
na' lówela xabáa dxe' da xabáa chee'!
- 5 ¿Núzraqueze naca ca naca Xránadxu Dios,
Bénnea' dxe'e xabáa na'la?
- 6 Dios dxun cuine' dxexruj lazre' chee lé'ene'
da de zran xabáa, ne lu xezr la xu.
- 7 Dios dxechise' benne' xache' lu xu xrte,
ne dxebéaje' benne' baxache' lu da dxezaca zi'e,
- 8 na' dxune' dxelebé' benne' caní ládujla benne'
dxelenná be'e,
ládujla benne' ca' dxelenná bé'ene' bénneache chee'.
- 9 Dxune' zua nu'ula zue' tuze ládujla zrí'inequeze' ca',
na' dxebé nu'ula nigá lawe' da naque' xrna bi cheéqueze'.

¡Gaca ba lá'azxa Xránadxu Dios!

Salmo 114

- 1 Gate beledxúaj benne' Israel ca' lu xezr la xu Egipto,
beledxúaj zri'ine zre sua Jacob lu xezr la xu chee
benne' zitu' ca',
 - 2 na' gulaca zri'ine zre sua Judá ca tu xu'u lizre Dios,
gulaca benne' Israel ca' naga dxenná be'e.
 - 3 Ble'e Nísadau' Xrna da nigá, na' bzrunnuj na,
na' gugá xegu Jordán.
 - 4 Gulexrite xi'a zri'a ca' ca dxelexrite chivo ca',
na' gulexrite xí'adu ca' ca dxelexrite chíbudu ca'.
 - 5 ¿Bizra guca chiu', nísadau', lawe' da ben na bzrúnnuju'?
¿Bizra guca chiu', xegu Jordán, lawe' da ben na gugú'?
 - 6 Le'e, xi'a zri'a ca', ¿Bizr chee na' guxrítele ca dxelexrite
chivo ca'?
- Le'e, xi'adu ca', ¿Bizr chee na' guxrítele ca dxelexrite
chíbudu ca'?

- ⁷ Dxezrize xēzr la xu lau Xránadxu Dios, lau Dios cheē Jacob.
⁸ Dios nigá bene' bexaca xiaj xre' tu beaj nisa,
 na' bexaca xiaj tu ga dxalaj nisa.

Salmo 115

- ¹ Quegá netu', Xran.
 Quegá cuintu', san Lué'queze dxal-la' xucá'ana szrentu'
 ne cheē xel-la' zri'i lazre' chiu', ne xel-la' li lazre' chiu'.
² ¿Bizr cheē na' dxun na ba xen xuluchebe bēnneache netu':
 “Gazra zua Dios chee?”
- ³ Dios cheēdxu zuē' xabáa.
 Dxonē' ca da dxaca lázrequeze'.
- ⁴ Dios ca' cheē benne' ca' zaj naca na bedáu' plata,
 ne bedáu' oro, da nun ni'a na' bēnneache.
- ⁵ Zaj zua dxu'a na, san quebe dxelenné na.
 Zaj zua xiaj lau na, san quebe dxelelé'e na.
- ⁶ Zaj zua naga na, san quebe dxelén na.
 Zaj zua zrina na, san quebe dxelelé'e na.
- ⁷ Zaj zua na' na, san quebe bi dxelecá'a na.
 Zaj zua ni'a na, san quebe dxeledá na.
 Quebe dxedxuaj chí'i na lba na.
- ⁸ Ca zaj naca na, zaj naca benne' ca' zaj nunē' na,
 ne benne' ca' dxuluxrén lazre' na.
- ⁹ Le guxrén lazre' Xránadxu, le'e, benne' Israel ca'.
 Le' dxácalēnē' le'e, ne dxuxúe' le'e.
- ¹⁰ Le guxrén lazre' Xránadxu, le'e, bxruze cheē Dios,
 nácale zri'ine zre sua Aarón.
 Le' dxácalēnē' le'e, ne dxuxúe' le'e.
- ¹¹ Le guxrén lazre' Xránadxu, le'e dxucá'ana szrenle Le'.
 Le' dxácalēnē' le'e, ne dxuxúe' le'e.
- ¹² Xránadxu dxajsá lazre' dxi'u, na' gunē' dxi'u da chawe'.
 Gunē' da chawe' cheē benne' Israel ca'.
 Gunē' da chawe' cheē bxruze cheē', zri'ine zre sua Aarón.
- ¹³ Gunē' da chawe' cheē xúgute benne' dxelape' Le' ba lá'ana,
 benne' blau ca', ne benne' quebe zaj naque' blau.
- ¹⁴ Gun Xránadxu chan zri'inu' ca',
 ne chan zri'ine bi biu chiu' ca'.
- ¹⁵ Gun Xránadxu da chawe' chiu'.

- Naque' Bénnea' ben xabáa, ne xezr la xu.
 16 Chee tuze Xránadxu naca xabáa,
 san bnézuje' bènneache xezr la xu.
 17 Benne' zaj nate quebe gaca xelúe lá'ane' Xránadxu,
 ne quebe gaca benne' ca' zaj zue' lu xedxu ba.
 18 Dxi'u, benne' ban, güe lá'anadxu Xránadxu,
 na'a zra, ne chadía chacanna.

¡Le güe lá'ana Xránadxu!

Salmo 116

- 1 ¡Nazrí'ida' Xránadxu Dios
 lawe' da benne' chi'a, ne da gunaba' lawe',
 2 ne lawe' da bze nague' chia!
 Chee le na' guláwizra' Le' dxácatē naca bana'.
 3 Guzúa' lu da stebe chee xel-la' gute,
 ne bzreba' ba zua' chu'a lataj ba xa'.
 Guzúa' lu da stebe, ne guzaca zi'a.
 4 Nadxa bláwizra' Xránadxu Dios, gunnía':
 Xrana' Dios, bselá bènne'du xu'a.
 5 Cháwe'le'e naca Xránadxu Dios, ne xrlátaje naque'.
 Awe', dxexache lazre' Dios cheedxu dxi'u.
 6 Dxuxúe Xránadxu benne' dxexruj lazre' ca'.
 Gate na' guzúa' lu da stebe bselé' neda'.
 7 Ben dipa lazre', bènne'du xu'a,
 lawe' da nun Xránadxu da chawe' chiu'.
 8 Lue', Xran, bseláu' bènne'du xu'a lu na' xel-la' gute,
 chee québedxa cuezre we'a, ne chee quebe cheajcházia'.
 9 Ta' lau Xránadxu Dios
 naga zaj zra' benne' ca' zaj naca banē'.
 10 Guxéajle'a chee', na' chee le na' bchálaja', lácala guzaca
 zí'le'a.
 11 Lu xel-la' dxezrebe chia', gunnía':
 Zaj naca xúgute bènneache benne' wen lazre' ca'.
 12 ¿Bizra quízrujqueza' Xránadxu Dios
 chee xúgute da chawe' da bene' chia'?
 13 Si'a lu ne'e xel-la' weselá,

- ne guláwizra' Xránadxu Dios.
- 14 Na'a guna' da ca' guchebe lazra' lau Xránadxu.
Guna' na lau xúgute bēneache chee'.
- 15 Xránadxu Dios dxe'e gunne xue
chee bēneache chee' gate dxelátie'.
- 16 Xrana' Dios, da li naca' wēn zrin chiu'.
Naca' wēn zrin chiu', ne zri'ine nu'ula wēn zrin chiu'.
Lue' bzúzruju' da zaj nadxéaj na neda'.
- 17 Da güe lá'ana' Lue' gaca na ca tu béadau' gutia' lau',
ne gucá'ana szrena' Lau', Xrana' Dios.
- 18 Lau Xránadxu Dios guna' da ca' guchebe lazra' chee',
da guna' lau xúgute bēneache chee'.
- 19 Guna' na chale'aj xu'u lizre Xránadxu Dios,
da dxe' na lu'ule xezre Jerusalén.
- ¡Gaca ba lá'azxa Xránadxu Dios!

Salmo 117

- 1 ¡Le güe lá'ana Xránadxu Dios, le'e, benne' dute xezr la xu!
¡Le güe lá'ana Le', le'e, xúgute bēneache,
2 lawe' da zrente naca xel-la' zri'i lazre' chee' ca nazrí'ine'
dxi'u,
ne chadía chacanna naca xel-la' li lazre' chee'!
- ¡Le güe lá'ana Xránadxu!

Salmo 118

- 1 ¡Le güe lá'ana Xránadxu Dios lawe' da naque' xrlátaje,
ne lawe' da chadía chacanna dxexache lazre' dxi'u!
- 2 Dخال-la' xelenná benne' Israel ca':
¡Chadía chacanna dxexache lazre' dxi'u!
- 3 Dخال-la' xelenná zri'ine zre sua Aarón:
¡Chadía chacanna dxexache lazre' dxi'u!
- 4 Dخال-la' xelenná benne' ca' dxelezrebe' Xránadxu Dios:
¡Chadía chacanna dxexache lazre' dxi'u!
- 5 Gate na' guzúa' lu da stebe bláwizra' Xránadxu Dios,

- na' bechebe Xránadxu, ne bselé' neda' lu da na'
bexru na neda'.
- 6 Zuale Xránadxu neda', na' québequeze zreba'
bi xelún bénneache chia' neda'.
- 7 Zúale Xránadxu neda' ládujla benne' ca' dxelácalene' neda'.
Chee le na' le'eda' cheajlechaze benne' ca' dxelecuídene'
neda'.
- 8 Cháwe'dxa naca guxrén lázredxu Xránadxu Dios
quézcala guxrén lázredxu bénneache.
- 9 Cháwe'dxa naca guxrén lázredxu Xránadxu Dios
quézcala guxrén lázredxu benne' dxeleenná be'e.
- 10 Gulechaj benne' xúgute cue' xezr la xu neda',
na' lu La Xránadxu Dios guzría xi'a benne' ca'.
- 11 Guléchaje' neda', ne buluchídie' neda',
na' lu La Xránadxu Dios guzría xi'a benne' ca'.
- 12 Guléchaje' neda' ca dxelún bescutuche',
na' guca xel-la' dxelezzá'a chee' ca tu xi' da dxuzezxe na
xixre' xeche' bizre,
na' lu La Xránadxu Dios guzría xi'a benne' ca'.
- 13 Buluzrigue' neda' chee cheajcházia'
na' gúcale Xránadxu Dios neda'.
- 14 Naca Xránadxu Dios ca tu xu'u naga zua chawa',
na' tu gúl-lazqueza' chee' lawe' da Léqueze' dxuselé' neda'.
- 15 Xel-la' dxelebé dxelul-la benne' xrlátaje ca'
lawe' da dxuselá Xránadxu le'.
Dute xel-la' waca chee' dxun Xránadxu Dios da zrente ca'.
- 16 Szrente nagá'ana xel-la' waca zren chee Xránadxu Dios.
Da zrente ca' dxun xel-la' waca zren chee Xránadxu.
- 17 Québequeze gatia', san gaca bana',
na' guzenda' bénneache ca zaj naca da nun Xránadxu.
- 18 Bde Xránadxu neda' lu da ba xa',
san quebe bdee' neda' lu na' xel-la' gute.
- 19 Gusalaj dxa xu'u chee chu'a naga guchi'u chia', Xran,
na' chu'a na', ne güe lá'ana' Lue', Xrana' Dios.
- 20 Dxa xu'u nigá naca na chee Xránadxu Dios.
Dxa xu'u nigá dxelú'u benne' xrlátaje ca'.
- 21 Güe lá'ana' Lue', Xran, lawe' da bennu' chia',

ne bseláu' neda' lu da guca chia'.

22 Xiaj na' da buluzúa benne' wen xu'u ca' chalá'ala,
le na' naca na xiaj blau.

23 Da nigá ben Xránadxu,
na' naca na tu da dxexebánedxu.

24 Zra nigá naca na zra da ben Xránadxu.
Béle'edxu, ne súadxu lu da ba neza lu zra nigá.

25 Xrana' Dios, dxata' xueda' Lue' guseláu' netu' na'a.
Dxata' xueda' Lue', Xrana', gunu' chepe ban na'a da dxuntu'.

26 Ba neza zrentē naca na cheē bēnnea' ze'ē waláz cheē
Xránadxu Dios.
Lu xu'u lizre Xránadxu Dios nigá dxenábantu'
gaca chawe' chiu'.

27 Xránadxu naque' Dios, ne ba benne' dxi'u tu da dxusaní na.
Le guchéaj béadu ca' gútele lawe' lu luzu cugu chee'.

28 Nacu' Lue' Dios chia', na' güe lá'ana' Lue'.
Dios chia', gucá'ana szrena' Lue'.

29 ¡Le güe lá'ana Xránadxu Dios lawe' da naque' xrlátaje,
ne lawe' da chadía chacanna dxexache lazre' dxi'u!

Salmo 119

Da dxun da bdxixruj be'e Dios dxi'u

1 Ba neza zrentē naca na cheē benne' ca' tu dxelúnzqueze'
da naca du lazre',
benne' ca' tu dxelúnzqueze' ca dxenná da bdxixruj bea
Xránadxu Dios.

2 Ba neza zrentē naca na cheē benne' ca' tu dxelúnzqueze'
ca dxusede dizra' chee' dxi'u,
na' dutē xichaj lázrdawe' dxuluzúe' dizra' chee'.

3 Benne' caní québequeze dxelunē' da zrinnaj,
benne' ca' tu dxelúnzqueze' ca dxenná Dios dxal-la' xelunē'.

4 Lue', Xran, bsízrenu' netu' chee gun xánnentu'
ca zaj naca da bdxixruj be'u Lue'.

- 5 Dxaca lázrele'a tu gúnzqueza'
ca zaj naca xrba chiu'.
- 6 Nadxa québequeze xedué'eda',
na' cue'a gunne xue guna' xúgute da bdxixruj be'u.
- 7 Dute_x xel-la' li lazre' chia' güe lá'ana' Lue' gate ba nusédia'
da ca' nuchi'u cheentu', da zaj naca na xrlátaje.
- 8 Tu gúnzqueza' ca da dxenná be'u.
Québequeze cueaj xíchaju' neda'.

Dxal-la' gundxu da gunnáqueze Dios

- 9 ¿Ájala gun benne' cuide' gunbe' da naca na xrlátaje?
Dxal-la' tu gúnzquezebe' ca dxenná xrtizru'.
- 10 Dute_x xichaj lázrdawa' dxuna' ba xuzre guna'
da dxennáu' Lue'.
Quebe gu'u lataj guzúa' chalá'ala ca da bdxixruj be'u.
- 11 Lu xichaj lázrdawa' tu dxúnzqueza' ca da dxennáu' Lue'
chee_x quebe guna' dul-la tábaga' Lue'.
- 12 Ba lá'azxa nacu' Lue', Xrana' Dios.
Bséde neda' da ca' dxenná be'u.
- 13 Nen dxú'aqueza' ba bzenda' bénneache
ca zaj naca da ca' nuchi'u cheentu'.
- 14 Dxebéle'edxeda' tu dxúnzqueza' ca dxusede dizra' chiu'
netu',
quez ca dxelebé benne' ca' déle'e xel-la' gunní'a chee'.
- 15 Gulaba lazra' ca zaj naca da bdxixruj be'u,
ne nna' xánnia' ca dxennáu' dxal-la' guntu'.
- 16 Béle'eda' guna' ca da dxenná be'u,
ne quebe gal-la lazra' ca zaj naca xrtizru'.

Dxebéle'edxu dxundxu da dxennáqueze Dios

- 17 Ben gaca chawe' chia' neda', wen zrin chiu',
na' gaca bana', ne tu gúnzqueza' ca naca xrtizru'.
- 18 Gusalaj xiaj lawa' chee_x nna'a
da zrente_x ca' da zaj zua na lu da bdxixruj be'u.
- 19 Naca' ca tu benne' dxedaze' lu xezr la xu nigá.
Ben chéajni'ida' da dxenná da bdxixruj be'u.
- 20 Dxedú lazra' lawe' da tu chí'izqueze
dexzá lazra' guna' da ca' nuchi'u cheentu'.
- 21 Gudil-lu' benne' ca' dxulucá'ana szren cuine',
benne' wen da calela ca',

- benne' ca' dxuluzúe' chalá'ala da bdxixruj be'u.
 22 Quebe gu'u lataj nu benne' nne' schanni' chia',
 na' quegá gucá'ana díraje' neda'
 lawe' da tu dxúnzqueza' ca dxusédenú' netu'.
 23 Cá'anqueze benne' dxelenná bea ca' gulenné' chia'.
 Neda', wen zrin chiu', blaba lazra' ca zaj naca xrba chiu'.
 24 Dxezaca ba lázrelena' da dxusede dizra' chiu' netu'.
 Dxuluzéajni'i na neda'.

Dute lázrdaudxu gundxu da dxennáqueze Dios

- 25 Zua bénne'du xu'a lu da stēbe chee xel-la' gute.
 Ben dípa xichaj lázrdawa' nen xrtizru'.
 26 Ble'eda' Lue' ca zaj naca da dxuna', na' bezi'u neda'.
 Bsede neda' ca zaj naca xrba chiu'.
 27 Ben chéajni'ida' ca gaca guna' ca bdxixruj be'u
 chee gulaba lazra' ca zaj naca da zrente' ca' da benú'.
 28 Dxedú lazra' lawe' da dxewí'ine lázrele'a.
 Bexru chacha neda' ne chee xrtizru'.
 29 Quebe gu'u lataj guna' da naca na wen lazre'.
 Lu xel-la' dxexache lazre' chiu' bsede neda' da bdxixruj
 be'u.
 30 Bechugu lazra' guna' da naca li lazre',
 na' dxe'a gunne xue guna' da ca' nuchi'u cheentu'.
 31 Tu dxúnzqueza' ca dxusede dizra' chiu' netu'.
 Xran, quebe guzú' neda' lu xel-la' stu'.
 32 Tu gúnzqueza' ca bdxixruj be'u,
 gate guzéajni'idxenu' neda'.

Dxaca lázredxu chéajni'idxu xrtizra' Dios

- 33 Xran, bsede neda' chee guna' ca naca xrba chiu',
 na' tu gúnzqueza' ca naca na ca zrindxa zra cheajsé chia'.
 34 Bzéajni'i neda', na' tu gúnzqueza' da bdxixruj be'u,
 na' dute lázrdawa' guna' ca naca na.
 35 Ble'e neda' chee guna' da bdxixruj be'u,
 lawe' da dxaca lázrequeza' guna' ca dxenná na.
 36 Ben sa lazra' guna' ca dxusede dizra' chiu' netu',
 chee quebe gaca' benne' wecude.
 37 Quebe gu'u lataj gucá'ana szrena' bedáu' xia xaga ca'.
 Ben dípa xichaj lázrdawa' chee guna' ca dxenná xrtizru'.
 38 Ben ca dxenná xrtizru' da guchebe lazru' chia' neda',

wen zrin chiu', chee zreba' Lue'.

- 39 Bde chalá'ala dizra' schanni' da dxelenné' chia',
da na' dxezreba', lawe' da xrlátaje zaj naca xrba chiu'.
40 Dxezá lazra' guna' da bdxixruj be'u.
Ben dipa xichaj lázrdawa' nen da xrlátaje chiu'.

Dxuxrén lázredxu xrtizra' Dios

- 41 Gudá xexache lazru' neda', Xrana' Dios.
Gudá guseláu' neda', ca ba guchebe lazru' gunu'.
42 Becheba' lau bénnea' dxusi'e neda' xel-la' stu', gunnía':
Dxuxrén lazra' xrtizra' Xrana' Dios.
43 Ben tu séquezda' guchálaja' dizra' li lazre' chiu',
lawe' da dxebeza lazra' da ca' dxuchi'u cheentu'.
44 Tu gúnzqueza' ca dxenná da bdxixruj be'u.
Guna' na tu chí'izqueze, ne chadía chacanna.
45 Láqueza' neda'
lawe' da dxe'a gunne xue guna' ca bdxixruj be'u.
46 Guchálajqueza' ca dxusede dizra' chiu' netu'
lau benne' wenná bea ca', na' québequeze xedué'eda'.
47 Wabéle'equezda' guna' ca bdxixruj be'u,
da ca' nazrí'ile'eda'.
48 Dxechebe lazra' guna' ca bdxixruj be'u,
da nazrí'ida', na' gulaba lazra' ca naca xrba chiu'.

Tu zúazqueze xrtizra' Dios

- 49 Bsa lazre' da guchebe lazru' chia' neda',
wen zrin chiu', da na' benu' dxebeza lazra'.
50 Gate na' guzaca zi'a, guzúa tu da bexúe zren na neda'
lawe' da ben dipa xrtizru' xichaj lázrdawa'.
51 Benne' dxulucá'ana szren cuine' belún lalé' chia' neda',
san québequeze gusana' da dxenná da bdxixruj be'u.
52 Xeajsá lazra' da bchi'u cheentu' nédxudaute, Xran,
na' bexaca zrena'.
53 Nen dute xel-la' dxezrá'a guzúa' lu da stebe
ne chee benne' ca' dxelune' da zrinnaj,
benne' ca' dxuluzúe' chalá'ala da bdxixruj be'u.
54 Xrba chiu' ca' gulaca na chia' ca tu da dxul-la'
gate na' zua' tu xezr la xu zitu'.
55 Chizrela xeajsá lazra' lau' Lue', Xrana' Dios,
na' tu bénzqueza' ca dxenná da bdxixruj be'u.

56 Lu da ba neza caní guzúa'
lawe' da tu bēnzqueza' ca zaj naca da bdxixruj be'u.

Dxebedxu dxulábadxu xrtizra' Dios

57 Da dxezá lazra' nácaquezu' Lue', Xrana' Dios.
Ba gunnía' tu gúnzqueza' ca naca xrtizru'.
58 Dute lázrdawa' dxenaba' Lue' xidu' gácalenu' neda'.
Bexache lazre' neda' ca ba gunnáu' gunu'.
59 Gunná' xannia' ca zaj naca da dxuna',
na' xecha lasa dxuna' ca dxusede dizra' chiu' netu'.
60 Bena' ba xuzre, ne quebe guzreda'
chee tu gúnzqueza' ca bdxixruj be'u.
61 Xralaj chee benne' ca' dxelune' da calēla zaj nuchele na
neda',
san quebe ne gal-la lazra' ca dxenná da bdxixruj be'u.
62 Dxēla dxasa' chee güe lá'ana' Lue'
lawe' da xrlátaje zaj naca da ca' dxuchi'u cheentu'.
63 Naca' tuze nen xúgute benne' ca' dxelezrebe' Lue',
benne' ca' tu dxelúnzqueze' da bdxixruj be'u.
64 Xrana' Dios, dxezrín dute xezr la xu
xel-la' dxexache lazre' chiu'.
Bsede neda' chee guna' ca dxenná xrba chiu'.

Zácale'e da wnnáqueze Dios

65 Ba benu' guca chawe' chia' neda', wen zrin chiu'.
Xran, benu' na cáteze dxenná xrtizru'.
66 Bsede neda' chee gueque be'eda' da naca xrlátaje,
ne chee chéajni'ida' lawe' da dxéajle'a da bdxixruj be'u.
67 Nédxula ca bzéxruju' neda' gudéa' chalá'ala,
na' na'a tu dxúnzqueza' ca dxenná xrtizru'.
68 Nacu' xrlátaje, ne dxunu' gaca chawe' cheentu'.
Bsede neda' guna' ca naca xrba chiu'.
69 Benne' dxulucá'ana szren cuine' gulenné' chia'
da wen lazre'
san dute lázrdawa' tu gúnzqueza' ca bdxixruj be'u.
70 Quebe xu'u xel-la' dxéajni'i lázrdau benne' ca'.
Neda' dxezaca ba lázrelena' da dxenná da bdxixruj be'u.
71 Chawe' naca bzéxruju' neda'
chee gusedia' guna' ca naca xrba chiu'.
72 Cháwedxa naca da bdxixruj be'u chia' neda'

quez ca gaxúa gaxúane dumí oro, ne plata.

Cháwele'e naca da wnnáqueze Dios

- 73 Nen ná'quezu' benu' neda' cáteze naca'.
Bzéajni'i neda' chee gusédia' guna' ca bdxixruj be'u.
- 74 Benne' dxelezrebe' Lue' xelélé'ene' neda'.
Xelebenē' lawe' da dxebeza lazra' gaca ca dxenná xrtizru'.
- 75 Xran, ba nézquezda' xrlátaje naca da dxuchi'u cheentu',
na' lu dutē xel-la' li lazre' chiu' bsaca zi'u neda'.
- 76 Lu dutē xel-la' dxexache lazre' chiu' bexúe zren neda'
cáteze dxenná da guchebe lazru' chia' neda', wēn zrin chiu'.
- 77 Bexache lazre' neda' chee gaca bana'
lawe' da dxezaca ba lázrelena' da bdxixruj be'u.
- 78 Ben xelexedué'e benne' ca' dxulucá'ana szren cuina
lawe' da gulennē' schanni' chia', ne quebe bi bena' chee'.
Neda' gulaba lazra' ca da bdxixruj be'u.
- 79 Ben xelexelá' benne' ca' dxelezrebe' Lue',
chee xelennē' chia',
na' xulusédie' da dxusēde dizra' chiu' netu'.
- 80 Ben gaca' du lazre' ca naca xrba chiu'
chee québequeze xedué'eda'.

Gun Dios ca dxenná xrtizre'

- 81 Zua bēne'du xu'a lu da stēbe
lawe' da dxebeza' xidu' guseláu' neda',
na' dxebeza lazra' gaca ca dxenná xrtizru'.
- 82 Dxezé bxrinne xiaj lawa' lawe' da dxezá lazra' xrtizru',
dxennia': ¿Bátaqueze xexúe zrenu' neda'?
- 83 Dxebizra' ca tu buzude xide zē na lu zren,
san quebe dxal-la lazra' guna' ca dxenná xrba chiu'.
- 84 ¿Bal-la zra gaca bana' neda', wēn zrin chiu'?'
¿Bátaqueze gudéu' lu da ba xa' benne' ca'
dxeláu zi' xuzre' neda'?
- 85 Benne' dxulucá'ana szren cuine' gulene' tu xēdxu
naga cheajcházia'.
Québequeze dxelunē' ca dxenná da bdxixruj be'u.
- 86 Da líqueze zaj naca xúgutē da bdxixruj be'u.
Gúcale' neda' lawe' da dxeláu zi' xuzre' neda',
ne quebe bi nuna' chee'.
- 87 Xeláteze la belutie' neda',

san quebe ne gusana' guna' ca bdxixruj be'u.

88 Lu xel-la' dxexache lazre' chiu' ben dipa xichaj lázrdawa',
chee tu gúnzqueza' ca dxusede dizra' chiu' netu'.

Dxéajle'dxu xrtizra' Dios

89 Xrana' Dios, tu chí'izqueze
zua xrtizru' xabáa na'la.

90 Xel-la' li lazre' chiu' sua na chee xúgute bénneache.
Lue' bzua chúchuquezu' xezr la xu, na' zúaqueze na.

91 Ne chee da gunnáquezu' zaj nnita xúgute da de,
na' xúgute da ca' dxelún na zrin chiu'.

92 La quebe bezaca ba lázreleña' da bdxixruj be'u
bache benítia' lu da guzaca zi'a.

93 Cabátaqueze gal-la lazra' da bdxixruj be'u
lawe' da ne chee da ca' ba btipu' lazra'.

94 Chiu' Lue' naca' neda'.

Bselá neda', lawe' da dxuna' ba xuzre guna' ca bdxixruj
be'u.

95 Benne' dxelebéaj xichaj Dios gulenné'e neda' chee
xuluzría xi'e neda',

san neda' dxulaba lazra' ca dxusede dizra' chiu'.

96 Dxelé'equesda' dxeajsé chee xúgute da de lu xezr la xu,
san da bdxixruj be'u Lue' québequeze cheajsé chee na.

Dxaca lázredxu gúnbeadxu xrtizra' Dios

97 Dios, nazrí'ile'eda' da bdxixruj be'u.

Du zra dxulaba lazra' ca naca na.

98 Ne chee da bdxixruj be'u nunu' nácadxa' sina ca benne' ca'
dxeledábague' neda'

lawe' da tu zúalezqueze da bdxixruj be'u neda'.

99 Dxéajni'idxeda' ca benne' ca' dxulusédené' neda'

lawe' da dxulaba lazra' ca dxusede dizra' chiu' neda'.

100 Ba guxéajni'idxeda' ca benne' gula ca'

lawe' da tu dxúnzqueza' ca dxenná da bdxixruj be'u.

101 Bena' ba xuzre quebe bi da calela guna'

chee tu gúnzqueza' ca dxenná xrtizru'.

102 Quebe bsana' dxuna' da ca' nuchi'u cheentu'

lawe' da Lué'queze bsédenu' neda'.

103 Xrtizru' naca na ca tu da zixrele'e lu dxu'a.

Nácadxa na zixre ca bzrina'dau' lu dxu'a.

- 104 Ne chee da bdxixruj be'u naca' benne' sina.
Chee le na' dxecuída' xúgute da wen lazre'.

Xrtizra' Dios dxuzéajni'i na dxi'u

- 105 Ca tu xi' naca xrtizru' naga dxedá',
da dxusení na neza xu'a.
106 Bzétaja' Dios, ne guchebe lazra'
tu gúnzqueza' ca nuchi'u cheentu' da naca na xrlátaje.
107 Dxezaca zí'le'a.
Xrana' Dios, btipa lazra' cáteze guchebe lazru' gunu'.
108 Xrana' Dios, dxata' xueda' Lue' si'u da dxue lánana' Lue',
ne gusédenu' neda' guna' ca nuchi'u cheentu'.
109 Tu zúazqueza' lu da stēbe chee xel-la' gute,
san québequeze ne gal-la lazra' guna' ca bdxixruj be'u.
110 Benne' dxelebéaj xichaj Dios buluzale' xralaj
da queła na neda'
san neda' quebe bsana' dxuna' ca bdxixruj be'u.
111 Ba gucá'a da dxusede xrtizru' neda' chee gaca na
da gápaqueza' chadía chacanna
lawe' da zaj naca xrtizru' da dxezaca ba lázrele'a.
112 Zúatequeze lázrdawa' guna' ca zaj naca xrba chiu'
tu chí'izqueze, ca zrindxa zra cheajsé chia'.

Bexácadxu chawe' ne chee xrtizra' Xránadxu

- 113 Dxecuída' benne' ca' dxelune' láweze da xrlátaje,
san nazrí'ida' da dxenná da bdxixruj be'u.
114 Nacu' Lue' ca tu xu'u naga zua chawa', ne ca tu
da dxucu'uj na neda',
lawe' da dxebeza lazra' gaca na ca dxenná xrtizru'.
115 Le gucuasa naga zua', le'e, benne' wen da caleła,
lawe' da tu gúnzqueza' ca bdxixruj bea Dios chia'.
116 Bze chacha neda' cáteze dxenná xrtizru', na' gaca bana',
ne quebe xedué'eda' chee da na' dxebeza lazra'.
117 Bze chacha neda', na' la',
ne tu xezaca ba lázrezqueza' ca naca xrba chiu'.
118 Bchuchu bléaju' xúgute benne' ca' bulusane' ca naca
xrba chiu'
lawe' da wen lazre' naca xel-la' sina chee benne' ca'.
119 Ca bebe bzria xi'u xúgute benne' ca' dxelebéaj xíchaje'
Lue' lu xezr la xu nigá.

Cheę ę na' nazrída' da dxusede dizra' chiu' netu'.
 120 Dxezrize beła' dxen chia' lawe' da dxezreba' Lue',
 ne dxezreba' da dxuchi'u cheętu' da naca na xrlátaje.

Dxal-la' gundxu ca dxenná xrtizra' Xránadxu

121 Ba beña' ca da nuchi'u cheętu', ne ca naca da xrlátaje.
 Quebe gudéu' neda' lu na' benne' ca' dxuluchínene' neda'.
 122 Guchebe lazre' chia' gunu' gaca chawe' chia'.
 Quebe gu'u lataj benne' ca' dxulucá'ana szren cuine'
 xuluchínene' neda' xadía.
 123 Guzé bxrinne xiaj lawa' lawe' da dxebeza' xidu'
 guseláu' neda',
 ne guchi'u cheętu' ca dxenná xrtizru'.
 124 Dute xel-la' dxexache lazre' chiu' beń gaca chawe'
 chia' neda', wen zrin chiu',
 ne bsede neda' guna' ca naca xrba chiu'.
 125 Naca' wen zrin chiu'.
 Bzėjni'i neda' cheę gúnbe'a da dxusede dizra' chiu' netu'.
 126 Xrana' Dios, ba bzrin zra bi gunu',
 lawe' da ba buluzúę' chalá'ala da bdxixruj be'u.
 127 Cheę ę na' neda' nazrída' da bdxixruj be'u Lue'
 quézcala oro, ne quézcala galega oro.
 128 Cheę ę na' dxéqueda' zaj nácadxa li lazre'
 da bdxixruj be'u ca xúgute da de,
 na' dxecuída' xúgute da zaj naca na da wen lazre'.

Dxaca lázredxu gundxu ca dxenná xrtizra' Dios

129 Dxebánentu' ca dxusede dizra' chiu' netu'.
 Cheę ę na' du lazra' tu dxúnzqueza' ca dxenná na.
 130 Gate nu dxuzájla'a ca naca xrtizru', dxusaní na.
 Dxun na dxelėjni'i benne' dxexruj lazre' ca'.
 131 Guxá dxu'a, ne gucá'a lazra'
 lawe' da dxezá lazra' gúnbe'a da bdxixruj be'u.
 132 Gunná' neda', ne bexache lazre' neda',
 ca tu dxúnzquezu' cheę benne' ca' zaj nazrína' Lue'.
 133 Beń tu gúnzqueza' ca dxenná xrtizru',
 ne quebe gu'u lataj da zrinnaj nna be'e na neda'.
 134 Bselá neda' lu na' benne' xichaj zra'a ca',
 na' tu gúnzqueza' ca dxenná da bdxixruj be'u.
 135 Beń gaca chawe' chia' neda', wen zrin chiu',

ne bsēde neda' guna' ca zaj naca xrba chiu' ca'.

- 136 Nisa gudhezra' guca na ca tu xegu nisa
lawe' da quebe dxelún bēnneache ca bdxixruj be'u.

Da li naca da dxenná Xránadxu

- 137 Xrana' Dios, xrlátaje nacu' Lue',
ne li lazre' naca ca dxuchi'u cheentu'.
- 138 Da dxusēde dizra' chiu' netu', da na' bzu' lu na'ntu',
naca na da li, ne da li lazre'.
- 139 Dxedú lazra' lawe' da dxé'le'a gunne xue
lawe' da gulal-la lazre' benne' ca' dxeledábague' neda'
ca zaj naca xrtizru'.
- 140 Du lázrele'ē naca xrtizru',
na' nazrí'ida' neda' na, naca' wen zrin chiu'.
- 141 Dxexruj lazre' naca', na' dxuluzúe' neda' chalá'ala,
na' quebe ne gal-la lazra' da bdxixruj be'u.
- 142 Tu chí'izqueze zua da dxuchi'u cheentu',
na' da li naca da bdxixruj be'u.
- 143 Da dxezaca zi'a, ne da stēbe zua' zaj nuchuchuj na neda',
san dxezaca ba lázrelena' da bdxixruj be'u.
- 144 Tu chí'izqueze naca li lazre' da dxusēde dizra' chiu'.
Bzéajni'i neda', na' gaca bana'.

Dxal-la' gulaba lázredxu da gunná Dios

- 145 Dutē lázrdawa' dxuláwizra' Lue', Xrana' Dios.
Ben gaca chawe' chia', na' tu gúnzqueza' ca dxenná xrba
chiu'.
- 146 Dxuláwizra' Lue'.
Bselá neda', na' tu gúnzqueza' ca dxusēde dizra' chiu' netu'.
- 147 Bálala dxasa', na' dxuláwizra' Lue'.
Dxebeza lazra' gaca ca dxenná xrtizru'.
- 148 Dxenná'aza' bedú xēla,
chee gulaba lazra' da bdxixruj be'u.
- 149 Dutē xel-la' dxexache lazre' chiu' bene chi'a.
Xrana' Dios, da bchi'u cheentu' btipa lazra'.
- 150 Benne' dxeláu zi' xuzre' neda' ba zaj zre'ē xelune' chia'
da calela.
Zaj nusane' da dxenná da bdxixruj be'u.
- 151 Xrana' Dios, zu' Lue' gagu naga zua',
ne da li zaj naca xúgutē da bdxixruj be'u.

152 Gate nate ba núnbe'a da dxusede dizra' chiu' netu',
da na' nuzú' cheentu' tu chí'izqueze.

Da gunná Dios dxuzéajni'i dxi'u

153 Gunná' xque ca dxezaca zi'a, ne bselá neda'
lawe' da quebe ne gal-la lazra' da dxenná da bdxixruj be'u.

154 Bechebe waláz chia', ne bexa'u neda'.

Btipa lazra' nen xrtizru'.

155 Stébele'e naca xeledá benne' ca' dxelebéaj xíchaje'

Lue', Dios,

lawe' da quebe dxelebé'e gunne xue xeluné' ca naca xrba
chiu'.

156 Xrana' Dios, dxexache lázrele'u bénneache chiu'.

Btipa lazra' cáteze dxenná xrtizru' gunu'.

157 Zánete zaj naca benne' ca' zaj nau zi' xuzre' neda',

ne benne' ca' dxeledábage' neda',

san quebe ne gusana' dxuna' ca dxusede dizra' chiu' netu'.

158 Ble'eda' benne' ca' dxelún lazre', na' dxegúteda' benne' ca'

lawe' da quebe dxeluné' ca dxenná xrtizru'.

159 Gunná'xque, Xran, ca nazrí'ida' da bdxixruj be'u.

Dute xel-la' dxexache lazre' chiu', btipa lazra'.

160 Da líqueze zaj naca xúgute xrtizru',

ne tu chí'izqueze zaj naca da dxuchi'u cheentu' lu
da xrlátaje chiu'.

Da gunná Dios dxutipa lázredxu

161 Benne' ca' dxelenná be'e dxeláu zi' xuzre' neda'

na' quebe bi nuna' chee'.

Dute lázrdawa' dxezreba' ca zaj naca xrtizru'.

162 Dxebéle'eda' lu da dxenná xrtizru'

ca dxebé bénnea' dxezrel-lene' tu xel-la' gunní'a zrente.

163 Dxecuúdeda', ne dxegúteda' da wen lazre'.

Nazrí'ida' da dxenná da bdxixruj be'u.

164 Gazre lasa tu zra dxue lá'ana' Lue'

lawe' da xrlátaje naca ca dxuchi'u cheentu'.

165 Dxelebeza zri lázrele'e benne' ca' zaj nazrí'ine'

da bdxixruj be'u,

na' quebe bi de da gun na cheajlecházie'.

166 Xrana' Dios, dxebeza' Lue' xidu' guseláu' neda',

ne tu dxúnzqueza' ca naca da bdxixruj be'u.

- 167 Dute lászrdawa' tu dxúnzqueza' da dxusede dizra' chiu'
netu',
ne nazrí'ile'eda' ca naca na.
- 168 Tu dxúnzqueza' ca naca da bdxixruj be'u,
ne ca dxusede dizra' chiu' netu'
lawe' da dxelé'eqeznu' xúgute da dxuna'.

Dxebéle'eddxu xrtizra' Dios

- 169 Xrana' Dios, bene da dxuláwizra' Lue'.
Bzéajni'i neda' ca dxenná xrtizru' gunu'.
- 170 Bene da dxenaba' lau Lue'.
Bselá neda' ca dxenná xrtizru' gunu'.
- 171 Tu güe lá'anazqueza' Lue', Xran,
gate ba nusédenú' neda' guna' ca naca xrba chiu'.
- 172 Tu guchálajzqueza' ca naca xrtizru'
lawe' da xrlátaje naca ca dxenná be'enu' netu'.
- 173 Guzúatequeze gácalenu' neda'
lawe' da dxuna' ba xuzre guna' ca bdxixruj be'u.
- 174 Dxezá lazra' guseláu' neda', Xrana' Dios.
Dxezaca ba lászrelena' da bdxixruj be'u.
- 175 Ben gaca bana', na' güe lá'ana' Lue',
na' da dxuchi'u chia' xelácale na neda'.
- 176 Gudéa' chalá'ala ca dxedá tu zrila' naníteba'.
Bexilaj neda', wen zrin chiu', lawe' da quebe ne gal-la lazra'
da bdxixruj be'u.

Salmo 120

- 1 Gate guzúa' lu da stebe bláwizra' Xránadxu Dios,
na' Le' gúcalene' neda'.
- 2 Bselá neda', Xrana' Dios, lu na' benne' wen lazre' ca,
ne lu na' benne' dxelezí xe'e ca'.
- 3 ¿Bizra gunna Dios le'e, benne' dxelezí xe'e?
¿Bizra da ba neza gaca na chee gate gudée' le'e
lu da zi' da xa'?
- 4 Gudée' le'e lu na' benne' ca' xuludé'e le'e xaga nalá
xéche'ze,
ne xuluzríe' le'e xi' galaj.

⁵ Edxugúa neda'.

Dxaca chia' ca zúaqueza' ládujla benne' Mesec,
ne ca zua' tu lu xu'u xide chee benne' Cedar.

⁶ Da zrente ba guzúa' ládujla benne' caní

dxuluzúe' chalá'ala xel-la' dxebeza zri lazre'.

⁷ Neda' dxezá lazra' gata' xel-la' dxebeza zri lazre'.

Gate dxuchálaja' cheen, dxeledíl-lale benne' ca' neda'.

Salmo 121

¹ Chisa xíchaja' nna'a da dxelún bénneache lu xi'a ca'.

¿Gazra za' da gácale na neda'?

² Da gácale na neda' za' lu na' Xránadxu Dios,

Bénnea' bene' xabáa, ne xezr la xu.

³ Quebe gu'e lataj cheajcháziu'.

Quebe gase Bénnea' dxuxúequeze' lue'.

⁴ Gunná' xque, quebe te bchigala chee Bénnea'.

Québequeze gase Bénnea' dxuxúequeze' benne' Israel ca.

⁵ Xránadxu Dios dxucú'uje' lue'.

Xránadxu Dios zue' cuitu' xabela dxegu'e lue' zrul-la.

⁶ Quebe guzezxe gubizra lue' te zra,

ne quebe bi gune beu' lue' chizrela.

⁷ Xranu' Dios guxúequeze' lue' chee quebe bi da calela

gaca na chiu'.

Guxúequeze' bénne'du xu'u.

⁸ Xránadxu Dios guxúequeze' lue' gate dxedxúaju',

ne gate dxexú'u, na'a zra, ne chadía chacanna.

Salmo 122

¹ Gubélena' benne' ca' gulé'e neda':

“Chéajdxu xu'u lizre Xránadxu Dios.”

² Na'a zúadxu nigá, zentu' dxa xu'u ze'e

da naxechaj lue', xezre Jerusalén.

³ Jerusalén naca na tu xezre da belexune',

na' naca na xrtante, ne dxé'le'e na cháwedau'.

⁴ Lu xezre na' zjaca xúgute cuen bénneache zaj de'e

Xránadxu Dios.

Dxelune' ca dxenná dizra' da guzre Dios benne' Israel ca',

chee xelúe lá'ane' La Xránadxu Dios.

- 5 Lu x̄ezre na' zaj dxe' benne' ca' dxuluchi'e chee
 benne' Israel ca',
 naga zaj dxe' benne' xrtia David, benne' ca' dxelenná be'e.
- 6 Le naba lau Dios gata' xel-la' dxebeza zri lazre'
 lu x̄ezre Jerusalén,
 chee xelepe ban da dxelún benne' ca' zaj nazrí'ine' x̄ezre
 na'.
- 7 Dxenábantu' Dios sua xel-la' dxebeza zri lazre'
 lu'ule ze'e da naxechaj na lue', Jerusalén,
 ne chee xelezrá' chawe' benne' zaj xu'e xu'u zren chiu'.
- 8 Nazrí'ida' le sa' ljwezra', ne bi ljwezra' ca', na' dxennía':
 Gata' xel-la' dxebeza zri lazre' chiu', x̄ezre Jerusalén.
- 9 Lawe' da nazrí'ida' xu'u lizre Xránadxu Dios
 dxuna' ba xuzre gaca chawe' chiu'.

Salmo 123

- 1 Chisa xíchaja' nna'a naga zu', Xran,
 naga zu' Lue', zu' xabáa na'la.
- 2 Ca dxun tu bi w̄en zrin dxenná'abe' bi nna xránabe',
 ne ca dxun nu'ula w̄en zrin dxenná'abe' bi nna
 nu'ula xránabe',
 caní dxenná'adxu bi nna Xránadxu Dios
 ca zrindxa zra xexache lazre' chēdxu.
- 3 Bexache lazre' chēntu', Xránantu' Dios.
 Bexache lazre' chēntu', lawe' da dxedú lázrentu'
 lawe' da dxulucá'ana ditaj b̄enneache netu'.
- 4 Dxedú lázrentu' lawe' da dxelún lala benne' gunnía' ca'
 chēntu',
 ne dxulucá'ana ditaj netu', benne' ca' dxulucá'ana szren
 cuine'.

Salmo 124

- 1 Chela ca gúcale Xránadxu Dios dxi'u.
 Caní dxal-la' xelenná benne' Israel ca' na'a.
- 2 Chela ca gúcale Xránadxu Dios dxi'u
 gate guledíl-lale benne' ca' dxi'u,
- 3 na' buluzría xi'te' dxi'u
 lu dut̄e xel-la' dxelezrá'a zrente chee',

- 4 ne guca cheedxu ca dxaca chee benne'
dxugacu nísadau' le', da na' gute na le'.
- 5 Chela guca caní cheedxu, na' bétete da na' dxi'u.
- 6 Dxal-la' xedxu Xránadxu Dios; Xcalenu',
lawe' da quebe be'e lataj benne' ca' xuluzría xi'e dxi'u.
- 7 Beladxu ca dxelá tu bxinne lu xixruj chee benne' wezén
bxinne.
Bzria xi' Xránadxu xel-la' dxenná bea chee benne' ca', na'
beladxu.
- 8 Naca Xránadxu Dios Bénnea' dxácalene' dxi'u,
Bénnea' bénqueze' xabáa, ne xezr la xu.

Salmo 125

- 1 Benne' ca' dxuluxrén lazre' Xránadxu Dios zaj naque' ca
xi'a Sión,
da quebe nu seque' gutá, san tu chí'izqueze zua chacha na.
- 2 Ca zaj zua xi'a ca' da zaj naxečaj na Jerusalén,
zua Xránadxu Dios, dxuxúequeze' bènneache chee' na'a zra,
ne chadía chacanna.
- 3 Quegá tu chí'izqueze xelenná bea benne' ca' dxelune'
da calela lu xezr la xu chee benne' xrlátaje ca',
chee quebe xelaca benne' xrlátaje ca' tuze nen benne'
wen da zrinnaj ca'.
- 4 Xrana' Dios, ben gaca chawe' chee benne' xrlátaje ca',
ne chee benne' ca' zaj naque' li lazre'.
- 5 Benne' ca' dxelebéaj xichaj Dios chee xelune' da calela,
xucuasa Xránadxu Dios benne' ca' tu zren nen benne' ca'
dxelune' da zrinnaj.
Dxenaba' gata' xel-la' dxebeza zri lazre' chee benne' Israel
ca'.

Salmo 126

- 1 Gate Xránadxu Dios bselé' dxi'u lu na' benne' zitu' ca',
ne begu'e dxi'u lu xezre Sión, gúquedxu dxennedxu xela.
- 2 Nadxa bzrízredxu, ne be lánadxu Xránadxu Dios.
Nadxa gulenná benne' xezr la xu ca':
“Da zrente ca' ben Dios, Xrana benne' ca', chee'.”
- 3 Da zrente ca' ben Xránadxu Dios cheedxu dxi'u,

- na' zúadxu lu da ba neza zrentę.
 4 Bselá Xránadxu dxi'u lu na' benne' zitu' ca',
 na' bezrindxu lu xęzr la xu cheędxu
 ca dxezrín nisa guba'u lu xęgu bizre ca'.
 5 Benne' ca' dxelebezre' tie' dxelaze',
 nen xel-la' dxelebé xelexezi'e lina.
 6 Dxebezre tie' zéaje' nu'e binne cháwe'du ca',
 na' dute xel-la' dxebé dxezrine' zeajnu'e lina chee'.

Salmo 127

- 1 Chela ca zúale Xránadxu Dios benne' ca' dxelune' tu xu'u
 dácheze naca xelune' zrin na'.
 Chela ca dxuxúe Xránadxu Dios tu xęzre,
 dácheze naca dxuluxúe benne' ca' le na.
 2 Dácheze naca dxásazele che zílala,
 ne dxunle zrin cáteze dxalaj gubizra ca dxebíadxa na,
 ne dute xel-la' dxudía dxezile da gágule,
 lawe' da dxunna Dios da xelagu benne' ca' nazrí'ine'
 dxácate na' dxelásię'.
 3 Le nna' xque, zaj naca zrí'inedxu bi ca' bęna Xránadxu
 dxi'u.
 Zaj naca be' tu da gunní'a zrentę.
 4 Zrí'inedxu dxelálajbe' cheędxu gate ne nácadxu cuide'
 zaj nácabe' ca xaga nalá xéche'ze ca' da nuxru benne'
 zeje' wedil-la.
 5 Ba neza zrentę naca na cheę bęnnea' nuxrue' zánete
 xaga nalá xéche'ze caní.
 Québequeze xedué'ene' gate zri'a chee'
 tu zren nen benne' ca' dxeledíl-lalene' le'.

Salmo 128

- 1 Ba neza zrentę naca na cheę benne' ca' dxelezrebe'
 Xránadxu Dios,
 benne' ca' tu dxelúnzqueze' ca nadxixruj be'e Dios.
 2 Gate dxagu' da dxezi'u cheę zrin da nunu'
 gaca chiu' tu da ba neza, ne gaca chawe' chiu'.
 3 Gaca zru'ulu' ca tu lba uva da dxebía da zixre
 cuita xu'u lizru',

- na' zri'inu' ca' xelácabe' ca xaga olivo ca' zaj zē
dxu'a ga dxagu'.
- ⁴ Caní gun Xránadxu gaca chawe' chee bēnnea' dxezrebe' Le'.
- ⁵ Dxenaba' gun Xránadxu, zuē' xi'a Sión, gaca chawe' chiu',
chee le'enu' gaca chawe' chee xezre Jerusalén xúgute zra
naca banu',
- ⁶ ne chee le'enu' zri'ine zre su'.
Dxenaba' gata' xel-la' dxebeza zri lazre' chee benne' Israel
ca'.

Salmo 129

- ¹ Zúadxu lu da stébele'e gate nácatēdxu cuide',
waca xelenná benne' Israel ca'.
- ² Zúadxu lu da stébele'e gate nácatēdxu cuide'
san quebe buluzria xi'e dxi'u.
- ³ Belunē' we' cúzrudxu gate beline' dxi'u xide,
na' gulaca cúzrudxu ca xezr la xu naga dxedé xia chee
bezre.
- ⁴ Xlátaje naca Xránadxu Dios.
Bselé' dxi'u lu na' benne' ca' buluchínene' dxi'u xadíaze.
- ⁵ Ben cheajlechaze, ne xelebígaqueze
xúgute benne' ca' dxelecuídene' benne' Sión ca'.
- ⁶ Ben xelaque' ca xíxre'du ca' dxelebía na xrgu'u
da dxelebizre na gate ne zaj nadxé'ene na,
- ⁷ da na' quebe nu benne' dxexequé'e na,
ne quebe seque' nu benne' gunē' na tu cheaj weaj.
- ⁸ Quebe xelenná benne' dxeledé' naga zaj zria na:
Dxenábantu' gun Xránantu' Dios gaca chawe' chee.
Lu La Xránantu' Dios dxenábantu' gaca chawe' chee.

Salmo 130

- ¹ Ga ni zua' lu da stébele'e dxuláwizra' Lue', Xrana' Dios.
- ² ¡Xran, bene chi'a!
¡Bze naga da dxenaba' lau'!
- ³ Xrana' Dios, chela nna' xánniu' ca naca dul-la nabágantú'
¿núzraqueze xegá'ana xrlátaje lau Lue'?
- ⁴ Lué'quezu' dxunite lau' cheentu'
chee gápantu' Lue' ba lá'ana.

- 5 Dute lázrdawa' dxebeza lazra' Xránadxu Dios,
ne dxuxrén lazra' xrtizre'.
- 6 Dxebeza lazredxa' Xránadxu Dios
cáqueze dxelún benne' ca' dxuluxúe' xezre ca',
dxelebeze' chaní',
ne cáqueze dxelún benne' ca' dxelicha bchigala,
dxelebeze' chaní'.
- 7 Benne' Israel ca' dxal-la' xelebeza lazre' Xránadxu Dios
lawe' da dxexache lazre' Xránadxu bénneache chee',
ne dxexá'awe' benne' ca' lu na' benne' guledábage' Le'.
- 8 Dios xexá'awe' benne' Israel ca'
lu na' xúgute dul-la da zaj nabague'.

Salmo 131

- 1 Xrana' Dios, ba bsana' xel-la' dxucá'ana szren cuina',
ne ba bcuasa' xel-la' dxeque xrlátaje cuina'.
Quebe dxulapa napa' lu da zaj naca szren,
da ca' quebe naca chia' gulapa' na'a.
- 2 Quebe bi gunnía', ne guzúa' zrize ca tu bi dxe'ene
za bexurte gúzrebe'.
Naca bénne'du xu'a ca tu bi dxe'ene za bexurte gúzrebe'.
- 3 Le cueza lazre' Xránadxu Dios, le'e, benne' Israel
na'a zra, ne chadía chacanna.

Salmo 132

- 1 Bsa lazre', Xrana' Dios, ca guca chee David,
ne ca guzaca zi'e,
- 2 ne ca da guchebe lazre' gune' chiu',
da guchebe lazre' lau', Dios wal-la chee Jacob.
- 3 Guné': "Québequeze chu'a xu'u lizra',
ne québequeze gáta'a ga dxasia'
- 4 ne québequeze guchúdia' xiaj lawa'
ne québequeze gasia'
- 5 ca zrindxa zra ba bena' tu xu'u lizre Xrana' Dios
naga súaqueze Dios wal-la chee Jacob."
- 6 Bénedxu zua xí'ina lálazxa naga xu'u xel-la' wezría
lu xezr la xu Efrata,

- na' bezréledxu na lu xezr la xu chee b́ennea' le' Jaar.
 7 Gunnantu': Chéajntu' naga zua Dios cheentu'.
 Guzú zríbentu' zran ni'a Le'.
- 8 Guxasa, Xránantu' Dios, nen xí'ina naga xu'u
 xel-la' wezría chiu',
 ne gudá lu xi'a naga súaquezu' Lue'.
- 9 Ben xelún bxruze chiu' ca' da naca xrlátaje,
 ne xelebezre xa'a xúgute b́enneache chiu', lu dute
 xel-la' dxelebé chee'.
- 10 Lawe' da nazrí'inu' David, wen zrin chiu',
 quebe guzú' chalá'ala wenná bea na' ba guca'u Lue'.
- 11 Da líqueze bzetaj cuina Xránadxu Dios,
 guchebe lazre' chee David quebe gucuase' ca da gunné'.
 Gunné': "Guna' xelenná bea zri'ine zre su' naga
 dxenná béaquezu' Lue'.
- 12 Che zri'inu' ca' tu xelúnzqueze' ca naca xel-la' wezría chia',
 ne ca naca xrtizra' da gusédeda' le',
 zri'inu' ca' tu xelenná béazqueze' naga dxenná be'u lue'."
- 13 Lawe' da gucá'a Xránadxu Dios xezre Sión,
 guca lazre' sua xu'u lízrequeze' ga na'.
- 14 Gunné': "Tu gácazqueze lataj nigá naga súaqueza' neda'.
 Tu súaqueza' nigá lawe' da caní dxezaca ba lazra' guna'.
- 15 Guna' gáta'le'le lina chee benne' ca',
 ne guna' xelejaj benne' xache' ca' xeta.
- 16 Guna' xelún bxruze chia' ca' da naca chawe',
 na' xelebezre xa'a xúgute b́enneache chia' lu dute
 xel-la' dxelebé chee'.
- 17 Lataj na' guna' xexaca xel-la' dxenná bea chee David.
 Guna' xelezúa na' zri'ine zre sua wenná bea na'
 ba gucá'a neda'.
- 18 Guna' xeleque zréaje benne' guledábague' Le',
 na' guna' chepe ban xel-la' dxenná bea chee David na'."

Salmo 133

- 1 Le nna' xque, xrtante naca, ne cháwe'le'le naca
 gate zaj nazraga b́enneache chee Dios, zaj naque' tuze.
 2 Naca na ca tu da za da dxuluzúa xíchaje',
 da dxedínnete na dxu'a lawe',

ca na' dxedínnetē na lu luzru Aarón,
ne dxedínnetē na ga zria zre'.

- 3 Dxedínnetē na ca xrlē'ela da dxexruj lu xi'a Hermón,
ne dxexruj na lu xi'a Sión lawe' da gun Xránadxu Dios
gaca chawe' cheē bēnneache zaj zre'e na',
ne gunnē' benne' ca' xel-la' nabán da zeajlí canna.

Salmo 134

- 1 Le na' xque, le güe lá'ana Xránadxu Dios,
le'e, nácale wēn zrin cheē Xránadxu,
zrale xu'u lizre Xránadxu chizrela.
2 Le chisa na'le lau lataj lá'azxa,
ne le güe lá'ana Xránadxu Dios.
3 Dxenaba' lau Xránadxu zue' Sión gunē' gaca chawe' chiu',
naque' Bēnnea' bēnē' xabáa, ne xēzr la xu.

Salmo 135

- 1 ¡Le güe lá'ana La Xránadxu Dios!
¡Le güe lá'ana Le', le'e, wēn zrin cheē Xránadxu,
2 le'e zrale xu'u lizre Xránadxu Dios,
lu chale'aj cheē xu'u naga zúaqueze Dios!
3 ¡Le güe lá'ana Xránadxu lawe' da naque' xrlátaje!
¡Le gul-la da güe lá'anale La Le', lawe' da naque' zri'li lazre'!
4 Xránadxu Dios ba guqué'e zri'line zre sua Jacob.
Guqué'e zri'line zre sua Israel cheē xelaque' bēnneache
chee'.
5 Nézquezdxu szrentē naca Xránadxu Dios.
Xránadxu naque' szrendxa ca xúgutē dios cheē benne' zitu'
ca'.
6 Xúgutē da dxaca lazre' Xránadxu gunē',
dxunē' na zran xabáa, ne lu xēzr la xu,
ne lu nísadau', ne lu da situj cheē nísadau' ca'.
7 Dxunē' zá'aca beuj dapa saca cheē xēzr la xu.
Dxunē' dxelepe xesa guziu' gate dxaca xiuj.
Dxunē' dxaca be' gáteteze.
8 Bēnē' gulate bi biu nedxu cheē benne' Egipto ca'.
Gulate bi biu nedxu cheē bēnneache,
ne béadu ca' cheē bē xixre' chee' ca'.

- 9 Bene' xel-la' waca ca' da za xabáa, ne da zrentē ca'
 da bene' lu xēzr la xu chee benne' Egipto ca',
 da ca' ben Dios da guca chee Faraón,
 ne chee xúgute wēn zrin chee Faraón na'.
- 10 Bzria xi'e bēnneache zánete cue' xēzr la xu ca',
 ne bēti'e benne' wenná bea ca',
 benne' zaj nápa'e xel-la' dxelenná bea.
- 11 Bēti'e Sehón, wenná bea chee benne' amorreo ca',
 ne Og, wenná bea chee benne' Basán ca',
 ne xúgute benne' wenná bea chee benne' Canaán ca'.
- 12 Bequ'e xēzr la xu nigá lu na' benne' wenná bea ca',
 na' bnézruje' na lu na' bēnneache chee', benne' Israel
 ca'.
- 13 Xrana' Dios, chadía chacanna zua lau' Lue'.
 Tu cheajlesá lázrezqueze bēnneache Lue'.
- 14 Xránadxu Dios guchi'e chee bēnneache chee',
 ne xexache lazre' cheedxu dxi'u, wēn zrin chee'.
- 15 Bedau' xia xaga ca' chee benne' xēzr la xu ca'
 zaj naca na oro, ne plata.
 Zaj naca na da belún bēnneache.
- 16 Zaj zua dxu'a na san quebe dxelenné na.
 Zaj zua lau na san quebe dxelélé'e na.
- 17 Zaj zua naga na san quebe dxelén na, ne quebe
 dxelécá'a na be'.
- 18 Benne' ca' dxelunē' na zaj nácaqueze' ca léqueze na,
 ne caní zaj naca xúgute benne' dxuluxrén lazre' na.
- 19 Le'e, benne' xrtía Israel, le güe lá'ana Xránadxu
 Dios.
 Le'e, benne' xrtia Aarón, le güe lá'ana Xránadxu
 Dios.
- 20 Le'e, benne' xrtia Leví, le güe lá'ana Xránadxu Dios.
 Le'e, núlale dxezrébele Xránadxu Dios, le güe lá'ana
 Xránadxu Dios.
- 21 Le'e, zrle xēzre Sión, le güe lá'ana Xránadxu Dios,
 Bēnea' zúaqueze' xēzre Jerusalén.

¡Gaca ba lá'azxa Xránadxu Dios!

Salmo 136

- 1 ¡Le güe lá'ana Xránadxu Dios, Benne' xrlátaje!
¡Chadía chacanna dxexache lazre' dxi'u!
- 2 ¡Le güe lá'ana Dios, naque' szréntedxa ca zaj naca dios
chee xezr la xu ca!
¡Chadía chacanna dxexache lazre' dxi'u!
- 3 ¡Le güe lá'ana Xránadxu, naque' szréntedxa ca zaj naca
xrana xezr la xu ca!
¡Chadía chacanna dxexache lazre' dxi'u!
- 4 ¡Le güe lá'ana Dios na', dxune' xel-la' waca zri'a ca!
¡Chadía chacanna dxexache lazre' dxi'u!
- 5 ¡Le güe lá'ana Dios na', bene' xabáa dute xel-la' sina chee!
¡Chadía chacanna dxexache lazre' dxi'u!
- 6 ¡Le güe lá'ana Dios na', bzue' xezr la xu lawe' nísadau!
¡Chadía chacanna dxexache lazre' dxi'u!
- 7 ¡Le güe lá'ana Dios na', bene' gubizra ne beu!
¡Chadía chacanna dxexache lazre' dxi'u!
- 8 ¡Bene' gubizra chee gusení na te zra!
¡Chadía chacanna dxexache lazre' dxi'u!
- 9 ¡Bene' beu' ne belaj ca' chee xulusení na chizrela!
¡Chadía chacanna dxexache lazre' dxi'u!
- 10 ¡Le güe lá'ana Dios na', betie' bi biu nedxu chee
benne' Egipto ca!
¡Chadía chacanna dxexache lazre' dxi'u!
- 11 ¡Le güe lá'ana Dios na', bebéaje' benne' Israel ca'
lu xezr la xu Egipto na!
¡Chadía chacanna dxexache lazre' dxi'u!
- 12 ¡Beche'e le' dute xel-la' waca zren chee!
¡Chadía chacanna dxexache lazre' dxi'u!
- 13 ¡Le güe lá'ana Dios na', bene' chupa la'a nísadau'
da nazí le na Xrna!
¡Chadía chacanna dxexache lazre' dxi'u!
- 14 ¡Bdee' benne' Israel ca' laduj nísadau' na!
¡Chadía chacanna dxexache lazre' dxi'u!
- 15 ¡Bgacue' nísadau' na' Faraón, benne' wenná bea chee
Egipto,
ne benne' zeje' wedil-la chee' ca!
¡Chadía chacanna dxexache lazre' dxi'u!
- 16 ¡Le güe lá'ana Dios na', beche'e benne' chee' ca'
le'e xixre' lawe' lataj!

- ¡Chadía chacanna dxexache lazre' dxi'u!
 17 ¡Le güe lá'ana Dios na', betie' wenná bea blau ca!
 ¡Chadía chacanna dxexache lazre' dxi'u!
 18 ¡Betie' wenná bea wal-la ca!
 ¡Chadía chacanna dxexache lazre' dxi'u!
 19 ¡Betie' Sehón, wenná bea chee benne' amorreo ca!
 ¡Chadía chacanna dxexache lazre' dxi'u!
 20 ¡Betie' Og, wenná bea chee xezr la xu Basán!
 ¡Chadía chacanna dxexache lazre' dxi'u!
 21 ¡Bnézruje' xezr la xu chee benne' ca' chee gaca na
 chee benne' chee' ca!
 ¡Chadía chacanna dxexache lazre' dxi'u!
 22 ¡Benne' na chee benne' Israel ca', benne' wen zrin chee' ca!
 ¡Chadía chacanna dxexache lazre' dxi'u!
 23 ¡Naque' Dios na', quebe gul-la lazre' dxi'u
 gate buluzetja benne' ca' dxi'u!
 ¡Chadía chacanna dxexache lazre' dxi'u!
 24 ¡Le' bselé' dxi'u lu na' benne' ca' guledíl-lalene' dxi'u!
 ¡Chadía chacanna dxexache lazre' dxi'u!
 25 ¡Naque' Dios na', dxugawe' xúgute da zaj naca ban!
 ¡Chadía chacanna dxexache lazre' dxi'u!
 26 ¡Le güe lá'ana Dios chee xabáa!
 ¡Chadía chacanna dxexache lazre' dxi'u!

Salmo 137

- 1 Dxu'a xegu chee xezr la xu Babilonia gudxé'edxu,
 ne gudxézredxu gate xeajsá lázredxu chee xezre Sión.
 2 Lu zruze xaga labada' dxu'a xegu na'
 buquéladxu da cun zríadi'i na du cheedxu ca'.
 3 Benne' ca' guleché'e dxi'u ca benne' zaj nada'u
 gulenábene' dxi'u gúl-ladxu.
 Benne' ca' buluzría xi' xezre cheedxu gulé'e dxi'u
 súadxu lu xel-la' dxebé, gulenné':
 Le gul-la cheentu' da ca' bíl-lale lu xezre Sión.
 4 ¿Ájazra gúl-ladxu da güe lá'anadxu Xránadxu Dios
 naga zúantu' lu xezr la xu chee benne' zitu' ca'?
 5 Chela gal-la lazra' lue', xezre Jerusalén,
 gun Dios gunita na'a xabēla xel-la' waca chee na.
 6 Ben xedá' luzra' chíchajla' che quebe cheajsá lazra' chiu',

- ne che quebe guca'ana szrena' lue', Jerusalén,
nacu' da dxezaca ba lázreleda'.
- 7 Xrana' Dios, bsa lazre' da calela da belún benne' Edom
lu zra na' guzría xi' xezre Jerusalén,
gate na' gulenné': "Le guchinnaj na. Le guchinnaj na,
ca zrinte lu lane chee na."
- 8 Le'e, benne' Babilonia, cuía xile.
Ba neza zrente gaca na chee bènea' guné' chee
ca da benle le'e cheentu' netu'.
- 9 Ba neza zrente gaca na chee bènea' que'e bidu chee ca',
ne quine'-be' lu xiaj xre na'.

Salmo 138

- 1 Xrana' Dios, duté lázrdawa' güe lá'ana' Lue'.
Tu dxúl-lazqueza' da dxue lá'ana' Lue' lau dios ca' chee
benne' zitu' ca'.
- 2 Dxuzú zriba' lau xudau' lá'azxa chiu',
ne dxue lá'ana' Lau' lawe' da nacu' li lazre',
ne dxexache lazru' bèneache chiu',
ne lawe' da blé'enu' nacu' Benne' szrente,
na' szrente naca xrtizru'.
- 3 Gate bláwizra' Lue', na' gúcalenu' neda'.
Nen duté xel-la' waca chiu' btipu' lazra'.
- 4 Xúgute benne' wenná bea du gabí'i xezr la xu
xelúe lá'ané' Lue', Xrana' Dios.
Caní xeluné' lawe' da ba belenne' ca naca xrtizru'.
- 5 Xelúl-le' chee da ba nune' Xránadxu Dios,
lawe' da zrente naca xel-la' ba chee Xránadxu.
- 6 Szrente naca Xránadxu Dios, ne dxácalene'
benne' baxache' ca',
na' quebe dxu'e lataj benne' dxucá'ana szren cuine'
zrine' lau Le'.
- 7 Lácala zua' lu da ba xa', Lue' dxutipu' lazra'.
Dxedábagu' benne' ca' dxeledábage' neda',
ne duté xel-la' waca chiu' dxuseláu' neda'.
- 8 Gun Xránadxu Dios da guchebe lazre' chia'.

Xrana' Dios, tu dxexache lázrezquezu' bénneache chiu'.
Quebe gusanu' dxunu' zrin da guzú lau' dxunu'.

Salmo 139

- 1 Xrana' Dios, ba gunná' xánniu' neda'
ne núnbea xánniu' neda'.
- 2 Nézqueznu' gate dxe'a, ne gate dxasa'.
Zítu'la nézqueznu' da zaj xu'u xichaj lázrdawa'.
- 3 Ba gunná' xánniu' ca dxuna', ne ca dxexezí' lazra'.
Nézqueznu' xúgute da dxuna'.
- 4 Gate quebe ne guchálaja' ba nézqueznu' Lue', Xran,
xúgute da nnia'.
- 5 Gátetezla cuita' neda' zúaquezu' Lue', Xran,
ne nuzé na'u neda'.
- 6 Ca szrentē naca da nézenu' Lue' naca na da dxebáneda'.
Nácale'e na sina da quebe gaca chéajni'ida'.
- 7 ¿Gala cha'a zitu' naga quebe zúaqueze Be' chiu'?'
¿Gala guzrúnnuja' naga quebe zúaquezu' Lue'?'
- 8 Che cuena' sibe zran xabáa, na' zúaquezu' Lue',
ne che xétaja' lu da situj chee xezr la xu, na' zu' Lue'.
- 9 La séqueda' tea' lu be', ne cha'a zitu' naga dxalaj gubizra,
u tea' xechalá'a nísadau' naga dxebía gubizra,
- 10 cá'anqueze na' súalenu' neda',
ne guxru na'u xabēla neda'.
- 11 Chela gaca guna' gacu da chul-la neda',
u guna' xexaca lení' da naxechaj neda', chee
xaca na da chul-la,
- 12 da chul-la na' quebe gaca gucache na neda' lau Lue',
na' chizrela xaca na ca te zra lau'.
Túzqueze ca zaj naca da chul-la, ne xel-la' naxaní' lau Lue'.
- 13 Lue' benu' da zaj xu'u lu bēla' dxen chia'.
Lue' bzalju' neda' lu lē'e xrna'a.
- 14 Güe lál'anaqueza' Lue' lawe' da szrentē zaj naca da dxunu',
ne dxebáneda' ca zaj naca na.
Dute lázrdawa' nézquezda' caní naca na.
- 15 Blé'equenznu' neda' gate gulá' gubinna zrita xu'a,
gate na' belezraga na lu lē'e xrna'a,
gate na' bgula' lu da bagácheze na'.
- 16 Ble'enu' bēla' dxen chia' gate gulá' gubinna na.

- Xúgute da caní ba naxúaj na lu xiche chiu',
 na' ca gude na' gulá' gubinna na,
 na' xúgute na gulaca na cáteze zaj naxúaj na.
- 17 Dios, szrente zaj naca da dxuwía lazru' gunu'.
 Da zante ca zaj naca na.
- 18 Chela gaca lazra' gulaba' ca zaj naca na,
 zaj naca na ca xuzre' dxe' dxu'a tu xegu zren.
 Gate dxexebana', ne zúalequeza' Lue'.
- 19 Dios, da líqueze gutiu' benne' ca' dxelune' da calela.
 Chee le na', le gucuasa naga zua', le'e, wete benne'.
- 20 Chiu' Lue', Dios, dxelenné' dizra' schanni'.
 Benne' ca' dxeledábague' lue' dxuluzétaje' Lau' lu da xálaze.
- 21 Xrana' Dios, dxecuída' benne' ca' dxuluzúe' Lue'
 chalá'ala,
 ne dxezrá'li'a benne' ca' dxeledábague' Lue'.
- 22 Dute lázrdawa' dxecuída' benne' ca'.
 Dxéqueda' benne' ca' ca benne' ca' dxeledábague'
 nédaqueza'.
- 23 Gunná' xanne' neda', Dios, ne gunná' da xu'u na lázrdawa'.
 Bxue neda' chee nézenu' da xu'u lu xichaj lázrdawa'.
- 24 Gunná' che zúale tu da calela neda',
 na' bsi neda' lu neza chawe' chiu' da zeajlí canna.

Salmo 140

- 1 Xrana' Dios, bselá neda' lu na' benne' ca' dxelune' da calela.
 Bxue neda' chee quebe bi xelún benne' xichaj zra'a ca'
 chia' neda'.
- 2 Benne' caní dxuluwía lazre' da calela ca' da xelune'.
 Tu zra tu zra dxulutíl-lalene' bénneache.
- 3 Da dxelenné' naca na ca lazxa bela' da zaj nalále'e.
 Xrtizra' benne' ca' zaj naca na ca nisa snia chee bela'.
- 4 Xrana' Dios, bxue neda' chee quebe bi xelún benne' ca'
 dxelune' da calela chia' neda'.
 Bselá neda' lu na' benne' xichaj zra'a ca',
 benne' ca' dxelune' ba xuzre cheajcházia'.
- 5 Benne' ca' dxulucá'ana szren cuine' zaj nabeque'
 tu da queł-la na neda'.
 Ba zaj nuzale' xralaj dxu'a neza.
 Ba zaj nabeque' da ca' xelel-la na neda'.

- 6 Gucha' Xrana' Dios: Lue' nacu' Dios chia'.
Xrana' Dios, bene chi'a dxuláwizra' Lue'.
- 7 Xrana' Dios, nacu' weselá chia'.
Lue' bcu'uju' xíchaja' lu zra guca wedil-la.
- 8 Xran, quebe gu'u lataj gaca ca da dxelezá lazre' benne' ca'
dxelune' da calela.
Quebe gu'u lataj chepe ban da dxuluwía lazre' xelune',
chee quebe xulucá'ana szren cuine'.
- 9 Zaj naxechaj benne' ca' dxelune' da calela neda'.
Ben gaca chee benne' ca' ca de' da dxelaca lazre' gaca
chee benne' xula.
- 10 Ben xexruj xi' lawe' benne' ca'.
Bzra benne' ca' lu xi'.
Bzra benne' ca' lu da sítujle'e naga cabátadxa xelexedxúaje'.
- 11 Quebe gu'u lataj xegá'ana lu xezr la xu bénnea' dxenné'
da calela.
Ben gaca da calela chee benne' xichaj zra'a, da guzría xi na
le'.
- 12 Nezda' xechébe Xránadxu Dios waláz chee benne' baxache',
ne guzé chache' da zaj xu'u lu na' benne' xache' ca'.
- 13 Da líqueze benne' xrlátaje ca' xelúe lá'ane' Lau' Lue',
na' benne' li lazre' ca' xelezúe' naga zu' Lue'.

Salmo 141

- 1 Xrana' Dios, dxuláwizra' Lue'.
Gudázega gácalenu' neda'.
Bene chi'a gate nnia' Lue'.
- 2 Ben la' da dxenaba' lau Lue' ca zren xala.
Ble'e na'a da dxechisa' lau' ca tu béadau' dxútia'-ba' lau'.
- 3 Xrana' Dios, bxue dxu'a nigá,
ne bxue xide dxu'a chee quebe nnia' tu da calela.
- 4 Quebe gu'u lataj gaca lazra' guna' tu da calela,
ne chee quebe guna' tu da calela tu zren nen benne' ca'
dxelune' da zrinnaj,
ne chee quebe gágulena' benne' ca' dxelune' da calela
lu laní chee'.
- 5 Che gudé benne' xrlátaje neda' lu da ba xa', gaca na chia'
tu da chawe',
na' che til-le' neda', gaca na chia' ca tu da dxelále'e zixre

- da dxegu'e xíchaja'.
 Tu nábazqueza' Dios guzague' da caleļa da dxelún benne'
 ca'
 dxelune' da caleļa.
- 6 Gate xeledxú'une' benne' xíchaje ca' chee benne'
 wen da caleļa ca' zran xi'a xiaj ca',
 na' xeleque be'e bénneache naca li ca da gunnía'.
- 7 Xelase dinnaj zrita chee benne' ca' dxu'a xedxu ba chee' ca'.
 Xelaca na ca bhecu xu, da dxelase dinnaj na naga
 dxa'ana bezre.
- 8 Chee le na' dxenná'a naga zu' Lue', Xrana' Dios.
 Dxuxrén lazra' Lue', quebe gusán lazru' neda'.
- 9 Bxue neda' chee quebe xelel-la xralaj ca' chee benne' ca'
 dxelune' da caleļa neda',
 ne chee quebe cheajcházia' lu da zaj nabeque' benne'
 wen da caleļa ca'.
- 10 Ben cheajlechaze benne' ca' dxelune' da caleļa lu xralaj
 da zaj nabéchequeze'
 dxácatē na' tea' neda' ga na' zri'a chawe'.

Salmo 142

- 1 Zizraj dxuláwizra' Xránadxu Dios.
 Du lazra' dxenaba' Xránadxu xexache lazre' neda'.
- 2 Lau Le' dxawa' zría ca da dxaca chia'.
 Lau Le' dxulé'eda' ca da stebe zua' neda'.
- 3 Gate zua lázrdawa' lu da stebe, Lue', Xran, nézenu'
 da dxaca chia'.
 La neza naga dxedá' gulebeque' xralaj da queļ-la na neda'.
- 4 Dxenná'a cuita' xabeļa, san quebe nu chilá' gácale neda'.
 Quebe nu chilá', benne' guxúequeze' neda'.
 Quebe nu chilá', benne' dxe' gunna xue' chia' neda'.
- 5 Dxuláwizra' Lue', Xrana' Dios, dxennia':
 Dxebeza lazra' tuzu' Lue'.
 Tuzu' Lue' dxezá lazra' lu xezr la xu nigá.
- 6 Bene da dxuláwizra' Lue', lawe' da dxezaca zí'le'a.
 Bselá neda' lu na' benne' ca' dxeláu zi' xuzre' neda',
 lawe' da zaj naque' wál-ladxa ca neda'.
- 7 Bebéaj neda' lu da dxaca chia', chee gaca güe lá'ana' Lue'.

Benne' xrlátaje ca' xeléchaje' neda' lawe' da gunu' gaca
chawe' chia'.

Salmo 143

- ¹ Xrana' Dios, bene da dxuchálaja' lau Lue'.
Bze naga da dxenaba' lau'.
Gudá gácalenu' neda' lawe' da nacu' li lazre', ne xrlátaje.
- ² Quebe guchi'u chia' neda', wen zrin chiu',
ca naca da nabaga',
lawe' da lau' Lue' quebe nu chilá' benne' naque' du lazre'.
- ³ Gúcale neda' lawe' da dxeláu zi' xuzre' neda'.
Xeláteze bache xelútię' neda'.
Ba belunę' naca' ca tu benne' dxedé' lu da chul-la
ca naca cheę benne' gate ca'.
- ⁴ Zua lázrdawa' lu da stébele'e, ne dxewí'ine lázrele'a.
- ⁵ Dxeajsá lazra' ca guca nédxudaute.
Dxulaba lazra' ca naca xúgutę da benu'.
Dxeajsá lazra' ca naca da zrentę ca' da benu'.
- ⁶ Dxechisa na'a lau Lue'.
Naca' ca tu xezr la xu bizre, dxebíleda' Lué'queze.
- ⁷ Gudázega gácalenu' neda', Xran, lawe' da dxedú lazra'.
Quebe chenu' gácalenu' neda', cheę quebe gaca' ca tu
benne'
ba xu'e xedxu ba.
- ⁸ Che zílala ben cheajsá lazra' dxexache lazru' bénneache
chiu' ca'
lawe' da dxuxrén lázrequeza' Lue'.
Bzėjajni'i neda' ca dxal-la' guna'
lawe' da dxezá lazra' guna' da dxaca lazru' Lue'.
- ⁹ Xrana' Dios, bselá neda' lu na' benne' ca' dxeledábague'
neda'
lawe' da dxuzúa cuína' lu na'u cheę guxúequezu' neda'.
- ¹⁰ Bsede neda' cheę guna' da dxaca lazru' Lue',
lawe' da nacu' Lue' Dios chia'.
Gusel-la Be' xrlátaje chiu' cheę che'e neda' la neza chawe'
chiu'.
- ¹¹ Cheę gaca bea na nacu' xrlátaje, Xran, gutipu' lazra'.
Lawe' da nacu' xrlátaje, guseláu' neda' lu da dxaca chia'.
- ¹² Lawe' da nacu' li lazre', guzría xi'u benne' ca'

dxeledábage' neda',
 ne guzría xi'u xúgute benne' ca' dxelaca lazre'
 xuluzría xi'e neda',
 lawe' da naca' neda' wen zrin chiu'.

Salmo 144

- 1 ¡Gaca ba lá'azxa Xránadxu Dios,
 Bénnea' dxuzé chache' neda'!
 Naque' Bénnea' dxuzázraje' na'a chee cha'a lu wedil-la,
 ne dxuzázraje' zrube na'a chee séqueda' tíl-lalena' benne'
 ca'
 dxelune' da calela.
- 2 Naque' Benne' dxexache lazre' neda',
 ne naque' ca tu xu'u naga ze chawa'.
 Dxuzúa chache' neda', ne dxuselé' neda'.
 Dxucu'uje' neda', na' dxuxrén lazra' Le'.
 Dxune' dxuluzúa benneache chia' dizra' chia'.
- 3 Xrana' Dios, ¿ájazra naca nu benne', dxeajsá lazru' le'?
 ¿Ájazra naca nu benne' dxe'u gunne xue chee'?
- 4 Naca benne' ca tu da níteze.
 Zaj naca zra chee' ca tu zrul-la da dxedeze.
- 5 Xrana' Dios, gusalaj zran xabáa, ne betaj gácalenu' neda'.
 Bta xi'a ca', na' dxuaj zren chee xi'.
- 6 Bzalaj xesa guziu', ne blaga benne' ca' dxelune' da calela.
 Bzalaj xaga nalá xéche'ze chiu', ne bzria xi' le'.
- 7 Naga zu' na'la, bzé na'u, ne bselá neda' lu da stébele'e zua'.
 Bselá neda' lu na' benne' zitu' ca',
- 8 benne' ca' tu dxelennézqueze' da wen lazre',
 ne dxuluzétaje' Dios gate dxelezí xe'e.
- 9 Dios, gúl-laqueza' chiu' da cube, quínnia' da dxúl-lalena'.
 Nen tu da dxínnia' da nua chi du chee na gúl-laqueza' chiu'.
- 10 Nacu' Lue' Bénnea' dxune' dxeledxúaj chawe'
 benne' wenná bea ca'.
 Dxuseláu' David, wen zrin chiu', lu xia nalá chee
 benne' wen da calela ca'.
- 11 Bexa'u neda', ne bselá neda' lu na' benne' zitu' ca',
 benne' ca' tu dxelennézqueze' da wen lazre',
 na' dxuluzétaje' Dios gate dxelezí xe'e.
- 12 Ben xelegula bi biu cheentu' ca tu xaga da dxegula chawe',

- ne zaj nácabe' bi cuide'.
 Ben xelaca bi nu'ula cheentu' ca bdu'a xiaj xrtante ca'
 da zaj nnita tu lu xu'u zren.
- 13 Ben chate lízrentu' xúgute cuen lina cheentu'.
 Ben xelánle'e be xixre' cheentu', chee xelácaba'
 gaxúa gaxúane be xixre'du ca' lu xezr la xu cheentu'.
- 14 Ben xelaca bezre cheentu' be wal-la chee xelunba' zrin.
 Ben quebe xelezanba' gate quebe ne zrin cha beu' cheeba'
 ca'.
 Ben quebe nu cha' cuezre xache' la neza cheentu'.
- 15 Ba neza zrente naca na chee bènneache ca' dxaca caní chee'.
 Ba neza zrente naca na chee bènneache ca'
 naca Xránadxu Dios chee'.

Salmo 145

- 1 ¡Gucá'ana szrena' Lue', Dios chia', ne Wenná Bea chia'!
 ¡Tu güe lá'anazqueza' Lau' Lue' chadía chacanna!
- 2 ¡Tu zra tu zra güe lá'ana' Lue'!
 ¡Tu güe lá'anazqueza' Lau' Lue' chadía chacanna!
- 3 ¡Szrente naca Xránadxu Dios, ne naca chee'
 tu güe lá'anazquezdxu Le'!
 ¡Québequeze séquedxu gúnbeadxu ca szrente naque'!
- 4 Xúgute cuen bènneache chiu' xelúe lá'ane' da benu' Lue',
 ne xuluzenne' benne' xezr la xu ca' ca naca da zrente da
 benu'.
- 5 Gulaba lazra' ca naca da xrtante chee da xabáa chee
 xel-la' szren chiu', ne ca naca da zrente da nunu'.
- 6 Xúgute bènneache xuluchálaje' ca naca xel-la' waca chee
 da zrente da nunu',
 na' neda' guzenda' le' ca naca xel-la' szren chiu'.
- 7 Xuluzenne' le sa' ljwezre' ca naca xel-la' zri'i lazre' zren
 chiu',
 ne tu xelúl-lazqueze' chee da xrlátaje da nacu' Lue'.
- 8 Xránadxu Dios naque' zri'i lazre', ne dxexache lazre'
 bènneache chee'.
 Dxezrene', ne quebe dxezrá'aze', na' dxexache lázrele'e
 dxi'u.

- 9 Dxun Xránadxu Dios da chawe' chee xúgute bēneache, ne dxexache lazre' xúgute da zaj naca ban da nune'.
- 10 Xúgute da ca' nunu' xelúe lá'ana na Lue', Xran, na' bēneache chiu' xulucá'ana szrene' Lue'.
- 11 Dxelenné' ca szrente naca xel-la' dxenná bea chiu'. Dxuluchálaje' ca naca xel-la' waca zrente chiu',
- 12 chee xuluzenne' xúgute bēneache ca naca da zrente ca' da nunu',
ne ca naca da xabáa chee xel-la' szren chee xel-la' dxenná bea chiu'.
- 13 Xel-la' dxenná bea chiu' tu súazqueze na, ne nna be'enu' xúgute cuen bēneache.
- 14 Nuxru Xránadxu Dios xúgute benne' ca' dxeajlecházie', ne dxexiche' xúgute benne' ca' zaj nada'u lu zrin wal-la.
- 15 Xúgute bēneache dxelenné'e Lue' chee gácalenu' le', na' Lue' gunézruju' da xelawe' ca zrin zra chee na.
- 16 Dxuzé na'u, ne dxunézruju' ca naca da chawe' da dxelexárje xúgute da zaj naca ban.
- 17 Xlátaje naca Xránadxu Dios lu xúgute da dxune', ne dxexache lazre' xúgute da zaj naca ban da nun Le'.
- 18 Xránadxu Dios zúatequeze' gácalene' xúgute benne' ca' dxululáwizre' Le',
xúgute benne' ca' du lazre' dxululáwizre' Le'.
- 19 Guné' ca dxelezá lazre' benne' ca' dxelezrebe' Le'. Cá'anqueze xenne' chee' gate xululáwizre' Le', ne guselé' benne' ca'.
- 20 Xránadxu Dios dxuxúequeze' xúgute benne' ca' zaj nazrí'ine' Le',
san guzría xi'e xúgute benne' ca' dxelebéaj xíchaje' Le'.
- 21 Du lazra' güe lá'ana' Xránadxu Dios. Xúgute benne' dxal-la' tu xelúe lá'anazqueze' Le' lá'azxa chadía chacanna.

Salmo 146

1 ¡Gaca ba lá'azxa Xránadxu Dios!

- ¡Du lazra' güe lá'ana' Xránadxu Dios!
 2 ¡Dxácatē naca bana' güe lá'ana' Xránadxu Dios!
 ¡Tu gúl-lazqueza' da güe lá'ana' Xránadxu Dios dxácatē
 naca bana'!
- 3 Quebe guxrén lázrele benne' dxelenná bea,
 ne quegá bēnneache lawe' da quebe xezezéqueñē'
 xuluselé' le'e.
- 4 Dxeledxúaj be' zaj xu'e, na' xelexexaque' xu xrte.
 Lu zra ná'queze xelenite da dxuluwía lazre' xelune'.
- 5 Ba neza zrente naca na chee bēnnea', dxácale Dios chee
 Jacob le',
 bēnnea' dxebeza lazre' Xránadxu Dios.
- 6 Dios na' bene' xabáa, ne xezr la xu, ne nísadau',
 ne xúgute da zaj zra' lataj ca'.
 Naque' Bēnnea' tu dxúnzqueze' da li lazre'.
- 7 Dxuchi'e chee benne' baxache' ca',
 ne dxugawe' benne' ca' dxeledune'.
 Xránadxu Dios dxuselé' benne' ca' zaj nada'u lu na'
 benne' ca'.
- 8 Xránadxu Dios dxexunē' xiaj lau benne' la chul-la ca'.
 Xránadxu Dios dxechise' benne' ca' dxeajlecházíe'.
 Xránadxu Dios nazrí'ine' benne' xrlátaje ca'.
- 9 Xránadxu Dios dxuxúe' benne' zitu' ca'.
 Nuxre' bidau' wezebe ca', ne nu'ula tuze ca',
 na' dxuchínnaje' da dxelún benne' ca' dxelunē' da calēla.
- 10 Tu nna béazqueze Xránadxu Dios.
 Le'e, benne' xezre Sión, nna be'e Dios cheeje
 ne xúgute cuen zri'ine zre súale.
- ¡Gaca ba lá'azxa Xránadxu Dios!

Salmo 147

- 1 ¡Le güe lá'ana Xránadxu Dios lawe' da naca chawe'
 gúl-ladxu da güe lá'anadxu Dios cheedxu,
 lawe' da xrtante naca güe lá'anadxu Le'!
- 2 Xránadxu Dios xexunē' xezre Jerusalén.
 Xequé'e benne' Israel ca' zaj zue' xezr la xu zitu' ca'.
- 3 Dxexunē' benne' ca' dxelexewí'ine lázrele'e,
 ne dxudé'e ladxe' naga zaj naca we' chee benne' ca'.

- 4 ¡Nézquezne' ca zaj naxán belaj ca!
 ¡Tu tu belaj ca' dxu'e la na!
- 5 ¡Szrentē naca Xránadxu Dios, ne nape' dute xel-la' waca!
 ¡Quebe bi de da quebe dxéajni'ine'!
- 6 Xránadxu Dios dxácalēne' benne' dxexruj lazre' ca',
 na' dxuzéxruje' benne' ca' dxelune' da calēla.
- 7 ¡Le gul-la da güe lá'anale Xránadxu Dios!
 ¡Le gul-la, ne le quinne da cun zríadi'i na du lau Dios
 cheedxu!
- 8 ¡Le' dxudé'e beuj ca' zran xabáa!
 ¡Le' dxesel-le' nisa xiuj lu xezr la xu!
 ¡Le' dxunē' dxelezría xíxre'du ca' lu xi'a ca'!
- 9 ¡Le' dxunézruje' da dxelagu be xixre' ca'!
 ¡Dxunézruje' da dxelagu béchajdu ca', be dxelebezre
 xa'aba'!
- 10 Da dxezaca ba lázrelēne' quebe naca na xel-la' wal-la
 chee bzrina' ca',
 ne quegá xel-la' wal-la chee bēnneache.
- 11 Dxezaca ba lázrelēne' benne' ca' dxelezrebe' Le',
 ne benne' ca' dxelebeza lazre' Le' chee xexache lazre' le'.
- 12 ¡Le güe lá'ana Xránadxu Dios, le'e zrale xezre Jerusalén!
 ¡Le güe lá'ana Dios chee, le'e zrale xezre Sión!
- 13 ¡Le' dxuzúa chúchue' dxa xu'u chee xezre chee!
 ¡Dxunē' dxaca chawe' chee benne' ca' zaj zre'e xezre chee!
- 14 ¡Dxebeque' xel-la' dxebeza zri lazre' lu xezr la xu chee!
 ¡Gúnnale'e chee zrua' chawe'!
- 15 ¡Dxusel-le' xrtizre' chee benne' ca' zaj zre'e dute xezr la xu,
 na' chadí dxaca ca da dxenné'!
- 16 ¡Dxugacue' xezr la xu bezxe' da naca na ca zrila'!
 ¡Dxuzéxruje' xrle'ela dxela ca de!
- 17 ¡Dxunē' dxelexruj xiaj bezxe' ca weaj xíajdu ca'!
 ¡Nu benne' gaca guchaga lawe' da zaga chee na?
- 18 ¡Dxenná be'e, na' dxexuna na!
 ¡Dxunē' dxaca be', na' dxexaca bezxe' na' nisa guba'u!
- 19 ¡Bzéajni'ine' Jacob ca naca xrtizre', ne bdee' xrba chee,
 ne da ca' gunná be'e lu na' benne' Israel ca'!
- 20 Quebe ne gune' caní chee xezr la xu xezícadxa ca',

na' benne' xezr la xu ca' quebe dxelexúnbe'e xrba chee'.

¡Gaca ba lá'azxa Xránadxu Dios!

Salmo 148

- 1 ¡Le güe lá'ana Xránadxu Dios!
 ¡Le güe lá'ana Xránadxu, le'e, zrale xabáa!
 ¡Le güe lá'ana Le', le'e, zrale dxala!
- 2 ¡Le güe lá'ana Le', le'e, gubáz chee xabáa chee' ca'!
 ¡Le güe lá'ana Le', le'e, benne' zante chee'!
- 3 ¡Le güe lá'ana Le', le'e, gubizra, ne beu'!
 ¡Le güe lá'ana Le', le'e, belaj dxusenile!
- 4 ¡Le güe lá'ana Le', le'e, xabáa ca',
 ne le'e, nisa zrale láwela xabáa!
- 5 ¡Le güe lá'ana La Xránadxu,
 lawe' da gunná bé'ene', na' guzúale!
- 6 ¡Bene' súa!e tu chi'ize, ne chadía chacanna!
 ¡Bzue' chee!e tu da bdxixruj be'e da quebe te chee na!
- 7 ¡Le güe lá'ana Xránadxu lu xezr la xu,
 le'e, bea zri'a zrale lu nísadau', ne xúgute nisa situj,
- 8 ne le'e, xesa guziu', ne xiaj xiuj, ne bezxe', ne beuj ca',
 ne le'e, be' bdunu' ca', dxunle ca gunná be'e!
- 9 ¡Le güe lá'ana Le', le'e, xí'adu ca', ne xí'a zri'a ca',
 ne le'e, xaga zixre ca', ne xaga cedro ca',
- 10 ne le'e, be xixre' ca', ne bea ca' dxuluxúe bèneache,
 ne le'e, be snia ca', ne be zaj zua xrila!
- 11 ¡Le güe lá'ana Le', le'e, benne' wenná bea ca', ne
 xúgute
 bèneache,
 ne le'e, benne' dxeleenná be'e, ne benne' dxuluchi'e,
- 12 ne le'e, benne' wegú' ca', ne nú'uladu ca',
 ne le'e, benne' gula ca', ne bidu ca'!
- 13 ¡Le güe lá'ana La Xránadxu!
 ¡Szrētēdxá naca La Le' ca xúgute la bèneache!
 ¡Da xabáa chee' dxulé'e lau na lu xezr la xu, ne xabáa!
- 14 ¡Le' nune' xezr chee' xezre wal-la!
 ¡Le güe lá'ana Le', le'e, bèneache chee',
 nácale zri'ine zre sua Israel!
 ¡Nácale benne' nazrí'i Le'!

¡Le güe lá'ana Xránadxu!

Salmo 149

- 1 ¡Le güe lá'ana Xránadxu Dios!
¡Le gul-la chee Xránadxu tu da cube!
¡Le güe lá'ana Le' naga zaj nazraga bënneache chee'!
- 2 ¡Le be, le'e, benne' Israel, lau Bénnea' bene' le'e!
¡Le sua xel-la' dxebé, le'e, zrale Sion, lau Bénnea' naque'
Wenná Bea cheele!
- 3 ¡Le güe lá'ana La Xránadxu, ne guxa'ale!
¡Le guchunchu xide ca', ne le quinne
da cun zríadi'i na du ca', dxue lá'anale Le'!
- 4 ¡Xránadxu Dios dxezaca ba lázrele' bënneache chee'!
¡Dxape' ba lá'ana benne' dxexruj lazre' ca', ne dxuselé' le'!
- 5 Dخال-la' xebebeze bënneache chee' lu da xabáa chee',
ne xelúl-le' duté xel-la' dxelebé du xela.
- 6 Dخال-la' xebebre xé'e, xelúe lá'ane' Dios,
zaj nu'e xia da zaj nalá dxupa la'ate,
- 7 chee xelexebéaj lazre' benne' xezr la xu ca',
ne xuludé' xel-la' zi' benne' xezre ca',
- 8 ne xuluchéaje' benne' wenná bea chee' ca' du xia,
ne benne' dxelenná be'e nen du xia,
- 9 ne xuluzría xi'e benne' ca' ca ba nun Dios gaca chee'.
Da nigá gaca na da xabáa chee bënneache chee Dios.

¡Le güe lá'ana Xránadxu!

Salmo 150

- 1 ¡Le güe lá'ana Xránadxu Dios!
¡Le güe lá'ana Xránadxu lu xudau' chee'!
¡Le güe lá'ana xel-la' waca chee' lu xabáa chee'!
- 2 ¡Le güe lá'ana Le' ca zaj naca da zren da nune'!
¡Le güe lá'ana Le' ca naca xel-la' szren chee'!
- 3 ¡Le güe lá'ana Le', gucuézrele luzu ca' da dxulucuezre'!
¡Le güe lá'ana Le', quínnele da cun zríadi'i na du,
ne da ca' dxínnele!
- 4 ¡Le güe lá'ana Le', guchúnehule xide, ne guxa'ale!
¡Le güe lá'ana Le', quínnele da cun zríadi'i na du,

ne gucuézrele bchiuj!

⁵ ¡Le güe lá'ana Le', gutíl-lale xíadu ca!

¡Le güe lá'ana Le', gutíl-lale xia zren ca!

⁶ ¡Le güe lá'ana Xránadxu, xúgutele naca banle!

¡Le güe lá'ana Xránadxu Dios!